


ღავითი სახეუტაიშვილი
სამტომეული



გამომცემლობა
„შოტა რუსთაველის სახელმწიფო უნივერსიტეტი“
ბათუმი – 2009

დავით ხახუტაიშვილი



85

დავით ხახუტაიშვილი

**შავიზღვისპირეთის ქართველური
ტომები ბერძენ-ლათინი
მწერლების სწოებით**



ცნობილი ქართველი მეცნიერისა და საზოგადო მოღვაწის, საქართველოს მეცნიერებათა აკადემიის წევრ-კორესპონდენტის, პროფ. დავით ხახუტაიშვილის შრომათა სამტომეულის I ტომში წარმოდგენილია ნაშრომი „შავიზღვისპირეთის ქართველური ტომები ბერძენ-ლათინი მწერლების ცნობებით“. მასში შესწავლილია აღმოსავლეთ და სამხრეთ-აღმოსავლეთ შავიზღვისპირეთში არსებული ვითარება ძვ. წ. IV საუკუნიდან ახ. წ. VI საუკუნემდე. ავტორი სხვადასხვა კუთხით აშუქებს კოლხურ ტომთა თავგადასავალს, კერძოდ, მათ ეთნიკურ ვინაობას, განსახლების არეალს, სამეურნეო, სოციალური, პოლიტიკური და კულტურული განვითარების საკითხებს, რაც აისახა ძველბერძნულ და ლათინურ წერილობით ტრადიციაში.

წიგნი განკუთვნილია როგორც სპეციალისტებისათვის, ასევე საქართველოს ისტორიით დაინტერესებულ მკითხველთა ფართო წრისათვის.

სამტომეულის რედაქტორი ისტორიის მეცნიერებათა დოქტორი,
პროფესორი **ნანა ხაზარაძე**

ტომის რედაქტორი აკადემიური დოქტორი, ა/პროფ
ნანა ხახუტაიშვილი

რეცენზენტი საქართველოს მეცნიერებათა აკადემიის
წევრ-კორესპონდენტი **მანანა შამილაძე**
საქართველოს მეცნიერებათა აკადემიის
აკადემიკოსი **ოთარ ჯაფარიძე**

**წიგნი გამოდის აჭარის ავტონომიური რესპუბლიკის
განათლების, კულტურისა და სპორტის სამინისტროს ფინანსური მხარდაჭერით**

ISBN 978-9941-409-40-0 (საერთო)

ISBN 978-9941-409-42-4 (I ტომი)

© გამომცემლობა „შოთა რუსთაველის სახელმწიფო უნივერსიტეტი“ – 2009

შ ი ნ ა ა რ ს ი

წინასიტყვაობა	6
შესავალი	
§1. წყაროები და ლიტერატურა	7
§2. ქართველ-ქართველური ტომები ძვ. წ. X-VII სს.-ში	17
თავი I – შავი ზღვის სანაპიროს ქართველური ტომები ძვ. წ. VI-I სს.-ში	
§1. ქართველურ ტომთა გავრცელების რაიონი შავი ზღვის სანაპიროზე	22
§2. სოციალ-ეკონომიური მდგომარეობა VI-I სს.	59
§3. პოლიტიკური მდგომარეობა ძვ. წ. VI-II სს.	114
§4. პონტოს სამეფო და კოლხეთი	123
§5. ელინისტური კულტურა და კოლხეთი	130
თავი II – შავი ზღვის სამხრეთ და სამხრეთ-აღმოსავლეთ სანაპიროს ქართველური ტომები ახ. წ. I-VI სს.	
§1. სოციალ-ეკონომიური მდგომარეობა I-IV სს.	140
§2. პოლიტიკური მდგომარეობა I-IV სს.	152
§3. ლაზიკის (ზანთა) სამეფო და მისი ადგილი საქართველოს ისტორიაში	163
ლიტერატურისა და წყაროების სია	175

წინასიტყვაობა

დ. ხახუტაიშვილის შემოქმედებაში მნიშვნელოვანი ადგილი უკავია შავი ზღვისპირეთის ქართველი და ქართველური ტომების ადრეული ისტორიისა და არქეოლოგიის საკითხებს. მეცნიერი ამ საკითხების კვლევას 1951 წლიდან შეუდგა, როცა აკად. ნ. ბერძენიშვილის წინადადებით, საკანდიდატო სადისერტაციო ნაშრომის თემად დაუმტკიცეს „შავი ზღვისპირეთის ქართველური ტომები ბერძენ-ლათინი მწერლების ცნობებით“. ეს არის პირველი შემაჯამებელი მონოგრაფია, სადაც ქართველოლოგიის განვითარების იმდროინდელი დონის შესაბამისად, შესწავლილია შავი ზღვისპირეთის ქართველურ ტომთა ეთნიკური ისტორიის, სამეურნეო და სოციალური განვითარების, საისტორიო გეოგრაფიის, ნივთიერი კულტურის მრავალი საკითხი, შესაძლებლობის ფარგლებში კრიტიკულად განხილული და შეფასებულია საეტიკური ლიტერატურა და წყაროები.

სადისერტაციო ნაშრომიდან ჩანს, რომ ავტორი მეტი დამაჯერებლობისათვის, ქართული თარგმანის პარალელურად, იყენებს შესაძლებლობას – ორიგინალში შეამოწმოს ბერძენი და ლათინი ავტორების ცალკეული მნიშვნელოვანი ცნობები. ნაშრომს, რომელზე მუშაობაც დ. ხახუტაიშვილმა 1954 წელს დაასრულა და რომლის საჯარო დაცვა 1955 წლის 22 აპრილს შედგა, ოფიციალურმა ოპონენტებმა – აკად. გ. მელიქიშვილმა და პროფ. შოთა მესხიამ მაღალი შეფასება მისცეს. სამწუხაროდ, ავტორს შემდგომში აღარ უცდია აღნიშნული მონოგრაფიის გამოქვეყნება, თუმცა გარკვეული სამეცნიერო ღირებულება მას დღესაც, ნახევარ საუკუნეზე მეტი ხნის შემდეგაც არ დაუკარგავს. ნაშრომში შესწავლილია აღმოსავლეთ და სამხრეთ-აღმოსავლეთ შავი ზღვისპირეთში არსებული ვითარება ძვ. წ. IV საუკუნიდან ახ. წ. VI საუკუნემდე. მასში ავტორი სხვადასხვა კუთხით აშუქებს კოლხურ ტომთა თავგადასავალს, კერძოდ, მათ ეთნიკურ ვინაობას, განსახლების არეალს, სამეურნეო, სოციალური, პოლიტიკური და კულტურული განვითარების საკითხებს, რაც აისახა ძველბერძნულ და ლათინურ წერილობით ტრადიციაში.

2009 წელს ქართულმა საზოგადოებრიობამ ფართოდ აღნიშნა დეაწლმოსილი მეცნიერის დაბადებიდან 85 წლისთავი. ამასთან დაკავშირებით, აჭარის ავტონომიური რესპუბლიკის მთავრობის ინიციატივით, გადაწყდა გამოიცეს მეცნიერის შრომების სამტომეულის გამოცემა.

I ტომში წარმოდგენილი ნაშრომი „შავი ზღვისპირეთის ქართველური ტომები ბერძენ-ლათინი მწერლების ცნობებით“ ქვეყნდება უცვლელად, ავტორისეული სტილის სრული დაცვით.

რედაქტორისაგან

შესავალი

§1. წყაროები და ლიტერატურა

შავი ზღვის სანაპიროს ქართველი ტომების ისტორიის მკვლევარს, ძვ. წელთაღრიცხვის VI საუკუნის შემდგომ პერიოდთან შედარებით, მრავალფეროვანი მასალა მოეპოვება როგორც წერილობითი, ისე ნივთიერი კულტურის ძეგლების სახით – შევსებული ეთნოგრაფიული და ანთროპოლოგიური მონაცემებით. უკანასკნელი რიგის მასალის ერთი ნაწილი უკვე კარგა ხანია შესულია სამეცნიერო მიმოქცევაში, ნაწილიც ელის თავის რიგს და თანდათანობით დგება საისტორიო მეცნიერების სამსახურში.

* * *

წერილობითი ცნობები შავი ზღვის სანაპიროს ქართველი ტომების შესახებ პირველად ბერძნულ მწერლობაში ჩნდება. ძველ-ბერძნული მითოლოგიისა და ლიტერატურის შესწავლა ცხადყოფს, რომ ბერძნებს შავი ზღვის სანაპიროების შესახებ ძვ. წ. IX-VII სს. მეტად ბუნდოვანი და თანაც ხშირ შემთხვევაში სხვათა მეშვეობით შენაძენი წარმოდგენა ჰქონდათ. ასეთ შუამავლად **უსლარს** ფინიკიელი ზღვაოსნები ჰყავს ნაგულისხმევი.¹ იგი ვარაუდობს, რომ შავი ზღვის სანაპიროებზე კოლონიების დაარსების პირველობის პალმა ბერძნებს კი არ უნდა ეკუთვნოდეთ, არამედ არაბერძნული წარმოშობის ტომებს, რომლებიც გაბატონებული იყვნენ ეგეოსის არქიპელაგის რაიონში ბერძნების გამოჩენამდე და ხელთ ჰქონდათ შავი ზღვის კარები.²

ძვ. წელთაღრიცხვის VI საუკუნისათვის უკვე ჩნდება პირველი კონკრეტული ცნობა შავი ზღვის სანაპიროების ტომთა შესახებ – უკვე ჩანს, რომ ბერძნები უშუალოდ გასცნობიან ამ რაიონს. მართლაც, ამ ხანაში აქ უკვე უნდა არსებულიყვნენ ბერძნული სავაჭრო ფაქტორიები. რაც უფრო ძლიერდება ბერძენთა ლტოლვა პონტოსაკენ, რასაც განსაკუთრებით ათენის საზღვაო სახელმწიფოს წარმოშობა უწყობს ხელს, მით უფრო მდიდრდება ცნობები. მეორე მხრივ, ბერძენ-სპარსელთა ომები აცნობს ბერძნებს ქართველურ ტომებს, რომლებიც აქემენიდთა ირანის მოხარკე-მოკავშირეები იყვნენ ძვ. წ. აღ. VI-V

¹ Услар П., Древнейшие сказания о Кавказе, ЗКОРГО, Тб., 1981, стр. 404-405.

² იქვე, გვ. 411-412.

საუკუნეებში და უნებლიეთ მონაწილეობას იღებენ სპარსელთა ლაშქრობებში მცირე აზიისა და ბალკანეთის ბერძნების წინააღმდეგ.

პირველი კონკრეტული ცნობა ქართველ ტომთა შესახებ *ჰეკატე მილეთელთან* გვაქვს დაცული (ძვ. წ. აღ. VI-V სს. I ნახევარი). ნაშრომები, რომელთა დაწერა მას 490 წელს დაუმთავრებია, ჩვენამდე მცირე ფრაგმენტების სახით არის მოსული (და დაცულია სტეფანე ბიზანტიელის, ამიანე მარცელინის, აპოლონ როდოსელის, სქოლიასტის და სხვათა შრომებში). ფრაგმენტებში „დედამიწის აღწერა“-დან შემონახულა ცნობები ქართული თუ ქართველური ტომების: კოლხების, მესხების, მოსინიკების, მაკრონების, კორაქსების, კოლების, ტიბარენების, ხალიბებისა და სხვათა შესახებ.³ ჰეკატე მილეთელი პირველი ლოგოგრაფოსია, რომელიც ცდილობს თავის წყაროებს (მითები, გადმოცემები და ა.შ.) კრიტიკული თვალით შეხედოს.⁴ ჰეკატეს ცნობები ქართველ ტომებზე მშრალია და შეიცავს ტომების ჩამოთვლას – ზოგჯერ ტერიტორიისა და ეთნიკური მიკუთვნებულობის აღნიშვნით.

მოთხრობითი ხასიათისა და თანაც ძვირფასი შინაარსის მქონე ცნობებს გვაწვდის V საუკუნის ისტორიკოსი, „ისტორიის მამად“ წოდებული *ჰეროდოტე* ჰალიკარნასელი (484-425 წ.წ.) ვარაუდობენ, რომ ჰეროდოტემ სხვა ქვეყანათა შორის იმოგზაურა პონტოს სანაპიროებსა და კოლხეთში, რაც აისახა კიდევ მის „ისტორიაში“. იგი წყაროდ იყენებს ზეპირ ტრადიციებს, პირად დაკვირვებებსა და წერილობით ძეგლებს (ლოგოგრაფოსები, ოფიციალური დოკუმენტები და აღწერილობანი, ეპიგრაფიკა),⁵ მაგრამ ხშირად მას მეტად სჯერა თავისი წყაროებისა და მის ნაშრომში არა ერთი ზღაპრული მონათხრობია მოცემული; იქა-აქ, სადაც მას თავისი მოგზაურობის მასალები აქვს გამოყენებული, ჩანს, რომ იგი წინასწარ აღებულ აზრს თავს ახვევდა თავის მთხრობელებს.

ცხადია, ჰეროდოტეს ცნობებს ხელალებით არ უნდა დაენდოს მკვლევარი, მაგრამ საკონტროლო წყაროების მოშველიებით ირკვევა, რომ ბევრი მისი ცნობა რეალური სინამდვილის ამსახველია და ძვირფას მასალას წარმოადგენს შავი ზღვის სანაპიროების ტომების ისტორიის, ეთნოგრაფიისა და საისტორიო გეოგრაფიის შესასწავლად. აღმოსავლურ-ქართული ტომების შესახებ, ჩანს, მას ძალიან ცოტა რამ

³ Латышев В., Известия древних писателей греческих и латинских о Скифии и Кавказе, I, СДБ, 1898 г. стр. 1-3

⁴ ყაუხჩიშვილი ს., ბერძნული ლიტერატურის ისტორია, II, თბ., 1949 წ. გვ. 34; I, თბ., 1950 წ., გვ. 454.

⁵ ყაუხჩიშვილი ს., დასახ. ნაშრ., I, გვ. 457-460.

სცოდნია. აქ მისი წყაროები ბაბილონელი ქურუმების და სპარსეთის სამეფოს ოფიციალური დოკუმენტების ცნობებით იფარგლება.

შემოწმებით ირკვევა, რომ ჰეროდოტეს ცნობები კოლხების მეურნეობის, მათი ზნე-ჩვეულებების, შეიარაღების, ტერიტორიის, პოლიტიკური მდგომარეობის და ა.შ. შესახებ რეალური ვითარების ამსახველია.

შავი ზღვის სანაპიროს ქართველ ტომებზე მდიდარი მასალაა დაცული ცნობილი ბერძენი ისტორიკოსისა და ფილოსოფოსის *ქსენოფონტის* (444-354 წწ.) ნაშრომებში, განსაკუთრებით კი „ანაბასისში“. 401 წელს ქსენოფონტი ლაშქრობაში გაყვა მცირე აზიის სატრაპკიროს მცირეს, რომელიც სამეფო ტახტს ეცილებოდა უფროს ძმას არტაქსერქსეს. 401 წელს კუნაქსასთან ბრძოლაში კიროს მცირე მოკლული იქნა და ბერძენთა დაქირავებული ლაშქარი, რომელიც მცირე აზიასა და ბალკანეთში უნდა დაბრუნებულიყო, გზამოჭრილი აღმოჩნდა, რის გამოც იგი მდ. ტიგროსს შეუყვია, ტავრეთი გადალახა და ტრაპეზუნტთან შავ ზღვაზე გავიდა, შავი ზღვის სამხრეთ სანაპიროს მიყვა და სამშობლოში დაბრუნდა. „ანაბასისი“ ამ ლაშქრობის ერთგვარი დღიურია, შედგენილი ერთ-ერთი მოლაშქრე-მეთაურის მიერ.

ბერძენთა ლაშქარმა არმენიის გავლის შემდეგ გაიარა რიგი ქართველი ტომებისა და მათი თემების ტერიტორიაზე. ნაშრომი, ძირითადად, ამ გზისა და მის სიგრძეზე ბერძენთა თავგადასავლის აღწერილობას წარმოადგენს. მასში მოვლენები ათენელი ოლიგარქის მსოფლმხედველობის პრიზმაშია გადატეხილი და იქა-აქ არც ტენდენციურობისაგანაა დაზღვეული, რაც ბერძენ მოლაშქრეთა ვაჟკაცობისა და ფიზიკურ-ინტელექტუალური ღირსების განდიდების მცდელობითაა ნაკარნახევი. სწორედ ის გარემოება, რომ აქ საქმე გვაქვს აღწერილობით მასალასთან, ზრდის „ანაბასისის“ მნიშვნელობას, როგორც ძვირფასი საისტორიო წყაროსი. მასში მკითხველი მნიშვნელოვან ცნობებს პოულობს შავი ზღვის სანაპიროებზე მცხოვრები ტომების ისტორიის, გეოგრაფიისა და ეთნოგრაფიისათვის. ქსენოფონტის გავლენა, უფრო სწორად, მისი გამოყენება წყაროდ, ბერძნულ-საისტორიო მწერლობაში თვით ბიზანტიურ ხანაშიც კი გრძელდება.⁶

ბერძენთა ცოდნა აზიის ხალხებზე განსაკუთრებით გაზარდა ალექსანდრე მაკედონელის ლაშქრობებმა აღმოსავლეთში, და ელინისტური ხანა იძლევა ისტორიკოსთა საკმაოდ ძლიერ პლედას (არისტობულე, კალისტენე, „მეფის დღიურების“ ავტორები, ერატოსთენე, პოლიბიოსი, პოსიდონიოსი, დიოდორე სიცილიელი, დიონისე ჰალიკარნასელი...),

⁶ ლიტერატურა: ყაუხჩიშვილი ს., დასახ. ნაშრ. II, გვ. 48-56; SC, I. ჯავახიშვილი ივ., ქართველი ერის ისტორია, I; მისივე, საქართველოს, კავკასიისა და ახლო აღმოსავლეთის ძირითადი ისტორიულ-ეთნოლოგიული პრობლემები, თბ., 1950.

რომელთა შრომებში იქა-აქ მოიპოვება მასალები კავკასიის ისტორიისათვის; კავკასიას ალექსანდრეს ლაშქარი არ უნახავს და რადგან ელინისტური ხანის მწერლობის ძირითადი თემა ალექსანდრეა, მასში კავკასიის შესახებ მასალა უფრო სუსტადაა წარმოდგენილი.

წინა აზიისა და შავი ზღვის სანაპიროების შესახებ ცნობების შემდგომი გამრავლება ანტიკურ ლიტერატურაში რომელთა ექსპანსიისა და იქ დამკვიდრების ხანაზე მოდის. კავკასიის შესახებ ცნობები განსაკუთრებით ძვ.წ. I საუკუნეში მრავლდება, როდესაც რომაელები ატარებენ ომების მთელ რიგს პონტოს მეფის მითრიდატეს წინააღმდეგ (სულა, ლუკული, პომპეუს დიდი). პონტოს სამეფოს ძირითადი ეთნიკური ბირთვი ქართველური იყო და მითრიდატეს ომების ისტორიკოსები ბევრ საინტერესო ცნობებს გვაწვდიან შავი ზღვის სანაპიროებისა და ამიერკავკასიის პოლიტიკურ-ეკონომიური ისტორიის, საისტორიო გეოგრაფიისა და ეთნიკური შემადგენლობის შესწავლისათვის.

ამ პერიოდის საისტორიო ლიტერატურის ყველაზე ბრწყინვალე ძეგლად *სტრაბონის* „გეოგრაფია“ გვევლინება. წარმოშობით პონტოელი ბერძენი (ქ. ამასიიდან), ისტორიკოსი და ანტიკურობის უდიდესი გეოგრაფოსი სტრაბონი (ძვ.წ. 64 – ახ.წ. 23 წ.), რომელმაც ანტიკურ ლიტერატურაში „გეოგრაფიის“ სახელწოდება დაიმსახურა, ისე როგორც *ჰომეროსმა* „პოეტისა“, განაზოგადებს იმ მასალას, რაც ელინურ და ელინისტურ ლიტერატურას დაუგროვებია ძვ.წ. I საუკუნემდე (ჩათვლით). „გეოგრაფიაში“ უძვირფასესი ცნობებია მოცემული პონტოს სანაპიროებისა და ამიერკავკასიის ხალხების შესახებ, რისთვისაც იყენებს როგორც წინააღმდეგ და მის თანამედროვე ავტორებს, ისე საისტორიო რიგის სხვა წყაროებს. სტრაბონის წყაროების ძიება – შემოწმებისა და დათარიღებისათვის მუშაობა, მიუხედავად დიდი ხნის ტრადიციისა, უახლოეს ისტორიოგრაფიაშიც გრძელდება, რადგან წყაროთა დაუდგენლად მისი ცნობების გამოყენებამ შეიძლება მკვლევარს მიუტევებელი ანაქრონისტული თუ სხვა ხასიათის შეცდომა ჩაადენინოს.⁷ თავის წყაროებს სტრაბონი კრიტიკულად ეკიდება და ცდილობს საბუთების მოტანით მკითხველიც დაარწმუნოს, თუ რატომ აძლევს უპირატესობას ერთ წყაროს მეორის წინაშე. უმრავლეს შემთხვევაში იგი თავის წყაროებს ასახელებს კიდევაც. სტრაბონი თავის შრომაში მიზნად ისახავს მოგვცეს გეოგრაფიული მასალა, მაგრამ გზადაგზა იძლევა ცნობებს ისტორიის, ეთნოგრაფიის, მეურნეობის, აღებმცემობის, მშენებლობის, სოციალური მდგომარეობის, ტანსაცმლის, ეთნიკური მიკუთვნებულობის, ტერიტორიული გაგრძელების და სხვათა შესახებ.

⁷ ყაუხჩიშვილი ს., ბერძნული ლიტერატურის ისტორია, II, თბ., 1949 წ., გვ. 191-192.

სტრაბონის ცნობები განსაკუთრებით მდიდარია და სანდო შავი ზღვის სამხრეთ სანაპიროების შესახებ. ეს გასაგებიცაა – იგი ხომ პონტოს ამასიიდანაა.⁸

რომაელთა ხანის საისტორიო მწერლობის ჩვენთვის საინტერესო ავტორების ასეთი ზოგადი გაცნობაც კი, ალბათ, რამდენიმე ათეულ გვერდს დაიკავებდა, რისი გადმოცემის საჭიროებასაც, წყაროთმცოდნეობითი ლიტერატურის ეხლანდელი დონის პირობებში, აქ ვერ ვხედავთ და ამიტომ მხოლოდ შემდგომი ავტორების, ისიც წამყვანის, ჩამოთვლით დავკმაყოფილდებით. ესენია: პლინი სეკუნდი, პომპონი მელა, ოვიდი ნაზონი, კორნელი ტაციტუსი, იოსებ ფლავიუსი, პლუტარქე, არიანე, დიონ კასიოსი, დიონისე, კლავდი პტოლემეაიოსი, ამიანე მარცელინი, პრისპე პანიონელი და სხვები. ამ ჯგუფიდან შეიძლება ცალკე გამოიყოს ფლავიუს არიანე (ახ. წ. II ს.) მისი ცნობილი „Περὶ πόντου“-ით, რომელიც ზოგი მკვლევარის აზრით 134 წელსაა დაწერილი (ვ. ლატიშევი, ივ. ჯავახიშვილი, ს. ჯანაშია), ზოგისაც კი – 131 წელს. იგი წარმოადგენს ოფიციალურ მოხსენებას, რომელსაც რომის იმპერატორს უგზავნიან მისი მცირეაზიელი მოხელე პონტოს სამხრეთ-აღმოსავლეთ და აღმოსავლეთ სანაპიროს შემოვლის შემდეგ. არიანეს ცნობები ფასდაუდებელია როგორც საისტორიო გეოგრაფიისათვის, ისე პოლიტიკური, ეკონომიური და სოციალური მდგომარეობის გათვალისწინებისათვის. ამასთან, იგი საშუალებას იძლევა შევსებული იქნას იმ ხანის ეთნიკური რუკა.

ძვირფასი ცნობები აქვს დაცული ჩვენთვის საინტერესო ტომებზე ბიზანტიელ ავტორებს. ამ მხრივ განსაკუთრებით პროკოპი კესარიელი, აგათია სქოლასტიკოსი, მენანდრე პროტიქტორი, თეოფანე ბიზანტიელი, იოანე მალალა, და „პასქალური ქრონიკის“ ავტორი უნდა გამოიყოს. პროკოპი კესარიელი (ავტორი შრომებისა: 1. De bello perrisico, 2. De bello vandalico, 3. De bello gothico, 4. De aedificiis, 5. Arcana historia) VI საუკუნის მწერალია. მის შრომებში დაცულია უძვირფასესი ცნობები შავი ზღვის სანაპიროს ქართველ ტომებზე. მისი ცნობები მით უფრო ძვირფასია, რომ მას თავისი სამსახურებრივი მდგომარეობის მეოხებით, ხელი მიუწვდებოდა ბიზანტიელი მეფეების არქივზე და საშუალება ჰქონდა იმპერიის საგარეო და საშინაო პოლიტიკის კურსში ყოფილიყო. თავისი შრომების დაწერისას იგი იყენებს როგორც საარქივო მასალებს, ისე პირად დაკვირვებებს, რომაელთა ჯარების სარდლების მოხსენებებს და წინარე ხანის ავტორთა შრომებს. იგივე შეიძლება ითქვას აგათია სქოლასტიკოსისა და მის შრომაზე

⁸ ჯანაშია ს., პარიადრი, სკიდასი, მოსხური მთები, შრომები, II, თბ., 1952 წ. გვ. 268-269.

(Περὶ Ἰουστινιανοῦ βασιλείᾳ). აგათიას თავისი შრომის დაწერისას დამატებით სპარსული არქივების მასალებიც გამოუყენებია (IV, 30). იგი პროკოპის უმცროსი თანამედროვეა და თავისი შრომით აგრძელებს მას. წყაროებზე (საარქივო მასალები, ელჩების მოხსენებები) ჩანს აგებული მენანდრეს შრომაც, რომელიც აგათიას აგრძელებს და მისი უმცროსი თანამედროვეა.

ჩვენს მიერ ზემოთ მითითებული ბიზანტიელი ავტორები, VI საუკუნის ლაზიკის ისტორიის შესწავლისათვის ძირითად წყაროს წარმოადგენენ. მათთან ვპოულობთ მასალებს როგორც საისტორიო გეოგრაფიისა და ეთნოგრაფიისათვის, ისე პოლიტიკური და სოციალურ-ეკონომიური ისტორიისათვის.

* * *

მიუხედავად წერილობითი წყაროების რაოდენობრივი სიუხვისა და ავტორების მრავალრიცხოვნებისა, მათი შინაარსობრივი მხარე იმდენად მწირია, რომ მათი მეშვეობით შავი ზღვის სანაპიროების ქართველ ტომთა ჩვენთვის საინტერესო ხანის ისტორიის გათვალისწინება, შეიძლება თამამად ითქვას, მიახლოებითაც კი შეუძლებელია. ნაწყვეტობა და სიმშრალე, უპერსპექტივობა, წყაროების მიუთითებლობა, ძველი ავტორების დამახინჯებული რედაქტირება, წყაროების ხელალებით გამოყენება – აი, ანტიკური ლიტერატურის იმ ძეგლთა უმრავლესობის დამახასიათებლობანი, რომელშიც მკვლევარმა შეიძლება ქართველ ტომთა შესახებ მასალა მონახოს.

საბედნიეროდ, დღეისათვის მკვლევარი მარტო წერილობითი წყაროების ამარა არ არის დარჩენილი. ქართული არქეოლოგიის უკანასკნელი პერიოდის მიღწევებმა მას ხელთ მისცა კოლხიდის *მატერიალური კულტურის* ძეგლთა დიდად მრავალფეროვანი და მრავალისმეტყველი კოლექციები, რომლებიც გადამწყვეტი მნიშვნელობისანი არიან, როგორც საისტორიო წყაროები. ამ ძეგლების სამეცნიერო მიმოქცევაში შეყვანამ ბევრი, წინათ „ურყევ ჭეშმარიტებად“ აღიარებული დებულება გააცუდა და კიდევ მეტი ახლად ან ახლებურად დააყენა. სამწუხაროდ, უნდა ითქვას, რომ მოპოვებული მასალის საკმაოდ დიდი ნაწილი ჯერაც არაა დამუშავებული და სამეცნიერო მიმოქცევაში შეტანილი, დამუშავებულ-გამოქვეყნებულთაგანაც ნაწილი მანკიერი მეთოდოლოგიური ხერხების გამოყენებითაა „შესწავლილი“. ეს განსაკუთრებით იმ ავტორთა ნაშრომებში იგრძნობა, რომლებიც კოლხიდის

ნივთიერი კულტურის მასალებს ქართველთმცოდნეობისაგან მოწყვეტილად იხილავენ.⁹

ჩვენ არაფერს ვამბობთ რეკოლუციამდელ არქეოლოგთა შრომებზე, რადგან ეს ავტორები, ორიოდ გამონაკლისის გარდა, უცხონი იყვნენ არა მარტო ეროვნულად, არამედ ისინი შორს იდგნენ ქართველთმცოდნეობის მართებული გაგებისაგანაც, ურომლისოდაც, ცხადია, ქართული ნივთიერი კულტურის ძეგლების ნამდვილი მეცნიერული ანალიზი წარმოუდგენელია.¹⁰

დასავლეთ საქართველოს (კოლხეთის) არქეოლოგიური შესწავლა XIX საუკუნის მეორე ნახევარში დაიწყო, ძირითადად, არაქართველი არქეოლოგების მიერ, მაგრამ ფართო გაქანება მან XX საუკუნის 20-იან წლების შემდეგ მიიღო, როცა გამოიზარდა წარსულის მკვლევართა, ქართველმცოდნე ისტორიკოსთა, არქეოლოგთა, ენათმეცნიერთა, ეთნოგრაფთა და ა.შ. მთელი პლეადა, რომელმაც მიზნად დაისახა შეექმნა და ხალხის კუთვნილებად ექცია ქართველი ხალხის წარსულის ცოდნა.

კოლხეთის არქეოლოგიური შესწავლა ამ დანასაქმის ერთი საპატიო ნაწილია. ადრევე იგრძნობოდა, რომ კოლხეთის არქეოლოგიურ შემსწავლელს უხვი სამკალი მოელოდა. მართლაც, ჯერ „ენიმკის“, ხოლო შემდეგ ივ. ჯავახიშვილის სახელობის ისტორიის ინსტიტუტის ექსპედიციებმა ს. ჯანაშიას, ნ. ბერძენიშვილის, გ. ნიორაძის, ა. იესენის, გ. გობეჯიშვილის, ნ. ხოშტარიას, ა. აფაქიძის და სხვათა ხელმძღვანელობა-მონაწილეობით, ძველი კოლხეთის მრავალრიცხოვანი ძეგლები გამოავლინეს და შეისწავლეს, რომლებიც ეთნოლოგიურად ადამიანის განვითარების თითქმის ყველა საფეხურს წვდებიან. დაბლაგომის, ეშერის, სოხუმის, ოჩამჩირის, ვანის, რაჭის, ქუთაისის რაიონის, კლდეეთის, ურეკის, ვაშნარის, დევის ზვრელის, საგვარჯილეს გამოქვაბულის და სხვა ადგილების არქეოლოგიურმა გათხრებმა მოგვცა ქვის, სპილენძის, ბრინჯაოსა და რკინის ხანის ნივთიერი კულტურის ძვირფასი კოლექციები. მათში საკმაოდაა წარმოდგენილი ანტიკური და ადრეხანტიური ხანის მასალაც (საერთოდ, ჯერჯერობით, ძეგლების მხოლოდ მცირე ნაწილია შესწავლილი... მხოლოდ 1952 წელს დაიწყო ბერძნული სავაჭრო კოლონიების კოლხური ჯგუფის შესწავლა (ბიჭვინთის გათხრები). ხოლო მდ. ჭოროხს იქით მდებარე ნაწილს კოლხეთისა და ტიბარენული ხალხების ადგილსაც-

⁹ Апакидзе А., Гобеджишвили Г., Каландадзе А., Ломтатидзе Г., Против маровщины и космополитизма в археологии Грузии, газ. «Заря Востока», 1952 г., 19, VI, (№144).

¹⁰ ბერძენიშვილი ნ., ქართული საბჭოთა არქეოლოგიის ზოგიერთი პრინციპული საკითხისათვის, „მომხილველი“, II, თბ., 1951, გვ. 337-347.

ხოვრისს ჯერ ნამდვილი არქეოლოგიური გათხრები არ ღირსებია,¹¹ რაც ამ ტერიტორიის საქართველოს გარეთ მდებარეობით არის გამოწვეული). აქ გვხვდება: სამეურნეო მდგომარეობის შესასწავლად – ცულები, თოხები, წაღლები, სასხლავი დანები, ნამგლები, სატეხები, ქვევრები, ხელსაფქვავეები, ცხოველთა ძვლები, ცხენის აკაზმულობანი, კარაქის საღებავები, აგური, კრამიტი, ხის შენობათა ნაშთები, წყალსადენები, მარმარილოსა და ქვის გათლილი ფილები და კვადრები – კედლებად და მოსაპირკეთებლად, მალარობი, მადნის სადნობი ლუმელები, ჩასასხმელი ყალიბები, ლითონის ფულები, მადნის სამტვრევი უროები, საოჯახოდ სახმარი ინვენტარი – ღოჭები, ხელაღები, ქოთნები, თეფშები, თასები, ჭრაქები, ხელსაბანი ტაშტები, საღვინე სურები; საბრძოლო ტექნიკისათვის: ხმლები, საომარი ცულები, ხანჯლები, შუბისა და ისრის წვერები, აკინაკები, ლახტის თავები და ა.შ. სამკაულებისა და ტანსაცმლისათვის – ქსოვილთა ნაშთები, სარტყლის ბალთები, საკიბები (ფიბულები), საავგაროზენი, ბეჭდები (ძვირფას გემიანებიც), საყურეები, სამაჯურები, ყელსაბამები (მასიური და მძივებიანი), დიადემები და ა.შ. აღებშიცემობისათვის: ადგილობრივი და უცხოური მონეტები, უცხო წარმოშობის ნივთები (ეგვიპტური სკარაბეი, ბერძნული ამფორები, ქარვა, მარმარილო და რიგი სხვა, რომელთა აღნუსხვისათვის აქ ვერ შევჩერდებით); კოლხური წარმოშობის ნივთები გვხვდება არა მარტო დასავლეთ საქართველოს ტერიტორიაზე, არამედ ჩრდ. კავკასიაში, ყირიმში, იბერიაში, შავი ზღვის სამხრეთ სანაპიროებზე და ა.შ.

მრავალფეროვანია ის მასალა, რომელსაც იმდროინდელი საზოგადოება იყენებს: ოქრო, ვერცხლი, სპილენძი, ბრინჯაო, რკინა-ფოლადი; თიხა, ქვის სხვადასხვა ჯიში (მარმარილო, ჭადაქვა, კონგლომერანტი, წყლის ტუფი, კირი...), მინა, ქარვა, გიშერი, ლაზური, პასტა, აქატი, ლალი და ა.შ. წარმოების ხელოვნებას უკვე დიდი ტრადიცია აქვს – გრავიურა, ფილიგრანი, მოოჭვა, სევადა და ა.შ. ამ პერიოდში უფრო იხვეწება, წინაურდება, იძენს ახალ ხერხებს.

მოპოვებული მასალა, განსაკუთრებით ნეკროპოლებიდან, ზრდის ჩვენ ცოდნას იმდროინდელი საზოგადოების წარმოდგენებზე. დადასტურებულია დამარხვის რამდენიმე წესის არსებობა (ჩვეულებრივი, „მეორადი“, კრემაციით...), მრავალგვარია თვით სამარხთა ხასიათიც (ურნები, ქვა-ყუთები, ქვევრ-სამარხები, სარკოფაგები, აგურ-ყუთები, გრუნტული, დოლმენების შემდგომი გამოყენება და ა.შ.). სამარხების ინვენტარი გვისურათებს ამ ხანის ადამიანის ავლადიდებას და გვაცნობს მის წარმოდგენებს საიქიო ცხოვრებაზე.

¹¹ Максимова М., О выходе хеттов на южный берег черного моря, ВДИ, 1948, №4, стр. 26.

ჩვენთვის საინტერესო პერიოდის ნივთიერი კულტურის შესწავლამ ქართველთმცოდნეობას შეაძლებინა ხაზი გაესვა წინარე ხანის ორი კულტურული წრის შემდგომი, უკვე საბოლოო, დაახლოებისათვის. მათ შორის დამახასიათებელი განსხვავებანი ქრება და უკვე ისახება საწყისები იმ ერთიანობისა, რომლის შესახებ გიორგი მერჩულე (X ს.) წერდა: „ქართლად ფრიადი ქვეყანაა აღირაცხების, რომელსაცა შინა ქართულითა ენითა ჟამი შეიწირვის და ლოცვად ყოველი აღესრულებს“.

კოლხიდის არქეოლოგიურმა შესწავლამ ბევრი შესძინა ქართველთმცოდნეობას, უდავოა, იგი მომავალში კიდევ მეტს შემატებს მას, რაც ბევრ ახალ დებულებას წამოაყენებს და უკვე დადგენილ უფრო საბუთიანს გახდის.

* * *

ლიტერატურა: შავი ზღვის სანაპიროზე მოსახლე ქართველი ტომების წარსულის ამა თუ იმ საკითხს, გაკვრითა თუ სპეციალურად, მრავალი მკვლევარი შეხებიან, მაგრამ, მცირე გამონაკლისს გარდა, მთავარი ყურადღება საისტორიო გეოგრაფიის საკითხების ძიებას ექცეოდა. ეს გარემოება გამოწვეული იყო როგორც ძიების ხერხების მანკიერებით, ისე წყაროების თავისებურებებით. უკანასკნელნი ძირითადად საისტორიო გეოგრაფიის შესწავლისათვის საჭირო მასალას იძლევიან, ხოლო ტომების სოციალ-ეკონომიური მდგომარეობის სურათი მათში მეტად სუსტად ან სრულებით არ არის წარმოდგენილი.

ბერძენ-ლათინი მწერლების ცნობების გამოყენების პირველი ცდები ქართულ ისტორიოგრაფიაში შუა საუკუნეებში გვაქვს დადასტურებული. ამ პერიოდის უდიდეს წარმომადგენლებად ვახუშტი და თეიმურაზ ბატონიშვილი უნდა ვაღიაროთ.

ჩვენთვის საინტერესო ტომების ისტორიაზე უმუშავიათ როგორც ქართველებს, ისე რუსებსა და ევროპელებს.

XIX საუკუნის პირველ ნახევარში ევროპელები პირველობენ. შავი ზღვის სანაპიროებს სწავლობენ მეცნიერების სხვადასხვა დარგის წარმომადგენლები. ამ პერიოდის ყველაზე დიდი ფიგურაა ფრანგი მეცნიერი **დიუბუა დე მომპერე**, რომელმაც თავის ნ-ტომიან ნაშრომში თავი მოუყარა ყირიმსა და კავკასიაში თავისი მოგზაურობის მასალებს.

XIX საუკუნე და XX საუკუნის დამდეგი იცნობს ევროპელთა მთელ რიგს, რომლებმაც მცირე წვლილი როდი შეიტანეს ქართველი ტომების ისტორიის შესწავლაში. მათ შორის პირველ რიგში უნდა დასახელებულ იქნას **მარი ბროსე**, რომელმაც თავისი სამეცნიერო მოღვაწეობის დიდი ნაწილი საქართველოს ისტორიის შესწავლას

შესწირა. ამავე პერიოდში მოღვაწეობენ: *სენ მარტენი, ლემან-ჰაუპტი, კონი, კიპერტი, ფორერი, ჰროვნი, გელცერი, ჰამილტონი, დე-მორვანი* და სხვები.

დიდია რუსი მკვლევარების ღვაწლი. ამ მხრივ ცალკე უნდა გამოიყოს *ლ. ლატიშევი*, რომელმაც ორტომიან კრებულში თავი მოუყარა ბერძნულ და რომაულ ლიტერატურაში სკვითიასა და კავკასიაზე დაცულ ძირითად ცნობებს. უნდა აღინიშნოს, რომ მსგავსი ხასიათის კრებული, მართალია, დიდი ნაკლოვანებებით, კავკასიის შესახებ პირველად შეადგინა და გამოსცა *კ. განმა*. მაგრამ ამ კრებულს არ ახლავს ორიგინალის ტექსტები და მისი სამეცნიერო ღირებულება ამის გამოც მეტად დაბალია.

შავი ზღვის სანაპიროს ტომების ისტორიის ცალკეულ საკითხებს სპეციალურად თუ გაკვრით ეხებიან რუსი მკვლევარები და მოგზაურები: უსლარი, ბრუნი, უვაროვები, კულაკოვსკი, თ. უსპენსკი, ლატიშევი, ალბოვი, პავლინოვი, სიზოვი, კოვალევსკი, როსტოვცევი, ორბელი, ყებელევი, პახომოვი, ზოგრაფი, მაქსიმოვა და სხვები.

XIX საუკუნის რუს მკვლევართაგან ცალკე უნდა გამოიყოს *კ. უსლარი*, რომელმაც მთელი თავისი სამეცნიერო მოღვაწეობა კავკასიური ენებისა და კავკასიის ხალხების ისტორიის შესწავლაში გაატარა. მის შრომებში გამოთქმული რიგი დებულებები დღესაც არ არის მოკლებული სამეცნიერო ინტერესს და ახალ-ახალ დასაბუთებებს პოულობენ. მისი ერთ-ერთი კაპიტალური ნაშრომის დიდი ნაწილი სწორედ შავი ზღვის სანაპიროს ქართველი ტომების ისტორიის საკითხებისადმი მიძღვნილი.

იმის გამო, რომ ქართველი ტომების წარსულის შესწავლა უმრავლესობა რუსი და უცხოელი მკვლევარების მიერ ქართველთმცოდნეობის უგულებელყოფის (შევნებული თუ შეუგნებელი) პირობებში მიმდინარეობდა, ქართულმა საბჭოთა ისტორიოგრაფიამ უარყო მათ მიერ არჩეული გზა და ისტორიის ქართველთმცოდნეობის სხვა დარგებთან (არქეოლოგია, ეთნოგრაფია, ენათმეცნიერება და ა.შ.) დაკავშირებით, ქართველი ტომების ძველი ისტორიის შესწავლა მკვიდრ და ნამდვილად მეცნიერულ ნიადაგზე დააყენა. საამისოდ ნიადაგი მოწინავე ქართველი ისტორიკოსების მიერ XIX საუკუნის მეორე ნახევრიდანვე მზადდებოდა. ამ მხრივ უნდა აღინიშნოს *დ. ბაქრაძის, ე. თაყაიშვილის, ი. ყიფშიძის, ს. გიორგაძის, ალ. ხანანაშვილის, ივ. ჯავახიშვილის* და სხვათა დიდი დამსახურება. ივ. ჯავახიშვილმა თავის შრომებში შეაჯამა ქართველთმცოდნეობის მონაპოვარი XX საუკუნის 20-იან წლებამდე და თავისი დიდი ცოდნისა და ნიჭის წყალობით დიდი ღვაწლი დასდო ქართველი ტომების ძველი ისტორიის შესწავლის საქმეს.

ქართველი ტომების ძველი ისტორიის შესწავლას ნამდვილად მეცნიერული საფუძველი ს. ჯანაშიას შრომებმა შეუქმნეს. მან არაერთი საკითხი დააყენა და გადაჭრა როგორც საისტორიო გეოგრაფიიდან, ისე, და ეს განსაკუთრებით მნიშვნელოვანია, სოციალურ-ეკონომიური ისტორიიდან. მან, პირველმა ქართულ ისტორიოგრაფიაში, მეცნიერულად დააყენა ქართული ფეოდალიზმის გენეზისის საკითხი და წყაროების თანამედროვე შესწავლის პირობებში გადაჭრა იგი. ნაადრევმა სიკვდილმა არ აცალა მას მისთვის სასურველი სისრულით დაემუშავებინა ქართული ისტორიოგრაფიის ეს ერთ-ერთი კარდინალური საკითხი. დიდი შრომა გასწია და ეწევა ქართული ფეოდალიზმის წარმოშობისა და ბუნების შესწავლაზე ნ. ბერძენიშვილი, იგი ს. ჯანაშიასთან ერთად მონაწილეობს ქართული ფეოდალიზმის გენეზისის შესახებ იმ კონცეფციის შემუშავებაში, რომელიც უახლოეს ქართულ ისტორიოგრაფიაში სახელმძღვანელო შეხედულებადაა აღიარებული.

დიდი შრომა გასწიეს და ეწევიან ქართველი ტომების ძველი ისტორიის შესწავლისათვის არ. ჩიქობავა, ვ. თოფურია, ს. ჟღენტა, გ. მელიქიშვილი, გ. ჩიტაია, ვ. ბარდაველიძე, ს. მაკალათია, გ. ლომთათიძე, ა. აფაქიძე, გ. გობეჯიშვილი, ალ. კალანდაძე და სხვები.

§2. ქართველ-ქართველური ტომები ძვ. წ. X-VII სს-ში

ძვ. წელთაღრიცხვის II და I ათასწლეულის მიჯნაზე ცენტრალურ და დასავლეთ ამიერკავკასიაში, იმ ტერიტორიაზე, სადაც შემდგომ ახლო აღმოსავლეთის უძლიერესი ფეოდალური სახელმწიფო – საქართველო წარმოიქმნა, გაფორმებას იწყებს ორი კულტურული წრე, რომელიც ლიტერატურაში აღმოსავლურ-ქართულად და დასავლურ-ქართულად იწოდება. ეს ძირითადად ბრინჯაოს კულტურაა და „ქართველი ტომების ორ გაერთიანებას შეესაბამება – დასავლურ-ქართულსა და აღმოსავლურ-ქართულს“.¹²

ამ ორი წრის მატერიალური კულტურის შესწავლის ისტორია გასული საუკუნის მეორე ნახევარში იწყება, ძირითადად, არაქართველი მკვლევარების მიერ, რომელთაგან ზოგი მოუმზადებელი იყო ასეთი მუშაობისათვის, ზოგიც კიდევ ცოდნით აღჭურვილი. „...საქართველოს წარსულსაც კოლონიური თვალთუქვით უცქეროდნენ: საქართველოს ისტორიაში ისინი უპირველეს ყოვლისა უცხოურს, მოტანილს,

¹² ბერძენიშვილი ნ., ჯავახიშვილი ივ., ჯანაშია ს., საქართველოს ისტორია, I, თბ., 1948, გვ. 27, შემდ.

ნასესხებს ეძებდნენ...“¹³ ამიტომ იყო, რომ მატერიალური კულტურის ძეგლები, რომლებიც ქართველ ხალხს შეექმნა, დიდხანს მისი შემოქმედისაგან მოწყვეტილად განიხილებოდა და თავის დანიშნულებას, როგორც საისტორიო წყაროსი, ვერ ასრულებდა. ასეთ მდგომარეობაში იყო დიდხანს ის მასალა, რომელიც დასავლურ-ქართული წრის რაიონში იქნა მოპოვებული. მას უსამართლოდ აღიარებდნენ უცხო, არაქართველური მოსახლეობის შემოქმედების ნაყოფად. ეს გრძელდებოდა შემდეგაც, როცა დაგროვდა მდიდარი მასალა, რომელიც უკვე სავსებით საწინააღმდეგოს უჩვენებდა, მაგრამ, XX ს-ის 20-30-იანი წლებიდან, როცა ქართველი ხალხი ახალი ცხოვრების მშენებლობას შეუდგა, არნახული გაქანება მიიღო ქართველმცოდნეობამ; იგი მკვიდრ ნიადაგზე დადგა და მზრუნველობით გარემოსილმა ბრწყინვალე წარმატებები მოიპოვა. ამ წარმატებათა შედეგი იყო (ერთ-ერთი), რომ შესაძლებელი გახდა არა მარტო ქართული მატერიალური კულტურის გამოყოფა არაქართულისაგან, არამედ კვლევის იქამდე დაღრმავება, რომ თვით ქართული ბრინჯაოს ხანის კულტურის შიგნით ორი წრის გამოყოფა გახდა შესაძლებელი, რომელიც ზემორე აღვნიშნეთ.

მასალების შესწავლიდან გამომდინარე, რომ ე.წ. „ყოფილი“ კულტურის ძირითადი შემქმნელები და მატარებლები კოლხები იყვნენ.¹⁴

ს. ჯანაშიამ მიუთითა ის ტერიტორია, სადაც ეს კულტურა იყო გავრცელებული. იგი შეიცავდა დღევანდელ დასავლეთ საქართველოს, ჩრ. კავკასიის მთიანეთს თერგის დასავლეთით, ჭოროხის ხეობას და შავი ზღვის სამხრეთ სანაპიროს, ე.ი. დაახლოებით იმ ტერიტორიას, რომელიც ანტიკურ პერიოდში კოლხეთადაა ცნობილი.¹⁵

ძვ. წ. VII-V საუკუნეებში დასავლურ-ქართული და აღმოსავლურ-ქართული წრის მატერიალური კულტურა იმდენად უახლოვდება ერთმანეთს, რომ მათი ცალ-ცალკე განხილვისათვის საფუძველი აღარ არსებობს – აღარ არსებობს ის სპეციფიკური რამ, რაც წინათ ცალკე წრეს ახასიათებდა.¹⁶

რა ნიშნების მიხედვით ხდება აღნიშნული გაყოფა?

დასავლური წრის მატერიალური კულტურისათვის ძირითადად დამახასიათებელია ე.წ. „კოლხური ცული“ და სქელპირიანი სატევარი, თოხი (წალღიც ?), ხოლო აღმოსავლურ-ქართული წრისათვის ე.წ.

¹³ ბერძენიშვილი ნ., ქართული საბჭოთა არქეოლოგიის ზოგიერთი პრინციპული საკითხისთვის. „მომხილველი“, II, თბ., 1951, გვ. 337.

¹⁴ Ивашенко М., Материалы к изучению культуры КОЛХОВ, მასალები საქართველოსა და კავკასიის ისტორიისათვის, II, თბ., 1941, გვ. 56-59.

¹⁵ საქართველოს ისტორია, I, თბ., 1948, გვ. 27.

¹⁶ გობეჯიშვილი გ., არქეოლოგიური გათხრები საბჭოთა საქართველოში, თბ., 1952, გვ. 109.

ჩუგლუგი, წარკვეთილი მახვილი, ბრტყელი ისრის პირები, გრძელი შუბის წვერები.¹⁷ იმისათვის, რომ გასაგები გახდეს შავი ზღვის სანაპიროზე მოსახლე ქართველური ტომების ანტიკური პერიოდის ისტორიისათვის დამახასიათებელი მოვლენები, რომლებიც, ბუნებრივია, ამოდიან უფრო ადრეული განვითარების მდგომარეობიდან და მხოლოდ მათი გათვალისწინებით შეიძლება გაგებულ იქნას, ზოგად ხაზებში მოვხაზოთ დასავლურ-ქართული წრის კულტურის მატარებელი ქართველური ტომების სოციალ-ეკონომიური მდგომარეობა ძვ. წ. X-VII საუკუნეებში – ესაა დაწინაურებული მიწათმოქმედების, მესაქონლეობისა და მელითონეობის ქვეყანა, რომელსაც კულტურულ-ეკონომიური კავშირები აქვს აღმოსავლეთის, სამხრეთისა და ჩრდილოეთის ქვეყნებთან. ამ ხნის მატერიალური კულტურის ნაშთებში ვხვდებით როგორც ეგვიპტურ-ფინიკიური სამყაროდან, ისე სკვითურ-სარმატული და ასირიულ-ურარტული ქვეყნებიდან მომავალ ნივთებს.

აღმოჩენილია ამ პერიოდის სამიწათმოქმედო იარაღების საკმაოდ დიდი რაოდენობა,¹⁸ რომელიც ბრინჯაოსაგანაა გაკეთებული. განსაკუთრებით აღსანიშნავია თოხები, რომელთა ფორმები დიდად როდი განსხვავდება დასავლეთ საქართველოს ზოგიერთ რაიონებში დღეს ხმარებული მსგავსი იარაღისაგან.¹⁹ ის გარემოება, რომ ამ დროის მასალებში ჯერჯერობით აღმოჩენილი არ არის სახნისი, არ უნდა მიგვითითებდეს აქ ნიადაგის მოხვნითი დამუშავების არარსებობაზე. თუ მთის მოსახლეობაზე შეგვიძლია ვთქვათ, რომ მიწის დამუშავებას იგი ძირითადად თოხით აწარმოებდა, რაც მთის განსაკუთრებული

¹⁷ ლიტერატურა: ჯანაშია ს., საქართველოს ისტორია, I, 1948, Ивашенко М., Материалы к изучению культуры колхов, 1941, (მასალების ნაკ. II). Иессен, К вопросу о древнейшей металлургии меди на Кавказе, изд. ГАИМК, 1935, გვ. 120. გობეჯიშვილი გ., არქეოლოგიური გათხრები საბჭოთა საქართველოში, თბ., 1952. Куфтин Б., Археологические раскопки в Триалети, Тб., 1941. მისივე, материалы по археологии Колхиды, т. I, т. II, Тб., 1949-1950. ჯაფარიძე ო., კოლხური ცული, საქ. სახ. მუზეუმის მოამბე, XVI, თბ., 1950, გობეჯიშვილი გ., სტალინის ნაცარგორა, მიმოხილველი, II, თბ., 1951. ნიორაძე გ., ზემოავჭალის სამარე, საქ. სახ. მუზეუმის მოამბე, VI, თბ., 1931. ლომთათიძე გ., არქეოლოგიური გათხრები საქართველოს ძველ დედაქალაქში, თბ., 1945, მისივე, წინაპართა ნაკვალევი, თბ., 1952. Хоштария Н., Древнее поселение в Даблагоми, Тб., 1941. აფაქიძე ა., ბაკურციხის არქეოლოგიური ძეგლები, თბ., 1940. (ინახება თსუ ფონდ. ბიბლიოთეკაში. სად. ნაშრომი). Иессен, Древнейшая металлургия Кавказа и ее роль в Передней Азии, (доклады III международ. конгр. по Иранск. ист. и арх. М-Л., 1939). Пиотровский Б., История и культура Урарту, Ереван, 1944. Меликишвили Г., Наири-Урарту, Тб., 1954. აქ მითითებულია მხოლოდ საბჭოთა პერიოდის ლიტერატურა, ისიც მხოლოდ ნაწილობრივ. ზოგიერთი აქ მითითებული შრომათაგანი თავისუფალი არაა მანკისაგან, ზოგშიც დებულებები მოძველდა ახალი და მდიდარი მასალის მოპოვების გამო.

¹⁸ ჯაფარიძე ო., მიწათმოქმედების იარაღები დასავლურ ქართულ კულტურაში, თსუ შრომები, 49, თბ., 1953, გვ. 173-212.

¹⁹ Ивашенко М., Материалы к изучению культуры колхов, მასალები საქართველოსა და კავკასიის ისტორიისათვის, II, თბ., 1941, გვ. 19-20; გობეჯიშვილი გ., დასახ. ნაშრ., გვ. 98.

გეოგრაფიული პირობების გამო ჩვენ დრომდეც ასევე დარჩა, არ შეგვიძლია ვამტკიცოთ, ბარი არ იცნობდა კავ-სახნისს. „თქმულება არგონავტებზე“ კოლხიდას უკვე მეტად დაწინაურებული მიწათმოქმედების ქვეყანად გვიხატავს. გ. ჩიტაიას აზრით, ამ დროს ქართველ ტომებში გამოყენებაში უნდა ყოფილიყო „რკინის სახნისი და ვარაუდით რკინის საკვეთელი, სახვნელი იარაღი სათესი აპარატი, შერეული თესლის გამოყენება მოსავლის გადიდების მიზნით...“ და ა.შ.²⁰

მოპოვებული მასალა საშუალებას იძლევა ვილაპარაკოთ არა სოფლის მეურნეობაზე საერთოდ, არამედ მიუთითოთ მის ზოგიერთ დარგებზედაც. ასე, სოფლის მეურნეობის წამყვანი დარგი როგორც მთაში, ისე ბარში მარცვლეული კულტურების მოყვანა იყო. ამაზე მიგვითითებს როგორც საფქვაკვების სიმრავლე, ისე მარცვლეულთა ნაშთების აღმოჩენა და უძველესი ტიპის სახვნელი იარაღების ქონება. გ. ჩიტაია ამ დროისათვის ქართველ ტომებში წყლის წისქვილისა და კვერის არსებობასაც ვარაუდობს.²¹ მარცვლეული კულტურების მოყვანის ტექნიკის დაწინაურებაზევე მიუთითებს ბრინჯაოსა და კაუის ნამგლების აღმოჩენა. ამ პერიოდის სოფლის მეურნეობაში აღინიშნება არა მარტო ტექნიკური გაუმჯობესებანი, არამედ სასარგებლო ფართობის გაზრდაც – ჩნდება ტყის საჩეხი მძიმე ცულები და წალდები, უკანასკნელი იმითაცაა საინტერესო, რომ მისი ფორმები დღეისთვისაც ცოცხლადაა შემონახული დასავლეთ საქართველოს სინამდვილეში. სოფლის მეურნეობის ინტენსიური დარგების არსებობაზე უნდა მიგვითითებდეს სასხლავი დანების (მოგვიანო ხანის, ჩხოროწყუ) და ყურძნის წიპწების აღმოჩენა. გარდა ამ მასალისა, ჩვენ გვაქვს წერილობითი წყაროების ცნობა, რომ ერთ-ერთი ქართველი ტომი – მესხები (მუსკები), ძვ. წ. IX საუკუნის პირველ ნახევარში ასირიის მეფეს აშურნასირპალ პირველს (884-860 წწ.) სხვასთან ერთად ღვინის ხარკსაც უხდიდა.²² სხვა წყაროებიდან ჩვენ ვიცით, რომ ძვ. წ. VI საუკუნეში მესხები კულხა-კოლხა გაერთიანებაში შედიან.²³ მასალები უთითებენ ტექნიკური კულტურების და განსაკუთრებით სელის კულტურის გავრცელებაზე. სელის ქსოვილების ნაშთების აღმოჩენა (ოჩამჩირესთან, ე.წ. „ქსოვილიანი“ თიხის ჭურჭლები, წვერმაღალაში (სუფსის შესართავის ახლოს, მახარაძის რაიონი) – სპილენძის ცულზე...²⁴) ერთი მხრით მიგვითითებენ სელის კულტურის, ხოლო მეორეს მხრივ – საფეიქრო

²⁰ ჩიტაია გ., აკად. ს. ჯანაშია და ქართველი ხალხის წარმოშობის პრობლემა, „მომხილველი“, I, თბ., 1949, გვ. 12.

²¹ იქვე, გვ. 12.

²² ჯავახიშვილი ივ., ქართველი ერის ისტორია, I, თბ., 1951, გვ. 21.

²³ რაზედაც ყველაზე მკაფიოდ ჰეკატე მილეტელის ფრაზა – «Μόσχοι, Κόλχαν ἔθνος προσεχέας τοῖς Μητινοῖς» (ფრ.188) – უნდა მიგვითითებდეს.

²⁴ Кухтин Б., Материалы к археологии Колхиды, II, Тб., 1950, стр. 274-297.

დაზგის არსებობაზე. ასეთ მასალაზე დაყრდნობით შეიძლება თამამად გავიმეოროთ ჰეროდოტეს ცნობა კოლხური ტილოს სახელგანთქმულობაზე ცენტრალურ და აღმოსავლეთ ხმელთაშუაზღვისპირეთში. მას დიდი ტრა-დიცია ჰქონია და მოუხიბლავს არცთუ დაბალი გემოვნების მომხმარებელი – ბერძნული არისტოკრატია, რომელიც, ალბათ, უცხოეთიდან შეტანილი საქონლის ძირითადი მომხმარებელი იყო. ცხადია, დახელოვნება საფეიქრო წარმოებაში, ისევე როგორც სხვა დარგებში, არც ერთ ხალხს და მათ შორის კოლხებსაც, ციდან არ ბოძებიათ. ეს იყო წინა თაობათა შრომითი და ინტელექტუალური გარჯის შედეგი.

განათხარი მასალებიდან ჩანს, რომ ამ პერიოდის დასავლურ-ქართული ტომები შინაური ცხოველების თითქმის ყველა სახეს იცნობენ. საკმაოდ შორს წასულა რძის პროდუქტების დამზადების ტექნიკა. არაერთგანაა აღმოჩენილი კარაქის სადღვეები. გამოიყენებოდა პირუტყვის ხორცი, რძე, მატყლი, ტყავი და რქები. რქებისაგან ზოგიერთ სამეურნეო თუ საკულტო დანიშნულების იარაღებსა და სასმისებს აკეთებდნენ, ტყავებისაგან ფეხსაცმელ-ტანსაცმელსა და ფარჩაჩქანს. სხვადასხვა წონა ჰქონდა მესაქონლეობას მთისა და ბარის მეურნეობაში. მთაში, როგორც ირკვევა, ძირითადად წვრილფეხა პირუტყვის (ცხვარი) მოშენებას მისდევდნენ,²⁵ ხოლო ბარში – მსხვილფეხასი. მთა ამ მხრივაც ყოველთვის დამოკიდებული იყო ბარზე, რაც საზამთრო საძოვრების საჭიროებით იყო შეპირობებული. მთის მესაქონლეობაში ცხვრის, ხოლო ბარისაში – ხარ-ძროხის უპირატესი მდგომარეობის ასახვა უნდა დავინახოთ, ალბათ, იმაში, რომ ამ და მომდევნო პერიოდის ხელოვნებაში მთაში უპირატესად ცხვრის გამო-სახულებაა წარმოდგენილი, ხოლო ბარში – ხარის. ცხენი უკვე ამ პერიოდისათვის კარგა ხნის მოშინაურებულია და განათხარი მასალებიც მრავლად შეიცავენ ლაგამებს, საყბურებსა და მორთულობას. თუმცა დასავლურ-ქართული წრისათვის ჯერ დადასტურებული არა გვაქვს, მაგრამ აღმოსავლურ-ქართული წრის მოსახლეობა უკვე იყენებს ცხენს დასაჯდომადაც და ბორბლიან ტრანსპორტშიც (გამოსახულებანი ბრინჯაოს სარტყლებზე). ბორბლიან ტრანსპორტში ცხენზე უფრო ადრე პოულობს გამოყენებას ხარი (თრიალეთის გათხრების მასალები).²⁶

²⁵ გობეჯიშვილი გ., არქეოლოგიური გათხრები საბჭოთა საქართველოში, თბ., 1952 წ. გვ. 109. მისივე, მდ. რიონის სათავეებში 1952 წ. ჩატარებული არქეოლოგიური გათხრების შედეგები (თეზისები, ივ. ჯავახიშვილის სახ. ისტორიის ინსტიტუტის სამეცნიერო სესია, 1953 წ. 20-21 მარტი), გვ. 12.

²⁶ ბორბლის უძველეს სახეებზე იხ. მ. გეგეშიძე, ბორბლის უძველესი სახეების საკითხისათვის, „მომომხილველი“, II. თბ., 1951, გვ. 431-450.

ამ პერიოდის მასალები, რომლებიც ზღვის სანაპიროებზეა მოპოვებული, უთითებენ მეთევზეობისა და მარილის წარმოების არსებობაზე (ეშერის, ოჩამჩირის ... მასალები).

დასავლურ-ქართული კულტურის წრის ტომები ცნობილი არიან მაღალგანვითარებული მემთამაღნობით. ამ ტომებს, დღეს ჩვენს ხელთ არსებული მასალების მიხედვით, მეტალურგიის ორი ძირითადი ბაზა გააჩნიათ – ერთი დიდ კავკასიონზე – რიონ-ენგურის ზემო წელი (რაჭა-სვანეთი), მეორე მცირე კავკასიონზე – ჭოროხის აუზი (ისპირ-გიუმიშხანეს რაიონი, პონტოს მთაგრეხილის დასავლეთი კალთები). იმდროინდელი მეტალურგიის ეს ცენტრები არქეოლოგიურად ერთნაირად არაა შესწავლილი. თუ რიონ-ენგურის რაიონის მეტალურგიის კულტურისათვის, საქართველოს მეცნიერებათა აკადემიის ისტორიის ინსტიტუტის ექსპედიციის მიერ (გ. გობეჯიშვილი), მოპოვებულია მდიდარი და მრავალფეროვანი მასალა, სამხრეთ (ჭოროხის აუზის) ბაზისათვის ჩვენ, ძირითადად, წერილობითი წყაროების მჭლე ცნობების ამარა ვართ ჯერჯერობით დარჩენილი.

განათხარი მასალების შესწავლიდან ირკვევა, რომ კოლხური ტომები იცნობენ ბრინჯაოს სხმულის წარმოების მთელ პროცესს, დაწყებული მადნის ამოღებიდან (მაღაროები), დამთავრებული ნივთის ჩამოსხმით (სასხმელი ყალიბები). შესწავლილია იმდროინდელი მაღაროები – მადნის სამტვრევი უროებით და ცეცხლის კვალით, რასაც გამოსამტვრევი ქანის დასარბილებლად იყენებდნენ. ამ მაღაროებიდან, სპეციალისტების გამოანგარიშებით, ასეულათასობით ტონა მადანია გამონგრეულ-გამოტანილი; აღმოჩენილია იმდროინდელი მადანსადნობი წარმოების ნაშთები და ნივთების ჩამოსასხმელი ყალიბები (ცულები, სატეხები და ა.შ.). ლითონის (ამ დროს – ძირითადად ბრინჯაოს) წარმოებაში ქართველი ტომები იცნობენ ჩამოსხმას, გრავირებას, ფილიგრანს, მოოჭვას, კვერვას, სევადას, და ამის შესახებ ქართველთ-მცოდნეები დღეს ლაპარაკობენ არა გუმანით, არამედ უშუალოდ ძეგლებზე დაკვირვებით, ძეგლებზე, რომელთა ნაწილი ხელოვნების შედევრად არის აღიარებული.

ბრინჯაოს ინდუსტრიას ერთდროულად მრავალი მოდგმის ტომები იცნობდნენ, მაგრამ ქართველ ტომებს ეკუთვნის ბრინჯაოს სხმულის ორიგინალური ნიმუშების შექმნა. ბრინჯაო რთული სხმულია – სპილენძისა (დაახ. 90%) და კალის (დაახ. 10%) ნაერთი. ამიერკავკასია ღარიბია კალით და ეს გარემოება დიდხანს ქართველ ტომებში ბრინჯაოს ადგილობრივი წარმოების არსებობის უარყოფის, ან კიდევ დამოკიდებული ხასიათის ურყევ საბუთად იყო აღიარებული. ქართული არქეოლოგიის უკანასკნელი ხანის მონაპოვრებმა მოშალა ეს ე. წ. „ურყევი საბუთი“ და ნათელყო, რომ დასავლურ-ქართულ ტომებს

(ჯერ მოპოვებული მასალებით რიონის აუზის მცხოვრებთ) ბრინჯაოს წარმოებაში გამოუნახავთ კალის შემცველი ნივთიერება – ანთიმონი. ანთიმონიანი ბრინჯაო თამამად ღგება კალანარევი ბრინჯაოს გვერდით. მიკვლეული და შესწავლილია ანთიმონის იმდროინდელი მაღაროები და გამორკვეულია მადნის ამოღების ტექნიკა.²⁷ გამოანგარიშებით, ამ მაღაროებიდან ასიათასობით ტონა მადანია ამოღებული. ალბათ, ამ მადნით მარაგდებოდა ბრინჯაოს წარმოების სხვა რაიონებიც.

კოლხური ბრინჯაოს კულტურა, როგორც ორიოდ შემთხვევითი აღმოჩენის წყალობით ირკვევა, სამხრეთით ართვინ-ორდუს ხაზს იქით აღარ ვრცელდებოდა (მასალების უქონლობა საშუალებას არ იძლევა ეს საზღვარი უფრო იქით გადავწიოთ, თუმცა წერილობითი წყაროები სხვანაირი სურათის ჩვენებისაკენ გვიბიძგებს).

მეტალურგიის მეორე კერა ქართველ ტომებს ჭოროხის აუზში ჰქონიათ. ივ. ჯავახიშვილის გამოკვლევით, „სპილენძ“ სახელში ქართული პროვინცია ისპირი – სპერი უნდა იყოს მიმალული.²⁸ შავი ზღვის სამხრეთ სანაპიროებს ჯერ არ უნახავთ ნამდვილი, მეთოდურად გამართული არქეოლოგიური გათხრები და ამიტომ მათ შესახებ დაბეჯითებით რაიმე კონკრეტულის თქმა შეუძლებელია, მაგრამ წერილობით წყაროებში (ასურული, ურარტული, ებრაული) დაცული ცნობებით შეიძლება მისი სურათის უზოგადეს ხაზებში ჩვენება.²⁹

ჩვენთვის საინტერესო ქრონოლოგიურ მონაკვეთში, ტერიტორიაზე, რომელიც მდ. ევფრატის დასავლეთით შავ ზღვამდე და სამხრეთით კუმუხის, კილიკიისა და ფრიგიის საზღვრებს შორის მდებარეობდა, ძვ. აღმოსავლეთის ხალხთა წერილობით ლიტერატურაში მითითებულია ქართველურ ტომთა რამდენიმე გაერთიანება – **დაიაენი (დაიუხი), ტაბალი, მუსკი (მესხი), ქაშქები, კულხა (კოლხი)**. ეს ის ტომებია, რომლებთანაც მტრული თუ მეგობრული ურთიერთობა ჰქონიათ ამ ხალხებს და ცნობებში ამ ურთიერთობის ამბებია გადმოცემული. ამ წყაროებში არაერთი ძვირფასი ცნობაა შემონახული, რომელთა განზოგადება ამ ტომების სოციალური და ეკონომიკური სურათის გათვალისწინებას გვახერხებინებს.

²⁷ ამ საკითხზე სპეციალურად იხ. გობეჯიშვილი გ., არქეოლოგიური გათხრები საბჭოთა საქართველოში, თბ., 1952. მისივე, რაჭის არქეოლოგიური ექსპედიციის ანგარიშები (ინახება ივ. ჯავახიშვილის სახ. ისტორიის ინსტიტუტში).

²⁸ ჯავახიშვილი ივ., დასახ. ნაშრ. გვ. 24

²⁹ უახლესი ძირითადი ლიტერატურა დასავ. ქართ. ტომთა მეტალურგიაზე: საქართველოს ისტორია, I, თბ., 1948. Иессен, К вопросу о древнейшей металлургии меди на Кавказе, изд. ГАИМК, 1935., Меликишвили Г. А., Наირи-Урарту, Тб., 1954, стр. 58., Куфтин Б., Материалы к археологии Колхиды, II, Тб., 1950., Ивашенко М., Материалы к изучению культуры колхов, 1941., Хоштария Н., Древнее поселение в Даблагоми, Тб., 1941.

ძვ. წ. XII საუკუნის დამლევს ასურეთს ბრძოლა უხდება ნაირის ქვეყნის ხალხთა დიდ გაერთიანებასთან, რომელსაც დაიაენის (დიაუხის) მეფე სიენი მეთაურობს. 1112 წელს ასურეთის მეფეს ტიგლათ-ფილესარ I-ს (1115-1077 წწ.) გადაულახავს ევფრატი და აუოხრებია ნაირის ქვეყნები დიაუხის ჩათვლით. „ნაირის ქვეყნის 60 მეფეს, მათთან ერთად ვინც მათ დასახმარებლად მოვიდა, ჩემი მახვილი წვერით თვით ზემო ზღვამდე მივსდიე. სიენი, დაიაენის მეფე, რომელიც არ დაემორჩილა აშურს, ჩემს მბრძანებელს, მე შეკრული და დატყვევებული მოვიყვანე ჩემს ქალაქს აშურში“ – იკვეხნის ასურეთის მბრძანებელი.³⁰ დაიაენის წონა ამ დროს იმდენად დიდი ყოფილა, რომ ტიგლათფილესარ I-ს სიენი არ დაუსჯია. მას ფიცი დაადებინა და თავისსავე ქვეყანაში გაისტუმრა.³¹ მალე ასურეთი სუსტდება და სწორედ ეს პერიოდი (XI-IX სს.) დაიაენის ძლიერების გაფურჩქვნის ხანაა. ძვ. წ. IX საუკუნეში დაიაენის უკვე ორი საშიში მეზობელი ჰყავს – გაძლიერებული ასურეთი და ახალწარმოქმნილი ურარტუ. დაიაენი ცდილობს გამოიყენოს ასურეთ-ურარტუს წინააღმდეგობანი და ორიენტაციას ასურეთზე იღებს, მაგრამ გაძლიერებული ურარტუ ახერხებს დაიაენის იზოლირებას და არგიშთი I (781-760 წ.) ანადგურებს მას. არგიშთის მემკვიდრის – სარდური II დროს (760-730 წ.) დაიუხის (დაიაენის) ტერიტორიის ერთი ნაწილი ურარტუს პროვინციაა, ხოლო მეორე ნაწილი შევიდა ახალგაძლიერებული კოლხას შემადგენლობაში. ურარტელები სასტიკ ბრძოლას აწარმოებენ კულხასთან, მაგრამ მალე ასურეთი ძლიერდება და ურარტუ იძულებულია ყურადღების ცენტრი ასურელებთან ბრძოლისაკენ გადაიტანოს, რითაც სარგებლობს კულხა და აძლიერებს დიაუხის ნამემკვიდრევის ათვისებას.³²

დიაუხის (დაიაენის) სამეფოს ტერიტორია გაშლილი იყო არზრუმისა და მდ. ევფრატის სათავეების რაიონში და ჩრდილოეთით იგი შორს ვრცელდებოდა, შესაძლებელია, შავ ზღვამდეც კი.³³ ასურულ-ურარტული წყაროების ცნობების შესწავლიდან ირკვევა, რომ იგი ეკონომიურად დაწინაურებული ქვეყანაა. ტიგლათფილესარ I-ს 1112 წლის ბრძოლაში, რომელიც მკვლევართა ვარაუდით მალაზგითთან მომხდარა, ხელთ უვდია 120 საომრად შეჭურვილი ეტლი, არის ცნობები, რომ ნაირის ქვეყნები ასურელებს დროდადრო ხარკის ნაწილს

³⁰ ВДИ, 1947, №1, გვ. 264.

³¹ იქვე, მელიქიშვილი გ., უძველესი სამეფო სამხრეთ საქართველოს ტერიტორიაზე, „მიომხილველი“, II, თბ., 1952, გვ. 216-218. მისივე, Наирн – Урарту, Тб., 1954, გვ. 59 და შემდ.

³² იქვე, გვ. 219-225.

³³ მელიქიშვილი გ., უძველესი სამეფო სამხრეთ საქართველოს ტერიტორიაზე, „მიომხილველი“, II, თბ., 1952, გვ. 216.

ეტლებით უზღიდნენ.³⁴ ამას თუ მიუყენებთ თრიალეთისა და ნაცარგორას გათხრების მასალებს, ცხადი გახდება, თუ როგორ დაწინაურებული ყოფილა ბორბლიანი ტრანსპორტი ქართველ ტომებში. დაიანდიაუხის სამეფოს ეკონომიური მდგომარეობის გასათვალისწინებლად ძვირფას მასალას იძლევა არგიშთი I-ის (781-760 წწ.) დიაუხის დალაშქრის ამბების აღწერილობის შემცველი წარწერა. ამ ლაშქრობის დროს დიაუხში დაუნგრევიათ 105 ციხესიმაგრე და დაუწვათ 453 დასახლებული პუნქტი („ქალაქი“), ტყვედ წაუყვანიათ 15181 ყრმა, 2734 კაცი და 10604 ქალი, ხელთ უგდიათ 4426 ცხენი, 10478 მსხვილფეხა და 73770 წვრილფეხა პირუტყვი, ხარკის სახით მიუღიათ 41 მინა* ოქრო, 37 მინა ვერცხლი, რამდენიმე ათიათასი მინა სპილენძი, 900 საჯდომი ცხენი, 300 მსხვილფეხა და რამდენიმე ათეული ათასი სული წვრილფეხა რქოსანი პირუტყვი. ყოველწლიურ სახარკო გამოსაღებად დაუდვიათ 10000 მინა სპილენძი, ოქროს გარკვეული რაოდენობა, ხარები, ძროხები (100), ცხვრები (500), ცხენები (300).³⁵ დიაუხი მთაგორიანი ქვეყანა იყო და ამიტომ აქ, ისე როგორც სხვაგანაც, მთიან ქვეყნებში, შეიმჩნევა მესაქონლეობის დაწინაურება, განსაკუთრებით მეცხვარეობისა (გაიხსენეთ რაჭის არქ. ექსპედიციის მასალები). 400 წლის შემდეგაც ეს ადგილები მესაქონლეობის დონის თითქმის ასეთსავე სურათს წარმოადგენს – ქსენოფონტის ლაშქარმა ტაოხებში ხელთ იგდო დიდი რაოდენობით ცხვრები, ხარები და ვირები.³⁶ ცხადია, როდესაც დიაუხზე ვლაპარაკობთ, როგორც დიდ ეთნიკურ-პოლიტიკურ გაერთიანებაზე, არ შეიძლება მისი ცალკე პროვინციების სოციალ-ეკონომიური განვითარების დონე ერთნაირად წარმოვიდგინოთ. ასეთი გაერთიანება იმ ხანაში არ შეიძლებოდა არსებულებიყო, განსაკუთრებით რელიეფის ასეთი მრავალფეროვნებისა და მისგან გამომდინარე მეურნეობის დარგების (მაშასადამე, ეკონომიკის) მრავალსახეობის პირობებში. ზოგი თემი მეტალურგიაშია დაწინაურებული, ზოგი მეცხოველეობაში, ზოგი კიდევ მიწათმოქმედებაში. ჩვენ, წერილობითი წყაროებიდან, ცოტა რამ ვიცით დიაუხის მიწათმოქმედებაზე, მაგრამ მძლავრი სამთამადნო წარმოების (განსაკუთრებით სპილენძის) კერის არსებობა უეჭვოა. ყოველწლიურად 5000 კილოგრამზე მეტი სპილენძის გამოღება იმ ხანაში ისეთ ქვეყანას თუ შეეძლო, რომელსაც საკუთარი წარმოება ჰქონდა.

ურარტუს მეფეთა წარწერებში გ. მელიქიშვილმა ყურადღება მიაქცია ერთ მეტად საინტერესო გარემოებას – დიაუხში შემოჭრილი

³⁴ მელიქიშვილი გ., ურარტუ, თბ., 1952, გვ. 37-38.

* მინა – დაახლ. 505 გრამს. (მელიქიშვილი, იქვე).

³⁵ მისივე, უძველესი სამეფო ..., გვ. 224.

³⁶ იქვე, გვ. 226.

ურარტუს ლაშქარი „ციხე-სიმაგრეებს“ *ანგრეეს*, ხოლო „ქალაქებს“ *წვაეს*. ამ ციხე-სიმაგრეთა უმრავლესობაში მან, სამართლიანად, კარგად ცნობილი „ციკლოპური ნაგებობანი“ დაინახა.³⁷ ჩანს, ციხე-სიმაგრეები ქვისაგან ყოფილა ნაშენები, ხოლო „ქალაქები“, ძირითადად, ალბათ, ხისაგან.

იხილავს რა დიაუხის სოციალურ-ეკონომიური განვითარების დონეს, გ. მელიქიშვილი წერს: „ასურული და ურარტული წყაროები მუდამ ლაპარაკობენ დაია/ე/ნი-დიაუ/ე/ხის ქვეყნის „მეფის“ (და არა „მეფეების“) შესახებ. ძნელია დაეჭვება იმაში, რომ ამ მსხვილი გაერთიანების სათავეში მდგომი ეს მეფეები სუვერენულ, მემკვიდრულ ხელისუფლებას წარმოადგენენ. ამ ქვეყნის სატომთაშორისო ვაჭრობის განვითარებისათვის ხელსაყრელი გეოგრაფიული მდებარეობა, ძვირფასი ლითონების (ოქროსა და ვერცხლის) სიუხვე ... მეტალურგიის ფართო განვითარება და სხვა, აგრეთვე შესაძლებელს ხდის ვიფიქროთ, რომ აქ (ყოველ შემთხვევაში ამ გაერთიანების გაბატონებულ ტომში) ჩვენ საქმე გვაქვს საზოგადოებასთან, სადაც სოციალ-ეკონომიური დიფერენციაციის პროცესი უკვე შორსაა წასული, სადაც სახეზეა, ერთი მხრივ, რიგითი თავისუფლების მასისაგან გამოყოფილი ძლიერი არისტოკრატიული ზედა ფენა და, მეორე მხრივ, ექსპლუატირებული ტყვე-მონების ფენა“.³⁸

ძვ. წ. აღ. IX საუკუნიდან მოყოლებული, ასურული წყაროები არაერთხელ მოგვითხრობენ ასირია-*ტაბალის* ურთიერთობის ეპიზოდებზე. ტაბალის პირველი ხსენებაც სწორედ IX საუკუნეში გვხვდება, სალმანასარ III-ის დროს (860-825 წწ.).³⁹ ერთ-ერთ წარწერაში ასურეთის ეს მბრძანებელი მოგვითხრობს: „ქორონიკონსა მეფობისა ჩვენისასა ოცდამეორესა (ე. ი. 838-837 წწ. – დ.ხ.) მეოცდართეჯერ ეფფრატი გადავლახე, ჩავედი ტაბალად და ტაბალის 24 მეფისაგან საჩუქარი მივიღე“.⁴⁰ ტაბალი, როგორც ამ ცნობიდან ჩანს, ზოგადი მნიშვნელობის სახელია – ტომთა და თემთა კრების აღმნიშვნელი. ამავე ცნობაში ჩანს, თუ როგორი განსხვავებაა, სოციალურად, ტაბალსა და დიაუხს შორის. ტაბალი ცალკე „სამეფოების“ კრებაა, ხოლო დიაუხი ერთი სამეფოა, მაგრამ ორივეგან „მეფეები“ მემკვიდრეობითაა: სარგონ II (722-705 წწ.) გვაცნობებს, რომ როცა ტაბალებმა ამრი ჰვილეს-ძე ტაბალი *თავისი მამის ტახტზე დასვეს*, მას ჩემი ქალიშვილი მივათხოვე და მზითვად კილიკია გავატანეო. ტერიტორიუ-

³⁷ მელიქიშვილი გ., უძველესი სამეფო სამხრეთ საქართველოს ტერიტორიაზე, „მიმომხილველი“, II, თბ., 1952, გვ. 227-228.

³⁸ იქვე, გვ. 228.

³⁹ ჯავახიშვილი ივ. ქართველი ერის ისტორია, I, თბ., 1951, გვ. 393.

⁴⁰ ჯავახიშვილი ივ. ქართველი ერის ისტორია, I, თბ., 1951, გვ. 393.

ლად „ტაბალს აღმოსავლეთით ევფრატი საზღვრავდა, სამხრეთ-აღმოსავლეთის მხრით კუმუხი, ხოლო სამხრეთით კილიკია, ანუ როგორც მას ასურელები ეძახდნენ, ჰილლაკუ. ერთი სიტყვით, ტაბალებს სწორედ ის ადგილები ეჭირათ, რომელსაც შემდეგ დიდ კაპადოკიას ეძახდნენ...“⁴¹ დიდხანს გრძელდებოდა ტაბალისა და ასურეთის ბრძოლა. როგორც ასური მეფეების წარწერებიდან ჩანს, დამარცხებული ტაბალი დროებით ემორჩილებოდა ასურთა მბრძანებლობას, მაგრამ შესაფერისი დროის დადგომისთანავე იარაღს ჰკიდებდა ხელს. ასურთა მეფეები ცდილობენ ტაბალის კეთილგანწყობილება სხვა გზებითაც მოიპოვონ. ისინი არ თაკილობენ ტაბალის მეფეებთან სამოყვრო კავშირების გაბმასაც, მაგრამ რაც იარაღით ვერ გაკეთებულყო, ის არც მოყვრად მოკიდებით კეთდებოდა. ცნობილია, რომ სარგონ II-ის სიძემ ამრი ჰვილეს ძემ, ტაბალთა მეფემ, თავისი სიმამრის წინააღმდეგ ძლიერი კოალიცია შექმნა. სარგონ II-ს 714-709 წელს სასტიკი ბრძოლების ჩატარება უხდება ტაბალისა და მისი მოკავშირეების – ურარტუს მეფის რუსა სარდურის ძისა (730-714 წწ.) და მუსკების მეფის მიტასის წინააღმდეგ. ეს ბრძოლა ასურეთის გამარჯვებით დასრულდა. იგი, როგორც ჩანს, 714-709 წლებს შორის გრძელდებოდა. სარგონ მეორემ მოკავშირეები ცალ-ცალკე დაამარცხა. 709 წელს მან ტაბალი საბოლოოდ მოსტეხა, ამრი ტყვედ წაიყვანა ნათესავებითა და დიდებულებით და ქვეყანაში თავისი მოხელეები ჩააყენა. ტაბალმა ამ ხანიდან შინაური დამოუკიდებლობაც დაკარგა.⁴²

ამგვარად, ტაბალი ასურეთთან ბრძოლაში აწარმოებს აქტიურ საგარეო პოლიტიკას, ცდილობს დაუკავშირდეს ანტიასურულ ძალებს და მათზე დაყრდნობით გადაირჩინოს თავი. ყურადსაღებია, რომ იგი ასურეთის წინააღმდეგ შექმნილი კოალიციის ინიციატორია. ტაბალისა და ასურეთის ხანგრძლივ ბრძოლას ბოლო კიმერიელების შემოსევამ მოუღო. კიმერიელთა და სკვითთა ტალღებმა გრივალვით გადაუარა წინა აზიას. ჯერ ყველაფერი მირეგვ-მორეგვეს, შემდეგ კი შეუნელებელი ბრძოლებითა და თარეშებით ქანცგამოცლილნი ჩაიფერფლნენ, მაგრამ წინა აზიის პოლიტიკურ გეოგრაფიაში დიდი ცვლილებელი შეიტანეს. მათმა შემოსევებმა ნიადაგი მოუშადა მიდიელთა გაბატონებას. ამ დროს სუსტდებიან წინა აზიის უძლიერესი სახელმწიფოები ასურეთი და ურარტუ, ხოლო ქართველ ტომთა სახსენებელი წინა აზიაში ჰქრება. ამ ხანიდან ისინი მხოლოდ შავი ზღვის სამხრეთ-

⁴¹ იქვე, გვ. 404. აგრეთვე, ჯანაშია ს., თუბალ-თაბალი, ტიბარენი, იბერი, ენიმკის მოამბე, I, თბ., 1937, გვ. 233; საქართველოს ისტორია, I, გვ. 35-36. ჩიტაია გ., აკად. ს. ჯანაშია და ქართველი ხალხის წარმოშობის პრობლემა, „მომომხილველი“, I, 1949, გვ. 11.

⁴² ჯავახიშვილი ივ. ქართველი ერის ისტორია, I, თბ., 1951., ჯანაშია ს., თუბალ-თაბალი, ტიბარენი, იბერი, ენიმკის მოამბე, I, თბ., 1937, გვ. 233.

აღმოსავლეთ სანაპიროებზე შემორჩნენ.⁴³ ბიბლიური ტრადიციის ცნობით, კიმერიელთა (გოგის) შემოსევების შედეგად მოსოხი და თუბალი (ტაბალი), რომლებიც წინათ ყველას შიშის ზარს სცემდნენ, ან დაიხოცნენ, ან დამონებულ იქნენ.⁴⁴ როგორც ჩანს, ქართველ ტომთა ნაწილი სამხრეთისაკენ მოლაშქრე კიმერიელებს შეერთებია და ისრაელის დალაშქვრაში მონაწილეობა მიუღია.⁴⁵

ასურული და ებრაული წყაროების ცნობებით, ტაბალი ეკონომიურად დაწინაურებული ქვეყანა ყოფილა. იგი განსაკუთრებით სახელგანთქმული ყოფილა მესაქონლეობითა და მემთამადნეობით. მეცხოველეობიდან განსაკუთრებით სახელმძოვნილი ყოფილა მეცხენეობა. აშურბანიპალი (668-626 წწ.) წერს, რომ ტაბალს ხარკად მათი ქვეყნის საუკეთესო ცხენები დაუწესეო.⁴⁶ მასზე ადრე, სარგონ II-ს (722-705 წწ.) ტაბალის დალაშქრისას ხელთ უგდია 100 საომარი ეტლი, რომელიც ტაბალის მეფეს – ამრის ჰკუთვნებია.⁴⁷

ტაბალი განსაკუთრებით სახელმძოვნილი ყოფილა მემთამადნეობით. ბიბლიური ტრადიცია თობელს (ტაბალს) მჭედლობის ხელოვნების პიონერად აღიარებს და დაბეჯითებით იმეორებს – „თობელი ესე არს კვერით სურო⁴⁸ მჭედელი რვალისა და რკინისა“. ტაბალებს ლითონური ნაწარმი არა მარტო საკუთარი, შინაური მოთხოვნების დასაკმაყოფილებლად უწარმოებიათ, არამედ ისინი მესხებთან (ბიბლ. მოსოხი) ერთად თავიანთი საქონლის აღმოსავლეთ ხმელთაშუაზღვისპირეთის ქალაქებშიც მიდიოდნენ ხოლმე და იქ მონებსაც იძენდნენ.⁴⁹ 837 წელს ასურეთის მეფეს სალმანასარ მესამეს (860-825 წწ.) ხელთ უგდია ტაბალის ლითონისა და ძვირფასი ქვების მალაროები.⁵⁰

იმდროინდელ საერთაშორისო ვაჭრობაში მონაწილეობა, რაც საკუთარ წარმოებას ემყარებოდა, მემკვიდრეობითი „მეფეების“ არსებობა, შენაძენი (და ტყვე) მონების ყოლა, განვითარებული მემთამადნეობა, ძვირფასი ლითონების მოპოვება, იმდროისათვის მძიმე შეიარაღების (საომარი ეტლები) ქონება, კერძო საკუთრების (ყოველ შემთხვევაში, მის ჩანასახ ფორმებში მაინც) არსებობა (მზითვების მიცემის ფაქტები), სხვისი ტერიტორიების დაპყრობა (და არა მოთარეშება-აოხრება) საერთაშორისო შეთანხმებების მიღწევის ხერხები, ძალთა განწყობილების ცოდნით და ა.შ. უნდა მიგვიტივებდეს, რომ

⁴³ იქვე, გვ. 437.

⁴⁴ იქვე, ეზეკიელი, XXX 11,26, XXXVIII 2,3.

⁴⁵ ეზეკიელი, XXIX, 1-4.

⁴⁶ ჯავახიშვილი ივ., იქვე, გვ. 21-23.

⁴⁷ იქვე, გვ. 435-436.

⁴⁸ შესაქმე, IV, 22.

⁴⁹ ეზეკიელი, XXVII, 13. ჯავახიშვილი ივ. იქვე, გვ. 23.

⁵⁰ იქვე, გვ. 435.

ტაბალის ქვეყნის რიგ „სამეფოებში“ სოციალური დიფერენციაცია საკმაოდ ღრმად უნდა ყოფილიყო წასული და იქ სახელმწიფოს *ჩანასახთან* უნდა გვექონდეს საქმე. მის წარმოშობაში საგარეო ფაქტორს ამაჩქარებელის (კატალიზატორის) როლი უნდა ეთამაშა.

ასირიულ და ებრაულ წყაროებში ტაბალის გვერდით *მუშკი-მოსოხი* იხსენიება, რომელიც მეცნიერებაში, სამართლიანად, მესხებთანაა გაიგივებული. ძვ. წ. აღ. XII საუკუნისათვის ისინი იმდენად ძლიერნი არიან, რომ ტიგლათფილესარ I-ის ერთი წარწერის ცნობით, მის მეფობამდე (1115-1077 წწ.) 50 წლით ადრე (ე.ი. დაახლოებით 1165 წლის ახლოს), თავს დასხმიან ასურეთს და მისი მოხარკე ქვეყნები ალმი და პურუკუცი დაუპყრიათ, ამით არ დაკმაყოფილებულან და ტიგლათფილესარ I მეფობის დასაწყისში კატმუხი დაუპყრიათ. კატმუხის დაპყრობაში მუშკების (მესხების) 5 მეფეს მიუღია მონაწილეობა. ძვ. წ. აღ. 1112 წლის ახლო ხანებში ასურეთის მეფე კატმუხში ჩავიდა, მუშკების ლაშქარს შეებრძოლა და დაამარცხა, ხოლო შემდეგ ქვეყანა სასტიკად დაამარცხა და ხარკი დაადო.⁵¹ ამის შემდეგ მუშკებს ხშირად ვხვდებით ასურეთის მოხარკე ქვეყნების სიაში, მაგრამ შინაური ავტონომია მათ, როგორც ჩანს, არ უნდა დაეკარგათ და არც არასოდეს უნდა შერიგებოდნენ ასურელთა მეხარკეობას. ისინი, როგორც ზემოთ აღვნიშნეთ, მონაწილეობას ღებულობენ ანტიასურულ კოალიციაში ტაბალისა და ურარტუს მეფეებთან ერთად (ძვ. წ. აღ. VIII ს. დამდეგი). მუშკები, ისევე, როგორც ტაბალი და ურარტუ, სარგონ II-თან (722-705 წწ.) ბრძოლაში დამარცხდნენ და მათ ქვეყანაში ასური მოხელეები იქნენ ჩაყენებული.⁵² კიმერიელთა შემოსევამ გამოუსწორებელი ზარალი მიაყენა მუშკებს და მათი ტერიტორია, რომელიც კატმუხამდე მიდიოდა (ტიგრისის მარჯვენა მხარე, კაშიარის მთების, ახ. ტურ-აბდინის ჩრდილოეთით), მეტად შეამცირა. არის ცნობები, რომ ერთხანობას მათ ფრიგიაც უნდა სჭეროდათ. ძვ. წ. აღ. VI საუკუნიდან მესხები უკვე სპარსელთა მოხარკენი არიან, ამ დროს ისინი უკვე მუშკების ძველი ტერიტორიის მხოლოდ ჩრდილო ნაწილში სახლობდნენ. მისი ტერიტორიის დიდი ნაწილი სამხრეთიდან მოზღვავებულ უცხო ტომებს უჭირავთ.

მუშკების მეურნეობის შესახებ არსებული ცნობებიდან ირკვევა, რომ იგი საკმაოდ დაწინაურებულია და მისი სოფლის მეურნეობა იცნობს ინტენსიურ დარგებსაც, განსაკუთრებით კი – მევენახეობას. აშურნასირპალ II-ს (884-860 წწ.) მუშკები ხარკის ნაწილს ღვინითაც უხდიან. ამასთან ერთად, ხარკის სიებში იხსენიება თითბრის ჭურჭე-

⁵¹ იქვე, გვ. 434. Меликишвили Г. Наири-Урарту, Тб., стр. 1954, 175-176

⁵² იქვე, გვ. 435.

ლი, ხარები და ცხვრები.⁵³ ეზეკიელიც ტვიროსში „რვალის ჭურჭლისა“ და „კაცთა სულების“ მოვაჭრეებად თობელთან ერთად მოსოსსაც ასახელებს.⁵⁴

მუშკების სოციალური მდგომარეობის შესახებ იგივე შეიძლება გავიმეოროთ, რაც ტაბალზე ვთქვით.

ძვ. წ. აღ. VIII საუკუნეში ურარტუს მიერ დიაუხის სამეფოს განადგურებამ და თვით ურარტუს შემდგომმა დაძაბულობამ ნიადაგი მოუმზადა ახალი ქართველური გაერთიანების გაძლიერებას, რომელიც ურარტულ წყაროებში **კულხას** (კოლხას) სახელით იხსენიება. პირველადი ტერიტორიულ-ეთნიკური ერთეული, რომელიც ამ გაერთიანების ბირთვს წარმოადგენდა, როგორც მკვლევარები ამტკიცებენ (ივ. ჯავახიშვილი, ს. ჯანაშია, გ. მელიქიშვილი), კოლას თემი უნდა ყოფილიყო, აქედანვე გამოყავთ სახელწოდება კოლხი.⁵⁵

როგორც ჩანს, კულხა განზე იდგა და არ მოყოლია კიმერიელთა და სკვითთა თარეშის არეში, პირიქით, კიმერიელთა შემოსევებმა და შემდგომ, ნაწილობრივ ამ ნიადაგზე, წინა აზიის უძლიერეს სახელმწიფოთა დაცემამ ხელსაყრელი ნიადაგი შექმნა კულხას გაძლიერებისათვის. მომდევნო ხანის წყაროების ცნობით (ჰეკატე), მის შემადგენლობაში მესხებიც (οἱ Μόσχοι) შედიან. ამრიგად, კულხა ძველი დიაუხისა და მუსკების მემკვიდრედ გამოდის. იგი ემეზობლება ტაბალსაც. მისი ტერიტორია მტკვრის სათავეებისა და ჭოროხ-რიონის აუზთა რაიონებშია გაშლილი.

ძვ. წ. აღ. II ათასწლეულის მეორე ნახევრიდან ხეთების სახელმწიფო მძიმე ბრძოლებს აწარმოებს შავი ზღვის სანაპიროზე, პონტოს მთებში მოსახლე ქაშქთა ტომების წინააღმდეგ.⁵⁶ ქაშქები ხეთების სამეფოს ჩრდილო და ჩრდილო-აღმოსავლეთით სახლებულან და, როგორც გ. მელიქიშვილი აღნიშნავს, ეჭირათ ზოგი ის ტერიტორია ტრაპეზუნტისა და ლალისის დინებათა რაიონში შავი ზღვის სამხრეთ-აღმოსავლეთ კუთხეში, რომელიც შემდეგ ისტორიული კოლხეთის შემადგენლობაში შედიოდა.⁵⁷ ხეთების სახელმწიფოს განადგურების შემდეგ ქაშქების ტომები საუკუნეების სიგრძეზე ებრძვიან ასირიას.⁵⁸ ქაშქების მეურნეობაში წამყვანი დარგი მეცხოველეობა ყოფილა, ხოლო

⁵³ იქვე, გვ. 31.

⁵⁴ ეზეკიელი, XXVII, 13.

⁵⁵ ჯავახიშვილი ივ., საქართველოს, კავკასიისა და ახლო აღმოსავლეთის ძირითადი ისტორიულ-ეთნოლოგიური პრობლემები, თბ., 1950, გვ. 12. Меликишвили Г. А., Наири-Урарту, Тб., 1954, стр. 59-63.

⁵⁶ Авдиев В.И., История Древнего Востока, М., 1953, стр. 345.

⁵⁷ მელიქიშვილი გ., ქაშქების ხალხის ეთნიკური ვინაობის საკითხისათვის, „მომომხილველი“, III თბ., 1953, 193 და შმდგ. მისივე, Наири-Урарту, стр. 73 и т.д.

⁵⁸ იქვე.

სოციალურად ისინი გვაროვნული წყობილების სტადიაზე იმყოფებიან. გ. მელიქიშვილმა წყაროებში დაცული მასალების საფუძველზე ცხადყო, რომ ქაშქებთან, მითითებულ ხანაში (ძვ.წ. XIV-XI და მომდევნო საუკუნეები), უნდა არსებულიყო გვაროვნული სამხედრო დემოკრატია, სატომო საბჭო, უხუცესთა საბჭო და სუვერენული, მემკვიდრეობითი ბელადი.⁵⁹

ზემოთ მოყვანილი მასალების საფუძველზე, დასავლურ-ქართულ ტომთა სოციალური განვითარების სურათი ძვ. წ. აღ. X-VII საუკუნეებში, ალბათ, შემდეგნაირად უნდა წარმოვიდგინოთ: მთაში უკვე იგრძნობა „პირველყოფილი თემური წყობილების ბზარი – ეგრეთ წოდებული გვაროვნული არისტოკრატის გამოყოფის პროცესი“⁶⁰ (ერთდროული სამარხების ინვენტარის სხვადასხვაობა, გადაგვარებული სახის საბრძოლო იარაღი – სარიტუალო-საკულტოდ ქცეული), მაგრამ მთა სოციალური განვითარების დონით ამ დროს დიდად ჩამორჩება ბარს. ამ დროის ბარში სოციალური დიფერენციაციის პროცესი საკმაოდ შორსაა წასული. ისახება მონობა, ტომთა გაერთიანებისათვის ბრძოლა წარმოშობს ჰეგემონ და დამორჩილებულ ტომებს, რაც აჩქარებს გაძლიერებული ტომის ბელადის პოლიტიკური ევოლუციის ტემპს. ასეთ ბელადს თანდათან უჩნდება პოლიტიკური ჰეგომონისათვის დამახასიათებელი ფუნქციები: დამორჩილებული ტომებისა და მონების მორჩილებაში ყოლა, თავდაცვისა და მეურნეობის (მეტალურგია, მელიორაცია, ტექნიკური კულტურები ...) ორგანიზაცია, საერთაშორისო ვაჭრობაში მონაწილეობა და ა.შ. ჩვენ არ შეგვიძლია თვალი მივადევნოთ ამ პროცესების კონკრეტულ გამოვლინებას, მაგრამ ძვ. წ. აღ. VI საუკუნისათვის უკვე კოლხთა სახელმწიფო გამოჩნდება და ამ მრავლისმეტყველი შედეგის მიხედვითაც შეგვეძლო დაგვესკვნა, რომ სოციალური დიფერენციაციის პროცესი კულხას გაბატონებულ ტომში დიდი ხნის წინათ იყო დაწყებული. კულხა ხომ დიაუხის სამეფოს პირდაპირი მემკვიდრე იყო.

⁵⁹ დაწვრილებით იხ. დასახ. ნაშრომი „მიმომხილველი“, III, 193-205.

⁶⁰ გობეჯიშვილი გ., არქეოლოგიური გათხრები საბჭოთა საქართველოში, თბ., 1952, გვ. 57-58.

თავი I
შავი ზღვის სანაპიროს ქართველური ტომები
კვ. V. VI-I საუკუნეებში

**§1 ქართველურ ტომთა გავრცელების რაიონი შავი ზღვის
სანაპიროზე**

ჩვენ დრომდე შემონახული წერილობითი წყაროების შესწავლის საფუძველზე უკვე საყოველთაოდ აღიარებულად ითვლება, რომ ჩვენთვის საინტერესო პერიოდამდე დიდი ხნის წინ ქართველური ტომების ადგილსაცხოვრებელი უფრო ფართო ტერიტორიას მოიცავდა და შორს იყო გავრცელებული სამხრეთისაკენ; იგი ძველადმოსავლურ ხანაში შუამდინარეთისა და დასავლეთ აზიის ცნობილ მონარქებს ემეზობლებოდა და არამცირე უსიამოვნებას აყენებდა მათ. ქართველი ერის დღევანდელი საცხოვრებელი, როგორც ს. ნ. ჯანაშიამ გამოიკვლია, ქართველ ტომთა ძველი კულტურულ-პოლიტიკური ცენტრების ჩრდილოეთით მდებარეობდა და მის ერთ-ერთ მეტად დაწინაურებულ პერიფერიას წარმოადგენდა.

ისტორიამ იცის მაგალითები, როცა ესა თუ ის ხალხი ან ტომი სრულებით ქრება საისტორიო სარბიელიდან – ერწყმის სხვა ხალხს, კარგავს ენას, თვითმყოფობას და ალბანელი აზერბაიჯანელად, შავში თურქად და ა.შ. გვეკლინება. ხდება ისეც, რომ ამა თუ იმ ხალხს სხვა ტომებისა და ხალხების მოწოლის გამო ადგილსაცხოვრისი უმცირდება, უცხოთა მიერ დაკავებული ტერიტორიის აბორიგენი მოსახლეობა ნაწილობრივ ერწყმის მოსულს, რაც მოსულის ენაში აისახება და მას საუკუნეების შემდეგაც შენიშნავენ ამ ენის ლექსიკაში, ნაწილობრივ იყრება, ან იჟლიტება. სწორედ ასეთი ბედი ეწია ქართველური ტომების დიდ ნაწილს: ჯერ სემიტური, ხოლო შემდეგ ე. წ. ინდოევროპული ტომების მოწოლის შედეგად მათი გავრცელების რაიონი სამხრეთისაკენ თანდათან მცირდებოდა. ეს პროცესი შუა საუკუნეების მიწურულამდეც არ შეწყვეტილა.

ჩვენთვის საინტერესო ხანის დამდეგს ქართველ-ქართველური ტომების გავრცელების რაიონის სამხრეთი ზღვარი შორს იყო გაწეული დღეს არსებული საზღვრებიდან. აპოლოდორის ცნობით, რომელიც სტრაბონთანაა დაცული, იბერიის სამხრეთი საზღვარი მდ. არაქსი ყოფილა. ბერძენ-ლათინ ავტორებთან დაცული ცნობები საშუალებას იძლევა, აგრეთვე, გავითვალისწინოთ ქართველ-ქართველურ ტომთა განსახლების რაიონი შავი ზღვის სანაპიროებზე, მაგრამ, სანამ ამ

ცნობების უშუალო გამოყენებას დავიწყებდეთ, საჭიროდ მიმაჩნია ზოგიერთი შენიშვნა გავაკეთო:

ბერძნების მიერ შავი ზღვის სანაპიროების გაცნობა ძვ. წ. აღ. VIII საუკუნიდან იწყება და აქედანვე ჩნდება პირველი კონკრეტული ცნობები მათ შესახებ (ჰესიოდე). მაგრამ ეს ცნობები მეტად ბუნდოვანია და თანაც განიცდის იმ წარმოდგენების გავლენას, რომლებიც ბერძნებს ამ სანაპიროების გაცნობით შეუძუშავდათ. ძვ. წ. აღ. VIII საუკუნეში ბერძნების მიერ ჩატარებული ცდა შავი ზღვის სანაპიროებზე კოლონიების დაარსებისა (სინოპი) მიდია-სპარსეთის წინა აზიის სცენაზე გამოსვლის გამო ფერხდება და ძვ. წ. აღ. VII-VI საუკუნეში ახალი ძალით ჩაღდება, რაც ეგეოსის სამყაროს სოციალ-ეკონომიური მდგომარეობითაც იყო შეპირობებული. აქედან იწყება ნამდვილი კონკრეტული და, შეიძლება ითქვას, რეალური სინამდვილის ამსახველი ცნობების გაჩენა ბერძნულ ლიტერატურაში. მაგრამ ასეთი ცნობების გვერდით, არსებობენ ზღაპრული და ხშირად ურთიერთგამომრიცხავი ცნობებიც, რომლებშიც ნამდვილის ზღაპრულისაგან გამოცალკევება სიძნელეს წარმოადგენს. ეს გარემოება შედეგია არა ამა თუ იმ ავტორის ნიჭიერება-უნიჭობისა, არამედ იმ წყაროების სიჭრელისა, რომლითაც ეს ავტორები სარგებლობდნენ. ბერძენ-ლათინი მწერლების ცნობებზე მუშაობისას თვალში გვეცემა ტომების სიმრავლე, რომელთაც ეს ავტორები შავი ზღვის სანაპიროზე ასახელებენ. როგორც ცნობების ურთიერთშეპირისპირებით შეიძლება ვიფიქროთ, აქ მოსახლე ტომების რიცხვი ისეთი დიდი არ უნდა იყოს, როგორც ამ ავტორებს აქვთ წარმოდგენილი. ეს განსაკუთრებით შეეხება შავი ზღვის სამხრეთ სანაპიროებზე მოსახლე ქართველურ ტომებს. სამხრეთ სანაპიროები, სადაც ბერძენ-ლათინი ავტორების წარმოდგენით, ტომთა სიმრავლე განსაკუთრებით დიდია, მთიანი ქვეყანაა, რომელიც, ცხადია, ხეობებადაა დაყოფილი. ცალკეულ ხეობათა მოსახლეობა სხვადასხვა სახელით იწოდება, ისევე, როგორც, მაგალითად, დღეს ქართლის მთიანეთის მოსახლეობა (თუშები, ფშავეები, ხევსურები, მოხვევები, მთიულები და ა.შ.). თვით თემის, ხეობის მცხოვრები, იმის მიხედვით, თუ ვისთან უხდება მას საუბარი, თავის თავს სხვადასხვა სახელით იხსენიებს: ჩოხატაურელი გურული გურიის სხვა კუთხის მცხოვრებს ეტყვის, რომ ის ჩოხატაურელია, მეგრელს ეტყვის რომ ის გურულია, ხოლო რუსთან საუბარში თავის თავს ქართველს უწოდებს და იგი ყველა შემთხვევაში მართალია. გარდა ამისა, ესა თუ ის თემი, ხეობა ან ტომი თავის თავს აღნიშნავს ერთი გარკვეული სახელით (ფშაველი, გურული, ქართლელი ...), მაგრამ გარდა ამისა, მას კიდევ აქვს რამდენიმე სახელი, რომელიც მისთვის შორეულ თუ ახლობელ მეზობლებს შეურქმევიათ: ქართველი, ივირქ, კოხივ, ქორთუ, აქრთუა;

სომეხი, ჰაი, არმენი, ...; მეგრელი, მარგალი, აგრუა, მზან, ტოლა; თუში, მოსკო, ტუსკო; სვანი, მუშვენ, აფუნუა; ლუმი, ჰობოლალ და ა.შ. ასეთი მაგალითების მოყვანა კიდევ შეიძლებოდა, მაგრამ მოყვანილიც საკმარისია იმის ცხადსაყოფად, თუ რა ვითარება შეიძლებოდა ყოფილიყო ძველი ავტორების შეცდომის წყარო. ბერძნებსა და რომაელებს თავიანთი საქმიანობის დროს ურთიერთობა აქვთ მრავალ ტომთან და თემთან. აქ ისინი ისმენენ მრავალ თითქოსდა ეთნიკურ სახელწოდებას, რომელთაგან ბევრი, სინამდვილეში, ერთი და იგივე შინაარსის მატარებელია. ცხადია, ადგილობრივი ენების უცოდინარ ბერძენ ვაჭარს ან მოგზაურს ვერ მოვთხოვთ სიზუსტე დაეცვა და უშეცდომოდ ეწერა. ჰეროდოტეც კი ვერ ახერხებს დააზღვევოს თავისი „ისტორია“ ზღაპრული ცნობების შეტანისაგან; მაგრამ ბერძნულ-ლათინურ ლიტერატურაზე დაკვირვებით ირკვევა, რომ მომდევნო თაობები ალღოს უღებენ წინა თაობათა მიერ დაშვებულ შეცდომებს და ცდილობენ მათ გასწორებას. ადგილობრივი ეთნოგრაფიული რუკის უფრო დაბეჭდვით გაცნობა მათთვის აშკარას ხდის, რომ, სადაც მათ წინაპრებს ტომი ეგულებოდათ, იქ სინამდვილეში თემი ყოფილა. ისინი იგებენ, რომ ხშირად რამდენიმე სახელში ერთი და იგივე ტერიტორიაა აღნიშნული. შეიძლებოდა მოგვეყვანა მაგალითი, სადაც წინა თაობათა შეცდომებს ასწორებენ მომდევნო ხანის ავტორები (სტრაბონი, არიანე, სტ. ბიზანტიელი და სხვ.) და გვაფრთხილებენ მაკრონებისა და სანების, დრილებისა და სანების, ზიდრიტების და ბიზერების და ა.შ. იგივეობაზე.

ამგვარად, ბერძენ-ლათინი ავტორების მიერ მოწოდებული ცნობები შავი ზღვის სანაპიროების ეთნიკური შემადგენლობის შესახებ დიდი სიფრთხილით უნდა იქნას გამოყენებული; ყოველ ცალკეულ შემთხვევაში ცნობა შემოწმებული უნდა იქნას მთელი ლიტერატურული მემკვიდრეობის სინათლეში, თვით გვიანფეოდალური ლიტერატურის ჩათვლით. უკანასკნელი, რიგ შემთხვევებში, გადამწყვეტი კორექტორის მნიშვნელობას იძენს (იხ. მიხაელ პანარეტის ცნობები ხალიბებზე და ხალდებზე, შეუდარეთ სტრაბონის ცნობებს იმავე ტომზე).

მაგრამ ბერძნულ-ლათინური ცნობების გამოყენებისას შეცდომებისაგან თავის დასაზღვევად მარტო ზემოაღნიშნულის გათვალისწინება არ არის საკმარისი, არამედ უნდა გვახსოვდეს, რომ დროთა ვითარებაში ხდება გარკვეული სახელის შინაარსის შეცვლა-გაფართოება ან შევიწროება. ცხადია, ერთნაირი მოცულობის შინაარსის არ არიან ქსენოფონტისა და სტრაბონის მოსინიკები, ხალიბები, ტიბარენები და ა.შ. გვხვდება ისეთი შემთხვევებიც, როდესაც ლიტერატურაში ერთბაშად ქრება მთელი რიგი ტომების ხსენება. მათ ტერიტორიაზე ახლა

სხვა სახელის ტომები ან ტომი იხსენიება. ამის მიზეზი, ჩვენ მიერ ზემოთ მითითებულ გარემოებათა გარდა, ძირითადად, პოლიტიკური ვითარების ცვლილებებში ჩანს საძიებელი: პოლიტიკურად გაბატონებული ტომი თუ თემი თავის სახელს თავს ახვევს მის მიერ დამორჩილებული ტომებისა და თემების ჯგუფს და შთანთქავს მათ სახელებს. ამის კარგ მაგალითად ზანების (ლაზების) მაგალითი იკმარება. პლინიუს სეკუნდთან (ახ. წ. 79 წ.) ის შავი ზღვისპირეთის ერთი ტომთაგანია, რომელიც კოლხებსა (ეთნიკური და არა პოლიტიკური მნიშვნელობით) და მდ. აფსარის სანაპიროზე მცხოვრებ ჰენიოხ-ამპრევტებს შორის არის მოქცეული.⁶¹ დაახლოებით ისეთივე მდგომარეობა უჭირავთ მათ არიანეს დროს.⁶² არიანე ასახელებს ზღვის სანაპიროზე მოსახლე ლაზების შორეულსა და ახლოებულ მეზობლებს: ზიდრიტებს, აბსილებს, აბაზგებს, სანიგებს. პტოლემეაიოსის დროს კოლხიდის ზღვის სანაპიროები უკვე ლაზებს უჭირავთ,⁶³ ხოლო არიანეს ანონიმი რედაქტორი კი გვაცნობებს, რომ „დიოსკურიიდან ანუ სევასტოპოლისიდან მდ. აბსარამდე წინად ცხოვრობდა ხალხი (ἔθνος) წოდებული კოლხებად და სახელგადარქმეული (μετονομασθεντές) ლაზებად“-ო.⁶⁴ ასე გააქრო ლიტერატურული ხსენებიდან ტომების მთელი ჯგუფი პოლიტიკური ვითარების შეცვლამ. მსგავსი მაგალითი სამხრეთ სანაპიროების ტომთა ცხოვრებიდანაც შეიძლება მოგვეყვანა. სტრაბონი ერთგან გვაცნობებს, რომ ეხლანდელი ხალხები წინათ ხალიბებად იწოდებოდნენ (Οἱ δὲ νῦν Χαλδαῖοι Χάλυβες τὸ παλαιὸν ὀνομάζοντο...)⁶⁵ ჩვენ სრული უფლება გვაქვს სტრაბონის ეს ცნობა პირდაპირი მნიშვნელობით არ გავიგოთ, რადგან სტრაბონამდელი ავტორის ქსენოფონტის ცნობიდან ვიცით, რომ ხალიბები და ხალდები სხვადასხვანი არიან. ასევე სტრაბონიდან 14 საუკუნის შემდეგ, ტრაპეზუნტელი მემათიანე მიხაელ პანარეტი გვაცნობებს, რომ ხალიბია და ხალდია სულ სხვადასხვა პროვინციებია, რომელთა მცხოვრებთ ხალიბები და ხალდები ეწოდებათ.⁶⁶ სტრაბონის ეს ცნობა ემყარება მისი ან მისი წყაროს დროისათვის ხალდების ხალიბებზე პოლიტიკური ჰეგემონობის ფაქტს და ასეთ გარემოებაშია გასაგები.

ამგვარად, ბერძნულ-ლათინურ გეოგრაფიულ ლიტერატურაში არსებული ცდომილებანი სხვადასხვა წყაროდან შეიძლება ამოდიოდეს. ყოველი კონკრეტული შემთხვევის გათვალისწინება-შემოწმება, ცხადია,

⁶¹ Plin., VI, §11. SC. II, 178.

⁶² PPE., §15. SC. I, 222.

⁶³ Ptol., V, 9, §5. SC, I, 241.

⁶⁴ P_s. PPE, §48. SC, I, 275.

⁶⁵ Strab., XII, 3, §19, SC, I, 158.

⁶⁶ Панарет М., Трапезунтская хроника, М., 1905, 3,15,16::34,35,38,40.

შეუძლებელია საკონტროლო მასალების უადრესი სიმცირის გამო, მაგრამ იქა-აქ ასეთი მასალები იპოვება და საშუალება გვეძლევა ამა თუ იმ ცნობის ავტორიანობა შევამოწმოთ.

ზემოაღნიშნულ გარემოებათა გათვალისწინებით, ჩვენ შეგვიძლია ადგილი მივუჩინოთ ჩვენთვის საინტერესო ტერიტორიის ტომებს, თემებს და სხვა ტომობრივ დაჯგუფებებს.

ტიბარენები: ანტიკური პერიოდისათვის შავი ზღვის სანაპიროზე მოსახლე ტომთაგან ყველაზე სამხრეთით ტიბარენები სახლებულან. მათ შესახებ ცნობას იძლევა არაერთი ბერძენი და რომაელი ავტორი: ჰეკატე მილეთელი, ჰეროდოტე, ქსენოფონტე, ფსევდო-სკილაქს კარიანდელი, აპოლონ როდოსელი, ანონიმი (სკიმნ ქიოსელი?), სტრაბონი, პომპონი მელა, ვალერი ფლაკი, დიონისე, ზინობიოსი, პორფირი, ევსევი და სხვები.

ტიბარენების ადგილსაცხოვრისის ზოგადი განსაზღვრისათვის გადამწყვეტია ქსენოფონტის ცნობა, რომლითაც კოტიორა ტიბარენების ქვეყანაშია.⁶⁷ ჰეკატე მილეთელის ცნობით, ტიბარენებს აღმოსავლეთით მოსინიკები ესაზღვრებიან.⁶⁸ ასეთივე ცნობა აქვს ფსევდო სკილაქს კარიანდელსაც.⁶⁹ ძვ. წ. აღ. I საუკუნის უსახელო ავტორის (სკიმნ ქიოსელი?) ცნობით, ტიბარენები აღმოსავლეთით კერასუნტამდე ვრცელდებიან,⁷⁰ ხოლო სტრაბონის ცნობით, ტიბარენები მრავალტომიანები არიან. ... Προς νότον δὲ τῆς Ὑπικανίας θαλάττης, ἐκ μέρους καὶ τοῦ ἰσθμοῦ παντός, ματαξὺς ταύτης καὶ τοῦ Πόντου τῆς τε Ἀρμενίας ἢ πλείστη κεῖται καὶ Κολχίς καὶ Καππαδοκία σύμπασα μέχρι τοῦ Εὐξείνου Πόντου καὶ τῶν Τιβαρηνικῶν ἔθνων...⁷¹ მეორეგან სტრაბონი გვამცნობს, რომ ტიბარენია და კოლხიდა მოსაზღვრეები არიან. მათ შორის საზღვარი, მისი თუ მისი წყაროს ცნობით, ტრაპეზუნტის მთაა, რომელიც ტავრის მთიანეთში მდებარეობს... ἐν δὲ τῇ ὀρεινῇ τῶν Τιβαρηνικῶν καὶ τὸ ὄρος ἐστὶν ὁ Τραπεζοῦς, ὁ μῦσμον τῆ πόλει τῆ περι τὴν Τιβαρηνίαν καὶ τὴν Κολχίδα...⁷² მე-12 წიგნში სტრაბონი აღნიშნავს, რომ ფარნაკისა და ტრაპეზუნტის სამხრეთის ზემოთ, მცირე არმენიამდე, ცხოვრობენ ტიბარენები და ხალხები (ὑπὲρ μὲν δὲ τῶν περι

⁶⁷ Xenoph., V, 5, §2.

⁶⁸ Fr., 193. SC, I, 3.

⁶⁹ Scil., 87. SC, I, 86.

⁷⁰ Περίγηγος, §911. SC, I, 90-91.

⁷¹ Strab., II, 5, §31, SC, I, 105.

⁷² იქვე, VII, 4, §3. SC, I, 124.

Φαρνακίαν καὶ Τραπεζοῦντα τόπων οἱ Τιβαρηνοὶ καὶ Χαλδαῖοι μέχρι τῆς μικρᾶς Ἀρμενίας εἰσὶν...)⁷³

როგორც ზემოთ მოყვანილი ამონაწერებიდან ჩანს, სტრაბონს ტიბარენულ ტომად მიაჩნია ხალიბებიც, რომლებიც ასევე ტრაპეზუნტის სამხრეთით და სამხრეთ-დასავლეთით ცხოვრობდნენ.* გამოვალთ რა იმ გარემოებიდან, რომ ხალიბებიც ტიბარენულ ტომს წარმოადგენს, ჩვენ საშუალება გვეძლევა „ტიბარენული ხალხების“ საცხოვრისი შემოფარგლოთ არა მარტო სტრაბონის, არამედ გაცილებით უფრო ადრეული ხანისათვის. იგი ერთგან გადმოგვცემს, რომ ანტიოქოზ დიდის სატრაპებმა არტაქსიმ და ზარიადრიმ, რომლებმაც არმენიის ორი სამეფო დააარსეს, მეზობლებს მიწები წაგლიჯეს და კერძოდ: „იბერებს პარიადრის კალთები და კირს იქით მდებარე ხორზენე და გოგარენე, ხალიბებს და მოსინიკებს კარინიტიდა და ქსერქსენე, რომლებიც ესაზღვრებიან მცირე არმენიას, ან მის ნაწილსაც კი შეადგენენ, კატაონებს აკილისენა და ანტიტავრის მიმყოლი ოლქი“.⁷⁴ არმენიის მიჯნას, მისი სიტყვით, „ჩრდილოეთით შეადგენენ კასპიის ზღვის ზემოთ მდებარე პარახოათრის მთები, ალბანები, იბერები და კავკასი, რომელიც მოიცავს ამ ხალხებს და ეკვრის არმენიის /მთებს/, იგი ეკვრის აგრეთვე მოსხურ მთებს და კოლხურსაც, ვიდრე ეგრეთ წოდებულ ტიბარენებამდე. დასავლეთით /არმენიის საზღვარს შეადგენს/ ეს ხალხები და პარიადრი და სკიდასი, ვიდრე მცირე არმენიამდე და ევფრატის ხეობამდე, რომელიც განყოფს არმენიას კაპადოკიისა და კომაგენესაგან“.⁷⁵ როგორც ს. ჯანაშიამ გამოარკვია, სტრაბონის მიერ მოხსენებული პარიადრი, სკიდასი და მოსხური მთები „ეს პონტოს მთაგრეხილის სხვადასხვა ნაწილია; სკიდასი ის მთებია, რომელიც გირესუნ-კერასუნტისა და ტრაპიზონ-ტრაპეზუნტის ხაზზე გასდევს შავი ზღვის სანაპიროს: მოსხური მთები სკიდასის გაგრძელებაა აღმოსავლეთისაკენ, გადაჭიმული ტრაპეზუნტ-ბაიბურდის ხაზიდან, ვიდრე ჭოროხის ქვემო წელამდე. პარიადრი კიდევ ყველაზე დასავლეთით მდებარე ნაწილი, რომელიც, სტრაბონის წარმოდგენით, იწყება ფატი-სა-თერმეს რაიონიდან და გასდევს დასავლეთისაკენ“.⁷⁶ კარინიტიდა და ქსერქსენე, რომელიც სკიდარის მთების აღმოსავლეთ კალთებზე და მის აღმოსავლეთით მდებარეობდა, მდინარეების არაქსისა და ევფრატის სათავეების დასავლეთით, ძველი წელთაღრიცხვის მეორე საუ-

⁷³ იქვე, XII, 3, §28. SC, I, 159-160

* ტიბარენებისა და ხალიბების შესახებ იხ. აგრეთვე პ. ინგოროყვას შრომა „ვიორგი მერჩულე“, მნათობი, 1950, №7

⁷⁴ იქვე, XI, 14, §5. SC, I, 155.

⁷⁵ Strab., XI, 14, § I. SC, I, თარგმანი ს.ნ. ჯანაშიასი. იხ. შრ., II, 264.

⁷⁶ ს. ჯანაშია, პარიადრი, სკიდასი, მოსხური მთები, შრ. II, 266.

კუნის 80-იან წლებამდე ქართველურ გაერთიანებათა შემადგენლობაში ყოფილა, ხოლო ამ დროიდან კი მცირე არმენიის შემადგენლობაში შესულა. სტრაბონის დროს სკიდასისა და პარიადრის მწვერვალები ჰეპტაკომიტებით, მოსინიკებით და ბიზერებით ყოფილა დასახლებული, გადაღმა კი უკვე მცირე არმენია იწყებოდა.⁷⁷

ამგვარად, ძვ. წ. აღ. II საუკუნის დამდეგიდან „ტიბარენული ხალხების“ ადგილსაცხოვრისის აღმოსავლეთი საზღვარი პარიადრისა და სკიდასის, ანუ აღმოსავლეთ პონტოს მთაგრეხილის მწვერვალებზე გადიოდა.

„ტიბარენულ ხალხებს“ სამხრეთიდან, სტრაბონის ცნობით, კაპადოკია ესაზღვრებოდა. თუ მის ცნობას მივყევით, მდინარე ღალისის ქვემო წელში შესართავამდე და მის აღმოსავლეთით გადილონიტიდაა, კიდევ აღმოსავლეთით კი სარამინი,⁷⁸ ხოლო კამბისინა, რომელიც ღალისისა (ციზილ-ირმაკი) და ირისის (იეშილ-ირმაკი) სათავეებში მდებარეობდა, ამ დროს არმენიის შემადგენლობაშია.⁷⁹ ყოველივე ზემოაღნიშნულიდან გამორიცხვის გზით მივიღებთ, რომ ტიბარენიისა და კაპადოკიის შეხებისათვის ადგილი მდ. ღალისის დიდი რკალის აღმოსავლეთით რჩება,⁸⁰ უფრო ირის-ლიკის ხაზზე. ამგვარად, გარკვეული ხანისათვის „ტიბარენული ხალხების“ საცხოვრისის სამხრეთი საზღვარი მდ. თერმოდონტის სამხრეთით ირის-ლიკის დინებას გაყვებოდა და პარიადრზე შეყოლებით ჩრდილოეთისაკენ მიდიოდა.. პომპონი მელასთან დაცული ერთი ცნობა ამტკიცებს, რომ ანტიკურ ლიტერატურას შემოუნახავს ცნობა, რომლითაც ტიბარენელ ხალხებს მდ. ღალისზე უცხოვრიათ. იგი, როგორც ჩანს, ძალიან ძველი წყაროდან უნდა ამოდიოდეს. “(პაფლაგონიელებთან). უახლოეს ხალხებს, – ამბობს იგი, – აქვთ უბრწყინვალესი ქალაქები ამისი და სინოპი, კინიკ დიოგენის სამშობლო, ხოლო მდინარეებიდან ღალისი და თერმოდონტი. ღალისზე მდებარეობს ქალაქი ლიკასტო, ხოლო თერმოდონტზე – ველი. მასზე იყო ქალაქი თემისკირა“ (chalybes proximi clarissimos habent[urbes] Amison et Sinopen, cynici Diobenis patriam, amnium Halyn urbs sdt Yicasto, ot Thermodonta campus in eo fuit Themiscurum oppidum...)⁸¹. ჩვენ მიერ აღნიშნულ მოსაზრებას მხარს უჭერს ის გარემოებაც, რომ სახელი „ღალისი“ ჭანურ ენაში მდინა-

⁷⁷ იქვე, XII, 3 §18. SC, I, 158.

⁷⁸ იქვე, XII, 3 §13. SC, I, 157.

⁷⁹ იქვე, XI, 14 §4. SC, I, 155.

⁸⁰ შრდ. ს. კაკაბაძე, ქართული სახელმწიფოებრიობის გენეზისის საკითხები, საისტორიო მოამბე, I, თბ., 1924 წ., გვ. 60 და შმდგ.

⁸¹ Pomp. Mela, I, 105. SC, II, 117.

რის ზოგად სახელად ქცეულა.⁸² ყურადსაღებია ის გარემოებაც, რომ კონსტანტინეპოლში შავი ზღვის სამხრეთ სანაპიროს მცხოვრებლებს, სინოპელებისა და სამსუნელების ჩათვლით, ლაზებს ეძახიან. ე.ი. ეს ადგილები მათ ქართველური მოდგმის ადგილსაცხოვრისად აქვთ წარმოდგენილი. მართლაც, როგორც ივ. ჯავახიშვილმა გაარკვია, ძველი ტაბალის ტერიტორიას სამხრეთით კილიკია საზღვრავდა, აღმოსავლეთით – ევფრატი, სამხრეთ-აღმოსავლეთით – კუმუხი, ე. ი. მას ის ტერიტორია ეჭირა, რომელიც შემდეგ დიდ კაპადოკიად არის ცნობილი.⁸³ ტაბალის არსებობას მცირე აზიაში დიდი კაპადოკიის ტერიტორიაზე, როგორც ეს გელცერმა გამოთქვა პირველად, ბოლო მოუღო კიმერიელებისა და სკვითების შემოსევებმა. ამ შემოსევებით შეწუხებული თუბალური ტომები ჩრდილოეთისაკენ გაიწევენ და აძლიერებენ შავი ზღვის სამხრეთ სანაპიროებზე მოსახლე ქართველ ტომებს, რომლებიც თუბალის პერიფერიას წარმოადგენდა და რომელსაც შერჩა ამ მოდგმის სახელიც – „ტიბარენი“.⁸⁴ გ. ჩიტაიას აზრით, ტიბარენებსა და მესხებს გარკვეულ პერიოდში ლიდიელებისა და თირსენ-ეტრუსკების მეზობლადაც უცხოვრიათ, რაზედაც სახვნელი იარაღების იგივეობაც მიგვითითებსო.⁸⁵ ასევე ს. ნ. ჯანაშია, ანალიზს უკეთებს რა ასურული და ებრაული წყაროების ცნობებს, მიუთითებს, რომ ებრაელ ავტორებს თუბალ-თობელთა ტერიტორია ჩრდილოეთით, ხმელთაშუა ზღვის მონაპირე ხალხების მეზობლად აქვთ ნაგულისხმევი.⁸⁶

ტიბარენები იბერული მოდგმის წარმომადგენლები არიან, რომლებიც ისტორიულ ქარტახილს შავი ზღვის სამხრეთ სანაპიროზე მიუმწყვდევიან.⁸⁷ მათი ერთი ნატეხი მცირე აზიის ცენტრალურ რაიონებში, როგორც ციცერონის წერილიდან ირკვევა, ძვ. წ. აღ. I საუკუნეში ჯერ კიდევ ყოფილა გადარჩენილი (ძვ. წ. აღ. 51 წ. კილიკიის პროკონსული მარკ ტული ციცერონი ბრძოლას აწარმოებს აჯანყებული „ტიბარენების“ წინააღმდეგ).⁸⁸ საინტერესოა, რომ IV საუკუნის ავტორი ევსევი ტიბარენებს იაფეტური მოდგმის ტომად ასახელებს.⁸⁹

⁸² Март Н.Я., Из поездки в Турецкий Лазистан, ИАН, 1910, стр. 607-608. Адонц Н., Армения в эпоху Юстиниана, СПб, 1908, стр 59. (ТР по Грузинско-Армянской филологии, XI). აღონცი სახელწოდებას „Haly-s“ უკავშირებს ლაზურ ღალა (მდინარე) და ქართულ წყალს („sgali“).

⁸³ ჯავახიშვილი ივ., ქართველი ერის ისტორია, I, გვ. 404 (დამატება 1).

⁸⁴ იქვე, 408-409.

⁸⁵ ჩიტაია გ., რაჭული სახვნელი, ენიშკის მოამბე, I, თბ., 1937, 287.

⁸⁶ ჯანაშია ს., თუბალ-თაბალი, ტიბარენი, იბერი, ენიშკის მოამბე, I, 237.

⁸⁷ მისივე, უძველესი ეროვნული ცნობა ქართველთა პირველსაცხოვრისის შესახებ, შრ. II, თბ., 1952, 65.

⁸⁸ მისივე, თუბალ-თაბალი, 232.

⁸⁹ Evseb. Chron., SC, I, 667.

ეფორის ცნობით, რომელიც სტეფანე ბიზანტიელთანაა დაცული, ტიბარენებს მეზობლად ხალიბები და ლევკოსირები ჰყოლიათ.⁹⁰

ტაბალ-ტიბარენი შემკრებლობითი ცნებაა ჩვენთვის საინტერესო ხანაში. სალმანასარ III-ის ცნობით, მას ტაბალის 24 მეფე ჰყოლია მოხარკედ,⁹¹ ასევე სტრაბონის მიერ „ტიბარენული ხალხების“ (ტომების) მოხსენიება საფუძველს გვაძლევს დავასკვნათ, რომ ამ სახელის შინაარსი თუმცა შემცირებულა, მაგრამ შემკრებლობითი ხასიათი არ დაუკარგავს. თვით ტომი ტიბარენები ჩვენთვის საინტერესო ხანაში სადღაც თერმოდონტის აღმოსავლეთით ცხოვრობს,⁹² მაგრამ მისი სახელი ჯერ კიდევ აფარია მთელ ტერიტორიას კაპადოკიამდე, არმენიამდე და კოლხიდამდე. აქ სხვებს შორის ცხოვრობს ტიბარენული (იბერული) მოდემის ტომი, რომელსაც ანტიკური ავტორები ხალიბების სახელით იცნობენ.

ხალიბები: პირველი კონკრეტული ცნობა ხალიბების შესახებ ჰეკატე მილეტელთანაა დაცული. მისი გადმოცემით, ხალიბები პონტოს ხალხია მდინარე თერმოდონტზე, რომელთაც სამხრეთით არმენები საზღვრავენ (Χάλυβες, περί τόν Πόντον ἔθνος ἐπὶ τῷ Θερμῶδοντι... Χαλύβιοι πρὸς νότον Ἀρμένιοι ὀμουρέουσι).⁹³ შემდეგ ცნობებს ხალიბებზე ვხვდებით ესქილესთან, ჰეროდოტესთან, ქსენოფონტესთან, ფსევდო-სკილაქს კარიანდელთან, არისტოტელესთან, აპოლონ როდოსელთან, ვალერი კატულთან, ვირგინი მარონთან, მრავალგზის – სტრაბონთან, პომპონი მელასთან, ვალერი პრობთან, ვალერი ფლაკთან, კურცი რუფთან, პლინი სეკუნდთან, აპიანესთან, ამიანე მარცელინთან და მრავალ სხვა ავტორთან.⁹⁴ მათ შესახებ ცნობა უნდა ჰქონდეს ჰომეროსსაც (ილიადა, II, 856). ხალიბების ადგილსაცხოვრისის განსაზღვრისათვის ძირითადად ქსენოფონტის „ანაბასისში“ დაცული ცნობები უნდა გამოვიყენოთ, რადგან იგი თვითმხილველის მიერაა დაწერილი. როგორც ჩვენ მიერ ზემოთ იყო აღნიშნული, ისტორიაში გვხვდება მაგალითი, როდესაც გაბატონებული ტომი თავის სახელს თავს ახვევს ტომების მთელ ჯგუფს და თავისი ბატონობის პერიოდის მთელ სიგრძეზე ნთქავს მათ სახელებს. ქსენოფონტის მიერ შავი ზღვის სანაპიროზე მითითებული ხალიბები მოსინიკებსა და ტიბარენებს შორის ცხოვრობენ და თანაც მოსინიკების ქვეშევრდომები არიან, ე. ი. ისინი ამ დროს თავის ბუნებრივ ჩარჩოებში არიან. უსპენსკის

⁹⁰ SC, I, 267.

⁹¹ ჯავახიშვილი ივ., დასახ. ნაშრ. 404-405.

⁹² შდრ. პ. ინგოროყვა, გიორგი მერჩულე, ჟურნ. მნათობი, 1950, №7, გვ. 112.

⁹³ Fr., 195. SC, I, 3.

⁹⁴ იხ. SC, I, 3, 333-334, 86, 380, 413-414, 426, 155, 158, 527-528, ... SC, II, 13, 14, 117, 25, 202-203, 127-128, 178, 181, 24, 27, 276, 360, 390, 19, 22, 325, 421...

გამოკვლევით, რომელიც ტრაპეზონურ წყაროებს ემყარება, ხალიბიად იწოდებოდა ოლქი, რომელიც იასონიის კონცხის სამხრეთით ვრცელდებოდა. ამ სახზე აშენებული იყო სიმაგრეები – ვონა, უნია, ლიმნია და სხვები. ხალიბიის მთავარი ქალაქი ნეოკესარიაა (ნიკსარ). ხალიბია წარმოადგენს ფართო ოლქს მდ. ლირისის დინებაზე.⁹⁵ ამასვე ადასტურებს ფსევდო სკილაქს კარიანდელის ცნობა, რომ ხალიბებს გააჩნიათ ჰავანი გენეტი, ქალაქი სტამენა და აკროპოლი იასონია.⁹⁶ ასევე ჰეკატე მილეთელი წერს, რომ სტამენა ხალიბების ქალაქია.⁹⁷ აპოლონ როდოსელის ცნობით ხალიბები თერმოდონტის აღმოსავლეთით ცხოვრობენ.⁹⁸ პომპინი მელასთან დაცული ცნობით, რომელზეც ზემოთ უკვე მივუთითეთ, ხალიბების ტერიტორიაზეა ამისი და სინოპი, აგრეთვე ლალისი და თერმოდონტი.⁹⁹ ამას თუ დავუმატებთ ქსენოფონტის ცნობას ხალიბების არსებობაზე სხვაგანაც, საკმაოდ ჭრელი სურათი წარმოგვიდგება, რომელთა შეთანხმება არცთუ იოლი საქმეა. მე ვფიქრობ, რომ თვითეულ შემთხვევაში ჩვენ გათვალისწინებული უნდა გვქონდეს ხალიბების პოლიტიკური მდგომარეობა. პომპინი მელასთან დაცული ცნობა, ცხადია, ეხება იმ ხანას, როდესაც ხალიბებს დაპყრობილი ყავს მეზობლები და მათ შორის ტიბარენებიც, ხოლო სტრაბონის წყაროს ხანაში ხალიბები ხალდ-ჭანებსა ჰყავთ დამორჩილებული. ხალიბები, ცხოვრობენ რა ტიბარენებსა და მოსინიკებს შორის, სამხრეთით არმენებამდე ვრცელდებიან. ხალიბია მდ. ლირისის სათავეებით უკავშირდებოდა ერზინჯანსა და კამახინას.¹⁰⁰ მამასადაძე, იგი სიღრმეში ვრცელდებოდა ფართოდ, ხოლო სანაპიროზე არც ისე დიდი ზოლი ეჭირა.

ლიტერატურაში ხალიბების შესახებ არაერთი აზრია გამოთქმული. მას შეხებიან სპეციალურად თუ გაკვრით თ. უსპენსკი, ალ. ხახანაშვილი, დიუბუა დე მომპერე, უსლარი, აბიხი, ჰამილტონი, აღონცი, ივ. ჯავახიშვილი, ს. ჯანაშია და სხვები. ალ. ხახანაშვილი, იყენებს რა სტრაბონის მცდარ ცნობას ხალიბებისა და ხალდების იგივეობაზე და, იშველიებს რა მოსე ხორენელის ცნობას ჭანთა და ხალდთა იგივეობაზე, ფიქრობს, რომ ხალიბები და ხალდები მდ. თერმოდონტზე ცხოვრობდნენ, ისევე, როგორც ახლა იქ ჭანები ცხოვრობენ (sic!).¹⁰¹ იგი ამავე დროს ეკამათება დიუბუა დე მომპერეს, რომელიც ფიქრობდა, რომ ხალიბები მდ. ალაზნის (კახეთი) სანაპიროდან უნდა იყვნენ

⁹⁵ Успенский Ф., Очерки из истории Трапезунтской империи, Л., 1929, 96.

⁹⁶ Scil., 88. SC, I, 86.

⁹⁷ Fr., 196. SC, I, 3

⁹⁸ Apol. Rod., II, 372, 405. SC, I, 413.

⁹⁹ Pomp. Mela, I, 105. SC, II, 117.

¹⁰⁰ Успенский Ф., დას. ნაშრ., გვ. 96.

¹⁰¹ Хаханов А., Древнейшие пределы расселения грузин по Малой Азии, ЗКОРГО, XXII, 6, Тб., 1903, с. 24

გადასახლებული მცირე აზიაში,¹⁰² და აცხადებს, რომ ხალიბების მოძრაობა პირუკუ უნდა ყოფილიყო მცირე აზიიდან ალაზანისაკენ.¹⁰³ ცხადია, ერთიცა და მეორეც დაუსაბუთებლად გამოთქმული დებულებებია, რაც მხოლოდ იმ გარემოებას ემყარება, რომ ჰომეროსს მოხსენებული ყავს ალიძონები. სულ უკანასკნელად ხალიბებს თავის ნაშრომში „ქსენოფონტის „ანაბასისი“ და მისი ცნობები ქართველ ტომებზე შეეხო თ. მიქელაძე. ავტორი ცდება, როდესაც ცდილობს ხალიბებისა და ხალდების იგივეობა სტრაბონის ცნობაზე (XII, 3 §19) დაყრდნობით უეჭვო სინამდვილედ დაგვიხატოს¹⁰⁴ (ასევე ცდება ამ საკითხში ალ. ხახანაშვილი, უსლარი, ივ. ჯავახიშვილი და სხვები). ასევე ცდება ავტორი, როცა „ანაბასისის“ ტექსტის დამოწმებით (IV, 4 §18; IV, 5 §34; IV, 6 §5; IV, 7 §15-18; V, 5 §1), ხალიბები ოთხ სხვადასხვა ადგილას მოსახლედ ჰყავს ნაგულისხმევი. მათი ასეთი განსახლება მას, შეცდომით, ხალიბების მიერ ოდესღაც დამორჩილებული ტომების გაძლიერებით და მათ მიერ დამოუკიდებლობის მოპოვებით აქვს ახსნილი.¹⁰⁵ საკითხის ასეთი გადაჭრის უსაფუძვლობა, ვგონებ, ცხადი უნდა იყოს: „ხალიბ“ სახელს ატარებს ერთი ტომი, რომელიც, თუ დაიმორჩილებს სხვა ტომებს, თავს ახვევს მათ თავის სახელს, მაგრამ დამორჩილებულ ტომთაგან თუ რომელიმე თავი გამოიხსნა, მაშინ მის მიღმა მდებარე ტომები ყველა გამოხსნილია და ამდენად, ასეთი ვითარება სპორადული განსახლების მიზეზი ვერ იქნება. თ. მიქელაძეს ხალიბთა ადგილსაცხოვრისის დაუჯერებელი საზღვრები აქვს წარმოდგენილი. მათი სამოსახლო, როგორც ავტორი გადმოგვცემს, თურმე, ერევნის მიდამოებსაც მოიცავდა,¹⁰⁶ ხოლო დასავლეთით ისინი თერმოდონტისა და იქნებ ღალისის აუზებში, ტიბარენების დასავლეთითაც კი, ცხოვრობდნენ. ხალიბები ერთ დროს, მისი წარმოდგენით, „დიდი ხალხი“ ყოფილა.¹⁰⁷ ხალიბების სხვადასხვა ადგილას მოხსენიება „ანაბასისში“ შეიძლება უფრო ბუნებრივად აიხსნას, თუ დავუშვებთ, რომ „10000-ის“ გზამ, რომელიც ზამთრის მძიმე პირობებში და მთებში მიემართებოდა, ტომთა საცხოვრისების საზღვრების ურთიერთშეჭრილობის გამო, რამდენჯერმე გადასერა ერთი და იგივე ტომის, ან ერთსა და იმავე ენაზე მოლაპარაკე სხვადასხვა თე-

¹⁰² Dubais de Montpereux, Voyage autour du Caucase, IV, Paris, 1840, p. 139.

¹⁰³ Хаханов, იქვე, 24

¹⁰⁴ მიქელაძე თ., ქსენოფონტის „ანაბასისი“ და მისი ცნობები ქართველი ტომების შესახებ, თბ., 1953, გვ. 178 (ხელნაბეჭდი). აგრეთვე: Адонц Н., Армения в эпоху Юстиниана, СЛБ, 1908, стр. 58-59 (Тексты по армяно-грузинской филологии, XI). ჯავახიშვილი ივ. ქართველი ერის ისტორია, I, 414.

¹⁰⁵ იქვე, 157-158.

¹⁰⁶ იქვე, 164.

¹⁰⁷ იქვე, 167.

მების ტერიტორია, რამაც შექმნა ილუზია იმ ტომის მრავალ ადგილას ბინადრობაზე. დაღესტნიდან მომავალი უცხო მგზავრი, რომელსაც წარმოდგენა არა აქვს ამიერ კავკასიის ეთნოგრაფიულ რუკაზე, გადმოვიღოს რა ქართლსა და იმერეთს, შევივლის სამეგრელოში, გადავივლის გურიასა და გავა ჭანეთში, ხოლო იქედან კლარჯეთში, იტყვის, რომ მეგრელები ორ სხვადასხვა ადგილას სახლებულან, ხოლო ქართლები კი სამსაო (ქართლი, გურია, კლარჯეთი – მათ ყოფს სამეგრელო და ჭანეთი).. უკანასკნელი გარემოება ეთნოგრაფიული რუკის უცოდინარობით გამოწვეული მცდარობა იქნება, ხოლო პირველი – შემთხვევითი სინამდვილე. დაახლოებით ასეთი რამ უნდა შემთხვეოდა „ანაბასისის“ ბერძნებსაც. ი. მანანდიანი ფიქრობს, რომ ხალიბები არმენების თანამეტომეები არიან.¹⁰⁸ ცხადია, ამ აზრის საწინააღმდეგოდ არაერთი ფაქტი მეტყველებს, მათ შორის ის გარემოება ყველაზე მეტად, რომ ამ დებულებით არმენული ტომის საცხოვრისის საზღვრები შავ ზღვაზეა გატანილი.

მოსინიკები: მათ შესახებ ანტიკურ ლიტერატურაში მრავალი ავტორი იძლევა ცნობას: ჰეკატე მილეთელი, ჰეროდოტე, ქსენოფონტი, ფსევდო-სკილაქს კარიანდელი, ფსევდო არისტოტელე, აპ. როდოსელი, ნიკოლოზ დამასკელი, ანონიმი (სკიმნ ქიოსელი ?), სტრაბონი, პომპონი მელა, კურცი რუფი, პლინი სეკუნდი, ვალერი ფლაკი, Liber Generationis ავტორი (იპოლიტე პორტელი), ამიანე მარცელინი და სხვები. ზოგიერთი ამ ავტორთაგანი იმეორებს წინამორბედებს (ამ. მარცელინი, სტ. ბიზანტიელი, ფსევდო არიანე და სხვები), ზოგს კი ახალი ცნობებიც გააჩნია (ქსენოფონტი, სტრაბონი და სხვები).

ჰეკატე მილეთელის ცნობით, მოსინიკები ტიბარენების აღმოსავლეთით ცხოვრობენ,¹⁰⁹ ტიბარენები კი ყველა ავტორს ზღვის სანაპიროზე მცხოვრებ ხალხად აქვთ წარმოდგენილი. აქედან, ჰეკატესათვის მოსინიკები ზღვის სანაპიროს მცხოვრებლები არ არიან, რადგან სამხრეთ სანაპიროზე მოსახლე ტიბარენების აღმოსავლეთით მცხოვრები მოსინიკები ზღვის სანაპიროს მცხოვრებლები ვერ იქნებოდნენ. ამასვე ადასტურებს ფსევდო-სკილაქს კარიანდელის ცნობა, რომ ისინი მთებში ცხოვრობენ (...οἱ τοὶ ὄντι κατοικοῦσιν).¹¹⁰ ფსევდო-სკილაქსისათვისაც მოსინიკები და ტიბარენები ერთმანეთის მეზობლად ცხოვრობენ (Μετά δὲ Μοσάκτου ἔθνος ἐστὶ Τιβάρησι).¹¹¹ ჰეკატესა და ფსევდო-სკილაქსის ცნობას მოსინიკების ზღვიდან დაშორებით მთებში

¹⁰⁸ Манандян Я., О некоторых проблемах истории древней Армении и Закавказья, Ереван, 1944, 53.

¹⁰⁹ Fr., 193. SC, I, 3;

¹¹⁰ Scil, 86. SC, I, 86.

¹¹¹ იქვე, 87. SC, I, 86.

ცხოვრებაზე, მხარს უჭერს სტრაბონიც, რომელიც გვაცნობებს, რომ მოსინიკები, რომლებიც ამ ავტორის დროს, თურმე, ჰეპტაკომიტებად იწოდებოდნენ, სკიდასის მთის თხემებზე სახლობდნენ,¹¹² მაგრამ ყველა ამ ცნობას თითქოს უარყოფს ქსენოფონტის „ანაბასისში“ დაცული ცნობა, რომლითაც მოსინიკები ზღვის სანაპიროს მცხოვრებლებადაა წარმოდგენილი.¹¹³ ქსენოფონტის ცნობას ერთი შეხედვით უპირატე-სობა უნდა მიეცეს სხვებთან შედარებით, რამდენადაც მან თავისი ფე-ხით გაიარა მოსინიკების საცხოვრისი ტერიტორია, მაგრამ მხოლოდ გაიარა და არ შეეძლო ეძია, თუ სად იყო მოსინიკების ძირითადი სა-ბუდარი. როგორც „ანაბასისისა“ და სხვა ცნობების ურთიერთშეჯე-რებიდან ირკვევა, ქსენოფონტის დროს მოსინიკებს ზღვის სანაპიროები ეჭირათ, როგორც მოძალადეებს. ცდება თ. მიქელაძე, როდესაც „ანაბა-სისის“ ცნობაზე დაყრდნობით მოსინიკების ერთ ნაწილს ზღვის სანაპიროს აცილებს და კერასუნტის სამხრეთით 60-70 კმ-ზე ათავ-სებს, კიუმბერტ დაღის სამხრეთ ან სამხრეთ-დასავლეთ კალთებზე და მათ „პირიქეთელ“ მოსინიკებს უწოდებს, ხოლო მოსინიკების მეორე ნაწილს, რომელიც ბერძნებს მტრულად შეხვდა, ზღვის სანაპიროზე ათავსებს და „პირაქეთელს“ უწოდებს.¹¹⁴ მაგრამ საკითხავია, როგორ მოახერხებს ზღვას 60-70 კმ-ით დაშორებულმა „პირიქეთელმა“ მოსი-ნიკებმა ბერძნების საშველად 300 ნავით მოსულიყვნენ? ამგვარად, უეჭველია, რომ მოსინიკები ზღვის სანაპიროზე გამოჭრილან ფართო ფრონტით და მათი ორივე ნაწილი ახლა ფლობს ზღვის სანაპიროებ-საც. მოსინიკების მოხსენიება ჰეროდოტესთან¹¹⁵ გვაფიქრებინებს, რომ ისინი ერთ დროს დიდი გაერთიანების ჰეგემონები უნდა ყოფილიყვნენ. მართლაც, სტრაბონის ცნობით, ძვ. წ. აღ. II საუკუნის 80-იან წლე-ბამდე მოსინიკებს ხალიბებთან ერთად კარენტიდასა და ქსერქსენემიც უცხოვრიათ, რის შემდეგ ეს ოლქები მცირე არმენიის შემადგენ-ლობაში შესულა. როგორც სტრაბონის მიერ იქვე მოყვანილი ცნობი-დან შეიძლება ვივარაუდოთ, მოსინიკების სახელს შეფარებული ჰყო-ლია ჰეპტაკომიტები-სკვითინები და ბიზერები, რომლებიც ასევე სკი-დასის მთაზე ცხოვრობდნენ.¹¹⁶ „ანაბასისის“ ცნობებზე დაყრდნობით, თ. მიქელაძეს მოსინიკების ტერიტორიის საზღვრად აღმოსავლეთით კერასუნტის ხაზი აქვს ნაგულისხმევი, დასავლეთით – ქ. მესუდიეს ხაზი, ხოლო სამხრეთით – ქ. სუმეხრის ქვემოთ გამავალი ხაზი;¹¹⁷

¹¹² Strab., XI, 3, §18. SC, I, 158

¹¹³ Xenoph., V, 4 §1-34; V, 5 §1.

¹¹⁴ მიქელაძე თ., დასახ. ნაშრ. 146.

¹¹⁵ Herodot., III, 94, VII, 78 SC, I, 9, 57.

¹¹⁶ Strab., XI, 14, §5. SC, I, 155.

¹¹⁷ იქვე, XII, 3, §18, SC, I, 158, 224 შდრ. თ. მიქელაძე, დასახ. ნაშრ. 221-223.

მოსინიკების წარმომავლობის საკითხს არაერთი ავტორი შეხება. ღიუბუა დე მონპერეს შესაძლებლად მიაჩნია მოსინიკები მესხებს გაუიგივოს.¹¹⁸ ამავე აზრს იზიარებს ალ. ხახანაშვილიც. მისი აზრით, ბიბლიის მეშხი, ასირიული წყაროების მუსკი ანუ მუშკი, ქართული წყაროების მესხი და ჰეროდოტეს მოსინიკები ერთი და იგივენი არიან.¹¹⁹ ივ. ჯავახიშვილი ფიქრობს, რომ „მოსინიკი“ ადგილობრივი წარმოშობის სახელია, რომელიც „მო“ თავსართად და „სსანიკ“ სახელად დაიშლება. ბერძნულ ფორმაში დაცული ორი „ს“-ანი მიუთითებს, რომ აქ არაჩვეულებრივი „ს“-ანი ყოფილა. მართლაც, მოგვიანო წყაროები იძლევიან ფორმას „ტძანი“, რაც „ჭანის“ უცხოური გამოთქმა უნდა იყოსო. ამგვარად, მისი აზრით, „მოსინიკი“ ფორმაში ჭანების სახელის უძველესი ფორმა უნდა ყოფილიყო დაცული.¹²⁰

ჭანები: იმ ტერიტორიაზე, სადაც გვიან ლაზისტანის ვილაეთი იყო, ანტიკური ავტორები ასახელებენ რამდენიმე ტომს. ისინი დღეს ერთი საერთო სახელის – ჭანის, ანუ ლაზის სახელს ქვეშ არიან გაერთიანებული. თავის დროზედაც ისინი წარმოადგენდნენ არა ენობრივად დაყოფილ კოლექტივებს, არამედ ერთ ენაზე მოლაპარაკე ტომის თემებს შეადგენდნენ. ისინი ოდესღაც გვაროვნული კოლექტივები იყვნენ, მაგრამ ჩვენთვის საინტერესო ხანაში ამ საფეხურს უკვე დიდი ხნის გაცილებულნი არიან. ეს თემები სხვადასხვა ეპოქაში სხვადასხვა სახელით გვევლინებიან, იმის მიხედვით, თუ რომელი ტომი თუ თემი ჰეგემონობს, ხოლო როცა არ არსებობს მათი ერთობა, ან ანტიკური ავტორებისათვის ცნობების მიმწოდებლები ახლოს ეცნობიან მათ, აშკარავდება მათი დაყოფა თემებად, ხეობებად თუ ტომებად. ჰეკატე მილეტელთან ისინი მაკრონებად იწოდებიან, ასევე იხსენიებს მათ ჰეროდოტე,¹²¹ ქსენოფონტი, აპ. როდოსელი, არიანე და სხვები. ხოლო ჰიპოკრატე, ფსევდო-სკილაქს კარიანდელი, პომპონი მელა, ფსევდო-არიანე მათ მაკროკეფალებად (Μακροκέφαλοι) იხსენიებს. სტრაბონით, ამ მხრივ, შეიძლება ითქვას, ახალი პერიოდი იწყება. იგი გადმოგვცემს, რომ „ტრაპეზუნტისა და ფარნაკიის ზემოთ ცხოვრობენ ტიბარენები, ხალდები და სანები, რომელთაც წინათ მაკრონებს უწოდებდნენ“ (Τῆς δὲ Τραπεζοῦντος ὑπέρκειται καὶ τῆς Φαρνακίας Τιβαρανοί τε καὶ

¹¹⁸ Dubois de Montpereux, Voyage autour du Caucase, IV, Paris, 1840, p. 339.

¹¹⁹ Хаханов А., Древнейшие пределы расселения Грузии по Малой Азии, ЗКОРГО, XXII, 6, Тб., 1903, №2, с. 2, 5-6

¹²⁰ ჯავახიშვილი ივ., დასახ. ნაშრ. 395-396.

¹²¹ Strab., XII, 3, §18, SC, I, 158.

Χαλδαῖοι καὶ Σάννοι οὐκ πρότερον ἑκάλουν Μάκρωνα).¹²² ამგვარად, სტრაბონის აზრით, ძველ მაკრონებს მის დროს თურმე სანებს ეძახდნენ. მაგრამ მარტო მაკრონები არ მონათლულან სანებად. არიანე გადმოგვცემს, რომ დრილებიც სანები უნდა იყვნენო.¹²³ მ. ინაძემ სამართლიანად აღნიშნა ყველა იმ ავტორების მცდარობა, რომლებიც თვლიან, რომ სახელი „სანი“ თითქოს ჰეკატე მილეტელთან იყოს პირველად მოხსენიებული.¹²⁴ სინამდვილეში „სანი“ პირველად მემნონის „ჰერაკლეუმის შესახებ“-ში უნდა იყოს მოხსენიებული, როგორც ეს ვ.პ. ძაგუროვამ აღნიშნა.¹²⁵ თ. მიქელაძეს, „ანაბასისის“ ცნობებზე დაყრდნობით, დადგენილი აქვს მაკრონთა ტერიტორიის აღმოსავლეთი (კაზიკლი-დადი) და სამხრეთი საზღვარი (მდ. მაჩკა-დერე), ხოლო დანარჩენი საზღვრების დადგენას შეუძლებლად თვლის.¹²⁶ სან-მაკრონები, როგორც წყაროებზე დაკვირვებიდან ირკვევა, ტრაპეზუნტის მიდამოებიდან მდ. ჭოროხამდე ვრცელდებოდნენ. VI-II საუკუნეებში მათი სახელი ზღვის სანაპიროებზე „კოლხ“ სახელს ჰქონდა დაფარული და იქა-აქ თუ გაივლებდა აქ მოსახლე ტომების ნამდვილი სახელი. სიღრმეში კი, სადაც თავისთავადი ტომები იყვნენ, მათ უცხო სახელი ვერ ფარავდა. საინტერესოა, რომ სომხურ საისტორიო მწერლობაში ტრაპეზუნტის მიმდგომი ქვეყანა „ჯანიკად“ ანუ „ხასტიკად“ იწოდება.¹²⁷ ასევე საინტერესოა, რომ ეს ოლქი მოსე ხორენელთან ერთი მხრით ტაოს („ტაიქ“) მეზობლადაა წარმოდგენილი, ხოლო მეორე მხრივ ლაზიკის.¹²⁸ მ. პანარეტის „ქრონიკიდან“ ვგებულობთ, რომ ხალდის სახელი გარკვეულმა ოლქმა ტრაპეზუნტის იმპერიის უკანასკნელ პერიოდამდე შეინარჩუნა.¹²⁹ VIII საუკუნის ქართველი ავტორი იოანე საბანის-ძე გვაცნობებს, რომ ტრაპეზუნტი „ქალდიასა“ ქვეყანაში არისო.¹³⁰ ამავე აზრისაა „მატიანე ქართლისაჲ“-ს ავტორიც.¹³¹ ხოლო ვახუშტი აღნიშნავს, რომ „ჭანეთი ... არს ესე შავი ზღვის კიდის წადევნებით, გონიდან ტრაპეზონტის საზღვრამდე“.¹³²

¹²² ჰეროდოტეს ცნობით, მის დროს მაკრონები თერმოდონტთან მდ. პანთენოსზე მოსახლე სირიელების მეზობლად ყოფილან, („ისტორია“, II, 104. SC, I, 9) მაკრონები ამ პერიოდისათვის აქეთ გაჭრილი ჩანან.

¹²³ PPE, §15. SC, I, 222.

¹²⁴ დასახ. ნაშრ., 220-221.

¹²⁵ იხ. ВДИ, 1951, №1, გვ. 287. ამ ავტორის გამოანგარიშებით მემნონს თავისი შრომა ძველი და ახალი წელთაღრიცხვის მიჯნაზე დაუწერია.

¹²⁶ დასახ. ნაშრ. 227.

¹²⁷ История Армении Моисея Хоренского, М., 1893, 54, 122.

¹²⁸ იქვე, გვ. 54 და 181.

¹²⁹ დასახ. ნაშრ., 31, 34-35... შდრ. დასახ ნაშრ., 65.

¹³⁰ ძველი ქართული ლიტერატურის ქრესტომათია, I, 1946, 62.

¹³¹ ქართლის ცხოვრება, თბ., 1942, 179.

¹³² ვახუშტი, აღწერა სამეფოსა საქართველოსა, თბ., 1941, 142.

ტრაპეზუნტის აღმოსავლეთით მცხოვრებ ტომებზე განსაკუთრებით ძვირფას ცნობებს იძლევა II საუკუნის ავტორი ფლავიუს არიანე.¹³³ მისი ცნობით, ტრაპეზუნტის მახლობლად „უმეფო სანებს“ უცხოვრიათ, ხოლო მათ მეზობლად მდ. ჭოროხის მიმართულებით მაკრონებისა და ჰენიოხების სამეფო ყოფილა.¹³⁴ იმავე ადგილას პლინი სეკუნდი სან-ჰენიოხების ტომს (gens Sannorum Heniochorum) იხსენიებს. მისი ცნობით „მის (ე.ი. ტრაპეზუნტს) იქით ცხოვრობს არმენოხალიბთა ტომი და 30000 ნაბიჯზე მდებარეობს მცირე არმენია, ტრაპეზუნტამდე ნაპირ-ნაპირ მდ. პიქსიტია, ხოლო მის შემდეგ სან-ჰენიოხების ტომი“ (... ultra quod gens Armenochalybes, et maior Armenia XXX p. distans. In ora ante Trapezunta flumen est Pyxites, ultra vero gens Sannorum Heniochorum).¹³⁵ ს. ჯანაშიამ შენიშნა, რომ არიანეს მაკრონ-ჰენიოხები და პლინის სან-ჰენიოხები ერთი და იგივე მოსახლეობა უნდა ყოფილიყო. სწორი ჩანს მისი მოსაზრება, რომლითაც ფორმა მაკრონი აქ არიანეს იმიტომ უხმარია, რომ მას სანები უკვე სხვა ადგილას ჰყავდა მოხსენიებული.¹³⁶ არიანეს ცნობით, მაკრონებისა და ჰენიოხების მეფის სასახლე მდ. პრიტანისზეა,¹³⁷ რომელიც მკვლევართა მიერ მდ. ფორტუნასთანაა გაიგივებული. არიანეს ანონიმი რედაქტორის ცნობით კი მდ. არხაბედან (დღ. არქაბე) მდ. ოფიუნტამდე (არიანეს ოფისი – სულან-სუ) მაკრონებისა და ჰენიოხების საცხოვრისია.¹³⁸ მაკრონებისა და ჰენიოხების სამეფოს შემდეგ არიანეს **ზიდრიტები** ჰყავს მოხსენიებული. ისინი, მისი სიტყვით, ფარსმანის ქვეშევრდომები ყოფილან. მე სარწმუნოდ მიმაჩნია ნ. ლომოურის მტკიცება, რომ აქ იბერიის მეფე ფარსმანი იგულისხმება;¹³⁹ და რადგან ეს ასეა, ფარსმანი იბერიელს საშუალება უნდა ჰქონოდა თავისი ხელისუფლება გაეგრძელებინა ზიდრიტებზე, ე. ი. ზიდრიტების ტერიტორია იბერიის მოსაზღვრეც უნდა ყოფილიყო. ეს გარემოება თავის მხრივ I-II საუკუნის იბერიის სამეფოს ძლიერებაზე მიგვითითებს, რომელსაც შავიზღვისპირეთის გამომყოფი მთები გადმოულახავს. ფსევდო-არიანე ზიდრიტებს მდ. არქაბესა და მდ. აბსარს შორის ათავსებს და თანაც გვაცნობებს, რომ ზიდრიტების სახელს ჰქონია

¹³³ PPE, §15, SC, I, 222.

¹³⁴ PPE, §15, SC, I, 222.

¹³⁵ Plin., VI, §12, SC, II, 178.

¹³⁶ ჯანაშია ს., თუბალ-თაბალი... 201. მე არაფერს ვამბობ ავტორის მიერ იქვე გამოთქმულ სხვა მოსაზრებებზე.

¹³⁷ PPE, §8, SC, I, 219

¹³⁸ PPE, §42, SC, I, 273. ივ. ჯავახიშვილი მათ სამეფოს ოფისა და არქაბეს ხეობებს შორის ათავსებს (იხ. მისივე, საქართველოს, კავკასიისა და ახლო აღმოსავლეთის ... დამატება II, 265) ამავე აზრს იზიარებს მ. ინაძე (იხ. მისი – ფლავიუს არიანე, 315).

¹³⁹ კლავდი პტოლემეაიოსის ... 60

დაფარული *ბიზერების* სახელი,¹⁴⁰ რომელიც ამ ტომის ერთ-ერთი თემი უნდა ყოფილიყო და რომლის ხსენება ანტიკურ ლიტერატურაში ჰეკატე მილეთელით იწყება.¹⁴¹ გარდა მითითებული ტომებისა, ჭოროხის სამხრეთით სახლებულან *ჰენიოხები*. მათი აქ გამოჩენის საკითხი ჯერ გადაჭრილად ვერ ჩაითვლება, ზოგიერთი მკვლევარი კი უფრო იქით იხრება, რომ მასში ურარტული წარწერების იგანის (იგანიოხი) ნაშთი დაინახოს (უშაკოვი, ინაძე). მ. ინაძე ფიქრობს, რომ შავი ზღვის ჩრდილო-აღმოსავლეთ და სამხრეთ-აღმოსავლეთ კუთხეში მოსახლე ჰენიოხები წარმოადგენდნენ აღმოსავლეთ შავიზღვისპირეთის ცენტრალური რაიონების უძველეს მცხოვრებლებს, სადაც ძვ. წ. IX-VIII საუკუნეში მათ ძლიერი პოლიტიკური გაერთიანება აქვთ. მომდევნო ხანაში გაძლიერებულმა კოლხებმა ჰენიოხთა ერთი ნაწილი საცხოვრისიდან განდევნეს და ჩრდილოეთით მისწიეს, სადაც მათ შეინარჩუნეს თავიანთი პოლიტიკური ორგანიზაცია, ვიდრე ძვ. წ. აღ. I საუკუნემდე, ხოლო მეორე ნაწილი დაიმორჩილეს და მათი ხსენება გაქრა, სანამ კოლხთა სამეფო არ დაიშალა და სამხრეთ-აღმოსავლეთ კუთხეში შერჩენილმა ჰენიოხებმა სან-ჭან-მაკრონებთან ერთად თავიანთი სამეფო არ შექმნეს.¹⁴² ცხადია, ურარტული წყაროების იგანი ძველი კოლხეთის ტერიტორიაზე ვერ იქნებოდა, რადგან ურარტუს მეფეები არაერთხელ იხსენიებენ იგანის დალაშქვრას, იქიდან ხალხის გადმოსახლებას და ა. შ. მაგრამ აღნიშნულ ხანაში ურარტელებს ამ მიმართულებით გზად გადაეღობებოდა ჯერ დიაუხი, ხოლო შემდეგ – კოლხას სამეფო. ისედაც, ურარტელთა ლაშქრობებზე დასავლეთ საქართველოს ტერიტორიაზე წყაროებში არაფერია ნათქვამი. ამ და რიგი სხვა გარემოების გამო იგანი არ შეიძლება ასე ჩრდილოეთით ვიგულისხმოთ. მისაღებია გ. მელიქიშვილის მიერ მოცემული ლოკალიზაცია, რომლითაც იგანი ჩილდირის ტბის მიდამოებშია მოთავსებული.

ანტიკური ავტორები ტრაპეზუნტ-კერასუნტის რაიონში უთითებენ *ხალდთა* ტომსაც. მოსე ხორენელის და რიგი სხვა სომეხი ავტორების ჩვენებებიდან ირკვევა, რომ ხალდი ჭანების სახელი ყოფილა. საფიქრებელია ხალდები ჭანთა ერთ-ერთი თემი ყოფილიყო. ჭანები, როგორც ირკვევა, ტრაპეზუნტს იქეთაც ვრცელდებოდნენ, სადაც ისინი დღემდე შემორჩნენ. ჯიფორდის მიერ 1868 წ. დაწერილი ანგარიშიდან ვიგებთ, რომ ტრაპეზუნტის ვილაეთის თერეკას კაიმაყის ერთ-ერთ კაზაში, რომელიც ქ. კურასუნტის ახლოს მდებარეობდა, მხოლოდ

¹⁴⁰ Ps. PPE, იქვე.

¹⁴¹ Fr., 190. SC, I, 3.

¹⁴² ინაძე მ., დასახ. ნაშრ., 312 და შმდგ.

ლაზები (ჭანები) ცხოვრობდნენ.¹⁴³ პროკოპი კესარიელის ცნობით, პეტრას ბრძოლიდან უკან დაბრუნებული ჭანები რიზეს, ათინასა და ტრაპეზუნტზე გავლით ახერხებენ შინ დაბრუნებას.¹⁴⁴ ეს ტომი თავის თავს, როგორც ჩანს, ჭანებს ეძახდა, რასაც სახელის დღემდე შერჩენის ფაქტიც ადასტურებს. ძირითადი სატომო სახელი ყველა მათთვის ჭანი ყოფილა. ლაზები მათ მწიგნობრული გზით შეერქვათ. პროკოპი კესარიელის შრომებიდან ვგებულობთ, რომ მის დროს ბერძნულ ენაში მიღებული ყოფილა აქ მცხოვრები ტომის „ჭან“ სახელით (Τζανικιόν ἔθνος) აღნიშვნა.¹⁴⁵ ჭანები მის დროს უკვე ზღვის სანაპიროზე აღარ ცხოვრობდნენ, მაგრამ აღმოსავლეთით არმენებს ემეზობლებოდნენ.¹⁴⁶ ისინი, თურმე, მრავალ ტომად (თემად) იყოფოდნენ, მათ შორის იყვნენ Τζάνων τῶν Ὠκενεζῶν καὶ Τζάνων τῶν Κοξυλίων.¹⁴⁷

ანტიკურ ლიტერატურაში დაცული ცნობების შესწავლისას ამ რაიონში ტომთა ხან ერთი სახელწოდებანი იჩენენ თავს, ხან მეორენი და მესამენი. ეს გარემოება აიხსნება როგორც პოლიტიკური ვითარების ცვლილებით, ისე ანტიკურ ავტორთა წყაროების სხვადასხვაობით და ღირსება-ნაკლოვანებით.

კოლხები: კოლხების ძირითადი კულტურულ-პოლიტიკური ცენტრები უშუალოდ შავი ზღვის სანაპიროზე თავდაპირველად არ უნდა ყოფილიყო. მათი ძირითადი კერა მდ. მტკვრის სათავეებში მდებარე კოლას ოლქი უნდა იყოს, საიდანაც ისინი ახერხებდნენ შავი ზღვის აღმოსავლეთ და სამხრეთ-აღმოსავლეთ სანაპიროების დაპყრობას და თავიანთ სახელს აძლევდნენ მათ. ამით უნდა აიხსნას ჰეკატე მილეტიელის ერთი ცნობა, რომლითაც მესხები კოლხურ ტომადაა დახასიათებული. ძვ. წ. აღ. VIII-VII საუკუნეებში კოლხებს უძლიერესი პოლიტიკური გაერთიანება აქვთ, მაგრამ მომდევნო ხანებში გაძლიერებული მიდია-სპარსეთი დიდ ზიანს აყენებს მათ და ართმევს მათ ძირითად ოლქებს. ამ ხანიდან (ძვ. წ. VI ს.) „კოლხ“ სახელი მხოლოდ შავი ზღვის სანაპიროზე შემორჩა. ძირითადი საბუდარის დაკარგვის შემდეგ, როგორც ჩანს, იწყებს წამოწევას სანაპიროზე მდებარე ცენტრები.

დღევანდელი დასავლეთ საქართველოს ტერიტორიაზე მათ, როგორც პლინის ცნობიდან ირკვევა, ლაზთა ტომის ჩრდილოეთით და მდ. ფასიდის სამხრეთით უცხოვრიათ.¹⁴⁸

¹⁴³ ИКОРГО, VII, 1. დამატება, თბ., 1881 15, 17, 59-60: 68.

¹⁴⁴ B.P., II, 30. გეორგიკა, II, 82

¹⁴⁵ იქვე, I, 15 და ... გეორგიკა, II, 25-26

¹⁴⁶ B.G., VIII, 1. გეორგიკა, II, 91. De aedificiis, III, 6. გეორგიკა, II, 182 და შმდ. 1950,

¹⁴⁷ De aedificiis, III, 6. გეორგიკა, II, 185, 188; Адонц Н. დასახ. ნაშრ. 59-65.

¹⁴⁸ Plin., VI, 12. SC, II, 178.

ძვ. წ. VI საუკუნეში, როდესაც სახელი „კოლხი“ ანტიკურ ლიტერატურაში გარკვევით ჩნდება, იგი შემკრებლობითი ცნებაა, რომელიც ერთ რომელიმე ტომს კი არ აღნიშნავს, არამედ პოლიტიკურ გაერთიანებას, რომელშიც ათეულობით ტომია თავმოყრილი. ჰეკატე მილეთელთან დაცული ცნობიდან ვგებულობთ, რომ კოლხების საზღვრები ერთ დროს მატეენების საზღვრებამდე მიდიოდა (Μόσχοι, Κόλχων ἔθνος προσεχές τοῖς Ματιηνοῖς).¹⁴⁹ პირველი ცნობა, რომ კოლხები მდ. ფასიდზე ცხოვრობდნენ, პინდაროსთან უნდა იყოს დაცული.¹⁵⁰ ჰეროდოტეს დროს კოლხები თუმცა აქემენიდების მეძღვენიები არიან, მაგრამ ისინი წინა აზიის ოთხ უდიდეს ხალხთა რიცხვშია შეყვანილი. მისი ცნობით, მიდიელებსა და კოლხებს შორის მხოლოდ სასპერები ცხოვრობდნენ. კოლხები მის დროს, როგორც მისი „ისტორიიდან“ ჩანს, კავკასიის ქედამდე ვერ ავრცელებდნენ თავიანთ ბატონობას,¹⁵¹ მაგრამ ფასიდი მათი სამფლობელოა.¹⁵² სამხრეთით ისინი მაკრონების მეზობლად უნდა ცხოვრებულებყვნენ. ჰეროდოტე გადმოგვცემს, რომ მაკრონებს, მათი თქმით, წინადაცვეთა კოლხებისაგან სულ ცოტა ხნის წინათ უსწავლიათ.¹⁵³ ძველ კოლხებს აქვთ მეორე სახელიც – „ფასიანელები“ (οἱ Φασιανοί). იგი პირველად ჰიპოკრატესთან გვხვდება,¹⁵⁴ შემდეგ ამ სახელს ხმარობს ქსენოფონტიც, ხოლო ახ. წ. V საუკუნის ავტორი იული ჰონორი იხსენიებს „ტომ ფასიდს“ (Phasis gens).¹⁵⁵ თ. მიქელაძე, უშვებს რა, რომ „ფასიანი“ აღნიშნავს „წყლით მდიდარ ქვეყანაში მცხოვრებ ხალხს“, ფიქრობს, რომ რიონზე მოსახლე ფასიანელები და ერზერუმის მიდამოებში მოსახლე ფასიანელები ტერიტორიულად გათიშული ერთი და იგივე ხალხიაო.¹⁵⁶ ცხადია, აღმოსავლურ-ქართული და დასავლურ-ქართული ტომები ერთ მოდგმას ეკუთვნიან, მაგრამ ის ერთიანობა, რომელიც ჩვენ ავტორს აქ აქვს ნაგულისხმევი, არასოდეს არ არსებობდა ფეოდალიზმის გამარჯვებამდე, როდესაც მართლაც წარმოიქმნა მთლიანი ხალხი. მანამდე არსებობდა ერთი მოდგმის ტომების დროებითი პოლიტიკური გაერთიანება. ამასთან, სახელთა მსგავსება, ძალიან ხშირად, არ გამოდგება ნათესაობის დასადგენად.* ფსევდო-სკილაქს კარიანდელთან დაცული

¹⁴⁹ Fr., 188. SC, I, 3.

¹⁵⁰ SC, I, 324.

¹⁵¹ Herod., III, 97. SC, I, 9.

¹⁵² Herod., IV, 37, SC, I, 20-21

¹⁵³ Herod., II, 104, SC, I, 9.

¹⁵⁴ Hippocr., §22. SC, I, 58-59.

¹⁵⁵ Yul. Honor., 38. SC, II, 443.

¹⁵⁶ მიქელაძე თ., დასახ. ნაშრ., 180 და შემდ.

* ქსენოფონტის ბაზიანებში ზოგიერთი ავტორი ბასიანელებს ხედავს.

ცნობებით, კოლხების პოლიტიკური ბატონობა დღევანდელი ბზიფის ხეობისკენ ჩანს გაწეული.¹⁵⁷ კოლხთა სიძლიერეზე და კულტურულ დაწინაურებაზე მიუთითებს აპ. როდოსელის „არგონავტიკაში“ დაცული ცნობა, რომ კოლხებს აქვთ მათი წინაპრების მიერ შესრულებული ჩანაწერები „კირბებზე“, სადაც გადმოცემული იყო ყველა გზები და წყალთა და ხმელეთთა საზღვრებიო.¹⁵⁸

სტრაბონის წარმოდგენით, კოლხიდა სამხრეთით ტრაპეზუნდამდე ვრცელდება, ხოლო აღმოსავლეთით – ლიხის მთამდე. შორაპანი, მისი ცნობით, კოლხების ციხეა.¹⁵⁹ პლინის ცნობით, კოლხთა მეფეს ემორჩილებოდნენ სვანებიც.¹⁶⁰ მისი ცნობით, რომელიც, ალბათ, რომელიმე ჩვენამდე მოუღწეველი წყაროდან არის ამოღებული, კოლხებს კოლონიზაციაც უწარმოებიათ და მათ მიერ ყოფილა დაარსებული ქალაქი პოლა ისტრიაში, ქალაქი ოლკინიუმი (ძველი კოლხინია) დალმატიაში, ქალაქი ორიკი ილირიაში.¹⁶¹ ამპელიუსთან დაცული ერთი ცნობით, რომელიც მეტად ძველი ტრადიციის გადმოცემა უნდა იყოს, კოლხეთი თერმოდონტის აუზამდე ვრცელდებოდა.¹⁶² ასევე, რომელიც დაც ძველი წყაროთი სარგებლობს არიანე, როდესაც ამბობს, რომ ტრაპეზუნტიდან 270 სტადიით დაცილებული მდინარე ოფისი (სულან-ლუ-სუ) კოლხთა ქვეყანას თიანიკესაგან (ἄπὸ τῆς Θιανίκης) გამოპყოფსო.¹⁶³ „თიანიკე“ იგივე „სანიკე“-ჭანიკე-ჭანეთი უნდა იყოს. ამასთან, მას კოლხები ტრაპეზუნტის მიდამოებში ჰყავს მხოლოდ მითითებული.*

პტოლემეაიოსი კოლხიდას შემდეგ საზღვრებში წარმოგვიდგენს: ჩრდილოეთით – სარმატია, აღმოსავლეთით – იბერია, სამხრეთით – კაპადოკიის პონტო და დიდი არმენია.¹⁶⁴ როგორც ამ ცნობის სხვა ავტორების ცნობებთან შეჯვრებიდან ცხადი გახდება, კოლხიდა ამ დროს წმინდა გეოგრაფიული ცნებაა, რომელიც შავი ზღვის მთელ აღმოსავლეთ და სამხრეთ სანაპიროს მოიცავს.

კოლხების ჩამომავლობასა და სახელის ეტიმოლოგიაზე მრავალი მოსაზრებაა გამოთქმული. უსლარი, ყურადღებას აქცევს რა „შესაქ-

¹⁵⁷ Scil., 81. SC, I, 85-86.

¹⁵⁸ SC, I, 422. სიჭინავა ვ., ძველი კოლხეთის კულტურის ისტორიიდან. რუსთაველის სახ. ბათუმის სახელმწიფო პედაგოგიური ინსტიტუტის შრომები, III, ბათუმი, 1954 წ. გვ. 81-101.

¹⁵⁹ Strab., XI, 3, §4. SC, I, 140; XII, 3, §13. SC, I, 157

¹⁶⁰ Plin., XXXIII, 52. SC, II, 197.

¹⁶¹ იქვე, III, 129, 144, 145. SC, II, 168, 169.

¹⁶² Ampel., VI, 8, SC, II, 197

¹⁶³ PPE, §8. SC, I, 219, 222;

* არიანეს ეს ცნობა, ჩემის აზრით, უფრო ქსენოფონტის განმეორებას უნდა წარმოადგენდეს, ვიდრე ახ. წ. აღ. II საუკუნის მდგომარეობის ასახვას.

¹⁶⁴ Strab., IX, 1. SC, I, 240-241.

მეთა“ წიგნის ცნობას (X, 13-14), რომ მიცრაიმისაგან წარმოიშვნენ ლუდმი, ლეგავიმი, ნავტუხიმი, ნატრუსიმი და კასლუხიმი, ფიქრობს, რომ თუ „კასლუხიმი“ სახელიდან არამეული ენის ბუნების თანახმად ხმოვნებს და მრავლობითის დაბოლოებას ამოვიღებთ, დაგვრჩება „კსლხ“, რომელშიც, მისი სიტყვით, ძველი ებრაული ენის ყველა მკვლევარი სცნობს ბერძენი ავტორების კოლხებს. ამდენად, ჰეროდოტეს ცნობა კოლხების ეგვიპტელებისაგან ჩამომავლობაზე მას მისაღებად მიაჩნია.¹⁶⁵ ნ. მარი „კოლხ“ სახელს „ჭოროხ“-ის გზით „კოროხ“-ს უკავშირებდა. უკანასკნელი მას „კულხ“-„კოლხ“-ის ადგილობრივ ფორმად მიაჩნდა.¹⁶⁶ ივ. ჯავახიშვილი კოლხებს ასირიული წყაროების „კასკებს“ უკავშირებდა. ამდენად, კოლხების პირველ ხსენებას წერილობით წყაროებში იგი ძვ. წ. XII საუკუნის დამლევით ათარიღებდა.¹⁶⁷ ყველაზე დასაბუთებულად და მისაღებად გამოიყურება ივ. ჯავახიშვილისა (შემდგომ გამოთქმული) და გ. მელიქიშვილის მიერ გამოთქმული მოსაზრება, რომლის მიხედვითაც „კულხ“ სახელი ნაწარმოებია კოლას ოლქის სახელწოდებიდან, რომლის მოსახლეობა კულხა-კოლხას დიდი პოლიტიკური გაერთიანების შექმნას ჩაუდგა სათავეში.¹⁶⁸

ლაზები. ძველი კოლხიდის ტერიტორიაზე მდ. ჭოროხის მარჯვენა მხარეზე და მდ. რიონის სამხრეთით ძველთაგანვე უცხოვრია ლაზთა ტომს, რომელსაც წილად ხვდა შავი ზღვის სანაპიროზე კოლხების სახელი შეეცვალა.

ლაზების პირველი ხსენება ანტიკურ ლიტერატურაში მემნონ ჰერაკლიდელთან უნდა გვექონდეს (ძვ. წ. I საუკუნის დამლევი – ახ. წ. I საუკუნის დამლევი).¹⁶⁹ მემნონის ცნობით, როდესაც ძვ. წ. აღ. 70 წელს ლუკულმა სინოპში შეამწყვდია ტირანი კლეორხი, უკანასკნელი, ღამით, დაჯდება რა გემზე, გარბის პონტოს „მიგა ოლქებში“, რომლებიც სანებითა და ლაზებითაა დასახლებული.¹⁷⁰ პლინი სეკუნდის ცნობით, მდ. აბსარის ირგვლივ სანაპიროზე ჰენიოხები, ამპრეეტები და ლაზები ცხოვრობენ, ხოლო ლაზთა ტომის ჩრდილოეთით მას კოლხთა ტომი აქვს დასახლებული,¹⁷¹ უკანასკნელი, როგორც აღინიშნა, მდ. ფასიდის სამხრეთით სახლებულა. ამგვარად, მისი ცნობით, მდ. ფასიდსა და მდ. აბსარს შორის სანაპიროზე ორი ტომი ყოფილა: ლაზები

¹⁶⁵ Услар П., Древнейшие сказания о Кавказе, ЗКОРГО, XII, 1881, 404 и т. д.

¹⁶⁶ Марр Н., Из поездки в Турецкий Лазистан, Из. АН, СПб 1910, 548.

¹⁶⁷ ჯავახიშვილი ივ., ქართველი ერის ისტორია, I, 405, 406.

¹⁶⁸ მისივე, საქართველოს კავკასიისა და ..., გვ. 4, 12., Меликишвили Г., Наირи-Урарту, стр. 63.

¹⁶⁹ ВДИ, 1951, №1, М.-Л., 287.

¹⁷⁰ SC, I, 510.

¹⁷¹ Plin., VI, 12, SC, II, 178.

და კოლხები. არიანეს ცნობით, ზიდრიტების ჩრდილო მეზობლები ლაზები ყოფილან, მაგრამ აღმოსავლეთ სანაპიროს მიდევნებით სოხუ-მამდე გარდა ლაზებისა კიდევ სამი ტომი სახლებულა: აპსილები (აბშილები), აბაზგები და სანიგები.¹⁷² პტოლემეაიოსის დროს კოლხიდის მთელი სანაპიროები უკვე ლაზებს სჭერიათ,¹⁷³ ხოლო ფსევდო არიანე გვაცნობებს, რომ დიოსკურიდან აბსარამდე წინათ კოლხები ცხოვრობდნენ, მაგრამ ეხლა ლაზები დაერქვათო.¹⁷⁴ ეს ლაზთა პოლიტიკური ექსპანსიის შედეგია. ისინი IV საუკუნისათვის დასავლეთ საქართველოს ტერიტორიაზე ქმნიან ძლიერ სამეფოს, რომელშიც იქ მოსახლე ტომებს აერთიანებენ და ქვეყანას თავიანთ სახელს აძლევენ, ისევე, როგორც ეს უფრო ადრე კოლხებმა მოიმოქმედეს. ამ ტომის სახელის ის ფორმა, რომელიც ანტიკურ ლიტერატურას აქვს დაცული (ლაზიკა, ლაზები), რომელიც ქართველური ენისათვის დამახასიათებელი ფორმა უნდა იყოს. ს. ჯანაშია ფიქრობს, რომ ადგილობრივი ფორმა „ზან“ უნდა იყოს. როგორც „ზანი“, ისე „ლაზი“, ამოდის „სანიდან“. მისი აზრით, ამოსავალი ფორმა „სან“-ია, საიდანაც ახ. წ. აღ. I საუკუნეებში ყალიბდება საკუთარი სატომო სახელები, ჩრდილო კოლხეთისათვის – „ზანი“, სამხრეთისათვის – „ჭანი“. იგი, ამასთან, იქით იხრება, რომ ამ ორივე შტოს საერთო სახელად „სანი“ იქნას აღიარებული.¹⁷⁵ „სან“ სახელისათვის უპირატესობის მიცემისას ავტორი ამოდის იქედან, რომ ჰეკატეს ის ფრაგმენტი, სადაც მაკრონებისა და სანების იგივეობაზეა ლაპარაკი, მას მთლიანად ჰეკატეს კალმიდან გამოსულად მიაჩნია. სინამდვილეში განსაზღვრება „ეხლა სანები“ («Οὐ νῦν Σαννοί») ეკუთვნის სტეფანე ბიზანტიელის კალამს, რომელსაც ეს ცნობა სტრაბონიდან ან რომელიმე სხვა ავტორიდან შეეძლო ამოედო. ადგილობრივ „ზან“ ფორმის არსებობაზე მიგვიითიებს მთელი რიგი გეოგრაფიული სახელები, რომლებიც დასავლეთ საქართველოს ტერიტორიაზე შემოინახენ. ასეთებია: საზანო, ზანა, ზანაძგა, ზანათი, ზანაკარი და სხვა. ამასთან აღსანიშნავია, რომ სვანები მეგრელებს ზანარ, ხოლო სამეგრელოს ზან (ერთი მეგრელი მ-ზან, მუ-ზნი) ეძახიან. სხვათა შორის უნდა აღინიშნოს, რომ ქართულ ისტორიოგრაფიაში მიღებული აზრი ლაზებისა და მეგრელების იგივეობაზე სინამდვილეს არ უნდა შეეფერებოდეს. პტოლემეაიოსის ცნობიდან ვგებულობთ, რომ ლაზები ძირითადად ზღვის სანაპიროს მცხოვრებლები ყოფილან, ხოლო მათ ზემოთ, ე. ი. ქვეყნის სიღრმეში, მანრალესა და

¹⁷² PPE., §15, SC, I, 222.

¹⁷³ Strab., IX, 1, SC, I, 241.

¹⁷⁴ Ps. PPE., §48, SC, I, 275.

¹⁷⁵ ჯანაშია ს., თუბალ-თაბალი ..., 206 და შმდ. განსაკ. 210. ს. კაკაბაძე, დასახ. ნაშრ., 72.

ეკრიკტიკის (ეგრისის) სხვა ხალხებს უცხოვრიათ.¹⁷⁶ ისინი, როგორც ჩანს, ძველი კოლხიდის სამხრეთ-დასავლეთ* და აღმოსავლეთ ნაწილში ცხოვრობდნენ და ოდიტგანვე თავის თავს მარგალებს ეძახდნენ, ხოლო ქვეყანას – ეგრისს (აქედან, ალბათ, ეკრიკტიკე). ამის გამო იბერიის მცხოვრებლებისათვის გარკვეულ ხანაში დასავლეთ საქართველო ეგრისად და სამეგრელოდაა ცნობილი. რამდენადაც ჩვენთვის საინტერესო გადარჩენილი ქართული წერილობითი წყაროები მხოლოდ აღმოსავლეთ საქართველოდანაა და თანაც მოგვიანო ხანისა, ამიტომ შეიქმნა ილუზია ზანების (ლაზების) და მეგრელების იგივეობისა, რამდენადაც ამ წყაროებში დასავლეთ საქართველო წარმოდგენილია სამეგრელოდ და არა საზანოდ. ისტორიოგრაფიაში „ეგრისის სამეფოდ“ ცნობილი პოლიტიკური წარმონაქმნი სინამდვილეში „ზანთა სამეფოა“ და არა მეგრელთა. მეგრელთა პოლიტიკურ სცენაზე გამოჩენა უფრო გვიანი დროის ამბავია.

აპსილები. არიანეს ცნობით, ლაზების მეზობლად, ზღვის სანაპიროზე აპსილები (Ἀψίλοι) – აფშილები ცხოვრობდნენ.¹⁷⁷ ანტიკურ ლიტერატურაში აპსილების პირველი ხსენება პლინი სეკუნდთან გვხვდება. ისინი მას, ჩამოთვლის რიგის მიხედვით, დღევანდელი სოხუმის სამხრეთით ეგულება, მათ ჩრდილო მეზობლებს, მისი აზრით, სანიგები წარმოადგენენ.¹⁷⁸ როგორც არიანეს ცნობიდან ირკვევა, პლინის კოლხიდის სანაპიროს ეთნიკურ რუკაზე, მისი წყაროების ნაკლულევანების გამო, მთლად სწორი წარმოდგენა არ ჰქონდა. არიანე აფშილებსა და სანიგებს შორის აბაზებს ათავსებს.¹⁷⁹ აფშილთა ტომის არსებობაზე მიგვითითებს როგორც გვარ აფშილავას არსებობა, რომელიც ნაწარმოებია ისევე, როგორც ქართველიშვილი, ლეკიშვილი, აფხაზავა, სვანიძე, მესხია, მესხიშვილი, თურქიშვილი, თურქია, რუსაძე, რესეიშვილი, რუსიტაშვილი (არსებობდა ქართული სახელი რუსა), ... ისე ვაზის ჯიშის „აფშილაური“ არსებობა.¹⁸⁰ იქნებ ვაზის ამ ჯიშის სახელი ისევე იყოს წარმოებული, როგორც აჭარაში შემორჩენილი „კლარჯული“, „ხოფათური“ და ა.შ.

¹⁷⁶ Ptol., IX, I, SC, I, 241.

* ამაზე უნდა მიგვითითებდეს სახელწოდება „ერგე“ – სოფელი მდ. ჭოროხისა და აჭარისწყლის შესაყართან. ერგე – მარგალი – მეგრელი.

¹⁷⁷ PPE., §15. SC, I, 222. გაითვალისწინეთ გ. მელიქიშვილი, ქაშქების ხალხის ეთნიკური ვინაობის საკითხისათვის, „მიმოხილველი“, III, თბ., 1953, გვ. 203. შდრ. ს. კაკაბაძე, დასახ. ნაშრ., 68.

¹⁷⁸ Plin., VI, 14. SC, II, 179.

¹⁷⁹ რამიშვილი მ., გურიის, აჭარისა და სამეგრელოს ვაზის ჯიშები, თბ., 1948.

¹⁸⁰ ინგოროყვა პ., აფშილებს მდ. კელასურის ზემო ნაწილს და გუმისთას ხეობიდან, ვიდრე კოდორის ხეობამდე ათავსებს. იხ. მისი – გიორგი მერჩულე, მნათობი, №3, 1950, გვ. 124-125, 135-137.

აბაზგები. მათი პირველი ხსენება არიანესთან გვხვდება. მის დროს ისინი სოხუმის სამხრეთით ცხოვრებულან,* მაგრამ VI საუკუნეში, როგორც პროკოპი კესარიელი გადმოგვცემს, მათ უფრო ჩრდილოეთით წაუწვევიათ და დღევანდელი გაგრის (ტრაქეა) მიდამოებს გასცილებიან.¹⁸¹ თავის მხრივ II საუკუნიდან ისინი ლაზების მოხარკეები არიან. VII-VIII საუკუნეებში აფხაზ-აბაზგები ჯერ მთელ დასავლეთ საქართველოს აერთიანებენ, შემდეგ კი მათი სამეფო საქართველოს გაერთიანებისათვის ბრძოლაში ებმება. თვით აფხაზთა ტომს წილად არ ხვდა თავისი სახე დღემდე მოეტანა. გვიან შუა საუკუნეებში ძლიერდება კავკასიის ქედს გადაღმა მცხოვრები ჩერქეზული ელემენტის თანდათანობით ჩამოწევა ძველი აფხაზეთის ადგილსაცხოვრისზე. შეჯვარების პროცესი ჩერქეზული ელემენტის გამარჯვებით მთავრდება, მაგრამ აფხაზთა აქ ცხოვრების კვალი არ მოსპობილა. გეოგრაფიული სახელწოდება „აფხაზეთი“ უცვლელად შეინახა და მისგან, მის ახალსა და ძველ მცხოვრებლებს, აფხაზები ეწოდათ.* გვიან შუა საუკუნეებში მთის მოწოლა ბარზე შეინიშნება არა მარტო დასავლეთ კავკასიონის სამხრეთ ფერდობზე, არამედ საქართველოს კავკასიონის მთელ სიგრძეზე. ეს საქართველოს პოლიტიკური და სამხედრო დაუძლურებითაც იყო შეპირობებული.

სანიგები. სანიგები პირველად პლინისთან იხსენიებიან. ისინი, მისი წარმოდგენით, აპსილების ჩრდილოეთით სახლობენ, ზღვის ნაპირას სებასტოპოლისის (სოხუმის) მიდამოებში.¹⁸² იმავე ადგილას ჰყავს ისინი მოთავსებული არიანესაც.¹⁸³ მისი ცნობით, სებასტოპოლისი სანიგების ქვეყანაშია.¹⁸⁴ სამხრეთ მეზობლად აქ უკვე აპსილები კი არა, არამედ აბაზგებია, ხოლო აპსილები აბაზგებსა და ლაზებს შორისაა მოთავსებული. ჩრდილოეთით აპსილების ტერიტორია მდ. აქეუნტამდე (მახე) ვრცელდება. ფსევდო-არიანეს დროს სანიგები მდინარეებს აბასკსა (ფსოუ) და აქეუნტს შორის შევიწროებულან.¹⁸⁵ საფიქრებელია, რომ სანიგების სახელი შენახული გვაქვს აფხაზური თქმულების „წანებში“.¹⁸⁶ „წ“-ანის „ს“-ანით გადმოცემა ბერძნულისათვის ჩვეულებრივი რამ არის. სანიგების სახელი უნდა იყოს შენახული ქართულ გვარში – „სანიგი-ძე“ – სანიკიძე.

* PPE., იქვე.

¹⁸¹ BG, VIII, 9. გიორგიკა, II, 124 და შმდგ.

* შდრ. პ. ინგოროყვა, გიორგი მერჩულე, მნათობი, 1950, №3, გვ. 118-134.

¹⁸² Plin., VI, 14. SC, II, 179, 183.

¹⁸³ იქვე.

¹⁸⁴ ალბათ ამ ნიადაგზე აიგივებს პ. ინგოროყვა სანიგებსა და ჰენიოხებს. იხ. მისი – გიორგი მერჩულე, მნათობი, №3, 1950, გვ. 122-123.

¹⁸⁵ Ps. PPE., §57, SC, I, 275.

¹⁸⁶ ჯანაშია ს., თუბალ-თაბალი..., 195-196. შდრ. ს. კაკაბაძე, დასახ. ნაშრ., 68,72.

შავი ზღვის ჩრდილო-აღმოსავლეთ კუთხეში მთელი რიგი ანტიკური ავტორები (ფსევდო-სკილაქს კარიანდელი, ჰერაკლიდი, ველლეი პატერკული, ოვიდი ნაზინი, სტრაბონი, პომპონი მელა, ანეი ლუკანი, პლინი სეკუნდი, იოსებ ფლავიუსი, დიონისე, ავიენი, ფსევდო-არიანე და სხვები) ასახელებენ ე. წ. ჰენიოხებს,* რომლებიც, მათი თქმით, პელაზგების ჩამომავლები არიან. ფსევდო-სკილაქსი ჰენიოხებს აქეების მეზობლად ასახელებს. მისი წარმოდგენით, დონის სამხრეთით ჯერ სარმატები ცხოვრობდნენ, ხოლო შემდეგ ერთმანეთზე მიყოლებით მეოტები, სინდები, კერკეტები, ტორეტები, აქეები, **ჰენიოხები**, კორაქსები, კოლიკა, მელანქლონები, გელონები და კოლხები ქალაქ დიოსკურიადით.¹⁸⁷ როგორც ჩანს, მას პონტოს სანაპიროს ამ მონაკვეთზე მცხოვრები ტომების მიახლოებითი სია ჰქონია, მაგრამ ტომების განლაგების რიგზე მას მთლად ნათელი წარმოდგენა არ ჰქონია. არტემიდორს, ჩანს, უფრო განსხვავებული წყარო გააჩნდა. ნავსადგურ ბატას აქეთ, მისი ცნობით, ჯერ კერკეტების სანაპიროა 800 სტადიაზე, შემდეგ აქეების 500-ზე, ჰენიოხების 1000-ზე და შემდეგ მდებარეობს „დიდი პიტიუნტი“ დიოსკუროდთან 360 სტადიაზე.¹⁸⁸ სტრაბონი ეთანხმება მითრიდატეს ისტორიკოსებს (οἱ Μιθριδατικά συγγράμματα), რომლებიც ჯერ აქეებს ასახელებენ, შემდეგ ზიგებს, ჰენიოხებს, კერკეტებს, მოსხებს, კოლხებს, ხოლო ქვეყნის სიღრმეში ფთეიროფაგებს, სვანებს და სხვა მცირე ტომებს.¹⁸⁹ სტრაბონის წარმოდგენით, პიტიუნტი და დიოსკურიადა კოლხიდაშია. ამდენად, ჰენიოხების ადგილსაცხოვრებელი მას ჩრდილოეთით აქვს წარმოდგენილი, ისევე, როგორც არტემიდორსაც¹⁹⁰ (სტრაბონი უკვე იცნობს გადმოცემას ჰენიოხების ბერძნულ ჩამომავლობაზე).¹⁹¹ მისი წარმოდგენით, ჰენიოხები და კოლხები ერთმანეთის მეზობლად ცხოვრობენ.¹⁹² ამდენად, კერკეტები, სტრაბონის ამ წყაროს ხანისათვის, სანაპიროს მცხოვრებლები არ არიან, ან ისინი ჰენიოხების მიერ არიან დამორჩილებული და მათ სახელს ეფარებიან.

ამ ცნობების პარალელურად არსებობს მეორე რიგის ცნობები, რომელთა თანახმადაც ჰენიოხები უფრო სამხრეთით ცხოვრობენ. ჰერაკლიდი (ძვ. წ. II ს.) თავის „ფასიანელთა სახელმწიფოს შესახებ“

* პ. ინგოროვცა მათ სანიგებთან აიგივებს. ჰენიოხეთი, მისი აზრით, 3 ნაწილად იყოფოდა: ზემო, ქვემო და შუა ჰენიოხეთი.

¹⁸⁷ Scil., §70-81. SC, I, 85-86.

¹⁸⁸ Strab., XI, 2, §14, SC, I, 135.

¹⁸⁹ იქვე.

¹⁹⁰ იქვე.

¹⁹¹ Strab., XI, 2, §12. SC, I, 133-134.

¹⁹² Strab., XI, 2, §1. SC, I, 130.

(XVIII) წერს, რომ მდ. ფასიდზე თავდაპირველად ჰენიოხები ცხოვრობდნენ, ხოლო შემდეგ – მილეთელები.¹⁹³ პომპონი მელას და დიონისეს „პერიეგესის“ II საუკუნის ანონიმი სქოლიასტის ცნობით, რომელსაც მოყავს ხარაქსის ცნობა, დიოსკურია ჰენიოხების ქვეყანაშია.¹⁹⁴ ცალკე უნდა შევნიშნოთ პლინის დაბნეულობა ჰენიოხთა ადგილსაცხოვრისის განსაზღვრაში. ერთგან ისინი ჭოროხსა და ტრაპეზუნტს შორის ცხოვრობენ „სან-ჰენიოხების“ სახელით¹⁹⁵ (იქვე ჰენიოხები ცალკე იხსენიებიან), რამდენიმე წინადადების შემდეგ იგი ჰენიოხებს სოხუმის ჩრდილოეთით სანიგთა ტომის შემდეგ ათავსებს.¹⁹⁶ სხვაგან კიდევ ჰენიოხები კოლას რაიონში ჰყავს ნაგულისხმევი. ამ ცნობით მტკვარი სათავეებს ჰენიოხის მთებში იღებს, რომელთაც სხვები კორაქსულს უწოდებენ (Cyrus oritur in Heniochis montibus, quos alii Caraxicos vocavere).¹⁹⁷ უნდა ვიფიქროთ, რომ პლინის ვერ მოუსწვრია მის განკარგულებაში არსებული წყაროების გულდასმით შესწავლა-გადაამუშავება. ისინი, ჩანს, სხვადასხვა ხასიათის იყო და ჰენიოხებს რამდენიმე ადგილას უთითებდნენ.

სვანები. პირველ კონკრეტულ ცნობას სვანების შესახებ სტრაბონი იძლევა. მისი სიტყვით, იმ ტომების რიცხვს, რომლებიც თავს იყრიან დიოსკურიის ბაზრობაზე, ეკუთვნიან სვანები და ფთეიროფაგები (Οἱ Φθειροφάγοι, οἱ Σοάνες),¹⁹⁸ სტრაბონს, დასავლეთ კავკასიონის სამხრეთ ნაწილში დასახელების ღირსად, გარდა აღნიშნული ტომებისა, არავინ მიაჩნია. „სხვა მეზობელი ხალხები კავკასთან, მისი ცნობით, ღარიბი და მცირემიწიანები არიან“ (τὰ μὲν οὖν ἄλλα ἔθνη τὰ περὶ τὸν Καύκασον λυμπρά καὶ μικρόχαρα).¹⁹⁹ შემდგომი ცნობა სვანების შესახებ პტოლემეაიოსთანაა დაცული, მაგრამ იგი იხსენიებს არა სვანებს, არამედ „სვანო-კოლხებს“ (Σουαννόκολχοι).²⁰⁰ ს. ჯანაშია ფიქრობს, რომ Σουαννόκολχοι წაკითხულ უნდა იქნას, როგორც Σαννόκοლχοι. მისი დებულება ემყარება იმ წინამძღვრებს, რომ მისთვის ძვ. კოლხიდის მოსახლეობის ძირითადი უძველესი სახელი „სან“-ია, რომელიც პტოლემეს მოხსენიებული არ ჰყავდა. პტოლემეაიოსის ამ ადგილის ასე წაკითხვით, მისი აზრით, მოცემულ ტერიტორიას

¹⁹³ SC, I, 447.

¹⁹⁴ SC, II, 118; SC, I, 215-216.

¹⁹⁵ Plin, VI, 12. SC, II, 178.

¹⁹⁶ იქვე, VI, 14. SC, II, 179; VI, 30. SC, II, 182

¹⁹⁷ იქვე, VI, 26. SC, II, 181.

¹⁹⁸ Strab., XI, 2, §19. SC, I, 138.

¹⁹⁹ იქვე.

²⁰⁰ Ptol., V, 8, §17-25. SC, I, 239.

დაუბრუნდებოდა მისი ძირითადი ტომი.²⁰¹ ნ. ლომოურის აზრით, პტოლემეაიოსის სვანო-კოლხები მდ. ბზიფის რაიონის ჩრდ. დასავლეთით „არის საძიებელი“.²⁰² არც ერთ ძველ ავტორს პროკოპი კესარიელამდე სვანების ადგილსაცხოვრისის განსაზღვრისათვის საჭირო ცნობა არ მოუცია, გარდა ზოგადი მითითებებისა, რომლითაც ისინი დასავლეთ კავკასიონის სამხრეთ ფერდობზე მცხოვრებ ტომად წარმოგვიდგება. პროკოპი კესარიელის ცნობით, ქუთაისის მახლობლად მდებარე ციხე უქიმერიონი (Οὐξιμέριον) სვანეთისა და სკვიმნიეთისაკენ მიმავალ გზას კეტავდა.²⁰³ როგორც პროკოპის ცნობების დღევანდელ მდგომარეობასთან შედარებიდან ირკვევა, სვანთა სამოსახლო ლეჩხუმის (სკიმნია) დასავლეთით ყოფილა.* სვანები, როგორც ჩანს, მრავალ თემადაა გაყოფილი. ერთ-ერთ ასეთ თემს შეადგენდა მისიმიანთა ტომი. აგათია სქოლასტიკოსის ცნობით, ისინი აფსილების მეზობლად, მათგან ჩრდილო-აღმოსავლეთით სახლებულან. ერთი მხრივ მათ ლაზები ესაზღვრებოდნენ, ხოლო მეორე მხრით – ალანები.²⁰⁴ მისი ცნობით, მისიმიანების ენა განსხვავდება აპსილებისა და ლაზების ენისაგან.²⁰⁵ საინტერესო ცნობებს მისიმიანთა შესახებ იძლევა მენანდრე პროტექტორი.²⁰⁶ როგორც წყაროებზე დაკვირვებიდან ირკვევა, მისიმიანები მდ. კოდორის ზემო წელში და მისგან დასავლეთით უნდა სახლებულიყვნენ. პ. ინგოროყვა მათ პტოლემეაიოსის „სვანო-კოლხებს“ და ფაუსტოს ბიზანტიელის „ეგერო-სვანებს“ უიგივებს.²⁰⁷

ცხადია, შავი ზღვის სამხრეთ-აღმოსავლეთ სანაპიროზე მოსახლე ტომების სია ჩვენ მიერ მითითებული ტომებით არ ამოწურულა, მაგრამ ჩვენთვის საინტერესო ხანის ავტორებს მათ შესახებ ცნობები არ მოუციათ. ამის მიზეზზე თავის ადგილას უკვე გვქონდა ლაპარაკი და აქ აღარ გავიმეორებთ. ტომების ადგილსაცხოვრისის ზოგადი მითითება, ამ წყაროებზე დაყრდნობით, უმრავლეს შემთხვევაში ხერხდება, მაგრამ მათი საზღვრების დადგენა თუნდაც დავიწყებული არ იქნეს, რომ ყოველ ცალკე აღებულ პერიოდში ეს საზღვრები სხვადასხვაა, არ ხერხდება.

²⁰¹ ჯანაშია ს., თუბალ-თაბალი ..., 190, შენიშვნა 2.

²⁰² ლომოური ნ. , პტოლემეაიოსის ცნობები ... 85.

²⁰³ BG, VIII, 14, 16. გეორგიკა, II, 164-165, 171.

* შდრ. კაკაბაძე, ქართული სახელმწიფოებრიობის გენეზისის საკითხები, საისტორიო მოამბე, I, თბ., 1924, გვ. 57 და შმდგ.

²⁰⁴ Agath., III, 15. გეორგიკა, III, 86

²⁰⁵ ფაუნჩიშვილი ს., მისიმიანთა ტომი, თსუ შრომები, I, 1936, 277-280.

²⁰⁶ Fr., 22. გეორგიკა, III, 236-237

²⁰⁷ ინგოროყვა პ., დასახ. ნაშრ., გვ. 125, 135-140.

§2. სოციალ-ეკონომიური მდგომარეობა VI-I საუკუნეებში

კოლხიდა და შავი ზღვის სამხრეთი სანაპიროები ბერძნულ-ლათინურ მწერლობაში დახატულია, როგორც ეკონომიურად თვითკმარი რაიონი, სადაც დაწინაურებულ წარმოებაზე დამყარებული მეურნეობის გვერდით, რომელიც თავის მონაპოვარს უზიარებს სხვა ხალხებს და შემოქმედებითად ითვისებს სხვათა მიღწევებს, არსებობს ეკონომიურად შედარებით სუსტად განვითარებული ოლქებიც, რაც, ძირითადად, გეოგრაფიული პირობების განსხვავებით არის გამოწვეული. „გეოგრაფიული გარემო, უდავოა, საზოგადოების განვითარების ერთ-ერთ მუდმივ და აუცილებელ პირობას წარმოადგენს და იგი, რა თქმა უნდა, გავლენას ახდენს საზოგადოების განვითარების მსვლელობაზე, – **იგი აჩქარებს ან ანელებს საზოგადოების განვითარების მსვლელობას** (ხაზგასმა ჩემი, – დ.ხ.), მაგრამ მისი გავლენა **განმსაზღვრელი** როდია, ვინაიდან საზოგადოების ცვლილებანი და განვითარება გაცილებით უფრო სწრაფად ხდება, ვიდრე გეოგრაფიული გარემოს ცვლილებანი და განვითარება“.²⁰⁸ ამასთან, უნდა აღვნიშნოთ, რომ რაც უფრო დაბალია საწარმოო ძალების განვითარების დონე, მით უფრო ძლიერია ბუნების, გეოგრაფიული გარემოს გავლენის ხარისხი ადამიანთა საზოგადოებაზე, მით უფრო მეტადაა ადამიანი დამოკიდებული გარემოზე.

შავი ზღვის სანაპიროები ადრიდანვე იზიდავს უცხოელთა ყურადღებას, და ეს გარემოება სწორედ იმის მანიშნებელია, რომ აქ იყო ისეთი საზოგადოება, ისეთი მეურნეობა, რომელსაც შეეძლო რაიმე მიეცა უცხოეთისათვის. სხვა მასალაც რომ არაფერი გვქონოდა, სავაჭრო კოლონიების სიმრავლე (ფასიდი, დიოსკურია, პიტიუნტი, ტრაპეზუნტი, კერასუნტი, კოტიორა, აფსარი, ათინა, რიზე და ა.შ.) გვაფიქრებინებდა, რომ უცხოელ ვაჭრებს თავის დროზე აქ ღირსეული კონტრაგენტები უპოვნიათ: ამ კუთხის ეკონომიური სიღონიერთა და სოციალური დაწინაურებულობით უნდა ავხსნათ, რომ ბერძენი ვაჭრები და ახალმოშენები აქ ზედიზედ აარსებენ კოლონიებსა და სავაჭრო ფაქტორიებს, რომელთაგან ბევრი შემდეგში სავაჭრო და ეკონომიური საქმიანობის საყოველთაოდ ცნობილ ცენტრად იქცა (ტრაპეზუნტი, ფასიდი, დიოსკურია).

მაგრამ ჩვენ გვაქვს პირდაპირი ცნობები, როგორც წერილობითი, ისე, და ეს განსაკუთრებით საყურადღებოა, მატერიალური კულტურის ნაშთების სახით შემონახული. ამ ცნობებზე დაყრდნობით ჩვენ საშუა-

²⁰⁸ სტალინი ი., ლენინიზმის საკითხები, XI, ქარ. გამოც., თბ., 1951, გვ. 687, ნაშრომში: დიალექტიკური და ისტორიული მატერიალიზმის შესახებ.

ლება გვეძლევა იმდროინდელი პონტოსპირეთის ეკონომიური მდგომარეობის ზოგადი სურათი წარმოვიდგინოთ.

ბერძნულ ლიტერატურაში დაცულია არაერთი პირდაპირი თუ არაპირდაპირი ცნობა ძველი კოლხიდის დაწინაურებაზე მეურნეობის სხვადასხვა დარგში. ერთ-ერთი დარგი, რომლის შესახებ ჩვენ შედარებით საკმარისი ცნობები (წერილობითი თუ მატერიალური სახით) გვაქვს დაცული – ფეიქრობაა. ჯერ კიდევ დე-მორგანმა შენიშნა ბრინჯაოს ხანის ქართულ სამარხებში ქსოვილების ნაშთების არსებობა, რომლებიც აკად. ივ. ჯავახიშვილის სიტყვით, სელის, მატყლისა და ბამბისაგან იყო დამზადებული.²⁰⁹ როგორც შემდგომი ხანის არქეოლოგიურმა ძიებებმა ცხადყო, ბრინჯაოს ხანაში ქართველ ტომებს უკვე სცოდნიათ სხვადასხვა ღირსების ქსოვილის დამზადება. დაბლაგომის,²¹⁰ ეშერის, წვერმაღალის,²¹¹ ოჩამჩირის, სოხუმის,²¹² ფიჭვნარის²¹³ არქეოლოგიური მასალები ადასტურებენ, რომ კოლხიდაში უკვე ბრინჯაოს ხანაში არსებული საფეიქრო წარმოება განაგრძობს მოქმედებასა და განვითარებას ე. წ. ანტიკურ ხანაშიაც. ბუნებრივია ვივარაუდოთ, რომ მას განვითარება-წინსვლა განეცადოს. არქეოლოგიური მასალის გათვალისწინებით მიღებულ დასკვნებს მხარს აძლევს და ყოველმხრივ დასაბუთებულის ხასიათს სძენს წერილობითი წყაროების ცნობებიც, რომელთა მიხედვითაც ანტიკური ხანის კოლხეთი საფეიქრო წარმოების, კერძოდ, სელის დამუშავების ერთ-ერთი ძირითადი კერაა. დაწყებული ჰეროდოტით, ვიდრე სტრაბონამდე (ჩათვლით), დაინტერესებული ავტორები აღიარებენ კოლხური სელის წარმოების კარგ თვისებებს და ამით ცხადყოფენ მის სახელგანთქმულობას იმდროინდელ სამყაროში. პირველი ცნობა კოლხურ ფეიქრობაზე, როგორც აღვნიშნეთ, ჰეროდოტესთანაა დაცული (ძვ. წ. V ს.). ამ ცნობის მიხედვით, ეგეოსის სამყაროში ძვ. წ. V საუკუნეში სელის იმ ნაწარმს ეძლეოდა მაღალი შეფასება, რომელიც კოლხეთიდან ან ეგვიპტიდან იყო შემოტანილი. კოლხეთიდან შეტანილ ტილოს, თურმე, სარდონიკურს (თუ სარდონური სარდე-დან) უწოდებდნენ. ცნობაში შემდეგ მითითებულია, რომ კოლხები იმავე ხერხით ამზადებენ ტილოს, როგორითაც ეგვიპტელები.²¹⁴ აქებს კოლხურ სელს ქსენო-

²⁰⁹ ჯავახიშვილი ივ., საქართველოს ეკონომიური ისტორია, I, თბ., 1930; ქართველი ერის ისტორია, I, 1951, გვ. 12, გვ. 373.

²¹⁰ Хоштария Н.В., Древнее поселение в Даблагоми. Тб., 1940, стр. 191-200; Куфтин Б.А., Материалы археологии Колхиди, II, Тб., 1950, стр. 111-112, 288-297.

²¹¹ იქვე, გვ. 112, 292, შენიშვნა 1.

²¹² Соловьев Л.Н., Следы древнего соляного промысла близ г. Сухуми и г. Очамчири. Труды Абх. Гос. Музея, I, 1947, стр. 23

²¹³ იხ. ისტორიის ინსტიტუტის ფიჭვნარი (ქობულეთის) არქეოლოგიური ექსპედიციის 1953 წ. მასალები (6. ხოშტარია).

²¹⁴ Herodot., II, 105, SC, I, 9. Гаидукевич, Боспорское царство, М.-Л., 1949, стр. 113

ფონტიც,²¹⁵ ხოლო სტრაბონი პირველი საუკუნისათვის იმეორებს: კოლხიდა „აგრეთვე აწარმოებს დიდი (πολύ – მრავლად) რაოდენობის სელს (λίνον) ... სელის წარმოებამ (λινουργία) სახელიც კი გაითქვა. იგი უცხო ქვეყნებშიც კი გაჰქონდათო.“²¹⁶ სტრაბონი აქვე სელთან ერთად იხსენიებს კანაფსაც (κάνναβις).²¹⁷ ამგვარად, ძვ. წ. V-I საუკუნეების სიგრძეზე ძველ კოლხიდაში სელისა და კანაფის წარმოებას სასაქონლო ხასიათიც ჰქონია და ეს არცაა გასაკვირი. რადგან, „სასაქონლო წარმოება, კაპიტალისტურ წარმოებაზე უფრო ძველია. იგი არსებობდა მონათმფლობელური წყობილების დროს და მომსახურებას უწევდა მას“.²¹⁸

გარდა პირდაპირი ცნობებისა, ანტიკურ ლიტერატურას შემონახული აქვს არაპირდაპირი ცნობებიც, რომლებიც სელის წარმოების არსებობას პონტოსპირეთის ქართველურ ტომებში აუცილებლად გვაპარაუდებინებს. ასეთებია ცნობები შეიარაღებაზე, ტანსაცმელზე, ნადირობაზე (ქსენოფონტი); ამაზევე მიგვითითებს არქეოლოგიური მასალაც, განსაკუთრებით კი ე. წ. „ქსოვილიანი კერამიკა“ (ოჩამჩირე, სოხუმი, ფიჭვნარი ...), დიდი რაოდენობა კვირისთავებისა და გვიანდელი მდგომარეობის შესახებ ცნობები: ოსმან-ბეის ცნობით, ლაზური სელის ქსოვილი, რომლის წარმოების ძირითადი ცენტრი რიზეა და მისი მიდამოები, მისი მაღალღირსების გამო აღმოსავლეთში დიდ მოწონებაშია და „ტრაპეზუნტის ტილოს“ სახელითაა ცნობილი, თუმცა იგი ტრაპეზუნტში კი არ მზადდება, არამედ სელის წარმოების ცენტრ რიზეში, სადაც მდინარე ასკურუსის შეყოლებით, რიზეს ველი მოფენილია ტილოს ფაბრიკებით (სახელოსნოებით – დ. ხ.), სადაც ადგილობრივი მცხოვრებლები მუშაობენ.²¹⁹ შემდგომში ეს წარმოება ჩაკლა ევროპიდან შეტანილმა მანქანური წარმოების ტილომ.²²⁰

ჰეროდოტეს ზემოთ მითითებული ცნობა საინტერესოა არა მარტო სელის წარმოების არსებობის დასადაგენად, არამედ საშუალებას იძლევა გამოითქვას მოსაზრება იმ იარაღის როგორობის შესახებ, რომლითაც ქსოვილი მზადდება. როდესაც ნივთის დამზადების ხერხზე ლაპარაკობენ, მხედველობაში უმთავრესად ის იარაღი აქვთ, რომლითაც ნივთი მზადდება. ჰეროდოტეს ცნობა ჩვენ შემდეგნაირად გვესმის: კოლხებსა და ეგვიპტელებს სელის ქსოვილის დასამზადებლად ერთ-

²¹⁵ Xenoph., II, 4. SC, I, 359.

²¹⁶ Strab., XI, 2, §17. SC, I, 137. ივ. ჯავახიშვილი, საქართველოს ეკონომიური ისტორია, I, თბ., 1930, გვ. 372-4.

²¹⁷ Strab., XI, 2, §17. SC, I, 137.

²¹⁸ სტალინი ი., სოციალიზმის ეკონომიკური პრობლემები სსრ კავშირში, თბ., 1952, გვ. 17.

²¹⁹ Осман-беи, Лазистан, ИРГО, X, 8, 1874, стр. 361-362.

²²⁰ Жуковский П.М., Земледельческая Турция, М-Л., 1933, стр. 435

ნაირი იარაღი აქვთ, რომელიც არ წარმოადგენს ეგეოსის ქვეყნებში გავრცელებული საქსოვი იარაღის მსგავს ტიპს, არამედ ძირეულად განსხვავდება მისგან (ეს რომ ასე არ იყოს, მაშინ კოლხებისა და ეგვიპტელების ნათესაობის დასამტკიცებლად მოყვანილი ეს საბუთი დაკარგავს თავის თვისებას, როგორც საბუთი); უკვე უდავო ფაქტადაა აღიარებული ის გარემოება, რომ ეგვიპტის სელის წარმოებაში უკვე ახალი სამეფოს ხანიდან (ძვ. წ. XVI ს.) გამოყენებულია მხოლოდ ჰორიზონტალური საქსოვი დაზგა, რომელიც საბერძნეთმა აღმოსავლეთში გაიცნო და ისიც ელინისტურ ხანაში (ძვ. წ. IV-III სს.); დასტურდება, რომ მანამდე საბერძნეთი იყენებს ვერტიკალურ საქსოვ დაზგას. საბერძნეთის საფეიქრო წარმოებაში სხვადასხვა პერიოდებში ორგვარი საქსოვი დაზგის (ვერტიკალური VI-IV სს. ჰორიზონტალური – IV ს-ის შემდეგ) არსებობა კარგად ხსნის იმ განსხვავებას, რომელიც, ერთის მხრივ, ამ ქვეყნის ძვ. წ. აღ. VI-V საუკუნის და მეორე მხრივ – IV საუკუნის მომდევნო ხანის ქსოვილებს შორის არსებობს.²²¹ თუ ყოველივე ზემოთქმულს მივიღებთ მხედველობაში, ვგონებ, უფლება უნდა გვქონდეს ვთქვათ, რომ კოლხებს ძვ. წ. VI-V საუკუნეში საფეიქრო წარმოებაში ჰორიზონტალური საქსოვი დაზგა ჰქონიათ გამოყენებული. ბ. კუფტინი სამართლიანად ფიქრობდა, რომ დაბლაგომის მასალებში ვერტიკალური საქსოვი დაზგის „შვეულების“ (отвесы) უქონლობა შეიძლება იმით ავსხნათ, რომ აქ, ამ დროს, გამოყენებაშია სწორედ ჰორიზონტალური საქსოვი დაზგა.²²² კუფტინის აღნიშნულ დასკვნას ჩრდილს აყენებს ის გარემოება, რომ იგი ერთი ძეგლის, ისიც არასრულად გათხრილის, მასალას ემყარება, ეშერის იმავე ხანის მასალებში ასეთი „შვეულები“ უკვე გვხვდება.²²³ კუფტინი ვერ ხსნის, თუ რატომ უნდა ყოფილიყო საქსოვი დაზგის ეს ნაწილები ეშერის მიდამოებში და რატომ არ არის იგი დაბლაგომის მასალებში. მან იცის, რომ პონტოსპირეთის ადგილობრივი ტომები VI საუკუნიდან ბერძენი კოლონისტების გაცნობასთან ერთად ეცნობიან ვერტიკალურ საქსოვ დაზგასაც. ამ გარემოებიდან დაბლაგომის მასალაზე დაყრდნობით მას ბუნებრივი იყო გაეკეთებინა დასკვნა, რომ დაბლაგომში ადგილობრივი კულტურული კერის ნაშთთან გვაქვს საქმე, ხოლო ეშერში კი – ნარევთან, ან უფრო ისეთთან, სადაც ბერძნული ელემენტი ჭარბობს. თუმცა სამართლიანობა მოითხოვს ითქვას, რომ სანამ

²²¹ Максимова М., Техника эллинистического производства, в сборнике «эллинистическая техника», М.-Л., 1948, стр. 244-245.

²²² Куфтин Б., Материалы к археологии Колхиды, II, Тб., 1950, გვ. 111-112. ჩაჩაშვილი გ., ქართული ხალხური საქსოვი დაზგები, საქ. სახ. მუზ. მოამბე, XVIII, თბ., 1954, გვ. 179-214.

²²³ Куфтин Б., Материалы к археологии Колхиды, I, Тб., 1949, стр. 14-17

პონტოსპირეთის ქართული სანაპიროების ძველბერძნული სავაჭრო ქალაქების არქეოლოგიური შესწავლა მეცნიერებას შესაფერის და საკმარის მასალას არ მიაწვდის, მანამ მსჯელობა იმაზე, თუ სად როგორი კულტურა იყო გაბატონებული, ნაადრევია. თუ დადასტურდება, რომ VI-V საუკუნეებში ამ ქალაქებში გამოყენებულია ვერტიკალური საქსოვი დაზგა, მაშინ დაბლაგომის მასალები ძველი კოლხიდის ისტორიის დადგენაში კიდევ უფრო საპატიო მდგომარეობას დაიჭერს. მანამდე კი ისეთი მოსაზრება, რომელიც ეშერში აღმოჩენილ ორიოდ ცალ „შვეულას“ ემყარება,²²⁴ ცხადია, ჰაერში გამოკიდებულის შთაბეჭდილებას ტოვებს. მაგრამ აქ ჩვენ დიდ დახმარებას გვიწევს ქართული ხალხური საქსოვი დაზგების ტიპებზე დაკვირვება; ირაკვევა, რომ ქართულ სინამდვილეს შემოუნახავს საქსოვი დაზგების ორივე ძირითადი ტიპი, რომლებიც საქსოვი მასალის მიხედვით შეიძლებოდა ერთსა და იმავე რაიონში ყოფილიყო გამოყენებული.²²⁵

ცხადია, კოლხიდისა და პონტოსპირეთის ქართველური ტომების ადგილსაცხოვრისის არქეოლოგიური შესწავლა მომავალში მეცნიერებას ახალ-ახალ მასალებს მიაწვდის და ამით წინ წასწევს ძველი ტომების წარმოების ტექნიკის შესწავლის საქმეს, მათ შორის საფეიქრო ტექნიკის შესწავლის საქმესაც.

ანტიკური ხანის კოლხეთში სასაქონლო სელის ძირითად მწარმოებლად წარმართული ტაძრები მიმაჩნია, რომელთა მსხვილი მეურნეობების შესაძლო არსებობას პირველად ს. ჯანაშიამ მიაქცია ყურადღება.²²⁶ სტრაბონის საყურადღებო ცნობის შემდეგ²²⁷ მართლაც სრული უფლება გვაქვს დავუშვათ, რომ კოლხიდაში, ყოველ შემთხვევაში, ბარში მაინც, რამდენიმე ათეული დიდმნიშვნელოვანი წარმართული სალოცავი იყო, რომელთა მეურნეობას მომსახურებას უწევდა მონების გარკვეული რაოდენობა. ეს ტაძრები იყო არა მარტო როგორც ერთგვარი სახელოსნოები, არამედ სელისა და კანაფის (და საერთოდ ბოჭკოს) ნედლეულის დამამზადებელ-მომყვანები. ტაძრების მეურნეობას ქურუმები უძღვებიან და ისინივე არიან ამ დროის უმსხვილესი მონათმფლობელები. მაგრამ სატაძრო მეურნეობაში, როგორც გვიანი პარალელებით შეიძლებოდა გვეფიქრა, ხდება არა მარტო მონის შრომის ექსპლუატაცია, არამედ იმ თავისუფალი „მოთემეებისა“ თუ „ხატისყმებისა“, რომლებიც „ხატის მიწაზე“ სახლობენ, ან ამ მიწებით

²²⁴ Куфтин, დასახ. ნაშრ., I, გვ. 14-15

²²⁵ ჩაჩაშვილი გ., დასახ. ნაშრ., იქვე.

²²⁶ ჯანაშია ს.ნ., ფეოდალური ურთიერთობის წარმოშობისათვის საქართველოში, შრ. II, თბ., 1952, გვ. 154-155. მისივე, საქართველო ადრინდელი ფეოდალიზაციის გზაზე, შრ. I, თბ., 1949, გვ. 157-158

²²⁷ Strab., XI, 2, §17. SC, I, 137

სარგებლობენ. ცხადია, „ხატის ყმის“ ექსპლუატაცია შენიღბულია და იგი გარეგნულად ხატისა თუ სალოცავისადმი სამსახურადაა აღიარებული, მაგრამ მასში ისეთი შინაარსი იმალება, რომელიც ხელს უწყობს საზოგადოებისაგან უკვე გამოყოფილი (ხატისყმათაგან გამოყოფილი) წევრების კიდევ უფრო დაშორებას უმრავლესობისაგან. ძვ. წ. I საუკუნეში, კოლხეთის მესხეთში არსებული ლევკოთეას ტაძარი ორგზის ყოფილა გაძარცვული: ჯერ ფარნაკ და შემდეგ პოლუმონ პონტოელის მიერ.* იმის მიხედვით, რომ ტაძრის გაძარცვით მეფეებიც კი დაინტერესებულან, შეგვიძლია ვივარაუდოთ, თუ რა დიდი სიმდიდრის პატრონი ყოფილა აღნიშნული ტაძარი. ს. ჯანაშია პარალელური მასალების მოშველიებით სატაძრო მეურნეობათა სურათს ქართულ სინამდვილეში შემდეგნაირად გვინახტავს: ესაა არათავისუფალ შრომაზე დამყარებული მსხვილი მეურნეობები, „ტაძრები ამავე დროს განძების მფლობელებიც არიან... კოლხეთშიც ტაძრებს გარკვეული მდგომარეობისათვის მიუღწევიათ – მათ ხელში უკვე დიდ განძებს მოუყრიათ თავი (მეზობელი ქვეყნის მეფეები მათ რამდენიმეჯერ ძარცვავენ).²²⁸ ტაძრების ქონება ალბათ მარტო განძებში არ გამოიხატება – ისინი აქაც (პირველ შემთხვევაში იბერიაზეა ლაპარაკი – დ. ხ.) მამულის მფლობელებიც უნდა იყვნენ“.²²⁹ ამგვარად, სასაქონლო სელის ძირითად მიმწოდებლებად კოლხეთიდან სატაძრო მეურნეობები არიან საგულგებლნი, რომელთა სტრუქტურაც სასაქონლო წარმოების ყველაზე უკეთესი პირობების მქონე უნდა ყოფილიყო. ბაზარზე ხვდებოდა, აგრეთვე, ალბათ, ცალკე თემებისა თუ მეურნეობათა მიერ დამზადებული საფეიქრო ნაწარმიც. რა თქმა უნდა, წარმოების ხასიათი ალებული ეპოქის მთელ სივრცეზე ჩვენ ერთნაირად არ წარმოგვიგენია: ერთ შემთხვევაში მონის შრომაა ნაკლები ხარისხით გამოყენებული, მეორეგან პირუკუ, იგი სჭარბობს ე. წ. თავისუფალის შრომას – ორივე ერთმანეთის გვერდით არსებობენ ამ ეპოქისათვის.

კოლხურ საფეიქრო წარმოებას ჰქონდა ის პირობები, რომლებიც აჩქარებდნენ და აიძულებდნენ მას გაფართოებულყო. ამ პირობათაგან დამაჩქარებლის როლშიც, ცხადია, განსაკუთრებით საგარეო ბაზრის მოთხოვნილება უნდა გამოსულიყო. საფეიქრო ნაწარმი და ბოჭკოვანთა ნედლეული ანტიკურ სამყაროს სჭირდებოდა არა მარტო ტანსაცმლისათვის, არამედ იგი გამოიყენებოდა საზღვაო საქმეში (აფრები, ანძის თოკები), ნადირობაში (სათევზაო და სანადირო ბადეები) და ა.შ. ბაზარი საქონლის ღირსების საუკეთესო შემფასებელია. კოლხური საფეიქ-

* Strab., XI, 2, §17. SC, I, 137.

²²⁸ Strab., XI, 2, §17. SC, I, 137

²²⁹ ჯანაშია ს.ნ., ფეოდალური ურთიერთობის წარმოშობისათვის საქართველოში, შრ. II, გვ. 153-154.

რო ნაწარმის ასე ხანგრძლივი არსებობა იმდროინდელ მსოფლიო ბაზარზე იმის უტყუარი დადასტურებაა, რომ იგი იმდროინდელი კულტურული სამყაროს ესთეტიკურ მოთხოვნებს სავსებით აკმაყოფილებდა, ამას (წარმოება) კი იმით მიაღწევდა, თუ მის მომხმარებელ საზოგადოებასთან ერთად თვითონაც განვითარდებოდა. ჩანს, რომ კოლხეთის საფეიქრო წარმოება მომხმარებელი საზოგადოების განვითარების ტემპებს არ ჩამორჩენილა.

ბერძნულ-ლათინური მწერლობის შესწავლიდან ჩანს, რომ პონტოსპირეთის ქართველურ ტომებში შალის წარმოება ადგილობრივი მნიშვნელობის უნდა ყოფილიყო, რადგან მათ შესახებ რაიმე ცნობა იქ არ შენახულა. ჩვენ კი სრული უფლება გვაქვს დავასკვნათ, რომ, თუმცა სუსტად, მაგრამ მაინც, შალის წარმოება ამ ტომებში უნდა ყოფილიყო, რაზედაც ცხვრის არსებობის შესახებ ცნობებიც უნდა გვითითებდნენ (როგორც წერილობითი წყაროები, ისე არქეოლოგიური მასალები). ცხვრის განსაკუთრებულ მნიშვნელობაზე ძველი კოლხეთის მეურნეობაში მისი კულტის არსებობა უნდა მიგვანიშნებდეს. სტრაბონის ცნობით, ლევკოთეას საკურთხეველში (კოლხეთის მესხეთი) მსხვერპლად ცხვრის შეწირვა აკრძალული ყოფილა.²³⁰

ბერძნულ-ლათინურ მწერლობაში გვხვდება არაერთგზისი მითითება შავი ზღვის სანაპიროების, განსაკუთრებით, სამხრეთ სანაპიროების, ტომების დაწინაურებულობაზე *სამთამადნო წარმოებაში*. არქეოლოგიის მიერ უკანასკნელ პერიოდში მოპოვებული მასალების შესწავლიდან ცხადი ხდება, რომ ანტიკურ ლიტერატურაში დაცული ცნობები საფუძვლიანია, მაგრამ იმ შენიშვნით, რომ მათში ასახულია მხოლოდ ის რაიონები და იქ მოსახლე ტომები, რომლებიც იმდროინდელ დასავლეთ სამყაროსთან სავაჭრო-ეკონომიურ ურთიერთობაში იმყოფებიან, ხოლო სამთამადნო წარმოების ის ცენტრები, რომელთაც ადგილობრივი მნიშვნელობა ჰქონდათ, ან სხვა ბაზრებთან იყვნენ დაკავშირებული (ჩრდ. კავკასია, ჩრდ. პონტოსპირეთი, იბერია და ა. შ.), იქ არ არის ასახული.

ბერძნულ-ლათინურ მწერლობაში დაცული ცნობების შესწავლა ცხადყოფს, რომ ჩვენთვის საინტერესო ეპოქაში განსაკუთრებით მოწონებაში ყოფილა ხალიბთა ტომის სამთამადნო ნაწარმი.²³¹ ხალიბების ხსენება ბერძნულ ლიტერატურაში ბერძენთა კოლონიზაციის დაწყებამდეც გვხვდება, მაგრამ გარკვეული მითითება მათ შესახებ მხოლოდ ჰეკატე მილეთელიდან იწყება.²³² პირდაპირი მითითება ხალიბების

²³⁰ Strab., XI, 2, §17. SC, I, 137

²³¹ Гайдукевич В., Боспорское царство, М., 1949, 117, Максимова М., Техника эллинистического производства, М.-Л., 1948.

²³² Fr., 193, 195. SC, I, 3.

მეტალურგიაზე პირველად ქსენოფონთან გვხვდება. „ანაბასისში“ იგი გადმოგვცემს, რომ ხალიბები, რომლებიც მოსინიკებსა და ტიბარენებს შორის ცხოვრობენ, მცირერიცხოვანნი არიან და მათი უმრავლესობა რკინის დამუშავებით (σιδηρείας) ცხოვრობს.²³³ ფსევდო-არისტოტელე კი გადმოგვცემს იმ ხერხებზე, რომლითაც ხალიბები პოულობენ და ამუშავებენ ფოლადის იმ სახეობას, რომელსაც ასე გაუთქვამს სახელი ანტიკური მსოფლიოს დასავლეთ ცენტრში. იგი წერს, რომ ხალიბური რკინა, როგორც გადმოგვცემენ, მდინარის ქვიშიდან მოიპოვება. ქვიშას რამდენჯერმე რეცხავენ და მიღებულ მადანს ადნობენ რაღაც „ცეცხლგამძლე“ (συρίμαχον) ქვის შერევის შემდეგ, რის შედეგადაც მიღებული რკინა, რომელიც „ხალიბურის“ სახელს ატარებს, ერთადერთია, რომელიც არ იჟანგება, მაგრამ მისი მოპოვება უმნიშვნელო რაოდენობით ხდება.²³⁴ ფსევდო-არისტოტელეს აქ ფოლადის ერთი სახეობის შესახებ აქვს ლაპარაკი, რომელიც, როგორც მისი სიტყვებიდან ჩანს, ყველაზე უფრო პატივში იყო მისი დროისათვის უჟანგველი ლითონის თვისებების ქონებისათვის, ხოლო ძირითადი წარმოების შესახებ არაფერი აქვს ნათქვამი, რადგან იქ მოპოვება რაიმე უცნაური ხერხით არ წარმოებდა. არისტოტელეს ცნობებით, თუ ხალიბები რკინის წარმოებით იყვნენ ცნობილი, მოსინიკებს ბრინჯაოს და სპილენძის ორიგინალური წარმოებით გაუთქვამთ სახელი: მოგვითხრობენო, – წერს იგი, – რომ მოსინიკური სპილენძი გამოირჩევა მკვეთრი ელვარებით და განსაკუთრებული სითეთრით. მასში მოსინიკები კალის მაგიერ, თურმე, რაღაც მიწას ურევდნენ გამოდნობის დროს და ამის გამო აქვს მას ასეთი თვისებებიო.²³⁵ ფსევდო-არისტოტელე გადმოგვცემს, რომ მოსინიკები ასეთი შენადნობის დამზადებას მის დროს თურმე აღარ აწარმოებდნენ, რასაც იმით ხსნის, რომ ამ ტექნოლოგიური პროცესის გამომგონებელმა საიდუმლოება არავის გაანდო და მიწაში ჩაიყოლა.²³⁶ ფსევდო-არისტოტელეს ეს ცნობა განსაკუთრებულ მნიშვნელობას იძენს იმ არქეოლოგიური მასალის შესწავლისას, რომელიც საქართველოს სსრ მეცნიერებათა აკადემიის აკად. ივ. ჯავახიშვილის სახელობის ისტორიის ინსტიტუტის რაჭის არქეოლოგიური ექსპედიციის მიერაა მოპოვებული. ექსპედიციამ მდ. რიონის სათავეებში მიაკვლია ძველი მეტალურგიის ერთ-ერთ ცენტრს და დაადგინა, რომ ბრინჯაოს წარმოებაში აქ კალა შეცვლილია ანთი-

²³³ Xenoph., V, 5, §1; SC, I, 83.

²³⁴ Ps. Arist., II, §48. SC. I, 380.

²³⁵ იქვე, II, 62. SC, I, 380. Гаидукевич, იქვე, стр. 117.

²³⁶ იქვე.

მონით, რომლის შენარევი მართლაც თეთრი ფერით გამოირჩევა.²³⁷ ფსევდო-არისტოტელეს მიერ მითითებული მოსინიკური ხერხი შესაძლებელია სწორედ იმასვე გულისხმობდეს, როგორც გ. გობეჯიშვილმა რაჭაში დაადგინა. ელინისტური ხანისათვის, როგორც წერილობითი წყაროების ჩვენებიდან ირკვევა, ხალიბების მეტალურგიული წარმოება ფართოვდება და უფრო მნიშვნელოვანი ხდება. აპოლონ როდოსელი უკვე იმეორებს, რომ ხალიბები არ მისდევენ არც მიწათმოქმედებას, არც მებაღეობას და არც მესაქონლეობას – ისინი რკინას ამზადებენ და ცვლიან პროდუქტზე.²³⁸ როგორც ზემოთ დავინახეთ, ასეთი ცნობა ხალიბების შესახებ ქსენოფონტის „ანაბასისში“ დაცული (V, 5, §1). ამასვე I საუკუნისათვის იმეორებს სტრაბონიც. მისი ცნობით, ხალიბები ის ხალხია, რომელიც მის დროში ხალხებად იწოდება და რომელთა ქვეყანაშიც ფარნაკია მდებარეობს. ფარნაკიის კეთილდღეობის ერთ-ერთი წყარო სამთამადნო წარმოება ყოფილა. მთის მცხოვრებლებს, თურმე, მალაროები აძლევდა ცხოვრების სახსარს, ხოლო აქაური მთები მდიდარი ყოფილა რკინის მადნეულით, წინათ კი ვერცხლის მოპოვებაც უწარმოებიათ.²³⁹

ამგვარად, როგორც ვხედავთ, მთელი ანტიკური და ელინისტური ხანის სივრცეზე ხალიბია ერთნაირი წარმატებით გამოდის იმდროინდელ მსოფლიო ბაზარზე, რის გამოც ხდება მისი ასახვა ელინური და ელინისტური ხანის ლიტერატურაში, როგორც სამთამადნო წარმოების ერთ-ერთი მნიშვნელოვანი და უპირველესი ცენტრისა იმდროინდელ მსოფლიოში.

ელინისტურ ხანაში რკინის წარმოებით განსაკუთრებით განთქმული იყო ლაკონია, ლიდია და ხალიბია, სადაც ელინისტური სამყაროს მეურნეობისათვის ყველაზე მაღალი ხარისხის ფოლადი მზადდებოდა.²⁴⁰ ხალიბია მდიდარი იყო არა მარტო რკინის საბადოებით, არამედ ქვანახშირითაც,²⁴¹ რაც მეტალურგიისათვის საკმაო ბაზას ქმნიდა. ზოგიერთი მკვლევარი ფიქრობს, რომ ელინისტური ხანისათვის ხალიბური ფოლადი ძირითადად სადურგლო იარაღების გასაკეთებლად იხმარებოდა.²⁴²

შემოწმებით დასტურდება, რომ ანტიკური ავტორების ცნობა პონტოს სამხრეთ სანაპიროზე მოსახლე ქართველური ტომების მეტალურგიურ დამსახურებაზე უდავოა. ლითონის დამზადება აქ წარმოებდა

²³⁷ გობეჯიშვილი გ., არქეოლოგიური გათხრები საბჭოთა საქართველოში, თბ., 1952, გვ. 54-56.

²³⁸ Ap. Rod., SC, I, 414.

²³⁹ Strab., XII, §19. SC, I, 158.

²⁴⁰ იხ. კრებული: Эллинистическая техника, М-Л., 1948, стр. 17, 18, 29, 207.

²⁴¹ Успенский Ф., Очерки из истории Трапезунтской империи, Л., 1929, стр. 124

²⁴² დასახ. კრებული, გვ. 29

როგორც ადრე, ისე გვიან საშუალო საუკუნეებში: 1869 წელს ლაზისტანში მოგზაურობის დროს ი. დეილორს უჩვენეს (ს. ყარაჩუკურში მდ. შერშიუთ-ჩაის ანუ ტრიპოლი-ჩაის ხეობაში) სპილენძის ბევრი უმოქმედო მალარო, რომლებშიც დეილორს უპოვნია რკინის ქანის ნამტვრევები და უროები. იქვე მთების მწვერვალებზე მას უპოვნია მაგნეტური რკინის შესანიშნავი ნიმუშები. მალაროებში, მისი სიტყვით, თავდალუნული თუ შეძვრებოდა ადამიანი.* მდ. შერშიუთ-ჩაის (ტრიპოლი ჩაის) ხეობა სწორედ ძველი ხალიბების ადგილსაცხოვრისია. ჰამილტონს მდ. უნიესუს ხეობაში ს. კალე-კეის მიდამოებში უნახავს მის დროსაც მოქმედი სამჭედლოები (καμινοςδηροι). გამცილებელმა და მასპინძელმა (უნიაში) მას უთხრეს, რომ ირგვლივ მთები სავსეა რკინის მადნით (είναι ὄλοι σιδήρου).²⁴³

აქვე, შავი ზღვის სამხრეთ სანაპიროებზე, წარმოებდა ვერცხლის მოპოვებაც.²⁴⁴ ვერცხლის უძველესი მოპოვებლები, როგორც სტრაბონის შრომის ჩვენ მიერ მოყვანილი ადგილიდან ჩანს (XII, 3, §19), იგივე ხალიბები ყოფილან (უნდა შევნიშნოთ, რომ ანტიკურ ლიტერატურაში ქართველური ტომების მთელი მეტალურგიული შემოქმედება, თითქმის უკლისად, ხალიბებზეა, თუ შეიძლება ითქვას, უსამართლოდ მიწერილი). მისი ცნობით, მის დროს ვერცხლის მოპოვება აღარ უწარმოებიათ. სტრაბონი არ აღნიშნავს, თუ რა მიზეზით იქნა მიტოვებული მალაროები, მაგრამ შეიძლება ვივარაუდოთ, რომ აქაც ის მიზეზი მოქმედებს, რომელიც საერთოა მთელი იმდროინდელი სამყაროსათვის: საბადოების მტაცებლური ექსპლუატაცია, რაც ტექნიკის განვითარების დაბალი დონით იყო გამოწვეული, ადრე ფიტავდა საბადოებს და არარენტაბელურს ხდიდა მის დამუშავებას. როგორც ქვემოთ დავინახავთ, სამთამადნო წარმოებაში მთელი რიგი საუკუნეების სიგრძეზე ტექნიკური სიახლე არ ყოფილა შეტანილი. არაფერი გაუკეთებია ამ მხრივ ელინისტურ საზოგადოებასაც „...В области техники за исключением военного дела и строительства – эллинистическая наука заметных успехов не делала; в рабовладельческом обществе мысль ученого не направлялась в эту сторону“.²⁴⁵ 1869 წ. მდ. ხარშიტ-დერეს ხეობაში ტრაპეზუნტიდან გადასულ დეილორს გიუმიშ-

* Дейлор Г., Путешествие в Лазистан и Армению, Тб., 1871, стр. 18-26.

²⁴³ Успенский Ф., Очерки из истории Трапизунтской империи. Л., 1929, стр. 24, 95.

²⁴⁴ იქვე, წერს, რომ ტრიპოლიდან 25 კმ-ის დაშორებით პეტრომას ციხის მიდამოებში, თურქთაგან ტრიპოლის დაპყრობის ხანაში ყოფილა ვერცხლის წარმოება (ἀργυρέια ἔραγα) რაც XX საუკუნისათვის უკვე მიტოვებული ყოფილა. გვ. 89.

²⁴⁵ Ранович А., Эллинизм и ее историческая роль, М.-Л., 1950, гв. 36; აგრეთვე: Эллинист. Техника, М-Л, 1948, стр. 21-22.

ხანესთან უნახავს ვერცხლის მიტოვებული მალარობები,²⁴⁶ თვით სახელწოდება „გიუმიშ-ხანე“-ც ვერცხლის სახელწოდებიდანაა წარმომდგარი (gümüş – ვერცხლი, ვერცხლის; hane – სახლი, სადგომი, ადგილი).²⁴⁷

არქეოლოგიური მასალების შესწავლის საფუძველზე არქეოლოგი-მკვლევარები ადასტურებენ, რომ ჭოროხის აუზი ქართული მეტალურგიის ერთი ძირითადი კერაა, როგორც სპილენძ-ბრინჯაოს, ისე რკინა-ფოლადის წარმოების ხაზით.²⁴⁸ მაგრამ ამ რაიონის ძველი მეტალურგიული წარმოების შესწავლას აფერხებს ის გარემოება, რომ მეცნიერულად (მეთოდურად) ჩატარებული გათხრები შავი ზღვის სამხრეთ სანაპიროებზე ამ მიზნით ჯერ არავის უწარმოებია. მკვლევარები აქ წერილობითი წყაროებისა და დასავლეთ საქართველოს სამხრეთ რაიონებში მოპოვებული არქეოლოგიური მასალის (ისიც შემთხვევიდან-შემთხვევაზე აღმოჩენილის) ამარაღა არიან დარჩენილი, ამიტომ ბევრი მათი დასკვნა „ალბათ“-სა და „შესაძლებელია“-ზეა აგებული. სხვანაირად დგას საქმე ძველი კოლხიდის მეტალურგიული წარმოების შესწავლაში: ანტიკური ავტორების ცნობების თითქმის უქონლობას არქეოლოგიური მასალის შედარებითი სიუხვე ავსებს. ეს მასალა, ძირითადად ქართული საბჭოური არქეოლოგიის მიერ მოპოვებული, შესაძლებლობას იძლევა დაისვას მეტალურგიის ისტორიასთან დაკავშირებული მთელი რიგი საკითხები, ხოლო ზოგჯერ ზოგიერთი მათგანის გადაჭრაც კი მოხერხდეს. 1935 წ. ა. იესენმა გამოთქვა მოსაზრება, რომ ე. წ. კოლხური კულტურის (გვიანი ბრინჯაოს ხანა) ძირითადი მწარმოებელი ცენტრი ჭოროხის აუზში უნდა ყოფილიყო, ხოლო ლეჩხუმში უნდა წარმოადგენდეს წვრილ კერას ასეთი წარმოებისაო.²⁴⁹ შემდეგში ო. ჯაფარიძემ სცადა ეჩვენებინა, რომ კოლხურ კულტურას მეტალურგიული წარმოების ძირითადი ცენტრი ერთი კი არ უნდა ჰქონოდა, არამედ, გარდა ჭოროხის აუზისა, ასეთ ცენტრებად ლეჩხუმში და „ეგებ“ აფხაზეთიც უნდა მივიჩნიოთ.²⁵⁰ იესენთან შედარებით მისი მასალა უფრო მდიდარიცაა და უეჭვოც. მაგრამ როგორც ერთ, ისე მეორე მკვლევარს ხელთ მხოლოდ წარმოების პროდუქცია გააჩნიათ, რის გამოც არაფერი შეუძლიათ თქვან მადნის მოპოვებისა

²⁴⁶ Дейлор Т., დასახ. ნაშრ. გვ. 34-35.

²⁴⁷ Турецко-русский словарь, М., 1931, стр. 365, 383.

²⁴⁸ Иессен А. А., К вопросу о древнейшей металлургии меди на Кавказе, ИГАИМК, 1935, в. 120, стр. 129. ჯაფარიძე ო., მიწათმოქმედების იარაღები დასავლურ-ქართულ კულტურაში, თსუ შრომები, 49, თბ., 1953, გვ. 188-191 ... და სხვა შრ.

²⁴⁹ Иессен А. А., К вопросу о древнейшей металлургии меди на Кавказе, ИГАИМК, 1935, в. 120, стр. 129.

²⁵⁰ ჯაფარიძე ო., კოლხური ცული, საქ. სახ. მუხ. მოამბე, XVI-B, 1950, გვ. 52. მისივე, მიწათმოქმედების იარაღები ..., გვ. 188.

და დამზადების პროცესზე, სამთო-მოპოვებითი წარმოების ტექნიკაზე და ა.შ.

კოლხური მეტალურგიის ერთ-ერთი ცენტრი გამოვლინებული იქნა უკანასკნელ ხანებში რაჭის არქეოლოგიური ექსპედიციის მიერ (გ. გობეჯიშვილი). „1952 წელს მდ. ზოფხითურის სათავესთან გაწმენდილი იქნა ანტიმონის ორი ძველი მღვიმე, ბრილში გამოვლინდა მადნისადნობი წარმოების ნაშთები ... მღვიმეში აღმოჩნდა ხის ნახშირი და ქვები, რომლებიც ძველად გამოუყენებიათ მადნის მოსანგრევად. მადნისადნობი წარმოების გადანაყარის ფენაში აღმოჩენილია ლითონის წიდა და, აგრეთვე, გამდნარი ლითონით გაჟღერებული თიხის ჭურჭლის ნატეხები... მდ. რიონის სათავეები შუა ბრინჯაოს ხანიდან წარმოადგენდა ერთ-ერთ მნიშვნელოვან კერას ძველი ქართული მეტალურგიისა, რომელიც ვითარდებოდა ადგილობრივი სამთამადნო წარმოების ბაზაზე. ეს უკანასკნელი, ეპოქის შესაფერისად, დამყარებული იყო მადნის მოპოვების პრიმიტიულ ტექნიკაზე. გაზრდილ მოთხოვნილებას ლითონზე, გამოწვეულს ხელოსნობის დაწინაურებით და საგარეო კავშირ-ურთიერთობის გაფართოებით, ძვ. წ. VII-VI საუკუნიდან აკმაყოფილებდნენ არა ტექნიკის განვითარების გზით, არამედ, საფიქრებელია, უფრო მუშახელის რაოდენობის გაზრდის გზით“.²⁵¹ მე შეგნებულად მოვიტანე ეს გრძელი ამონაწერი რაჭის არქეოლოგიური ექსპედიციის ხელმძღვანელის გ. გობეჯიშვილის იმ მოხსენების თეზისებიდან, რომელიც რაჭაში 1952 წელს ჩატარებული არქეოლოგიური გათხრების ანგარიშს წარმოადგენს. როგორც ამ ამონაწერიდან ჩანს, ექსპედიციას მიუგნია არა მარტო მალაროებისთვის, არამედ წარმოების მთელი პროცესისათვის მიუდევნებია თვალი – მადნის მომჭვრევიდან მის გამოღობამდე. 1952 წლამდეც ექსპედიციას დიდი წარმატებები ხვდა წილად აქაური სამთამადნო წარმოების გამოვლენის საქმეში. ექსპედიციის მიერ გამოვლენილი იქნა ბრინჯაოს ქართული მეტალურგიის ერთი ორიგინალური თავისებურება, რომელსაც ზემოთ გაკვრით შევეხეთ ფსევდო-არისტოტელეს ცნობასთან დაკავშირებით. გამოიკვია, რომ კალის ნაკლებობა, რაც ბრინჯაოს შენადნობის მიღების ერთი ძირითადი დაბრკოლებათაგანია, კოლხ მეტალურგებს თავიდან აუცილებიათ წარმოებაში სიახლის შეტანით – კალა ანტიმონით შეუცვლიათ. როგორც ანალიზმა დაადასტურა, ანტიმონიანი ბრინჯაო, კალიანი ბრინჯაოსაგან განსხვავებით, მოთეთრო ფერისაა, ხოლო სხვა მხრივ მას არ ჩამოუვარდება.²⁵² რაჭის არქეოლოგიური ექსპედიციის

²⁵¹ თეზისები, ივ. ჯავახიშვილის სახ. ისტორიის ინსტიტუტის სამეცნიერო სესიისა, თბ., 1953, გვ. 13-14.

²⁵² გობეჯიშვილი გ., არქეოლოგიური გათხრები საბჭოთა საქართველოში, თბ., 1952, გვ. 54-56.

მიერ მოპოვებული მასალების მიხედვით შეიძლება ზოგი რამ აღვნიშნოთ მადნის მოპოვების ტექნიკურ მხარეზეც. მივმართოთ ისევ გობეჯიშვილის შრომას: „დიდი შრომა უხარჯავთ ძველ მელითონეებს, – წერს იგი, – სალ კლდეებში, ზღვის დონიდან 2000 მეტრ სიმაღლეზე, მცირე ბილიკები გაუკვეთიათ მადნის ძარღვებამდე. ამ ბილიკებით ტყის ზონიდან შემა უზიდავთ და **მადნიანი ქანები ცეცხლით უხურვებიათ. გაგარვარებულ ქანებზე წყალი უსხამთ და ამგვარად დანაპრალებული კლდიდან მადანი მოუტეხიათ გრანიტის დიდი უროებით, რომელთაც ხის ტარი გარედან ჰქონიათ მიმაგრებული.** შრომის ასეთი პროცესის გამოცნობის საშუალებას გვაძლევს მაღაროებში შემონახული დიდძალი ნახშირი და ქვის უროები. ჩანს, ჩვენს წინაპრებს პრაქტიკულად კარგად სცოდნიათ მაგარ სხეულებზე სითბო-სიცივის მოქმედების კანონი. მადნის ძარღვები ხშირად მეტად ღრმად ჩასდევს ფუჭ ქანებს. ამიტომ მაღაროები ზოგჯერ ღრმად იჭრებოდა კლდეში და ჭერის ჩამონგრევის საფრთხეც არსებობდა. საფრთხის თავიდან ასაცილებლად საჭირო ხდებოდა ჭერის გამაგრება. ახლა ამ მიზნით ხის ბოძებსა და ძელებს იყენებენ, ძველად კი კლდის ბუნებრივი სვეტები დაუტოვებიათ“.²⁵³ მადნის მოპოვების (მაღაროს გაყვანა, მადნის მომტვრევა და ა.შ.) ეს ხერხი ელინისტურ ხანაშიც განაგრძობს არსებობას. ძვ.წ. III-II სს. ბერძენი გეოგრაფის **ავათარხიდის** ცნობით, ელინისტური ხანის ეგვიპტურ მაღაროებში მემალაროე იყენებდა ცეცხლს ქანების დასარბილებლად.²⁵⁴ როგორც არსებული მასალების შესწავლიდან ირკვევა, რაჭა და საერთოდ დასავლეთ კავკასიონი რკინის მეტალურგიის ერთ-ერთ კერასაც წარმოადგენდა. რკინა ქართული სინამდვილისათვის არქეოლოგიურად IX საუკუნის შემდეგ დასტურდება, ასეთივე ასაკისას გვაგარაუდებინებს მის განვითარებულ წარმოებას ბიბლიური ტრადიციაც. განსაკუთრებით მდიდარია მასალა დასავლეთ საქართველოს რკინის წარმოებაზე განვითარებული შუა საუკუნეებიდან, გათხრილია ზოგიერთი საწარმოო კერის წარმოების ნაშთები (შხიბარი, ზემო სვანეთი),²⁵⁵ მათ შორის X-XI საუკუნით დათარიღებული. მაგრამ ლითონსადნობი საწარმოების ნაშთი შენახული უნდა გვქონდეს უფრო ადრინდელი ხანისათვის, კერძოდ, ისტორიის ინსტიტუტის არქეოლოგიური ექსპედიციის მიერ 1953 წ. ფიჭვნარში

²⁵³ იქვე, გვ. 55. აგრეთვე მისივე, ძველი ქართული სამთამადნო და მეტალურგიული წარმოების ნაშთები სოფ. ლებთან, საქართველოს სსრ მეცნიერებათა აკადემიის მოამბე, XIII, 3, თბ., 1952, გვ. 183-190.

²⁵⁴ Diodor., III, 12-14.

²⁵⁵ Деген-Ковалевский Б. Е., Из истории железного производства Закавказья, МГАИМК, 120. По материалам раскопок Чуберской железноплавильни, М.-Л., 1935, стр. 247 и след.

აღმოჩენილ ბორცვ „ნამჭედურზე“.²⁵⁶ საშუალო საუკუნეებში ქართულ სინამდვილეში რკინის წარმოების რამდენიმე დაწინაურებული კერა არსებობს; ასეთებია: ქართლში – სარკინეთი, სადაც არქეოლოგმა ნ. ლამბაშიძემ რკინის საკმაოდ დიდი საწარმო გათხარა, რომელსაც თან ახლავს ელინისტური ხანის შენობის ნაშთები ნაგები ანტიკური კრამიტით, დამწვარი ალიზით და ქვის კვადრებით, რომელიც არქეოლოგიურ ლიტერატურაში ელინისტური ხანითაა დათარიღებული; რაჭაში – წედისი, რომელსაც ნ. რეხვიაშვილმა სპეციალური მონოგრაფია უძღვნა;²⁵⁷ სვანეთში – შხიბარი (ჭუბერის თემი), რომელიც დეკენ კოვალევსკიმ გამოარკვია; იმერეთში – საწირე და ოკრიბა და ა.შ. გარდა ზემოთ დასახელებული მსხვილი საწარმოო ცენტრებისა, იყო ადგილობრივი მნიშვნელობის ცენტრებიც,²⁵⁸ რომლებიც ადგილობრივ მოთხოვნილებას აკმაყოფილებდა და საგარეო ბაზარზე არ გადიოდა.

ცხადია, ჩვენ მიზანს ქართული მეტალურგიის ისტორიის მიმოხილვა არ შეადგენს. ჩვენ გვინდოდა მხოლოდ გვეჩვენებინა, რომ პონტოსპირეთის ქართველურ ტომებს ჩვენთვის საინტერესო პერიოდისათვის, იმდროინდელ მსოფლიოში, ეპოქის შესაფერისად დაწინაურებული სამთამადნო წარმოება ჰქონია. აქაური ნაწარმის მნიშვნელობა იმდენად დიდი ყოფილა ეგეოსის ქვეყნების მეურნეობაში, რომ იქ გაჩნდა აზრი ხალიბთაგან რკინის გამოღობის გამოგონებაზე, ხოლო ხალიბების სატომო სახელი ბერძნულ ენაში ფოლადის აღმნიშვნელ სახელად იქცა.²⁵⁹ ივანე ჯავახიშვილმა, ანალიზი გაუკეთა რა მადნეულთა სახელებს სხვადასხვა ენებში, მივიდა დასკვნამდე, რომ „უმთავრესი და კაცობრიობის წარმატებისათვის აუცილებლად საჭირო მადნების სახელები ან ქართველი ტომებისაგან არის შეთვისებული, ან არა და მათი სატომო სახელწოდებისაგან არის წარმომდგარი“.²⁶⁰

ამგვარად, მასალების მთელი რიგი (წერილობითი, არქეოლოგიური, ეთნოგრაფიული, ენობრივი) სრულ თანხმობაშია ქართველურ ტომთა დაწინაურებულ მემთამადნეობაზე, როგორც წინაანტიკური, ისე ანტიკური ხანისათვის.

სურათი სრული არ იქნებოდა, თუ ორიოდ სიტყვით არ შევეხებოდით იმ ცნობებს, რომლებიც კოლხიდაში ოქროს მოპოვებას შეეხება.

²⁵⁶ იხ. ქობულეთის არქეოლოგიური ექსპედიციის 1953 წლის მასალები. ნ. ხოშტარის მასალის გაცნობისათვის უღრმეს მადლობას მოვასხენებთ.

²⁵⁷ რეხვიაშვილი ნ., მჭედლობა რაჭაში, თბ., 1953.

²⁵⁸ ჩუბინიშვილი ტ., სოფ. გოგოლეისუბანში გვიანი ბრინჯაოს ხანის არქეოლოგიური კომპლექსის აღმოჩენის გამო, მიმოხილველი, I, თბ., 1949, გვ. 295-296 და სხვა მასალებიც.

²⁵⁹ Услар П., Древнейшие сказания о Кавказе, ЗКОРГО, XII, Тб., 1881, стр. 467.

ჯავახიშვილი ივ., ქართველი ერის ისტორია, I, თბ., 1951, გვ. 24.

²⁶⁰ ჯავახიშვილი ივ., იქვე, გვ. 23-24.

თქმულება არგონავტებზე ცხადყოფს, რომ ბერძნებს კოლხიდის, როგორც ოქროთი მდიდარი ქვეყნის შესახებ ცნობები კოლონიზაციამდე ჰქონიათ. ბერძნულ ლიტერატურაში არსებობს შეხედულება, თითქოს კოლხებს ოქროს მოპოვების წესი ტყავებზე ჰქონოდათ დაწერილი (ეს ცნობა, დაცული ევსტათი თესალონიკელთან, ეკუთვნის ხარაქსს), რის გამოც მომხდარა არგონავტების ლაშქრობა.²⁶¹ სტრაბონთან დაცული გადმოცემით, თქმულება ოქროს საწმისზე წარმოშობილია იმ ფაქტის არსებობიდან, რომ სვანები მდინარის მიერ ჩამოტანილ ოქროს აგროვებენ ვარცლებითა და ბეწვიანი ტყავებით.²⁶² ანტიკური ავტორები, ლაპარაკობენ რა კოლხეთის ოქროს სიმდიდრეზე (სტრაბონი, პლინი, ხარაქსი, ევსტათი ...), მუდამ უთითებენ სვანთა მიწა-წყალს, სადაც ნაკადულებს ჩამოაქვთ ოქროვანი ქვიშა. პლინი სეკუნდის ცნობით (ა.წ. I ს.) მის დროს არსებულა ზეპირი გადმოცემა, რომ აიეტის შთამომავალ სავლაკს, მიუღია რა სამეფოს ხელუხლებელი მიწები სვანეთში და საერთოდ ოქროს საწმისებით მდიდარ თავის სამეფოში, მოუპოვებია ოქროსა და ვერცხლის დიდი რაოდენობა.²⁶³ როგორც შემოწმებით დასტურდება, ანტიკური ავტორების ცნობები კოლხიდის და კერძოდ სვანეთის შესახებ საფუძველს არაა მოკლებული.²⁶⁴ ენგურის სათავეებში ოქროს მოპოვება ჩვენ დრომდეც გრძელდებოდა.²⁶⁵ ჩვენ ზემოთ აღვნიშნავდით, რომ ტომების მეურნეობის ის დარგები, რომლებიც VI-I საუკუნის მსოფლიო ბაზარზე თავისი ნაწარმით არ იყო წარმოდგენილი, ანტიკურ მწერლობაში ან სულ არ არის, ან მეტად სუსტადაა ასახული. უკანასკნელ შემთხვევაში ეს ცნობები გაკვრივია და მეურნეობათა ამ დარგების შესწავლისათვის ჩვენ არქეოლოგიური და ეთნოგრაფიული მასალების მიხედვით გვიხდება უპირატესად მსჯელობა. ეს გარემოება განსაკუთრებით პონტოსპირეთის ქართველური ტომების სოფლის მეურნეობას შეეხება: თუ თვალს გადავაკლებთ ანტიკურ ლიტერატურას, დავინახავთ, რომ იქ სულ რამდენიმე პირდაპირი თუ არაპირდაპირი ცნობაა დაცული ამ ტომების სოფლის მეურნეობაზე, მაგრამ ეს გარემოება სრულებითაც არ გვეუბნება, თითქოს მათი სამიწათმოქმედო წარმოების დონე დაბალი ყოფილიყოს, პირიქით, ჩვენ გვაქვს მასალები, რომლებიც ცხადყოფს, რომ კოლხეთის ტომების სამეურნეო იარაღები უახლოეს მსგავსებას ამჟღავნებს

²⁶¹ Evstath., §I, 89. SC, I, 203-204.

²⁶² Strab., XI, 2, §19. SC, I, 138.

²⁶³ Plin., XXXIII, 52, SC, II, 197-198.

²⁶⁴ შდრ. Гайдукевич, Боспорское царство, М-Л, 1949, стр. 118.

²⁶⁵ საქართველოს ისტორია, I, 50-51.

მცირე აზიის უძველესი ხალხების სამიწათმოქმედო იარაღებთან, მათ შორის – ეტრუსკების სამიწათმოქმედო იარაღებთან.²⁶⁶

პირველი მითითება ანტიკურ ლიტერატურაში კოლხების მიწათმოქმედებაზე ოქროს საწმისზე თქმულებაში გვაქვს დაცული. თქმულების სიუჟეტი, ჩემის აზრით, მაშინ უნდა იყოს ჩამოყალიბებული, როდესაც რკინას ან სულ არ ჰქონდა სამეურნეო დანიშნულება, ან იგი ჯერაც კარგად არ იყო ცნობილი ადამიანისათვის. თქმულებიდან ვგებულობთ, რომ მოხვნა, როგორც ნიადაგის დაფხვიერების ხერხი (მიუხედავად იმისა, თუ რას თესავენ შიგ – დრაკონის კბილებს თუ ასლის მარცვალს) ამ დროინდელ საზოგადოებას უკვე სცოდნია.

ქსენოფონტის „ანაბასისში“ დაცული ცნობების შესწავლიდან ვგებულობთ, რომ შავი ზღვის სანაპიროების ტომების მეურნეობა გეოგრაფიული მდებარეობის მიხედვით იყო მოწყობილი: მთაში მესაქონლეობა იყო წამყვანი, ხოლო მიწათმოქმედება, ალბათ, დამხმარე მნიშვნელობისა (ასევე მელითონეობაც). მას ამის შესახებ პირდაპირ არაფერი აქვს ნათქვამი, მაგრამ უკან დახვეისას მთის ტომების საცხოვრისებზე გავლისას ბერძნები მარცვლეულს ვერ შოულობენ და მხოლოდ პირუტყვის ხელთგდებაზეა ლაპარაკი. ბარში წამყვანი მიწათმოქმედებაა, ხოლო მეურნეობის სხვა დარგები დამხმარეა. საერთოდ კი, ჩემის აზრით, იმდროინდელი მეურნეობა ყოველთვის შერწყმულია (მხედველობაში მაქვს დამჯდარი, ბინადარი ცხოვრების მქონე ტომები), რომელიმე დარგის უპირატესობით. არ მიმაჩნია მისაღებად მ. მაქსიმოვას მტკიცება, დამყარებული „ანაბასისის“ ცნობის არასწორ გაგებაზე, თითქოს პონტოსპირეთის ტომებში, მოსინიკების ჩათვლით, მეურნეობის ძირითადი დარგი მესაქონლეობა ყოფილიყოს. რამდენადაც მოსინიკებზე „ანაბასისში“ არსებობს გარკვეული მითითება, რომ „ძველი პურიც“ გააჩნდათო. იგი ეძებს საბუთებს თავისი ზემომოყვანილი დასკვნისათვის და ასეთებად მიაჩნია მოსინიკთა ადგილსაცხოვრისის რელიეფის მთაგორიანობა და მოსინიკების მიერ საჭმელად პურის მაგივრად წაბლის გამოყენება.²⁶⁷ აღნიშნული საბუთები თვით „ანაბასისისავე“ ცნობებით ბათილდება, ქსენოფონტს არსად არ აქვს ნათქვამი, რომ მოსინიკები წაბლის ნამცხვარს პურის ნაკლოვანების გამო ამზადებენო. პირიქით, მისი თქმით, წაბლის ნამცხვარით კვება აქ სიმდიდრის ნიშნადაა აღიარებული. იგი პირდაპირ აღნიშნავს, რომ მდიდართა შვილები, რომლებიც მე მაჩვენეს, წაბლით იყვნენ კვებულები.²⁶⁸ წაბლის ნამცხვარი შესაძლებელია ამ ტომისათვის დამახასიათებელი

²⁶⁶ ჩიტაია გ.ს., რაჭული სახენელი, ენიმკის მოამბე, I, თბ., 1937, გვ. 284.

²⁶⁷ Максимова М., Местное население юго-восточного Причерноморья по «Анабасису» Ксенофонта, Дрилы и Моссиники, ВДИ, 1951, №1, стр. 259.

²⁶⁸ Хероф., V, 5, §32,

ტაბლა იყოს, წარმოშობილი, იქნებ, მარცვლეულის ნაკლოვანების ნიადაგზე, მაგრამ არა იმ ტერიტორიაზე, სადაც ბერძნებმა გაიარეს, არამედ მალალ მთებში, სადაც ველური ნაყოფების საჭმელად გამოყენებაზე არაერთი წერილობითი თუ ეთნოგრაფიული ცნობა გვაქვს. მოსინიკებში მესაქონლეობის უპირატესი როლის დასადასტურებლად არც რელიეფის მოტანა გამოვადგება, რადგან მოსახლეობის სიმჭიდროვე და მოსინიკების მეურნეობის ხასიათი (მეთევზეობა, ფლოტის ყოლა, ვაზის კულტურის არსებობა) სრულებით არ ეგუება მეჯოგე ტომის მეურნეობის ხასიათს. ამასთან, მაქსიმოვას საერთო დასკვნას „საერთო“ ხასიათს უკარგავს ხალიბების მაგალითიც, რომლებიც, უპირატესად, ლითონის დამუშავებით იპოვებენ ცხოვრების სახსარს.²⁶⁹

ამგვარად, პონტოსპირეთის ტომების მეურნეობაზე „საერთოდ“ ლაპარაკი მეცნიერულად გაუმართლებელია და არ შეეფერება რეალურ სურათს. უფრო სწორი იქნებოდა აქაურ მეურნეობაში სამი სახის ფორმა გამოგვეყო: 1. უპირატესად სამიწათმოქმედო; 2. შერეული (შერწყმული); 3. უპირატესად მესაქონლეობითი ან მემთამაღნეობითი. როგორც ეთნოგრაფიული მასალების შესწავლით ირკვევა, თითოეულ მათგანს დასახლების თავისებური ტიპიც შეესაბამება.²⁷⁰

„ანაბასისის“ ცნობიდან ირკვევა, რომ ქართველური ტომები მარცვლეულ მეურნეობას იცნობენ, ხოლო ზოგიერთ მათგანში იგი წამყვანი დარგი ჩანს. ასევე ამ ტომებს ცნობიანთ **ვაზის** კულტურაც.

ჰეროდოტეს, ქსენოფონტის, სტრაბონის და სხვა ავტორების ცნობები კოლხური საფეიქრო წარმოების შესახებ არაპირდაპირ მიგვითითებენ, რომ სოფლის მეურნეობის ერთ-ერთ დარგს **ტექნიკური კულტურები** წარმოადგენდნენ.

როდესაც ისმება საკითხი მეურნეობის შესახებ, მისი მდგომარეობისა თუ დონის შესახებ, ძირითადი კითხვა უპირატესად წარმოების იარაღებს შეეხება. ანტიკურ ლიტერატურას ჩვენთვის საინტერესო ხანის სამეურნეო იარაღების შესახებ თითქმის არავითარი ცნობები არ შემოუნახავს, მაგრამ აქ ნაწილობრივ გვშველის არქეოლოგიისა და ეთნოგრაფიის მონაპოვრები. არქეოლოგიამ მოიპოვა მიწათმოქმედებასთან დაკავშირებული მთელი რიგი იარაღები: ცულები და წალდები (ახოების გასაჩხვად), თოხები და ბარები (მიწის დასამუშავებლად, სარეველებთან ბრძოლისათვის), ნამგლები და სასხლავი დანები (პურეულის ასაღებად, ვაზის გასასხლავად), კევრის ნაშთები, ხელსაფქვაკები, მარცვლის შესანახი ჭურჭელი და ა.შ. ეთნოგრაფიულმა სინამდვილემ შემოგვინახა სახვნელი იარაღების „მთელი მუზეუმი“;

²⁶⁹ იქვე, V, 5, §1.

²⁷⁰ ჩიტაია გ., დასახლების ტიპი მთიულეთში, თეზისები, ივ. ჯავახიშვილის სახ. ინსტიტუტის მეოთხე სამეცნიერო სესია, თბ., 1953, გვ. 9-10.

აგრეთვე მრავალი ძველი წეს-ჩვეულება, რომელიც მოსავლის მოყვანას, ალებასა და შენახვასთანაა დაკავშირებული.²⁷¹

არქეოლოგიური და ეთნოგრაფიული მასალის ურთიერთმიშველიებისას ირკვევა, რომ მიწის დასამუშავებელ ძირითად იარაღს შავი-ზღვისპირეთის მთიანეთში თოხი წარმოადგენდა. მისი არსებობის ზედა თარიღად ზოგადად გვიანი ბრინჯაოს ხანაა აღიარებული. არქეოლოგები, გამოდიან რა იქიდან, რომ თოხს მხოლოდ და მხოლოდ კოლხიდის არქეოლოგია იცნობს, ასკვნიან, რომ იგი დასავლურ-ქართული კულტურის ერთ-ერთი დამახასიათებელი იარაღი უნდა იყოს.²⁷² იგი მთის მეურნეობაში როგორც სახნელი იარაღის, ისე სარეველებთან საბრძოლველი და გასაიშვიათებელი (გასამეჩხრებელი) იარაღის მოვალეობას ასრულებს. საინტერესოა, რომ იგი დღემდე ხმარებაშია და მისი ფორმებიც, არ ჩანს, რომ ძალიან შეცვლილიყოს; ბარში თოხი სარეველა ბალახებთან ბრძოლისა და მიწის გასაფხვიერებლადაა გამოყენებული. ჩვენთვის საინტერესო ხანის (VI-I) ბარის მიწათმოქმედებაში თოხის სახვნელ იარაღად გამოყენება უკვე საჭიროებას არ წარმოადგენდა (გარდა იმ შემთხვევებისა, როდესაც ახალგატეხილ ტყიან მასივთან ჰქონდათ საქმე. ახალგაჩეხილი მიწები რამდენიმე წელი თოხით უნდა დამუშავებულიყო („მოთოხნა“), რადგან ფესვების ამოღობამდე სახვნელის გატარება შეუძლებელია). გ. ჩიტაიამ თავის გამოკვლევებში ცხადყო, რომ ქართველ ტომებს სახვნელი იარაღი (გამწევი ძალით) ძველთაგანვე ჰქონიათ გამოყენებული და ეთნოგრაფიულ სინამდვილეში შემონახული დასავლურ-ქართული სახვნელები („აფხაზური სახვნელი“, აგაფა, „იმერული კავი“, ოჩაჩა, რაჭული სახვნელი და ა.შ.) ძალიან ახლოს დგანან შუამდინარეთისა (ური) და მცირე აზიის კულტურული ხალხების (ეტრუსკების) სახვნელ იარაღებთან. „რაჭული სახვნელის“²⁷³ შესახებ მსჯელობისას პატივცემული მკვლევარი წერს: არსებითად, რაჭული სახვნელი, როგორც სახვნელი იარაღების გარკვეული სახე, წარმოადგენს სახვნელთა იმ ძირითად ტიპს, რომელიც შექმნილია წინა აზიაში და ეკუთვნის წინა აზიის უძველეს კულტურულ მოსახლეობას, ქართველ ტომთა წინაპრებს ალაროდული-სუბარული ტომების სახით საზოგადოდ, ხოლო თუბალ-

²⁷¹ Читая Г., Земледельческие системы и пахотные орудия Грузии, Вопросы этног. Кавказа, 1952, стр. 101.

²⁷² ჯაფარიძე ო., მიწათმოქმედების იარაღები დასავლურ-ქართულ კულტურაში, თსუ შრომები, 49, თბ., 1953, გვ. 174-202 (თავმოყრილია ლიტერატურაც).

²⁷³ ჩიტაია გ., რაჭული სახვნელი, ენიმკის მოამბე, I, 1937, გვ. 284. მისივე, К вопросу о происхождении абхазских пахотных орудий, стр. 375. Земледельческие системы и пахотные орудия Грузии, კრებულში Вопросы этнографии Кавказа, Тб., 1952, стр. 110 и след.

მუსკ თირსენებს (ეტრუსკებს) კერძოდ²⁷⁴ ივ. ჯავახიშვილი, იძლევა რა სახვნელი იარაღების დათარიღების ცდას, ყურადღებას აქცევს „ერქვანის“ „დაბადების“ ქართველ მთარგმნელთაგან ზოგადი მნიშვნელობით ხმარებას, იმ დროს, როცა, იგი სპეციალურ პირობებში გამო-საყენებელი სახვნელია.²⁷⁵

უძლიდრესი არქეოლოგიურ-ეთნოგრაფიული მასალა ქართულ სახვნელებზე და სამიწათმოქმედო კულტურებზე წარმოდგენილია გ. ჩიტაიას ნაშრომებში და კერძოდ „Земледельческие системы и пахотные орудия Грузии“-ში.²⁷⁶ აქ განსაკუთრებით განზოგადებულია სახვნელი იარაღების შესახებ დაგროვებული მასალა და მოცემულია კლასიფიკაცია, აგებული ამ იარაღის, როგორც სახვნელის, დანიშნულებაზე.

კულტურული მარცვლეულის არსებობა ქართულ სინამდვილეში ენეოლითური ხანის სადგომებშია დადასტურებული, ხოლო ახალი ქვის ხანის სადგომებში ხელსაფქვაკვებისა და ქვის თოხების არსებობა²⁷⁷ გვაფიქრებინებს, რომ პრიმიტიული მარცვლეული მეურნეობა ამ ეპოქის ადამიანისათვის უცნობი არ უნდა ყოფილიყო. ბოტანიკოსების, ეთნოგრაფების, ისტორიკოსების, არქეოლოგების და რიგი სხვა დარგების სპეციალისტთა გარჯის შედეგად გამოვლენილია ქართული პურეული მცენარეების ათეულობით უძველესი ჯიში, შესწავლილია თანამედროვე უხვმოსავლიან პურეულთა წინაპრები, და ის ღონისძიებები, რომლითაც საქართველოს აბორიგენი მოსახლეობა საუკუნეების სიგრძეზე აუმჯობესებდა კულტურულ მარცვლეულთა ჯიშებს, უგუებდა რა მას თავის მოთხოვნებს.²⁷⁸ ბევრი ამ ჯიშთაგანი ძვ. კოლხიდის ტერიტორიაზეა დადასტურებული²⁷⁹ (მახა, ხორბალი, ქერი, ფეტვი, ქვრიმა), სადაც კლიმატური პირობების გამო ისეთი მძლავრი მარცვლეული მეურნეობა, როგორც ძვ. იბერიას უნდა ჰქონოდა, არ არსებობდა.

²⁷⁴ იქვე, გვ. 291

²⁷⁵ ჯავახიშვილი ივ., საქართველოს ეკონომიური ისტორია, I, თბ., 1930, გვ. 201.

²⁷⁶ Читая Г., Земледельческие системы и пахотные орудия Грузии, Вопросы этног. Кавказа, 1952.

²⁷⁷ კილაძე ნ., ახალი ქვის ხანის ძეგლები თეთრამიწიდან, მასალები საქართველოსა და კავკასიის ისტორიისათვის, 29, თბ., 1951, გვ. 251, 255 ...

²⁷⁸ Читая Г. С., იქვე, გვ. 105-109. ივ. ჯავახიშვილი, საქართველოს ეკონომიური ისტორია, I, 1930, 11, 1935. Менабде Е., Пшеницы Грузии, Тб., 1948. მისივე, საქართველოს ქერები, თბ., ბოტანიკური ინსტ. შრომები, VI, 1938. მისივე, ботанико-систематические данные о хлебных злаках древней Колхиди, საქ. სსრ მეც. აკად. მოამბე I, №9, თბ., 1940; Жуковский П., Культурные растения и их сородичи, М., 1950. стр. 65.

²⁷⁹ საქართველოს ისტორია, I, 52.

ცოტა რამ ვიცით შავიზღვისპირეთის ქართველურ ტომებში მევენახეობა-მელვინეობის შესახებ. მათში ანტიკურ ლიტერატურაში რამდენიმე არაპირდაპირი ცნობაა შემონახული. სამხრეთ სანაპიროების შესახებ ცნობა „ანაბასისშია“ დაცული: ლაპარაკობს რა მოსინიკების ღვინოზე, ქსენოფონტი აღნიშნავს, რომ წყლით გაზავებული ის სასიამოვნო სასმელი იყო, ხოლო ისე კი არაო.²⁸⁰ აღწერს რა სინოპელთა ელჩების პატივსაცემად კოტიორასთან გამართულ ღვინოს, ამბობს, რომ ღვინოს ვსვამდით რქის სასმისებით (ყანწებით) ამ ქვეყნის (ე.ი. ტიბარენიის) ჩვევების მიხედვით.²⁸¹ „ანაბასისში“ არ არის მითითება, თუ სადაური იყო ის ღვინო, რომელსაც ბერძნები იქ შეექცეოდნენ, მაგრამ ყანწების დასახელება, როგორც ისეთი ფიალისა, რომლითაც ღვინოს სმა ამ ქვეყანაში მიღებული ჩვეულება ყოფილა, ვფიქრობ, საფუძველს უნდა გვაძლევდეს ტიბარენებში საკმაოდ დაწინაურებული მევენახეობა ვიგულისხმობ. აქეთკენვე უნდა გვითითებდეს ტიბარენიის რელიეფის შესახებ დაცული ცნობები და შავი ზღვის სამხრეთ სანაპიროს სუბტროპიკული ჰავა, რომელიც ვაზის კულტურისათვის ხელსაყრელი პირობა უნდა ყოფილიყო. და მართლაც, არქეოლოგიური მასალა ცხადყოფს, რომ მევენახეობას მეურნეობაში და ყოფაში საპატიო ადგილი ჰქონდა მიჩენილი. აღმოჩენილია დიდი რაოდენობა ქვევრებისა, რომელთა ნაწილი, ჩანს, არადანიშნულებისამებრ ყოფილა გამოყენებული, სასხლავი დანები,²⁸² რომელიც ვაზის მოვლისათვის ასე აუცილებელია, გადარჩენილია უნიკალური მონოლითური საწნახელი (სოფ. ზენითი, ქობულეთის რაიონი), რომლის ირგვლივ მიწის სამუშაოების წარმოებისას არაერთი ქვევრი გამოჩენილა. დასავლეთ საქართველოს ტერიტორიაზე გამოყოფილია აბორიგენული ჯიშების ათეულობით უძველესი სახე, რომლებშიც გვხვდება როგორც სუფრის ყურძნის მომცემი ჯიშები, ისე საღვინე ჯიშებიც. დღეს გადარჩენილი უძველესი ჯიშები მაღლარია, მაგრამ როგორც ცდებმა ცხადყო, ბევრი მათგანი შეიძლება დაბლარადაც იქნეს მოშენებული.²⁸³ მაღლარის სიჭარბე დასავლეთ საქართველოს ბარში კლიმატური პირობების არახელსაყრელობით უნდა იყოს გამოწვეული. იქნებ ამის გამოც იყო, რომ დასავლეთ საქართველოს ზოგიერთ რაიონში „ვენახი“ „ვენახოვანის“ შემცვლელად ვერ გამოვიდა და, ისევე როგორც ძველად, ახლაც ერთ ძირ ვაზს აღნიშნავს. ცხადია, დასავლეთ საქართველო

²⁸⁰ Xenoph., V, 4, §29.

²⁸¹ იქვე, VI, 1, §4.

²⁸² Хоштария Н., Археологические разведки, მასალები საქ. და კავკ. ისტორიისათვის. II, თბ., 1941, გვ. 80, 91-92.

²⁸³ რამიშვილი მ., გურიის, აჭარისა და სამეგრელოს ვაზის ჯიშები, თბ., 1948; ჯავახიშვილი ივ., საქართველოს ეკონომიური ისტორია, II, თბ., 1935, გვ. 289; იხ. ვახუშტი, აღწერა სამეფოსა საქართველოსა, თბ., 1941, გვ. 176.

იცნობდა დაბლარსაც, ისევე, როგორც აღმოსავლეთი – მაღლარს, მაგრამ დასავლეთ საქართველო აშკარად გაყოფილი იყო ორ ზოლად: 1. შედარებით ზეგნოვანი რაიონები, სადაც შერეულ მევენახეობასთან გვაქვს საქმე; და 2. კოლხიდის დაბლობი, სადაც მხოლოდ მაღლარია დადასტურებული.

პონტოსპირეთის ქართველური ტომების ადგილსაცხოვრისის კლიმატური პირობების გამო, აქ მოსახლე ტომებისათვის ყოველთვის მწვავედ უნდა მდგარიყო ხვანა-თესვისა თუ საძოვრებისათვის გამოსადეგი მიწის ფართობის საკითხი. ეს განსაკუთრებით კოლხეთის მიმართ უნდა აღინიშნოს, რომელსაც გამოუდევარი მიწების დიდი მასივები გააჩნდა (ჭაობები, ტყეები). გამოსაყენებელი ფართობის გადიდებისათვის ბრძოლა განსაკუთრებით უნდა გაეძლიერებინა როგორც პურეულზე მოთხოვნილების დაკმაყოფილების სურვილს, რაც მოსახლეობის რიცხვის სწრაფი ზრდით იყო შეპირობებული (ბუნებრივი მატება, მთის მოსახლეობის ჩამოსახლება), ისე საგარეო ბაზრის გავლენასაც. მე მიმაჩნია, რომ ტექნიკური კულტურების ფართობი ძველ კოლხიდაში მნიშვნელოვნად დიდი უნდა ყოფილიყო და მისი ზრდა იქნებ მარცვლეული კულტურების ქვეშ არსებული ფართობის საზიანოდაც წარმოებულიყო, ხოლო საკვები მარცვლეულის დანაკლისი ჩრდილო და სამხრეთ პონტოსპირეთიდან შემოტანილი პურით შეივსებოდა. ძველი კოლხიდის ეკონომიურ კავშირზე ჩრდილოეთსა და სამხრეთთან არაერთი ცნობაა შენახული. მათ ასაბუთებს და ამაგრებს ჩრდილოეთისა და სამხრეთის ქვეყნების მატერიალური კულტურისათვის დამახასიათებელი ნივთების (ამფორები, მონეტები და ა.შ.) აღმოჩენა კოლხეთის ტერიტორიაზე (დაბლაგომი ...) და პირუკუ (ნიმფეა).

ძველ კოლხიდას სასარგებლო ფართობისათვის ბრძოლა ძირითადად ჭაობებთან უნდა ეწარმოებინა და უწარმოებია კიდევ. ჰიპოკრატე გადმოგვცემს, კოლხიდაში იმდენად ბევრი არხია, რომ მცხოვრებლები ფეხით იშვიათად დადიან, ისიც ბაზრობაზე, ხოლო სხვა დროს ნავებით დასეირნობენო.²⁸⁴ ჰიპოკრატეს ეს ცნობა საფუძველს არაა მოკლებული და დასტურდება ძველი კოლხიდის ტერიტორიის არქეოლოგიური შესწავლითაც. ირკვევა, რომ წყლისა და ჭაობის წინააღმდეგ ბრძოლა აქ მოსახლე ტომებს ჯერ კიდევ მეორე ათასწლეულიდან უწარმოებიათ. მათ მიერ სამოსახლოების ირგვლივ გაყვანილი არხები, როგორც გ. ნიორამემ გაარკვია, ასრულებდა როგორც თავდაცვითი თხრილის მოვალეობას, ისე სატრანსპორტო გზასაც წარმოადგენდა და

²⁸⁴ Hippocr., §22, SC, I, 58.

უკავშირდებოდა რომელიმე მდინარეს.²⁸⁵ ამ ძველი სამოსახლოების გათხრისას არქეოლოგები პოულობენ როგორც ხელოსნობის ნაწარმს, ისე სოფლის მეურნეობის პროდუქტების ნაშთებს: ფეტვს, ხორბალს და ა.შ. ასევე, ამავე ნამოსახლარებზე გვხვდება სოფლის მეურნეობასთან დაკავშირებული იარაღები, მეცხოველეობის არსებობის მანიშნებელი მასალები, მონადირეობის როლის შესახებ მასალები, მასალები ფეიქრობაზე და ა.შ. ასეთია ნამოსახლარები, რომელთა კულტურული ფენები (შესწავლილთა მიხედვით) ნეოლითის შემდეგი ხანიდან დაწყებული ანტიკურ პერიოდამდე არსებულ მასალას შეიცავენ. ამ დროს მოსახლეობა, როგორც ზოგიერთი მკვლევარი ფიქრობს, უფრო უკან იხევს ზღვის სანაპიროდან,²⁸⁶ ალბათ, რაიმე დღეს ჩვენთვის უცნობი საფრთხის გამო. თუ ეს აზრი მართალია, ბუნებრივია მისი დაკავშირება ბერძნების გამოჩენასთან შავი ზღვის სანაპიროზე. მაგრამ გადაჭრით რისამე თქმა დღეს ჩვენ ხელთ არსებული მასალით შეუძლებელია.

ორიოდე ცნობაა დაცული მეცხოველეობაზე, ისიც სამხრეთ სანაპიროზე მოსახლე ტომებისათვის, რომელიც ქსენოფონტს ეკუთვნის.²⁸⁷ ძველი კოლხიდის შესახებ წერილობითი ცნობები თითქმის სულ არ გვაქვს, მაგრამ, სამაგიეროდ, არქეოლოგიური მასალა მდიდრადაა წარმოდგენილი. როგორც ამ მასალების შესწავლიდან ირკვევა, ტომების მეურნეობაში მეცხოველეობა ყველგან ერთნაირი მნიშვნელობისა არ არის. ბარში იგი დამხმარეა მიწათმოქმედების უპირატესობის პირობებში, ხოლო მთაში საქმიანობის ძირითადი დარგია, რიგ ტომებში – მეტალურგიული წარმოების შეთავსებით. ჩვენთვის საინტერესო ხანის არქეოლოგიურ მასალაში გვხვდება შინაურ ცხოველთა თითქმის ყველა წარმომადგენლის ნაშთები. როგორც ირკვევა, მეცხოველეობის პროდუქტები მრავალგვარ გამოყენებაში ყოფილა: ხორცი, რძის პროდუქტები (კარაჭი, ყველი, რძე), ტყავი (ფეხსაცმელი, ტანსაცმელი, შეიარაღება), რქა (შეიარაღება, ფიალები-ყანწები) და ა.შ. როგორც მასალების შესწავლა ცხადყოფს, მთაში ძირითადად წვრილფეხა პირუტყვის მოშენებას მისდევდნენ,²⁸⁸ თუმცა არც მსხვილფეხა პირუტყვი უნდა ყოფილიყო მათთვის უცხო. ზოგიერთი მკვლევარის აზრით, ის გარემოება, რომ კოლხიდის მთის ტომები მისდევდნენ მეცხვარეობას, იყვნენ რა დაწინაურებული მეტალურგები, ხელს უწყობდა კოლხების

²⁸⁵ ნიორაძე გ., არქეოლოგიური გათხრები კოლხიდაში, ენიმკის მოამბე, X, თბ., 1941, გვ. 326;

²⁸⁶ ხოშტარია, დიხა გუძუბა, კოლხეთის დაბლობის ძველი მოსახლეობა, საქ. სსრ მეცნ. აკად. მოამბე, №2, თბ., 1944, გვ. 209. იქვე, გვ. 207-215.

²⁸⁷ იხ. „ანაბასისის“ შესაბამისი ადგილები.

²⁸⁸ გობეჯიშვილი გ., მდ. რიონის სათავეებში 1952 წ. ჩატარებული არქეოლოგიური გათხრების შედეგები, თეზისები ..., გვ. 14.

კულტურული მონაპოვრის გავრცელებას სხვა ქვეყნებში და კერძოდ, ჩრდ. კავკასიაში, რამდენადაც მათი ცხვრის ჯოგები საძოვრებზე იქ გადადიოდა.²⁸⁹ ანტიკური ტრადიცია არაფერს ამბობს აღმოსავლეთ სანაპიროზე მოსახლე ტომების შესახებ, მაგრამ სამხრეთ სანაპიროზე იხსენიებიან „ჯოგებით მდიდარი ტიბარენები“;²⁹⁰ ხოლო სტრაბონის ერთ ცნობაზე²⁹¹ დაყრდნობით ვგებულობთ, რომ ძველი კოლხიდის ერთ ნაწილში, კერძოდ, მესხეთის მთიანეთში, ცხვრის კულტი უნდა არსებებულყო, ხოლო გამოსახულებანი უძველეს ქართულ ფულზე – „კოლხურ თეთრზე“²⁹² უნდა მიგვითითებდეს, რომ ხარი (და საერთოდ მასში ნაგულისხმევი მსხვილფეხა საქონელი) აქ დიდ პატივისცემაში ყოფილა. ეს ხარის მეურნეობაში მსხვილფეხა პირუტყვის წვრილფეხასთან შედარებით უპირატესი როლის დამადასტურებელია, რამდენადაც ის საზოგადოება, რომელსაც „კოლხური თეთრი“ ეკუთვნის, სწორედ ბარში უნდა ჩამოყალიბებულიყო. ხარის კულტი კოლხიდის ბარში (გაიხსენეთ თქმულება არგონავტებზე) მეურნეობის ხასიათთან უნდა ყოფილიყო დაკავშირებული, კერძოდ, მეურნეობაში მიწათმოქმედების უპირატეს როლთან. ამაზე უნდა მიგვითითებდეს მონეტებზე ხარის გამოსახულების არსებობაც.

ბერძენ-ლათინი ავტორები დიდად აქებენ კოლხიდის სატყეო მეურნეობას და აღნიშნავენ მისი პროდუქციის მნიშვნელობას სხვა ქვეყნების მეურნეობისათვის. სტრაბონი, აღწერს რა კოლხიდას და ეხება რა მის სიმდიდრეებს, გადმოგვცემს, რომ აქ ყველაფერი იშოვება ტყის ნაწარმთაგან, რაც მშენებლობისათვის და განსაკუთრებით გემთმშენებლობისათვის არის საჭირო: ხე-ტყე ადგილობრივად (ბარში) იწარმოება და მდინარეებითაც იღებენ, ხოლო სელი, კანაფი, სანთელი და ფისიც უხვადაა.²⁹³ ძვ. წ. I საუკუნის ავტორის *ვირგილი მარონის* ცნობით, კავკასიიდან შემავალი ხე-ტყიდან გემთმშენებლობაში ფიჭვი (pinus), ხოლო საბინაო მშენებლობაში კედარი (cedrus) და კვიპარისი-გუნდის ხე (cupressus) გამოიყენებოდა.²⁹⁴ მოთხოვნილება კოლხურ ხე-ტყეზე ეგეოსის ქვეყნებში წინაელინისტურ ხანაშიც უნდა ყოფილიყო, მაგრამ გვაქვს საფუძველი ვიფიქროთ, რომ ელინისტურ ხანაში მოთხოვნა იზრდება, განსაკუთრებით აღმოსავლეთში დიდი ფლოტილების მშენებლობასთან დაკავშირებით. ამ ხანაში თვით გემების წყალწყვაც სწრაფად იზრდება და შედარებით გრანდიოზულ მასშტაბებს აღ-

²⁸⁹ იქვე, გვ. 14.

²⁹⁰ Strab., XI, 2, §17. SC, I, 137.

²⁹¹ დიონისე, დასახლებული სამყაროს აღწერა, V.V, 766-774. SC, I, 186.

²⁹² კაპანაძე დ., ქართული ნუმიზმატიკა, თბ., 1950, გვ. 25-27.

²⁹³ Strab., XI, 2, §17. SC, I, 137.

²⁹⁴ Verg. Maron., II, §§440-443. SC, II, 14.

წევს.²⁹⁵ სტრაბონის ცნობით, მითრიდატე VI ევპატორი მთავარ შემწეობას თავისი საზღვაო ძალების ორგანიზაციისათვის კოლხიდიდან იღებდა.²⁹⁶ ცხადია, აქ სხვასთან ერთად გემები და ხე-ტყეც იგულისხმება. ხე-ტყის ტრანსპორტირება, როგორც ირკვევა, მდინარეების შემწეობით ხდებოდა, რაც დღესაც არაა უცნობი ეთნოგრაფიული სინამდვილისათვის, როგორც კავკასიონსა და სამხრეთ მთიანეთში, ისე კოლხიდის ბარში (გაიხსენეთ თუნდაც „პალიასტომის ტბა“, ეგნატე ნინოშვილისა). ხის ძვირფასი ჯიშები კი (ბზა, უთხოვარი ...), ალბათ, საზიდარი ცხოველებითაც გადაიტანებოდა, როცა ისინი მდინარეს მოშორებული იყვნენ. ამასთან, ხის ეს ჯიშები არ შეიძლება მდინარით უმეშვეოდ გადაიზიდოს, რადგან ისინი წყალში იძირებიან და ამდენად, ნავებით ან სხვა ხეებისაგან შეკრული ტივებით უნდა იქნეს გადატანილი. ხე-ტყის ცხოველებით (ცხენი, ჯორი, ვირი) ტრანსპორტირება იქა-აქ დღესაც შემორჩა ეთნოგრაფიულ სინამდვილეს (გურია-აჭარის მთების მიდამოები ...); ხშირად, ხე-ტყის ამ გზით ტრანსპორტირება 50-60 კმ-ის მანძილზე წარმოებს, რისთვისაც შექმნილია სპეციალური საკიდარი (გურია-აჭარაში „კეხი“). ჩვენ აღვნიშნეთ კოლხიდიდან უცხოეთში გასული ხე-ტყის გამოყენება, მაგრამ უაღრესად მრავალგან გამოყენებაშია ხე-ტყე საკუთრივ კოლხიდაში და სამხრეთ სანაპიროს ტომებში. სამხრეთ სანაპიროზე მოსახლე ტომების შესახებ გვაქვს ქსენოფონტის, სტრაბონისა და სხვა ავტორების ცნობები, ხოლო კოლხიდისათვის ვიტრუვის ცნობების გვერდით გვაქვს არქეოლოგიური მასალაც, რომელიც ქართველ ტომთა საბინაო და თავდაცვით ნაგებობებში ხე-ტყის განსაკუთრებულ მნიშვნელობაზე მიგვითითებს. „ანაბასისის“ ცნობით, პონტოსპირეთის ტომების სათავდაცვო და საცხოვრებელი ნაგებობები, იქაც კი, სადაც ქალაქური ტიპის დასახლებები გვაქვს, ხისაგანაა ნაშენები (დრილები, მოსინიკები ...). უფრო მეტიც, არიანე გადმოგვცემს, რომ ფასიდის ციხესაც კი წინათ ქვის კედლების ნაცვლად მიწაყრილი იცავდა თურმე, რომელზეც ხის კოშკები ყოფილა აღმართული.²⁹⁷ ვიტრუვი გადმოგვცემს, თუ როგორ აშენებდნენ კოლხები მთლიანი მორების სახლებს;²⁹⁸ მისი ცნობით, კოლხები პარალელურად ალაგებენ ხის მორებს, რომელთა შორის, თავებთან, ალაგებენ სხვა წყობას, რომლითაც იკვრება ოთხკუთხედი. ასე აყავთ კედელი განსაზღვრულ სიმაღლემდე, რის შემდეგ გასწვრივი ხეების შემოკლებით ქმნიან პირამიდის მსგავს სახურავს, რომელსაც ფოთლებითა და მიწით ხურავენ, ხოლო ფარდალალა ადგილებს ნაფოტებითა და

²⁹⁵ კრებულში: Эллинистическая техника, М-Л, 1948, стр.

²⁹⁶ Strab., XI, 2, §18. SC, I, 137.

²⁹⁷ PPE, §12. SC, I, 221.

²⁹⁸ Хепор., V, 2, §25 ...

ტალახით ავსებენ.²⁹⁹ ვიტრუვი მშენებლობის ამ წესს ადგილობრივს (ბარბაროსულს) უწოდებს, მაგრამ იგი ეთნოგრაფიულ სინამდვილეს, ოდნავ სახენაცვალი, ჩვენ დრომდე შემორჩა, ხოლო მისი ფესვები ძვ. წ. III-II ათასწლეულის სიღრმეში იკარგება. გათხრებმა კოლხიდის დაბლობში ცხადყო, რომ მრგვალი ხის მორების ნაგებობანი შენახული გვაქვს იმ უამრავ ხელოვნურ ბორცვებში, რომლებიც ძველ მოსახლობებზე არის აღიარებული.³⁰⁰ სამგორის ერთ-ერთი ყორღანის გათხრამ 1950 წელს ცხადყო, რომ ასეთი ნაგებობანი არც აღმოსავლეთ საქართველოსთვის (იბერიისთვის) ყოფილა უცხო, ჯერ კიდევ ძვ. წ. III ათასწლეულში (პროფ. გ. ნიორაძის გათხრები სამგორში 1950 წლის შემოდგომაზე). რაც შეეხება ვიტრუვის ცნობას, იგი სრულებითაც არ აღწერს ისეთ ნაგებობას, როგორც ლ. სუმბაძესა და დ. მშენიერაძეს აქვს მოცემული.³⁰¹ ჩვენთვის საინტერესო ხანისათვის კოლხებს მშენებლობის ის პრიმიტიული საფეხური (კედლების აყვანაში), რომელიც მათ აქვს მოცემული, ვითომც და ვიტრუვის მიხედვით, უკვე დიდი ხნის გავლილი აქვთ.

ხის მასალების სიუხვე მშენებლობაში შეპირობებულია როგორც სხვა სამშენებლო მასალის შედარებით სიღარიბით, ისე კლიმატური პირობებითაც; სუბტროპიკული, მაგრამ მეტად ნესტიანი ჰავის პირობებში ხის ბინების მშენებლობა ჯანმრთელობისათვის საკვებით გამართლებულია, ხოლო იმავე პირობებში ქვის შენობები რიგ ავადმყოფობათა გამომწვევ მიზეზად იქცევა. ჩანს, ძველ კოლხებს ამ ტერიტორიაზე ხანგრძლივი ცხოვრების მანძილზე ჰავაზე დაკვირვება უწარმოებიათ და შესაფერისი დასკვნებიც გაუკეთებიათ. გარდა საბინაო და თავდაცვითი ნაგებობებისა, ხე გამოიყენებოდა: 1. შეიარაღებაში (შუბის ტარები, ფარები, მუზარაღები, ისრის ღეროები); 2. გემთმშენებლობაში: მოსინიკების ერთ-ერთ ნაწილს „ანაბასისის“ ცნობით, 300-ზე მეტი ნავის გამოყვანა შესძლებია, თითოეულ მათგანში სამი კაცი შეიძლებოდა თურმე მოთავსებულიყო.³⁰² სულ სხვა ზომისაა აღმოსავლეთ სანაპიროზე მოსახლე ტომების „ნავები“. სტრაბონის ცნობით, ჰენიოხების ნავებში 25-30 კაცი ეტეოდა და ბერძნები მას „კამარებს“ უწოდებდნენ. ასეთ ნავებზე ამხედრებული ჰენიოხები შიშის ზარს სცემდნენ თურმე იმდროინდელ ზღვაოსნებს და ზღვის სანა-

²⁹⁹ Vitruvius Pollio – De architectura, II, 1, §4, SC, II, 42-43.

³⁰⁰ ნიორაძე გ., არქეოლოგიური გათხრები კოლხიდაში, ენიმკის მოამბე, X, თბ., 1941, გვ. 335, 342. ხოშტარია ნ., დიხა გუძუბა, კოლხეთის დაბლობის ძველი მოსახლობა, საქართველოს სსრ მეცნიერებათა აკად. მოამბე, V, №2, თბ., 1944, გვ. 210, 214, 216.

³⁰¹ Мшвениерадзе Д. Л., Строительное дело в древней Грузии, Тб., 1952, стр. 60-61 и рис.96. სუმბაძე ლ., კოლხური საცხოვრებელი სახლი ვიტრუვის მიხედვით. საქ. სსრ მეცნ. აკად. მოამბე, I, №6, თბ., 1945, 491 და შმდ. სურ. 1.

³⁰² Xenoph., V, 4, §11.

პირო ქალაქებს.³⁰³ ოვიდი ნაზონის მხატვრული თქმით, ჰენიოსები და აქეები უფრო მეტ ვნებას აყენებდნენ ზღვაოსნებსა და პონტოსპირეთის ქალაქებს, ვიდრე სტელას ურჩხულები ან ხარიბდა. მისი თქმით, ისინი, თავისუფლად დაეხეტებიან რა პონტოს მარჯვენა სანაპიროებზე, არც მარცხენა სანაპიროებს ანატრებენ თავიანთ სტუმრობას.³⁰⁴ ჰენიოსების თარეშებზე უნდა მიგვითითებდეს პლინის ჩვენება – „უდიდესი ქალაქი პიტიუნტი გაძარცვული ჰენიოსების მიერ“.³⁰⁵ აღმოსავლეთ სანაპიროზე დადასტურებული ნაგებობის ამ სახეობის ელინური სახელწოდება „კამარა“,³⁰⁶ შემდგომში ტომის სახელწოდებადაც იქცა.

მაშასადამე, ხე-ტყე ძვ. კოლხიდის საბინაო და თავდაცვით მშენებლობაში ძირითადი საშენი მასალა იყო; საერთოდ, მთელს მეურნეობაში მას უაღრესად საპატიო ადგილი ეჭირა და მასზე მოდიოდა საგარეო ვაჭრობის ერთი ნაწილიც.

ჩვენთვის საინტერესო ხანის ანტიკურ ლიტერატურას შემონახული აქვს არაერთი ცნობა, რომელიც პონტოსპირეთის ქართველურ ტომებში ხელოსნობის არსებობაზე მიგვითითებს. ჩვენ არა გვაქვს თითქმის არც ერთი პირდაპირი მოწმობა, რომელიც ხელოსნურ ორგანიზაციებს ეხება, მაგრამ მატერიალური კულტურა და წერილობითი ძეგლები მიგვითითებენ არაერთ ნივთზე, რომლებიც ხელოსნური შრომით უნდა იყოს შექმნილი (წარმოების და საბრძოლო იარაღები, სამკაულები და ა.შ.). მაგრამ აქ ერთი, ჯერ დაუძლეველი, დაბრკოლება გველოდება წინ: სპეციალისტ-არქეოლოგებს სრული უეჭველობით დღემდე ვერ მოუხერხებიათ ადგილობრივი ტომების ნაწარმი უცხოურისაგან გამოაცალკეონ, „ხოლო ამა თუ იმ არქეოლოგიური ფაქტის ქართულად გამოცხადება მარტო იმის გამო, რომ ის აწინდელი საქართველოს მიწის წიაღშია მოპოვებული, ვერაფერი მეცნიერებაა“.³⁰⁷ უკვე ძვ. წ. V საუკუნისათვის, ჰეროდოტეს ცნობაზე დაყრდნობით, შეიძლება კოლხიდაში საფეიქრო სახელოსნოების (სართავი, საქსოვი) და ფეიქარ ხელოსნების (და მონა-ფეიქრების) არსებობა დავუშვათ. ეს სახელოსნოები ქალაქებში და ტაძრებთანაა თავმოყრილი. ტაძრებში

³⁰³ Strab., XI, 2, §12. SC, I, 134.

³⁰⁴ Dvid. Nas., Epist., IVm 10, SC, II, 100-101.

³⁰⁵ Plin., VI, §16, SC, II, 179.

³⁰⁶ კორნელი ტაციტი (ახ. წ. 55-117) თავის „Historiae“-ში (111, 47. SC, II, 249) აღწერს „კამარების“ იმ სახეს, რომელიც I საუკუნეში ყოფილა გავრცელებული. ანიკეტის ფლოტი შემდგარი ყოფილა გემებისაგან, რომლებსაც ბრტყელი ძირი და მაღალი კიდეები ჰქონებია. ძეგლები ერთმანეთზე ლითონის გარეშე ყოფილა დამაგრებული. ამ გემებს „კამარები“ (Camara) ეწოდებოდათ და დიდი ღელეების დროს მისი გვერდები ფიცრების (tabulis) დამატებით მაღლდებოდა, ისე რომ ბოლოს სახურავით შეიკვროდა. მათი ნიჩბები გადასაადგილებელი ყოფილა და ამის გამო გემი ნაპირს ორივე მხრით შეიძლებოდა მისდგომოდა. ნ. ბერძენიშვილი, ქართული საბჭოთა არქეოლოგიის ზოგიერთი პრინციპული საკითხი, მიმოხილველი, II, თბ., 1951, გვ. 338.

არსებული სახელოსნოები, ალბათ, მონების შრომის პარალელურად „ხატის ყმათა“ ექსპლუატაციასაც ეწევიან. ტაძრებთან საქსოვი სახელოსნოების არსებობა დადასტურებულია ძველი აღმოსავლეთის ქვეყნებში (ეგვიპტე, ...) როგორც ანტიკურ, ისე ელინისტურ ხანაში. სახელოსნოები ტაძრების (ქურუმების) შემოსავლის ერთ-ერთი დიდი წყაროა. არქეოლოგები ძველ მოსახლობათა გათხრის დროს დიდი რაოდენობით ნახულობენ კვირისთავებს.* კვირისთავების შედარებით ვიწრო ადგილებზე (მოსახლობებში) თავმოყრა იქნებ საფეიქრო სახელოსნოების არსებობის მატერიალური დადასტურება იყოს. რა თქმა უნდა, საფეიქრო სახელოსნოები წარმოებაში არ იყო ძირითადი, მაგრამ ისინი არიან სასაქონლო ქსოვილის ძირითადი მწარმოებლები, ხოლო ქვეყნის მოსახლეობის ძირითადი მასა საოჯახო წარმოებით იკმაყოფილებს საკუთარ მოთხოვნებს, როგორც ეს XIX საუკუნის მთიელებში არის დადასტურებული. ხელოსნობის ზოგიერთი დარგის არსებობაზე უნდა მიგვითითებდეს, ალბათ, ჰეროდოტესთანვე დაცული ცნობა შეიარაღებაზე.³⁰⁷ მაგრამ ასეთი ცნობების გამოყენება „ფართოდ განვითარებული“ რაიმე წარმოების არსებობის დასასაბუთებლად, ცხადია, არ გამოდგება. თ. მიქელაძე შრომაში „ქსენოფონტის „ანაბასისი“ და მისი „ცნობები ქართველ ტომებზე“, ეხება რა მთის ხალიბების შეიარაღების შესახებ დაცულ ცნობებს, ფიქრობს, რომ მათ (ხალიბებს) უნდა სცოდნოდათ სელის მოშენება, „ფართოდ ყოფილა განვითარებული საფეიქრო წარმოებაც“ და ლითონის „მრეწველობა“.³⁰⁸ ასეთი ცოდვისაგან არც მ. მაქსიმოვას ზოგიერთი სტატიია თავისუფალი.³⁰⁹ წერილობით წყაროებში დაცული ასეთი ცნობები, ცხადია, მიუთითებს ხელოსნობის იმ დარგების შესაძლებელ არსებობაზე (მოცემულ რაიონში), რომლის ნაწარმიც წარმოდგენილია, მაგრამ ისინი არაფერს გვეუბნებიან წარმოების ხასიათის, მისი მოცულობის შესახებ. ჩვენ ვიცით სელის ფართო წარმოებაზე კოლხიდაში საერთოდ, მაგრამ ვიცით არა იმ ცნობებით, რომლებიც მის მოხმარებაზე მიგვითითებენ კოლხურ სინამდვილეში, არამედ იმით, რომ იგი (წარმოება) იმდროინდელ მსოფლიო ბაზარზე ერთ-ერთ ძირითად მიმწოდებლად გამოდის. იოლი დასაშვებია, რომ ე. წ. „მთის ხალიბებს“, რომელთაც ლითონის „მრეწველობა“ ჰქონდათ, სელის საკუთარი წარმოება არ ჰქონოდათ და ქსოვილები და სხვა პროდუქტებიც გაცვლის გზით მიეღოთ. ასეთი

* Хоштария Н., Древнее поселение в Даблагоми, Тб., 1941, стр. 200., Куфтин Б. А., Материалы к археологии Колхиды, II, Тб., 1950, стр. 111.

³⁰⁷ Herod., VII, 78. SC, I, 56-57.

³⁰⁸ მიქელაძე თ., ქსენოფონტის „ანაბასისი“ და მისი ცნობები ქართული ტომების შესახებ“, თბ., 1953, გვ. 169-1780 (ხელნაბეჭდი)

³⁰⁹ Максимова М., Местное население ..., ВДИ, 1951, №1, стр. 259-260.

მაგალითები პონტოსპირეთის სინამდვილეში დადასტურებული ფაქტები, როგორც წერილობით (იგივე ქსენოფონტი, აპოლონ როდოსელი, სტრაბონი), ისე მატერიალური კულტურის ძეგლებითა (რაჭის გათხრები) და ეთნოგრაფიული მასალებით. ჩვენ გვაქვს ცნობები რიგ ქართველ ტომებში მეტალურგ-ხელოსნების არსებობაზე. სამხრეთ სანაპიროს შესახებ ძირითადად წერილობითი ცნობებია შენახული (ქსენოფონტი, აპოლონ როდოსელი, ფსევდო-არისტოტელე, სტრაბონი, ...), ხოლო კოლხიდისათვის ძირითადად არქეოლოგიური მასალა (ძველი მღაროები, ნივთის ჩამოსასხმელი ყალიბები, მადნის სადნობი წარმოების ნაშთები და ა.შ.). საერთოდ, წერილობითი და არქეოლოგიური მასალების მიხედვით ჩანს, რომ პონტოსპირეთის ქართველურ ტომებს მეტ-ნაკლები სიძლიერით გააჩნიათ ხელოსნობის რიგი დარგები: მადნის მომპოვებლობა-გამოდნობა, მჭედლობა, ოქრომჭედლობა, ფეიქრობა, შეიარაღება (მეტყავე-მეიარაღე, მჭედელი-მეიარაღე), დურგლობა, მენავეობა, მექოთნეობა და აგურ-კრამიტის წარმოება, რქის ოსტატობა (ყანწები, იარაღის ტარები და ა.შ.) და ა.შ. ცხადია, ცხოვრება წინ მიდიოდა, დღევანდელი არ ჰგავდა გუშინდელს, ხოლო გუშინდელი – გუშინწინდელს, რის გამო არც ჩვენ გვაქვს უფლება ისინი ერთ ტაფაში მოვათავსოთ, ერთნაირი შინაარსი ჩავდოთ მათში; მაგრამ საამისოდ არქეოლოგიური მასალის მოპოვება და დამუშავება შესაფერისად უნდა დაწინაურდეს, რომ მსჯელობა ხელოსნური დარგების განვითარების შესახებ ქართველურ ტომებში საბუთიერ (სანდო) ნიშნებს იყოს დამყარებული. მანამდე კი შეიძლება მხოლოდ მიეუთითოთ ხელოსნობის მოცემული დარგის არსებობასა, ან შესაძლო არსებობაზე და ზოგჯერ მის მნიშვნელობაზე კონკრეტული ტომის მეურნეობაში.

ძველი კოლხიდისა და შავი ზღვის სამხრეთ სანაპიროების შესახებ დაცული მასალების შესწავლიდან ირკვევა, რომ ეს ტერიტორიები აქ მოსახლე ხალხებით ძველი დროიდანვე ეკონომიურ და კულტურულ კავშირშია თავის ახლობელ თუ შორეულ მეზობლებთან. იგი უზიარებს მათ და იზიარებს მათგან კულტურის მონაპოვრებს. ეს გაზიარება იმ ხანაში სწორედ ეკონომიური ურთიერთობით დაინტერესების მეშვეობით ხდება შესაძლებელი და ძირითადად მატერიალურ კულტურაში ჩანს შენახული, რასაც ავსებს წერილობითი წყაროების ცნობები. არქეოლოგიური მასალა მოპოვებული ჩრდილო შავიზღვისპირეთის ქალაქების გათხრების შედეგად, ადასტურებს, რომ კოლხიდის სავაჭრო ეკონომიური ურთიერთობა ჩრდილოეთის სანაპიროებთან ძვ. წ. VI საუკუნეში ნივთიერად დადასტურებული გარემოებაა. ნიმფის ნაქალაქარში ძველი საკურთხევლის გათხრისას ძვ. წ. VI საუკუნის ფენაში სხვა ნივთებთან ერთად აღმოჩნდა ორი ცალი „კოლხური თეთ-

რი“ და პითოსების ნამტვრების დიდი რაოდენობა, რომლის ანალო-
გიები მრავლადაა წარმოდგენილი დაბლაგომის მასალებში. სპეციალის-
ტები ფიქრობენ, რომ ჩრდილო შავიზღვისპირეთში პითოსები კოლხი-
დიდან უნდა იყოს გავრცელებული.³¹⁰ როგორც ირკვევა, კოლხიდიდან
ჩრდილოეთში გაჰქონდათ ძირითადად გემთმშენებლობისათვის ხე-ტყე;
აგრეთვე თაფლი, სელი, კანაფი, ცვილი, ფისი და ა.შ.³¹¹ კოლხიდის
ეკონომიური ურთიერთობა ჩრდ. შავიზღვისპირეთთან დასტურდება
ჩვენთვის საინტერესო ხანის მთელ სივრცეზე, მაგრამ იგი განსაკუთ-
რებით უნდა გაძლიერებულიყო ელინისტურ ხანაში. ამ ხანაში
ჩრდილოელი ვაჭრები აქ უნდა მოეზიდა აღმოსავლურ საქონელსაც,
რომლის დასავლეთისაკენ მოძრაობის ერთ-ერთი არხი სწორედ
ფაზისში მთავრდებოდა. ჩრდილოეთის ეკონომიურ ცენტრებთან
კავშირზე მიგვითითებენ დაბლაგომის სხვა მასალებიც.³¹² 1895 წელს
ვანში აღმოჩენილი იქნა კუნძულ სამოსის ოქროს სტატერი, რომელიც
ძვ. წ. VI საუკუნეს ეკუთვნის.³¹³ კოლხიდის სიღრმეში ასე შორეული,
ეგეოსის სამყაროსთან დაკავშირებული მონეტის აღმოჩენა ამ ხანის
კოლხეთის ეგეოსის სამყაროსთან ეკონომიური ურთიერთობის ნივთიე-
რი დადასტურებაა. მაგრამ არა მარტო მონეტები, არამედ იმდროინ-
დელი წარმოების მრავალრიცხოვანი ნაშთები კოლხიდიდან ცხადად
მეტყველებენ ამ კავშირზე. ამ მასალათაგან პირველ ყოვლისა უნდა
აღინიშნოს კერამიკული ნაწარმი და კერძოდ, შავლაქიანი ჭურჭლის
სიმრავლე ანტიკური ხანის კოლხიდის მოსახლობებში, როგორც
ზღვის სანაპირო ზოლში, ისე ქვეყნის სიღრმეშიც. ელინისტური ხანა
აღმოსავლეთისა და დასავლეთის ეკონომიურსა და კულტურულ ურთი-
ერთობაში სრულებით ახალი საფეხურია და კავშირები სხვადასხვა
ქვეყანას შორის ამ ხანებში ძლიერდება. იქმნება სრულიად ახალი
სავაჭრო-ეკონომიური ცენტრები, ძლიერდება ძველად არსებული რიგი
ქალაქებისა, ხოლო ნაწილი კი ეცემა და გადის საისტორიო სცენიდან.
კოლხეთის კავშირი ელინისტურ აღმოსავლეთთან მრავალმხრივია და-
დასტურებული როგორც ეკონომიურ, ისე კულტურულ სფეროში.
ელინისტური ხანის კოლხეთში შედარებით დიდი რაოდენობით გვხვდე-
ბა უცხო სახელმწიფოთა მონეტები, ვიდრე წინა ეპოქაში, ხოლო
ადგილობრივი მონეტების წარმოება, როგორც ჩანს, ძლიერდება და

³¹⁰ Скуднава В. М., Находка Колхидских монет и пифосов в Нимфее, ВДИ, 1952, №2, стр. 238-242.

³¹¹ Гаидукевич, დასახ. ნაშრ., გვ. 92

³¹² Хоштария Н. В., Древнее поселение Даблагоми, (ხელნაბეჭდი), თბ., 1940, გვ. 214-216.

³¹³ ხოშტარია ნ., არქეოლოგიური გათხრები სოფ. ვანში 1947 წელს, მიმოხილველი, I, 1949, გვ. 303. Куфтин Б. А. Материалы к археологии Колхиди, II, 145-146.

ცვლის ძველად მიღებულ ფორმებსა და ლითონს.³¹⁴ სწორედ ელინისტურ ხანაში ხდება წინწამოწევა დასავლეთისა და აღმოსავლეთის ერთ-ერთი იმ უდიდესი სავაჭრო გზისა, რომელიც ინდოეთში იწყებოდა და მტკვარ-რიონის გზით ფოთთან შავ ზღვაზე გამოდიოდა. ეს ცნობა, ძვ. წ. III საუკუნის დამდეგის ავტორს პატროკს ეკუთვნის, რომელიც სელევკ I ნიკატორის დროს (312-280 წწ.) ირანის ჩრდილო-აღმოსავლეთის ოლქების სატრაპი იყო და მინდობილი ჰქონდა კასპიის ზღვის შესწავლა. ამ ცნობას, რომელიც არისტობულის მეშვეობით სტრაბონთანაა დაცული,³¹⁵ არაერთი მკვლევარი შეხებია (უსლარი, ტარნი, მანანდიანი, რანოვიჩი, ს. ჯანაშია, ივ. ჯავახიშვილი და მრავალი სხვა). ზოგიერთი მათგანი, მათ შორის ი. მანანდიანი, 1930 წელს დაწერილ წიგნში უარყოფს ამ გზის დიდ მნიშვნელობას ელინისტურ ხანაში და საამისო საბუთად შუა აზიაში ამიერ კავკასიური და ამიერ კავკასიაში შუააზიური მონეტების უქონლობა მიაჩნია (ემყარება გურკო-კრიაჟინს – Хр. Вост. 1928 г. Кн. 16-17, ст. 203).³¹⁶ მანანდიანის მსჯელობიდან ისე გამოდის, რომ ან ფასიდ-ჰირკანიის გზა უნდა ყოფილიყო ძლიერ დატვირთული, ან ეკატანა-განძაკის გზა, რომელიც შავი ზღვის სამხრეთ-დასავლეთ სანაპიროებზე გავიდოდა.³¹⁷ მაგრამ წერილობით წყაროებზე დაკვირვებიდან ირკვევა, რომ თვით ელინისტურ ხანაში, მის დასაწყისშივე, შეგნებული იქნა ფასიდ-პონტოს დამაკავშირებელი საწყლოსნო გზის უპირატესობა, წინააღმდეგ მანანდიანის მტკიცებისა, რომელიც თავს ახვევს იმდროინდელ საზოგადოებას საქარავნო გზის უპირატესობის აღიარებას საწყლოსნო გზის წინაშე. ჩვენი მოსაზრების დასადასტურებლად შეიძლება პლინი სეკუნდთან დაცული კლავდი ცეზარის ცნობა მოგვეყვანა, რომლის თანახმადაც ძვ. წ. IV საუკუნის დამლევეს თუ III საუკუნის დამდეგს, სელევკ ნიკატორს (312-280 წწ.) გადაუწყვეტია შავი და კასპიის ზღვები არხით დაეკავშირებინა, მაგრამ ნაადრევ სიკვდილს ამ გეგმის განხორციელება არ დაუცლია.³¹⁸ ცხადია, ამ ფანტასტიური გეგმის ავტორებს მიახლოებით წარმოდგენილი ექნებოდათ, თუ რა დიდი სახსრები იქნებოდა საჭირო მის განსახორციელებლად, მაგრამ მიღებული სარფა, იმედი იყო, დაფარავდა გაწეულ ხარჯებს (ძველი ხალხების ეს ლამაზი ოცნება სინამდვილედ იქცა XX საუკუნეში ვოლგა-დონის სანაოსნო არხით, მოხდა რა ამ გზით – კასპიისა და

³¹⁴ კაპანაძე დ. ქართული ნუმიზმატიკა, თბ., 1950, გვ. 25-32.

³¹⁵ Strab., XI, 7, §3. SC, I, 149-150.

³¹⁶ Манандян Я., О торговле и городах Армении, 1930, стр. 45-47. Услар П., Древнейшие сказания о Кавказе, ЗКОРГО, XII, Тб., 1881, стр. 419, 424.

³¹⁷ იქვე, 45-46.

³¹⁸ Plin., VI, 31. SC, II, 182.

შავი ზღვების დაკავშირება). ფასიდ-პირკანის სავაჭრო გზის მნიშვნელობა განსაკუთრებით რომაელთა აქ ბატონობის ხანაში იზრდება, მაგრამ გარდა ამ გზისა, კოლხიდაზე გადაივლიდა ჩრდილოეთიდან მომავალი გზა, რომელიც შავი ზღვის სამხრეთ სანაპიროებს და სამხრეთ-დასავლეთ ამიერ კავკასიას, ჩრდილო კავკასიასა და სამხრეთ რუსეთს უკავშირდება. ეს გზა, იწყებოდა რა ჩრდილოეთში, სანაპიროებით (ან კარების გზით) შემოდიოდა კოლხიდაში.³¹⁹ ფასიდთან შტოვდებოდა – ერთი ხაზი რიონს აღმა შეყვებოდა და იბერიის გზით აღმოსავლეთ ამიერ კავკასიას უკავშირდებოდა, ხოლო მეორე შტო შავი ზღვის სანაპიროებს მიყვებოდა და გონიოსთან კვლავ იტოტებოდა: ერთი შტო აჭარისწყლის ხეობით სამცხე-ჯავახეთში გადადიოდა, მეორე – ჭოროხის ხეობით ართვინზე გაივლიდა და არტანუჯში ჩავიდოდა, ხოლო მესამე ზღვის სანაპიროს გაყვებოდა კვლავ და ამისონიპის დეფილეთი მცირე აზიის ცენტრალურ რაიონებში შედიოდა. სამხრეთ სანაპიროზე მას კვლავ გამოეყოფა რიგი გზებისა, რომლებიც აღმოსავლეთ პონტოს მთაგრებილზე გადადიოდა (კარჩხალის გზა, ზიგანის გზა და ა.შ.). ჩრდ. ტავრეთის მთებს შავი ზღვის სამხრეთი სანაპიროები მოწყვეტილი აქვს დანარჩენი აღმოსავლეთიდან, მაგრამ აქ არსებობს რიგი გადასასვლელებისა, რომლებზეც უძველესი დროიდანვე სწარმოებს ადამიანთა მოძრაობა.³²⁰ მათგან ყველაზე მნიშვნელოვანია ზინგანის გადასასვლელი (2036 მ სიმაღლეზე), რომელზეც დღეს ტრაპეზუნტ-ბაიბურთის გზატკეცილი გადაივლის. ესაა ერთადერთი კარი, რომელიც ზამთრის პერიოდში იშვიათად იკეტება. იგი XIX საუკუნეში საუკეთესო საქარავნო გზად ითვლებოდა.

ქართველურ ტომებს, ჩვენთვის საინტერესო ხანაში, საგარეო ბაზრისათვის შეეძლოთ მიეწოდებინათ როგორც ხელოსნობისა და სოფლის მეურნეობის ნაწარმი, ისე ბუნებრივი სიმდიდრეების დამუშავებით მიღებული ნედლეული.³²¹ რკინა-ფოლადი და მათი ნაწარმი (იარაღი – საბრძოლო და სამეურნეო), სპილენძი, ბრინჯაო და მათი ნაწარმი (ჭურჭლეული, იარაღი, სამკაულები), ოქრო-ვერცხლი და მათი ნაწარმი (სამკაულების დიდი ასორტიმენტი), სელი, კანაფი და საფეიქრო ნაწარმი (მრავალგვარი ქსოვილი), ტყავი და ტყავის ნაწარმი; დიდი

³¹⁹ ჯანაშია ს., ფეოდალური რევოლუცია საქართველოში, შრ. II, 44-47. Манандян Я., О местонахождении Caspia via u Caspia porta, Ист. Зап. 25, 1948, 59 и след. Цель и направление подготовлявшего Нероном Кавказского похода, Вопр. Ист., 1946, №7. 74 и след. მ. ინაძე, ფლავიუს არიანე და მისი ცნობები ..., 46-49, 113 ...

³²⁰ ლიტერატურა: Осман-бей, Лазистан, ИРГО, X, 8, 1874, 358-359. Деилор, Путешествие в Лазистан и Армению, 44-45. Успенский Ф., Очерки из истории Трапезундской империи, Л., 1929, 90, 118-121. Максимова, О выходе хеттов на южный берег Черного моря, ВДИ, 1948, №4, стр. 32. Матвеев, Турция, М-Л, 1946, 14, 115 и др.

³²¹ საქართველოს ისტორია, I, 1948, გვ. 44.

რაოდენობით ხე-ტყე (ძირითადად გემთმშენებლობისათვის, ხოლო ძვირფასი ჯიშები – ავეჯისა და იარაღისათვის), თაფლი, თევზი, ცვილი, ფისი, სურინჯი, მონები და ა.შ. რა თქმა უნდა, საგარეო ბაზარი ცალკეულ სახეს მეტ-ნაკლები ოდენობით ითვისებდა, ხოლო ვაჭრობის მასშტაბი სხვადასხვა ეპოქაში სხვადასხვანაირი იყო. ელინისტურ ხანაში, მაგალითად, იგი უფრო ფართო და დიდი რადიუსის მქონებული ხდებოდა, ვიდრე მის წინა ხანაში იყო. ერთ-ერთ ძირითად საშუა-
 მავლო როლს ადგილობრივი ტომების საგარეო ვაჭრობაში პონტოს-პირეთის ბერძნული სავაჭრო ქალაქები ასრულებენ, რომლებიც ძვ. წ. VIII-VII საუკუნიდან იხსენიებიან წერილობით წყაროებში. პ. უს-
 ლარმა, დააკვირდა რა ანტიკურ ლიტერატურას, შენიშნა, რომ ძველმა ავტორებმა არ იცოდნენ, თუ როდის და ვის მიერ იყო დაარსებული სავაჭრო კოლონიები. აქედან მან გააკეთა ლოგიკური დასკვნა, რომ შავი ზღვის სანაპიროზე არსებული სავაჭრო ქალაქები საფუძველ-
 ჩაყრილი ბერძნების მიერ კი არაა, არამედ მათ აქ მოსვლამდე ამ ადგილებში არსებობდა ქალაქები (მოსახლობანი), სადაც ბერძნები პირველ ხანებში დროდადრო მოდიოდნენ, შემდეგ სახლდებიან აქ და იპოვებენ რა საკმაო სიძლიერეს, ბატონდებიან, ხოლო ქალაქები თან-
 დათან კარგავენ ადგილობრივ ხასიათსა და თვისებებს.³²² მიღეთელები, მისი აზრით, კოლხების მემკვიდრეები არიან ვაჭრობაში.* ეს მოსაზ-
 რება, ვფიქრობ, პრინციპულად გასაზიარებელია, რაზედაც ზოგიერთი არქეოლოგიური მასალაც უნდა მიგვითითებდეს, რომელიც ზღვის სანაპიროებზე ბერძნული ქალაქების ტერიტორიებზე ან მათ მახ-
 ლობლად უფრო ადრინდელი მოსახლეობის არსებობაზე მიგვითითებენ. ცხადია, ზღვისპირა ქალაქების არქეოლოგიური გათხრების გარეშე მათ როლსა და ისტორიაზე გაბედულად მსჯელობა ძნელია; საბედნიე-
 როდ, ასეთი მუშაობა უკვე დაიწყო³²³ და ახლო მომავალში კოლხეთის სანაპიროს ქალაქების შესწავლისათვის მეცნიერება ახალი, ძვირფასი მასალებით გამდიდრდება. ჩვენთვის საინტერესო ხანაში, შავი ზღვის სამხრეთ-აღმოსავლეთ სანაპიროებზე ყველაზე მნიშვნელოვან სავაჭრო ქალაქებად ფაზისი (დღევანდელი ფოთის ადგილას) და დიოსკურია (დღევანდელი სოხუმის ადგილას) გვევლინებიან. ანტიკურ ლიტერატუ-
 რაში ისინი დიდი სახელგანთქმულობით სარგებლობენ. სტრაბონი ფა-
 სიდს „კოლხთა სავაჭრო ქალაქს“ (... Ἐμπόριον τῶν Κόλχων...)

³²² Услар Н., დასახ. ნაშრ. გვ. 434, 440-441. უსლარი ფიქრობს, რომ შავი ზღვის სანაპიროებზე კოლონიების გაშენების პირველობის პალმა ბერძნებს კი არ ეკუთვნით, არამედ სხვა ხალხებს, კერძოდ ფინიკიელებსო.

* იქვე, გვ. 416-417.

³²³ აფაქიძე ა., ბიჭვინთა, 1952 წლის საველე არქეოლოგიური კვლევა-ძიების შედეგები – თეზისები, თბ., 1953, გვ. 16.

უწოდებს.³²⁴ აქედან გადიოდა, ალბათ, კოლხეთის მეურნეობის ნაწარმის ძირითადი ნაწილი: ხე-ტყე, საფეიქრო ნაწარმი, თაფლი, ცვილი და ა.შ. დიოსკურია კი, სტრაბონის ცნობით, მის ზემოთ და მის ირგვლივ მცხოვრები ტომების თავშესაყარი პუნქტია. „ამბობენო, – გადმოგვცემს სტრაბონი, – რომ აქ 60 ტომის წარმომადგენელი იყრის თავს“,³²⁵ ხოლო პლინი იმეორებს სტრაბონის მიერ უკუგდებულ ტიმოსთენეს აზრს, რომლის ცნობით აქ 300 ტომის წარმომადგენლის თავმოყრა ხდებოდა თურმე და რომაელები თავიანთ საქმეებს 130 თარჯიმნის მეშვეობით აწარმოებდნენ.³²⁶ ასევე დიდი მნიშვნელობისა უნდა ყოფილიყო დიასკურიადის ჩრდილოეთით მდებარე „მდიდარი პიტინტი“ (დღევანდელი ბიჭვინთის ადგილას), რომელიც, პლინის ცნობით, ადგილობრივი ტომების მიერ ყოფილა გაძარცვული.³²⁷ სამხრეთ სანაპიროზე თავისი მნიშვნელობით ყველაზე მნიშვნელოვანი იყო სინოპი (ძვ. წ. VIII ს), მისი კოლონია ტრაპეზუნტი და ამისი. ცხადია, ჩვენ აღვნიშნავთ მთავარ სავაჭრო ქალაქებს. მათი რიცხვი გაცილებით დიდია, რომელთა ნაწილის მხოლოდ სახელებია დღეისათვის ცნობილი და მათი ადგილმდებარეობის გარკვევაში გადამწყვეტ სიტყვას ისევ არქეოლოგია თუ იტყვის. სინოპი, ამისი და ტრაპეზუნტი ის არხები იყო, საიდანაც სამხრეთ მეტალურგიული ბაზის ნაწარმი გადიოდა, რის გამოც ხალიბურ რკინასა და ფოლადს ანტიკურ ლიტერატურაში სინოპურისა და ამისურის სახელიც შეერქვა. აქედანვე გადიოდა აგრეთვე მონებიც, რომელთა არსებობაზე გვაქვს არაერთი წერილობითი ცნობა როგორც მოგვიანო ხანის, ისე ძვ. წ. VI-V საუკუნისათვის.³²⁸

სხვადასხვანაირი იყო პონტოსპირეთის ქართველურ ტომთა ურთიერთობა ბერძნულ სავაჭრო ქალაქებთან. „ანაბასისის“ ცნობებიდან ირკვევა, რომ ადგილობრივი ტომების ერთი ნაწილი მეგობრულადაა განწყობილი ბერძნულ ქალაქებთან, მეორე ნაწილი კი – მტრულად. ასევე, ანტიკურ ლიტერატურაში იქა-აქ გაპარულა ცნობა ადგილობრივი ტომების ქალაქებთან დამოკიდებულების შესახებ (პლინის ცნობა ჰენიონებზე³²⁹ და ა.შ.). ერთი დასკვნა ამ ურთიერთობის შესახებ, რომელიც ყველა დროისათვის შეიძლება გამოდგეს, ცხადია, არ შეიძლება არსებობდეს. კოლხეთის სამეფოს არსებობის პერიოდში, მაგალითად,

³²⁴ Strab., XI, 2, §17. SC, I, 136-137.

³²⁵ იქვე, XI, 2, §16. SC, I, 136.

³²⁶ Plin., VI, §15, SC, II, 179.

³²⁷ იქვე, §16. გვ. 179.

³²⁸ Xenoph., IV, 8, §4. Граков, Материалы по истории Скифии в греческих надписях, ВДИ, 1939, №3, стр. 290-305 и след. Максимова М., Местное население..., ВДИ, 1951, №1, стр. 262

³²⁹ Plin., VI, 15. SC, II, 179.

ურთიერთობის რეგულირებაში ძირითადი როლი სამეფო ხელისუფლებას ეკუთვნის, ხოლო სამეფოს დაცემის შემდეგ – ტომებს თუ ტომთა გაერთიანებების წინამძღოლებს. საერთოდ, ძველი ბერძნული ქალაქი შემოზღუდული არ არის მისი კედლებით და არც ახლომასხლო ტერიტორიებით. ზოგჯერ მისი საზღვრები შორს ვრცელდება და ახერხებს მთელი რიგი ქალაქების თავისი ჰეგემონობის ქვეშ გაერთიანებას. ასე წარმოიქმნა ჩრდილო შავიზღვისპირეთში ბოსფორის სამეფო. შავი ზღვის სამხრეთ და სამხრეთ-აღმოსავლეთ სანაპიროზე ასეთი მსხვილი პოლიტიკური გაერთიანება, რომლის ბირთვი ბერძნული ქალაქი ყოფილიყო, არა გვაქვს, მაგრამ აქაური და ამდროინდელი ქალაქების მეურნეობა არ შეიძლება ემყარებოდეს მხოლოდ ვაჭრობასა და ხელოსნობას. მას უცილობლად კავშირი აქვს სოფლის მეურნეობასთან. თუ ისეთ ძლიერ სავაჭრო ცენტრში, როგორც იყო ბიზანტიონი, სოფლის მეურნეობა ერთ-ერთი წამყვანი დარგი იყო,³³⁰ ცხადია, მიწათმოქმედებისა და მეურნეობის რიგ სხვა დარგებს სამხრეთ და სამხრეთ-აღმოსავლეთს სანაპიროზე განლაგებული ბერძნული სავაჭრო ქალაქებისათვის უფრო მეტი მნიშვნელობა უნდა ჰქონოდა. ამაზე პირდაპირი ცნობების სიმცირისას იქნებ განსაკუთრებული მნიშვნელობისა იყოს სტრაბონის ცნობა ფარნაკიის შესახებ, რომელიც, მისი აზრით, კეთილდღეობის წყაროებს ხმელეთზე მადნეულის დამუშავებით იპოვებს, ხოლო ზღვიდან – თევზჭერით.³³¹ იქნებ აქეთკენვე უნდა გვითითებდეს ქსენოფონტის ცნობა ტრაპეზუნტელების შესახებ, რომლებმაც ბერძნებს ბაზარი გაუხსნეს და საჩუქრად ხარები, პური და ღვინო გაუგზავნეს.³³² ეს ცნობა ტრაპეზუნტელების სოფლის მეურნეობასთან კავშირზე უნდა მიგვითითებდეს. ცხადია, ბერძნებს მიწა ბალკანეთიდან ან მცირე აზიიდან არ მოტანიათ, ის მათ ადგილობრივ კოლხებს წაართვეს და წაართვეს, ალბათ, ძალით. „Отношение к земле, как собственности, всегда опосредствовано захватом (мирным или насильственным) земель племенем, общиной, имеющей более или менее естественно сложившуюся или уже исторически развитую форму“.³³³

ასე სამხრეთ და სამხრეთ-აღმოსავლეთ სანაპიროებზე მდებარე ბერძნული ქალაქები, იმავე დროს, მიწათმფლობელებიც არიან. მათი ექსპანსია სხვადასხვა დროს და პირობებში სხვადასხვანაირია. ადგილობრივი ტომების რეაგირება ამაზე ამის მიხედვით სხვადასხვაგვარ-

³³⁰ Невская В. П. Византия в классическую и эллинистическую эпохи, М., 1953, стр. 37-42.

³³¹ Strab., XII, 3, §19. SC, I, 158.

³³² Xenoph., IV, 8, §23, 24.

³³³ Маркс К., Формы предшествующие капиталистическому производству, ВДИ, 1940, №1, стр. 15

რია. ზღვისპირა ქალაქების შემსწავლელთათვის ამ საკითხის გადასაჭრელად საჭირო მასალების მოპოვება, ალბათ, ერთი მნიშვნელოვანი ამოცანათაგანია.

ჩვენ გავაკეთეთ მოკლე მიმოხილვა საგარეო ვაჭრობისა, მაგრამ ტომების მეურნეობაში გადამწყვეტი როლი საშინაო ბაზარს ეკუთვნოდა. პირობები ბაზრის არსებობისათვის პონტოსპირეთის ქართველურ ტომებში ჩვენთვის საინტერესო ხანამდე დიდი ხნით ადრე არსებობდა, მაგრამ არის საბუთები, და საკმაოდ შეურყეველიც, რომლებიც მიგვითითებენ, რომ ეს ურთიერთობანი ჩვენთვის საინტერესო ხანაში განსაკუთრებით ინტენსიური ხდება: ამ ხანის კოლხიდაში, ძვ. წ. VI საუკუნისათვის, მიმოქცევაში უცხოური ფულის ნიშნების გვერდით ადგილობრივი გამოშვების მონეტებიც არსებობენ. ეს საშინაო ბაზრის მოთხოვნილებით გაჩენილი ფულის ნიშნებია, რომლებიც ძირითადად ძველი კოლხიდის ტერიტორიაზეა გავრცელებული³³⁴ და მეცნიერებაში „კოლხური თეთრის“ სახელითაა ცნობილი. წყაროებში პირველი მონეტის გაჩენის თარიღად ძვ. წ. VII საუკუნეა მითითებული. მის სამშობლოდ ეგეოსის სამყაროა (ლიდია ან კ. ეგინა) აღიარებული.³³⁵ ძვ. წ. VI საუკუნეში კოლხიდას უკვე გააჩნია საკუთარი გამოშვების მონეტა, რომლის ზოგიერთ ცალს უკვე მოუსწრია ყირიმში (ნიმფეა), ძველბერძნული ქალაქის VI საუკუნის ფენაში მოხვედრილიყო, კოლხური წარმოშობის სხვა ნივთებთან ერთად.³³⁶ როგორი იყო ის საფუძველი, წინაპირობები, რომლებმაც ძველ კოლხიდაში ფულის ნიშნების (მონეტების) გაჩენა შეაპირობა? როგორც ზემოთ აღვნიშნეთ, კოლხიდისა და სანაპირო ტომების მეურნეობა ამ ხანისათვის საკმაოდ დაწინაურებული სურათს იძლევა. ცალკეული ტომი ხშირად მეურნეობის რაიმე დარგში ავლენს თავის შესაძლებლობებს, რაც მას საშუალებას აძლევს თავისი ნაწარმიდან გამოყოს ნაჭარბი, რომელიც შეიძლება საქონლად მოგვევლინოს. ასეთ ტომებად წერილობითი წყაროების ჩვენებით ხალიბები და მოსინიკები ყოფილან, ხოლო არქეოლოგიური მასალების მიხედვით მდ. რიონის სათავეებში მოსახლე ტომი თუ ტომები (იხ. ქსენოფონტი, ფს. არისტოტელე, ა. როდოსელი, სტრაბონი; გ. გობეჯიშვილი ...). სამაგიეროდ, ბარში მოსახლე ტომები სოფლის მეურნეობის ნაწარმით იყვნენ მდიდარი. მთა ნანადირევითა და მესაქონლეობის პროდუქტებით იყო უხვად უზრუნველყოფილი, ხოლო ბარი – მეთევზეობით, მარილის საწარმოებით, საფეიქრო ნაწარმით და ა.შ. მითითებული გარემოებანი ქმნიდა საკმაოდ საფუძველს განვი-

³³⁴ საქართველოს ისტორია, I, 1947, გვ. 56.

³³⁵ კაპანაძე დ., ქართული ნუმიზმატიკა, თბ., 1950, გვ. 12-13.

³³⁶ Скудникова, დასახ. ნაშრ., გვ. 238-242.

თარებული საშინაო ბაზრის არსებობისათვის. ამ ბაზრის მომსახურებისათვის ჩნდება ფულის ის ნიშნები, რომელთა შესახებ ზემოთ მივუთითებდით. ბაზრობები უფრო ხშირად, ალბათ, წარმართულ დღესასწაულებზე და სალოცავებთან იმართებოდა. ბაზრობათა არსებობაზე მიუთითებს ჰიპოკრატეს ცნობა. იგი გადმოგვცემს, რომ კოლხები მხოლოდ ბაზრობებზე დადიოდნენ ფეხით, სხვა დროს ნავეებით დასეირნობდნენ.³³⁷ ჰიპოკრატეს ცნობიდან ირკვევა, რომ ქალაქებში ბაზრობები არ ან თითქმის არ იმართებოდა. იგი გადმოგვცემს, ფეხით მხოლოდ ქალაქში და ბაზრობებზე დადიოდნენ.³³⁸ ცნობაში თითქოს გამორიცხულია შესაძლებლობა ქალაქში ბაზრობის გამართვისა. მართალია, ამდროინდელი ქალაქები უკვე სავაჭრო და სახელოსნო პუნქტებია, სადაც წარმოებს ალებ-მიცემა, მაგრამ ჰიპოკრატის ამ ცნობაში, ალბათ, მასიურ ბაზრობაზეა ლაპარაკი, რომლებიც დროდადრო იმართებოდა კოლხიდის სხვადასხვა ნაწილში. ასეთი ბაზრობის ქალაქის ტერიტორიაზე გამართვა, იმდროინდელი ქალაქის ტერიტორიული სიმცირის გამო, შეუძლებელი იქნებოდა. მეორე მხრივ, იგი საშიში იყო ქალაქის თავდაცვის თვალსაზრისით და ამიტომ, ჩვეულებრივ, ქალაქებთან ახლოს იმართებოდა, მის კედლებს გარეთ.

წერილობითი წყაროებისა და არქეოლოგიური მასალის ჩვენებით ირკვევა, რომ ალებულ პერიოდში, კოლხიდაში და სამხრეთ სანაპიროებზე უკვე არსებობენ ქალაქები, რომლებიც ქვეყნის ცხოვრებაში მნიშვნელოვან როლს თამაშობდნენ. თუმცა ჰეკატე მილეეთელთან მოხსენებულია ხალიბების ქალაქი სტამენა (ფრ. 196) და მოსინიკების ქალაქი ხოირადა (ფრ. 193),³³⁹ ხოლო თქმულებაში არგონავტებზე იხსენიება კოლხური ქალაქი *Ἰα*, მაგრამ პირველი კონკრეტული და უეჭველი მითითება შავი ზღვის სანაპიროს ტომების ქალაქებზე „ანაბასისშია“ დაცული. ქსენოფონტი შკვითინების მიწაზე ასახელებს „დიდ: მდიდარ და დასახლებულ“ ქალაქად გიმნიადას.³⁴⁰ „ანაბასისის“ ტექსტზე დაკვირვებიდან ირკვევა, რომ იგი ასეთ შეფასებას განურჩევლად არ ხმარობს. მაგ. ტრაპეზუნტზე ნათქვამი აქვს „დასახლებული“ (οἰκουμένην), ხოლო კერასუნტი და კოტიორა უეპითეტოდ არიან მოხსენებული. ეს გარემოება უნდა მიგვითითებდეს, რომ მას გიმნიადა დიდ ქალაქად აქვს წარმოდგენილი. ასეთი ქალაქების არსებობა დაწინაურებული სოციალ-ეკონომიური ცხოვრების მანიშნებელია.

³³⁷ Hippocr., 22, SC, I, 58.

³³⁸ ...ὀλίγη τε χρέονται τῇ βασιδί κατὰ τὴν πόλιν καὶ τὸ ἐμπόριον, ἀλλὰ μονοξύλοισι διαπλέουσι ἄνω καὶ κάτω δῶριχες γὰρ πολλαὶ εἰσι...

³³⁹ SC, I, 3.

³⁴⁰ ... ἐντεῖθεν διήλθον σταθμούς τέτταρας παραβάγας εἴκοσι πρὸς πόλιν μεγάλην καὶ εὐδαίμονα καὶ οἰκουμένην ἢ ἐκαλεῖτο Γυμνιάς ... IV, 7, §19. SC, I, 73.

ისინი აქტიურად მონაწილეობენ სავაჭრო-ეკონომიურ ცხოვრებაშიც. ქალაქური ტიპის მოსახლობათა ნაშთები დადასტურებულია ვანში, დაბლაგომში, კლდეეთში და სხვაგან.

მდ. რიონის სათავეების არქეოლოგიური შესწავლა ცხადყოფს, რომ სასაქონლო-ფულადი ურთიერთობა, ჩვენთვის საინტერესო ხანაში, მთაშიც უნდა ყოფილიყო შეჭრილი; ეს გარემოება იმდენად მთის სოციალური განვითარებით არაა გამოწვეული, რამდენადაც ბართან ეკონომიური ურთიერთობის მოწესრიგების საჭიროებით, ბარის გავლენით.

საშინაო ბაზრის არსებობა შეპირობებული უნდა ყოფილიყო ტომებს შორის სამიმოსვლო გზების არსებობითაც; მიმოსვლისათვის, უნდა ვიფიქროთ, გამოიყენებოდა როგორც მდინარეები და ზღვა, ისე სახმელეთო გზები. გზების წესრიგში ქონებაზე იმდროინდელ კოლხი-დაში, ჩანს, ზრუნავდნენ. სტრაბონის ცნობაზე დაკვირვებიდან ირკვევა, რომ გზები განსაკუთრებული ზრუნვის საგანი ყოფილა.³⁴¹ სტრაბონის (და პლინის) ცნობა კოლხიდაზე გამავალ საერთაშორისო გზის აღწერას წარმოადგენს, მაგრამ ეს ხელს არ გვიშლის მათში ძველ კოლხებში გზების წესრიგში ქონებისადმი ზრუნვა დავინახოთ, გზების არსებობაზე გვაქვს ქსენოფონტის ცნობაც,³⁴² რომელიც უკვე სამხრეთ სანაპიროებს შეეხება და უფრო ადრინდელ მდგომარეობას გვაცნობს.

ამგვარად, ძვ. წ. VI-I საუკუნეებში შავი ზღვის სანაპიროზე მცხოვრები ტომების ეკონომიური განვითარების დონე დაწინაურებულობის ნიშნების მატარებელია. გეოგრაფიული პირობების მრავალგვარობა მეურნეობის დარგთა მრავალსახეობას იძლევა მიკრორაიონების მიხედვით (მთის, მთის ძირის და ბარის მეურნეობა). უკვე ამკარადაა გამოსახული სასაქონლო მეურნეობა, რომელიც აქტიურად მონაწილეობს იმდროინდელ საერთაშორისო ვაჭრობაში, ხოლო შინაური გაცვლითი ურთიერთობისათვის მონეტის გამოჩენა რაიონებს შორის შრომის დანაწილების უცილობელი დადასტურებაა და განვითარების მაღალი დონის მაჩვენებელია.

* * *

პონტოსპირეთის ქართველური ტომების სოციალური განვითარების დონე ჩვენთვის საინტერესო პერიოდში ერთნაირი არ არის არც ჰორიზონტალურ (გეოგრაფიულ), და მით უფრო, არც ვერტიკალურ (ქრონოლოგიურ) ჭრილში.

ქართველური ტომების ჩვენთვის საინტერესო ჯგუფის სოციალური მდგომარეობის გასათვალისწინებლად ანტიკური ლიტერატურა არ

³⁴¹ Strab., XI, 3, §4. SC, I, 139. Plin., VI, §13. SC, II, 178.

³⁴² Xenoph., V, 1, §13-14.

იძლევა რამდენადმე ხელჩასაკიდ ცნობებს, და ეს ითქმის არა მარტო შავიზღვისპირეთის, არამედ საერთოდ ყველა ქართველურ ტომზე. სტრაბონი აღწერს იბერიის სოციალურ სურათს, მაგრამ არაფერს ამბობს კოლხეთის ბარში სოციალური მდგომარეობის ამსახველ სურათზე. სამაგიეროდ, მისი ცნობები სვანების შესახებ საშუალებას იძლევა იმდროინდელი მთის სოციალური განვითარების დონე გავითვალისწინოთ და ეს სურათი სხვა ტომებზეც გავავრცელოთ. სამხრეთ სანაპიროს მთიანეთზე კი ქსენოფონტის „ანაბასისში“ დაცული ცნობებია გადარჩენილი, ხოლო ბარის სოციალურ განვითარებაზე აქაც გუმანითა და პარალელების მეშვეობით გვიხდება მსჯელობა.

წერილობითი წყაროების სიმცირის პირობებში გადამწყვეტ მნიშვნელობას იძენს დამხმარე დისციპლინების – არქეოლოგიის, ეთნოგრაფიის, ნუმიზმატიკის მონაპოვრები, მაგრამ აქაც, სამხრეთ სანაპიროების შესახებ, ჩვენ განკარგულებაში მეტად მცირე მასალაა წარმოდგენილი.

წერილობით წყაროებში შენახული ცნობებიდან ირკვევა, რომ სამხრეთ სანაპიროს მთიანეთში მოსახლე ქართველური ტომები ძვ. წ. VI-I საუკუნეებში გვაროვნული წყობის ჩარჩოებიდან ჯერ არ გამოსულან, მაგრამ უკვე კლასობრივი საზოგადოების ზღურბლთან იმყოფებიან. ცხადია, შექმნილი პირობები მეტად ანელებს მათ განვითარებას. II საუკუნის 30-იანი წლების მდგომარეობით, ტრაპეზუნტის მიდამოებში მოსახლე ჭანები (სანები), არიანეს ცნობით, უმეფონი ყოფილან (ἔθνος ἀβασίλευτον).³⁴³ დაახლოებით იგივე სურათი უნდა იყოს მოცემული VI საუკუნის ავტორის პროკოპი კესარიელის აღწერილობებში.³⁴⁴ თუ ახალი წელთაღრიცხვის II საუკუნეში ჭანები განვითარების გვაროვნულ საფეხურზე არიან, ცხადია, წინარე ეპოქაში ისინი ცხოვრების ამავე წესით განაგრძობდნენ არსებობას. ჩვენ უფლება გვაქვს ეს ვითარება დანარჩენ, თითქმის ასეთსავე პირობებში, აქ მცხოვრებ სხვა ტომებზეც გავავრცელოთ, მით უფრო, რომ ამაზე უნდა მიუთითებდეს ქსენოფონტის „ანაბასისში“ დაცული ცნობები. „ანაბასისში“ აღწერილი პონტოსპირეთის ტომების ერთი ნაწილი გვაროვნული წყობის საფეხურზეა, მეორენი კი კლასობრივი ცხოვრების წესს იცნობენ (ტიბარენები, ბარის კოლხები), ხოლო ზოგიც გარდამავალ სტადიაზე იმყოფება. უკანასკნელთაგან ყველაზე მეტი ცნობები „ანაბასისში“ მოსინიკებზეა დაცული. მოსინიკების საზოგადოება კლასობრიობის სწორედ კარებთან იმყოფება, მაგრამ ქონებრივი უთანასწორობა მათში საერთო მოვლენა არ გამხდარა, რის გამოც კლასობრივი ბატონობის

³⁴³ PPE., §15, SC, I, 222.

³⁴⁴ BP, I, 15; De aedificiis, III, 6.

ინსტიტუტს აქ თავისებური სახე მიუღია. ცდება თ. მიქელაძე, როდესაც ფიქრობს, რომ მოსინიკები ერთგვარი მონათმფლობელები უნდა ყოფილიყვნენ და ხალიბების სახით ჩვენ მონებთან უნდა გვეკონდეს საქმეო.³⁴⁵ მართალია, მოსინიკებს დაუმორჩილებიან მემთამადნე ხალიბები, მაგრამ მათი ურთიერთობა არ შეიძლება მონისა და მონათმფლობელის ურთიერთობას გავუივივოთ: მონა, ცნობილია, არ სარგებლობს ოჯახის ყოლის უფლებით და ამდენად, არ ახდენს ახალი მოდგმის რეპროდუქციას. აქედან გაუგებარია მათი ხანგრძლივი არსებობა ჰეკატე მილეთელის ხანიდან (ძვ. წ. VI ს.), ვიდრე გვიან შუა საუკუნეებამდე (იხ. მიხაილ პანარეტი). თ. მიქელაძე გრძნობს ამ გარემოებას და თავისი დასკვნის გადარჩენას ხალიბების შემადგენლობაში სხვა ტომების წარმომადგენელთა შეყვანით ცდილობს,³⁴⁶ მაგრამ მას ავიწყდება, იმავე დროს აქ სახელმწიფოს არსებობაც დაუშვას. მოსინიკებისა და ხალიბების ურთიერთობის ხასიათი ახსნას პოულობს ხევსურული ჯვარისყმობის ინსტიტუტში და რიგ სხვა ფაქტებში კავკასიის მთიელთა ეთნოგრაფიული ყოფიდან. ვ. ბარდაველიძე, ეხება რა ხევსურთა ჯვარისყმობის ინსტიტუტს, აღნიშნავს, რომ ხევსურების სამი სახის ლაშქრობიდან ერთ-ერთი ეწყობოდა ... მუდმივი საშემოსავლო ბაზის შექმნის მიზნით. ამ ბაზას შეადგენდა ყოვლწლიური გადასახადი, რომელსაც დამპყრობელი თემი დამორჩილებულ თემს აკისრებდა. ასეთ შემთხვევაში დაპყრობილ მიწებს დამპყრობელი თავის ადგილმამულს უერთებდა და ამგვარად, საკუთარი თემის ტერიტორიას საგრძნობლად აფართოებდა. ამავე დროს დაპყრობილი ხალხი დამპყრობელი თემის მოსახლეობის რიცხვში შეჰყავთ, რის შემდეგმ დამორჩილებული თემი მთლიანად გამარჯვებული ჯვარის საყმო-საგლეხოდ ცხადდებოდა.

საყმო-საგლეხო თავის შიგნით თვითმართველობას ინარჩუნებდა და მისი თემური ცხოვრების მთელი წყობა გარეგნულად ხელუხლებელი მოჩანდა, მაგრამ ეკონომიურად იგი ნახევრად კაბალურ მდგომარეობაში იმყოფებოდა...³⁴⁷ ასეთი ურთიერთობა შეიძლებოდა წარმოქმნილიყო არა მარტო ძალმომრეობის გზით, არამედ „ნებაყოფილებითაც“, როდესაც სუსტი თემი იძულებულია შევიდეს ძლიერის მფარველობაში და იკისროს გარკვეული ვალდებულებანი. დაახლოებით ამ სახით გვაქვს ჩვენ წარმოდგენილი მოსინიკებისა და ხალიბების ურთიერთობა. მემთამადნე ხალიბები მოსინიკებისათვის სანუკვარი მოხარკენი უნდა

³⁴⁵ მიქელაძე თ., ქსენოფონტის „ანაბასისი“ და მისი ცნობები ქართული ტომების შესახებ, თბ., 1953, 289-290 (ხელნაბეჭდი).

³⁴⁶ იქვე, 290.

³⁴⁷ ბარდაველიძე ვ., ხევსურული თემი, საქ. სსრ მეცნ. აკად. მოამბე, XIII, 8, 1952, 500-501.

ყოფილიყვნენ. სხვა თემებისა თუ ტომების დამორჩილებისათვის ბრძოლის კვალზე „ანაბასისში“ მრავალგანაა მითითება (მოსინიკებში, შკვი-თინებში ...).

ამგვარად, სამხრეთ სანაპიროს მთიანეთის ქართველური ტომები ჩვენთვის საინტერესო ხანაში გვაროვნული განვითარების სხვადასხვა საფეხურზე იმყოფებიან. დროდადრო მათი კლასობრივ საზოგადოებათა პოლიტიკური წარმონაქმნების შემადგენლობაში ჩართვა (აქემენიდური ირანი, პონტოს სამეფო, კოლხეთის სამეფო) მდგომარეობას არ ცვლის. მათი სოციალური აღნაგობა ბუნებრივ-ისტორიული პირობების გადაწვნის წყალობით ძლიერ ნელა იცვლება და თემურობის რიგი ნიშნები მათ გვიანობამდე მოაქვთ.

სამხრეთ სანაპიროს მთიელების ცხოვრების წესისაგან დიდად როდი განსხვავდება ძველი კოლხიდის ჩრდ. მთიანეთის (კაკასიონის) ტომების ცხოვრების წესი. ჩვენთვის საინტერესო ხანაში მათი მდგომარეობის გასათვალისწინებლად სანდო ცნობებს იძლევა სტრაბონის „გეოგრაფია“. „...მათ (სვანებს – დ.ხ.) ყავთ მეფე (Βασιλέα) და 300 კაცისაგან შემდგარი საბჭო (συνέδριον). ხოლო ჯარს, როგორც ამბობენ, 200 000-იანს აგროვებენ, რამდენადაც ყველა მცხოვრები მეომრობით გამოირჩევა, მწყობრს გარეშეც“.³⁴⁸ იხილავს რა სტრაბონის ამ ცნობას, ს. ჯანაშია შენიშნავს, რომ „ეს ცნობები ეკუთვნიან ხანას **არა უგვიანეს I საუკუნის პირველი ნახევრისა** ჩვენი წელთაღრიცხვის დაწყებამდე, და შესაძლოა საუკუნე-საუკუნენახევრით უფრო ადრინდელიც იყვნენო“.³⁴⁹ როგორც არ უნდა იყოს სტრაბონის თუ სტრაბონთან დაცული ამ ცნობის ხნოვანება, ს. ჯანაშიას სამართლიანი შენიშვნით, იგი **„უეჭველად მოქმედ გვაროვნულ საზოგადოებას ახასიათებს**: ტომს მოეპოვება ის ორგანო, რომლითაც ხალხი თავის სუვერენულ უფლებებს ახორციელებს, სატომო საბჭო; მისი 300 წევრი – ეს ცალკე გვართა წარმომადგენლებია, მამასახლისები თუ სხვა დელეგატებიც; ჯარს თვით ხალხი შეადგენს...“³⁵⁰ სვანეთის ასეთი ინსტიტუტების მოხსენიება სტრაბონთან არ არის მოულოდნელი რამ და გვიანი მდგომარეობის შესწავლა ცხადყოფს, რომ თემურობის ბევრი გადმონაშთი სვანეთის ეთნოგრაფიულ სინამდვილეში თითქმის ჩვენ დრომდეც შემორჩენილა.³⁵¹ საინტერესოა ამ მხრივ სვანური დიდი ოჯახი. „**სვანუ-**

³⁴⁸ Strab., XI, 2, §19. SC, I, 138.

³⁴⁹ ჯანაშია ს. ნ. , გვაროვნული წყობილება ქართველ ტომებში, შრ. II, 119.

³⁵⁰ იქვე, 118.

³⁵¹ წყაროები და ლიტერატურა: სვანეთის საისტორიო ძეგლები, II, თბ., 1941; Харадзе Р., Структура семейной общины в Картли, Вопросы этнографии Кавказа, Тб., 1952, 253...; მისივე, დიდი ოჯახის გადმონაშთები სვანეთში, თბ., 1940, ს. ჯანაშიას მითითებული შრომები და სხვა.

რი ქორი წარმოადგენდა პატრიარქალური ოჯახის თავდაპირველ სახეს, სადაც უფროსად უხუცესი მამაკაცი, ქორა – მახვში, ითვლებოდა და რომლის უფლებები ძირითად საკითხებში ოჯახის დანარჩენი წევრების სურვილით განისაზღვრებოდა.³⁵² ... სვანური ქორის შესწავლა სავსებით ადასტურებს სვანეთში გვაროვნული წყობილების დროს გაჩენილი დიდი ოჯახის გადმონაშთების არსებობის ფაქტს, რაც თავისთავად ინდივიდუალური ოჯახის უწინარეს საფეხურს აამკარავებს.³⁵³ კიდევ ბევრი რამ შემოინახა სვანურმა სინამდვილემ თემურობიდან: შრომის განაწილება ოჯახში, ქორწინება-შეუღლების წესი, თემური ყრილობები, სისხლის ალება და ა.შ.³⁵⁴ სტრაბონის ცნობით, სვანები მბრძანებლობენ მეზობელ ხალხებზე. სვანების ბატონობის ფორმა მეზობლებზე (ტომები, თემები) ისეთივე უნდა ყოფილიყო დაახლოებით, როგორც ხევსურების თემებისათვის (ზემოთ აღვნიშნეთ), და ასეთი ურთიერთობანი სვანეთს XIX საუკუნემდე უნდა ჰქონოდა შემონახული.³⁵⁵ სტრაბონთან დადასტურებულ სვანების მეფეში ს. ჯანაშიამ სამართლიანად „მახვში“ დაინახა.³⁵⁶ ხევის მამასახლისის ევოლუციისათვის ჩვენ დაცული გვაქვს საშუალო საუკუნეების (XIV ს.) მასალებიც, რომლითაც ხევის მამასახლისი ხევის მამად – მამობილად ითვლება, ხოლო ხევი მის შვილობილად („შენითა ნებითა მთავარმოწამე სეტისა და ერთობული ხევი გვიშველე“).* „ერთობული ხევი“ თავისი მახვშით 1869 წლამდე არსებობდა, სანამ მახვშის ხელისუფლება გარეშე ჩარევით არ იქნა გაუქმებული.

ახალი წელთაღრიცხვის მიჯნამდე თემურობის სტადიაზე ჩანს ჰენიოხთა მოდგმა. სტრაბონის ცნობით, ჰენიოხები ტყვედგებულ ადამიანებს მონებად კი არ აქცევდნენ, არამედ, თუ პატრონი გამოსყიდვას ისურვებდა – ისინი ცნობას აძლევდნენო.³⁵⁷ ე.ი. ჰენიოხებში, ჩანს, არ არსებობს ისეთი მეურნეობა, სადაც მონის შრომა რენტაბელური იქნებოდა. ეს მეურნეობა, როგორც ჰენიოხების მოსაქმეობაზე დაკვირვებიდან ჩანს, მეტად ღარიბია და სუსტად განვითარებული. ეს, ძირითადად, ჩანს, დასამუშავებლად გამოსადეგი მიწის ფართობის სიმცირითა და სიმწირით აიხსნება. აქ იაფი მუშახელის გამოყენებისათვის საფუძველი არ არსებობს – ქვეყანა თავისი მკვიდრების გამოკვებასაც

³⁵² ხარაძე რ., დიდი ოჯახის გადმონაშთები სვანეთში, თბ., 1940, გვ. 61.

³⁵³ იქვე, 108. აგრეთვე, ს. ჯანაშია, იქვე, 123.

³⁵⁴ ჯანაშია ს., იქვე, 123-124; რ. ხარაძე, დასახ. ნაშრ., იქვე.

³⁵⁵ Тенцов В. Я. Сванетия (географ. Очерк.) СМОМПК, X, Тб., 1890, стр. 56 и след.

³⁵⁶ იქვე, 117-124.

* სვანეთის საისტორიო ძეგლები, 6-7.

³⁵⁷ Strab., XI, 2, §12. SC, I, 135.

კი ვერ ახერხებს. ასეთსავე მდგომარეობაში მყოფებად წარმოგვიდგენს სტრაბონი სხვა მთიელებსაც.³⁵⁸

ამგვარად, ძვ. წ. I საუკუნისათვის, როგორც სამხრეთ სანაპიროს მთიანეთში, ისე კოლხიდის მთებში მოსახლე ტომები თემური ცხოვრების წესით ცხოვრობენ; წყაროებზე დაკვირვება მათში განვითარების სხვადასხვა საფეხურს ადასტურებს.

ძვ. წ. VI საუკუნის კოლხიდასა და სამხრეთ სანაპიროების ბარში უკვე კლასობრივი საზოგადოება გვაქვს მოცემული. მაგრამ ეს არ არის საბოლოოდ გაფორმებული, კლასიკურ ფორმებში ჩამოყალიბებული საზოგადოება, არამედ ეს, თუ შეიძლება ასე ითქვას, მონათფლობელურ-თემური საზოგადოებაა, სადაც წარმოებს არა მარტო მონის, არამედ თავისუფალი შრომის ექსპლუატაცია, თუმცა თავისუფალი მწარმოებლები თავისთვის თემურ წყობასა და თემობრივობის ინსტიტუტებს ინარჩუნებენ. ასეთი ფორმები მცირე აზიამ ელინისტურ და რომაულ ხანაშიც კი შეინარჩუნა.³⁵⁹ როგორი სოციალური ერთეულები გვეგულება ჩვენ ჩვენთვის საინტერესო ხანის ბარში? საკითხის გადმოცემას საზოგადოების ყველაზე დაბლა მდგომი მასის – მონათა არსებობის შესახებ მსჯელობით დავიწყებთ: მონების არსებობა ძვ. წ. VI საუკუნის კოლხიდაში სრულებით არ წარმოადგენს მოულოდნელ რამეს. როგორც ს. ჯანაშია აღნიშნავს, „გვაროვნული საზოგადოების განვითარების უკანასკნელ პერიოდში მონობა საყოველთაოდ გავრცელებული მოვლენაა“.³⁶⁰ კოლხიდას კი აღებულ ხანაში განვითარების ეს საფეხური, როგორც თანდათანობით დავინახავთ, გავლილი აქვს უკვე და აქ, არცთუ მცირე რაოდენობით, მსხვილ მონათმფლობელურ მეურნეობებთან უნდა გვქონდეს საქმე, რომლის მეპატრონეებადაც მსხვილი ტაძრები და სამეფო საგვარეულო უნდა ყოფილიყო. მოსაქმეობის რა დარგებში უნდა ყოფილიყო გამოყენებული მონის შრომა? ჩვენ ზემოთ აღვნიშნავდით, რომ კოლხიდა ძვ. წ. აღ. VI-V საუკუნეში ეგეოსის სამყაროში სელისა და სელის ნაწარმის ერთ-ერთ ძირითად მიმწოდებლადაა ცნობილი. იგი სელის ერთ-ერთ მთავარ მიმწოდებლად ჩანს ძვ. წელთაღრიცხვის პირველ საუკუნეშიც. ცხადია, კოლხიდის აქტიური მონაწილეობა იმდროინდელ საერთაშორისო ვაჭრობაში სასაქონლო მეურნეობის შედარებით სიძლიერეს უნდა დაყრდნობოდა. „სასაქონლო წარმოება კაპიტალისტურ წარმოებაზე უფრო ძველია, იგი არსებობდა მიწათმფლობელური წყობილების დროს და მომსა-

³⁵⁸ იქვე, XI, 2, §12, 13, 14, 15, 16 და განსკ. 19. SC, I, 135 და შემდ.

³⁵⁹ ჯანაშია ს. ნ., ფეოდალური ურთიერთობის წარმოშობისათვის საქართველოში, X, 140 და შემდ.

³⁶⁰ იქვე, 144.

ხურებას უწევდა მას“.³⁶¹ სასაქონლო მეურნეობა თემური წარმოების წესის არსებობისას გაუგებარია, იქ იგი უაღრესად სუსტადაა წარმოდგენილი. ქსოვა, წარმოების იარაღების განვითარების იმდროინდელ პირობებში, უაღრესად შრომატევადი სამუშაოა და იძლევა საშუალებას იაფი მუშახელის დიდი რაოდენობით გამოყენებისათვის. მართლაც, ძვ. აღმოსავლეთის ქვეყნებში მრავლადაა დადასტურებული საქსოვი სახელოსნოების არსებობა, სადაც ძირითადად მონა-მქსოველებია გამოყენებული (ეგვიპტე). ასეთივე სახელოსნოები არსებობდა კოლხიდაში. განსაკუთრებით დიდი რაოდენობით ისინი ტაძრებს უნდა ჰქონოდათ. მონური შრომის ფართოდ გამოყენება შესაძლებელი იყო აგრეთვე სელისა და კანაფის პლანტაციებში. ასეთ მეურნეობათა ქონება – წარმოების საშუალება ისევ ტაძრებსა და სამეფო საგვარეულოს აქვს.

კოლხიდის ბარისათვის, კლიმატურ-გეოგრაფიული პირობების გამო დიდი მნიშვნელობა ჰქონდა არხების მშენებლობას (იხ. ზემოთ). არხები წარმოადგენდა როგორც ჭაობებთან ბრძოლის საშუალებას, ისე სანაოსნო გზებსაც. ჰიპოკრატის ცნობის ანალიზისას, ჩვენ მოვიტანეთ არქეოლოგიური მასალაც, რომელიც კოლხიდაში არხთმშენებლობის დიდ ტრადიციასზე მიუთითებს. არხების მშენებლობა იდი რაოდენობით და მათი მოვლა, ცხადია, მოითხოვთ გარკვეულ ორგანიზაციას და სახსრების ისეთ ოდენობას, რაც თემისა და ტომის შესაძლებლობას აღემატება. კოლხიდაში ასეთი ორგანო არსებობს. ეს კოლხეთის სახელმწიფოა, მეფეა, რომელსაც მონების გარკვეული რაოდენობა და სახსრები შეუძლია დააბანდოს არხების მშენებლობასა და მოვლაში. ცნობილია, თუ რაოდენ შრომატევადი სამუშაოა არხების მშენებლობა და, განსაკუთრებით, მოვლა ისეთ ოლქებში, როგორცაა კოლხიდა. ძვ. აღმოსავლეთის ისტორიიდან (შუამდინარეთი, ეგვიპტე) ცნობილია, თუ როგორ წარმოებდა იქ საირიგაციო სამუშაოები და რა როლი ითამაშა მან უძველესი სახელმწიფოების წარმოქმნის საქმეში.

მონის შრომის გამოყენებისათვის კარგი პირობები არსებობდა სამთო მოპოვებით წარმოებაში და ხელოსნობაში. არქეოლოგიური მასალისა და წერილობითი წყაროების ჩვენებით ამდროინდელ კოლხიდაში შეიძლებოდა ხელოსნობის მრავალი დარგი მიგვეთითებინა; მართალია, ჩვენ არ ვიცით მათში არსებული შრომის ორგანიზაციის ხასიათი, მაგრამ იქ მონის შრომის გამოყენება დიდ დავას არ უნდა იწვევდეს.

მონური შრომის ხვედრითი წონა მეურნეობაში განსაკუთრებით ელინისტურ ხანაში იზრდება. ეს გარემოება მთელ ელინისტურ აღმოსავლეთში შეინიშნება და, ცხადია, საქართველო მისგან გამონაკლისს

³⁶¹ სტალინი ი. ბ., სოციალიზმის ეკონომიური პრობლემები სსრ კავშირში, თბ., 1953, გვ. 17.

არ წარმოადგენს – იბერიისა და კოლხეთის ტერიტორიაზე შესწავლილი ელინისტური ხანის მატერიალური კულტურის ძეგლები ამის უტყუარი დადასტურებაა. ბაგინეთის, მცხეთის, წიწამურის „სერის“, სარკინეთ-გრძელი ველის, ურბნისის, ვანის და ა.შ. ნაგებობანი ცხადად ადასტურებენ, რომ ამ ძეგლების შემქმნელი საზოგადოებანი იცნობენ არა მარტო ელინისტური ხუროთმოძღვრების მიღწევებს, არამედ შრომის ისეთსავე სახეობას იყენებენ, როგორც ელინისტურ მონარქიებში გამოიყენება – კვადრების ფაქიზად გათლა, აგურის გაკეთება, კრამიტის დამზადება, შემკობა, აშენება, წყალსადენების გაყვანა და მრავალი სხვა დარგი შეიძლება აღინიშნოს, სადაც შეიძლებოდა მონური შრომის გამოყენება. ს. ჯანაშიამ ქართულ ისტორიოგრაფიაში პირველმა მიაწინა იმ განსხვავების ძირითად მიზეზზე, რომელიც მონათფლობელურსა და ფეოდალური ხანის მშენებლობათა ტექნიკას შორის არსებობს – ესაა განსხვავება იმ შრომის ფორმებს შორის, რომლის გამოყენებითაც ხდება მშენებლობა.³⁶² იგივე შეიძლება ითქვას ხელოსნობის დარგებზე და, კერძოდ, კერამიკულ წარმოების პროდუქციაზე: თუ დავაკვირდებით ანტიკური (ელინისტური, რომაული) ხანის კერამიკას (ვლასპარაკობთ კონკრეტულად ქართული მასალით), ვნახავთ, რომ აქ ნივთი დამზადებულია უაღრესი გულმოდგინებით – თიხა გაცრილია კარგად, ფორმები გამოყვანილია გემოვნებით, გამოწვა იმდენად კარგია, რომ საუკუნეების სიგრძეზე წყალში დეცა კი ვერ ახდენს მასზე ზემოქმედებას. ხშირად გამოყენებულია სამკაული; არ არის უცნობი ლაქი და გაპრიალება; კრამიტი ანგობწასმული ან წითლად შეღებილია – ყველაფრიდან ჩანს, რომ მის გამკეთებელს დრო და ძალა არ დაუზოგავს, და არც ჰქონდა დასაზოგი – მონის შრომა მუქთი ან თითქმის მუქთი იყო და ეფექტიც სწორედ მისი უზომო და უანგარიშო ფლანგვით მიიღწეოდა; მეორე მხრივ, თუ დავაკვირდებით ფეოდალური ხანის კერამიკულ ნაწარმს, ვნახავთ უხეშად გაცრილი თიხისაგან ტლანქად შემზადებულ ჭურჭლეულს, კრამიტს და ა.შ., რომლებიც გარეგნულად უფრო ადრეული საფეხურის შთაბეჭდილებას ახდენს, მაგრამ სინამდვილეში იმ საზოგადოების წარმოების პროდუქტია, რომელმაც მონური წარმოების წესს აუგო ანდერძი.

ს. ჯანაშიამ ყურადღება მიაქცია მონების ფართო გამოყენებას ტრანსპორტში, კერძოდ ნაოსნობაში. საქართველოს მდინარეებში ნაოსნობის განვითარება, მისი აზრით, მონური შრომის გამოყენების დაშვებისასაა მხოლოდ გასაგები.

ამგვარად, მონური შრომის გამოყენების შესაძლებლობა არსებობს მეურნეობის მთელ რიგ დარგებში, ხოლო რიგი დარგების არსებობა

³⁶² ჯანაშია ს. ნ. საქართველო ადრინდელი ფეოდალიზაციის გზაზე, შრ. I, 293. შენიშ. 1.

მონური შრომის გამოყენების დაშვებისასაა გასაკები (ფეიქრობა, ფართო მელიორაცია, ნაოსნობა...).

კოლხეთის ბარის მოსახლეობის ძირითად მასას ჩვენთვის საინტერესო ხანაში *თავისუფალი მწარმოებლები*, ე.წ. „თავისუფალი ერი“ შეადგენს. ისინი იმავ დროს ქვეყნის შეიარაღებულ ძალასაც წარმოადგენენ. სტრაბონი იბერიაში ასეთსავე სოციალურ ფენას „მომრებსა და მიწათმოქმედთ“ უწოდებს.³⁶³ საზოგადოების ამ ნაწილისაგან გამოიყოფა, ერთი მხრივ, არათავისუფალთა ფენა, მეორე მხრივ – ჯერ მონათმფლობელური არისტოკრატია, ხოლო გვიან – ფეოდალური საზოგადოების ზედა ფენა.³⁶⁴ ეს იყო კოლხური საზოგადოების ის ნაწილი, რომელთანაც გვაროვნულობის ნიშნები ყველაზე მეტად და ყველაზე ღიბხანს, თვით ფეოდალიზმის საბოლოო გამარჯვებამდე იყო შემონახული. ეს ის ფენაა, რომელზეც მოცემული საზოგადოების ისტორიის მსვლელობა ყველაზე უკეთაა ასახული და რომლის წიაღშიც იშვა ყველა ის საზოგადოებრივი ჯგუფი, რომლებიც აქ მოცემულ თუ შემდგომ ხანაშია დადასტურებული.³⁶⁵ ძვ. წ. VI საუკუნიდან I საუკუნემდე ერის აღნაგობაში ღრმა ცვლილებები უნდა მომხდარიყო, რომლის შესახებ საუბარს იქ გავაგრძელებთ, სადაც ფეოდალიზმის გენეზისის საკითხს განვიხილავთ.

კოლხური საზოგადოების ერთ ფენას უშუალო მწარმოებელთა ის ჯგუფი წარმოადგენდა, რომელსაც ელინისტურ ხანაში *λαιοί* ეწოდებოდათ. იქ ისინი დამოკიდებულ გლეხობას შეადგენდნენ. ძვ. წ. II საუკუნის დამდეგისათვის ასეთი ფენა დადასტურებულია იბერიისათვის, ხოლო ს. ჯანაშიას მიერ მოცემული მითითებების თანახმად, ამ ცნობის მიყენება იმდროინდელ კოლხურ საზოგადოებაზეც შეიძლება. კოლხური და იბერული საზოგადოებების ადრინდელი და შემდგომი მდგომარეობის გათვალისწინებით თამამად შეიძლება ითქვას, რომ ჩვენთვის საინტერესო ხანაშიც მათ შორის სოციალური მდგომარეობის მხრივ ღიბი განსხვავება არ უნდა ყოფილიყო. *λαιοί*-ის, როგორც სოციალური ჯგუფების არსებობა, დადასტურებულია როგორც მცირე აზიაში (ეპიგრაფიული მასალები და წერილობითი წყაროები), ისე იბერიაში (სტრაბონის ცნობა). ორივეგან ისინი სამეფო გვარეულობის

³⁶³ Strab., XI, 3, §6, SC, I, 140. τρίτον δὲ τὸ τῶν στρατευομένων καὶ γεωργούντων... მესამე (ΥἼΝΟC) არის მხედართა და მიწათმოქმედთა... (თ. ყაუხჩიშვილი) ... მესამე – მეომრებისა და მიწათმოქმედთაგან ... (ს.ნ. ჯანაშია)

³⁶⁴ ჯანაშია ს., ადრეული ფეოდალიზმი, შრ. II, 174.

³⁶⁵ იქვე, 163-164.

საკუთრებაა.³⁶⁶ ს. ჯანაშია ვრცლად შეეხო $\lambda\alpha\sigma\iota$ -ის საკითხს. მანვე დააყენა მათი წარმოშობის გზების საკითხიც. მისი აზრით, ასეთ დამოკიდებულებაში მყოფი ფენის გაჩენა შეიძლება სამი გზით მომხდარიყო. „1. სოციალური დიფერენციაციის შედეგად „ყოველი ერიდან“ გამოყოფა. ამ კონკრეტულ შემთხვევაში დასახელებულ გზას ჩვენ უარყოფთ, ვინაიდან ამ პროცესის შედეგად „მდაბიო ხალხი“, უწინარეს ყოვლისა, ტაძრების ყმებად უნდა ქცულიყო, და არა მარტო სამეფო სახლისა, როგორც გადმოგვცემს სტრაბონი. რამდენადმე გაუგებარი იქნებოდა აგრეთვე „მესამე გენეს“ მოცემული ხასიათი; 2. მეფის მონების მიწაზე დასმა. ეს სავსებით შესაძლებელია, მხოლოდ არ მოგვეპოვება საკმაო საბუთი; 3. უცხო თემების დაპყრობა კლასობრივად საკმაოდ დიფერენცირებული საზოგადოების ხელისუფლების მიერ, დაპყრობილ თემთა მიწების სამეფო ფონდში გადარიცხვა და ამ ნიადაგზე თვით დამპყრობელთა ჩაყენება ყმურ მდგომარეობაში მეფის, როგორც სამხედრო ხელისუფლების უზენაესი წარმომადგენლისა და დასახელებული მიწის ფონდის უზენაესი პატრონის, მიმართ. ჩვენ უფრო ამ შესაძლებლობისაკენ ვიხრებით...“³⁶⁷ ასეთია ს. ჯანაშიას დასკვნა. ამ საკითხზე ძიებისას საჭიროა მხედველობაში იქნეს მიღებული თვით $\lambda\alpha\sigma\iota$ -ის ინსტიტუტის ბუნება. როგორც მცირე აზიაში,³⁶⁸ ისე იბერიაში $\lambda\alpha\sigma\iota$ მხოლოდ სამეფო საკუთრებად ითვლებიან.³⁶⁹ ამავე დროს იქაც³⁷⁰ და აქაც³⁷¹ ისინი გვაროვნულად ფლობენ ქონებას. უკანასკნელი გარემოება გადამწყვეტად უნდა იქნას მიჩნეული მათი წარმომავლობის ძიებისას. აქედან გამომდინარე, ჩვენ უნდა უარყოფთ, თითქოს მათი წარმოშობა მეფის მონების მიწაზე დასმასთან იყოს რაიმე კავშირში. მიწაზე დამჯდარ მონებს, ცხადია, გვაროვნული საკუთრება მიწაზე არ შეეძლოთ ჰქონოდათ. მათ არ შეიძლება ჰქონოდათ, აგრეთვე, გვაროვნული ინსტიტუტები (სახალხო კრება), ხოლო ელინისტურ აღმოსავლეთში არსებული $\lambda\alpha\sigma\iota$ მიმაგრებული არიან თავიანთი მიწის ნაკვეთებზე $\iota\delta\iota\alpha$ -ზე; ეს $\iota\delta\iota\alpha$, ა. ზ. რანოვიჩის აზრით, ძველი თემური საკუთრების გადმონაშთია.³⁷² უკვე ელინისტურ ხანაშივე იწყება თავის $\iota\delta\iota\alpha$ -ზე მიმაგრებული $\lambda\alpha\sigma\iota$ -ის ლტოლვა მიწიდან და

³⁶⁶ ჯანაშია ს., საქართველო ადრინდელი ფეოდალიზმის გზაზე, 150; ფეოდალური ურთიერთობის წარმოშობისათვის საქართველოში, 140; ადრეული ფეოდალიზმი, 161 და შემდ., Ранович А. Б. დას. ნაშრ., 147 და შემდ.

³⁶⁷ ჯანაშია ს., ადრეული ფეოდალიზმი, 166-167.

³⁶⁸ Ранович, იქვე, 147 და შემდ.

³⁶⁹ Strab., იქვე; ს. ჯანაშია, იქვე.

³⁷⁰ Ранович, იქვე, 155

³⁷¹ Strab., იქვე; ს. ჯანაშია, იქვე.

³⁷² Ранович, იქვე, 155.

უკვე ანტიოქოზ I-ის დროსვე იხსენიებიან **λαιοί**, რომლებიც საკუთარი **ἰδία**-საგან მოწყვეტილად ცხოვრობენ.³⁷³ ამგვარად, რჩება ერთადერთი გზა **λαιοί** წარმოსაქმნელად: „უცხო თემების დაპყრობა კლასობრივად დიფერენცირებული საზოგადოების ხელისუფლების მიერ...“ მაგრამ ეს არ არის ერთადერთი გზა ასეთი სოციალური კატეგორიის წარმოშობისათვის. აქ საქმე მხოლოდ დაპყრობებამდეა დაყვანილი. მართალია, დაპყრობების გზით შეიძლება მოხდეს ასეთი რამ, მაგრამ ასეთი ურთიერთობის წარმოშობის საფუძველია, როგორც ს. ნ. ჯანაშიამ მიუთითა, საკუთრება მიწაზე. ელინისტურ მცირე აზიაში (და საერთოდ, აღმოსავლეთში) მიწის უზენაესი მესაკუთრე მეფეა, ხოლო **λαιοί** მეფისაგან დამოკიდებულ ურთიერთობაში მყოფი მეთემეები ჩანან.³⁷⁴ ასეთ დამოკიდებულებაში შეიძლებოდა აღმოჩენილიყო არა მარტო დაპყრობილი თემების მოსახლეობა, არამედ ყველა, ვინც მიწაზე ნაკლოვანებას გრძნობდა და სარგებლობისათვის მფლობელობაში იღებდა მიწის ნაკვეთს სამეფო საგვარეულოს ფონდიდან. ასეთად შეიძლება გამოსულიყო, როგორც თავისუფალი თანამეტომე თუ თანამეთემე, ისე უცხოც. განსაკუთრებით დიდი უნდა ყოფილიყო ამათში მთის ნაჭარბი მოსახლეობა. შესაძლებელია, ჩვენთვის საინტერესო ხანაში ხდებოდა არა ოჯახებად ჩამოსვლა ბარში, არამედ გვარებად ან გვარის განაყოფებად. ეს მცირე უჯრედები ესახლებიან სამეფო მიწაზე, თავისთვის განაგრძობენ თემური წესით ცხოვრებას, მთიდან რომ ჩამოიტანეს, ხოლო მეფისადმი, მიწით სარგებლობისათვის, გარკვეულ ვალდებულებებს კისრულობენ როგორც ნატურით, ისე ფულად და სამსახურით (სამხედრო ძალა, პირადი მცველები). და ბოლოს, **λαιοί**-ს რიცხვი შეიძლება გაიზარდოს ბუნებრივი გამრავლების გზით. როგორც ს. ჯანაშიამ უჩვენა, **λαιοί** შემდგომ განვითარებაში უკვე ფეოდალიზმის ხანის ყმას იძლევა.³⁷⁵ **λαιοί**-ს, როგორც სოციალური კატეგორიის ჩამოყალიბების პროცესის დასაწყისი, პირადად იმ ეპოქაში მაქვს ნაგულისხმევი, როდესაც კოლხთა ტომი იწყებს სამხრეთ-დასავლეთ და დასავლეთ საქართველოს ერთ პოლიტიკურ ერთეულში გაერთიანებას და ქმნის კოლხას გაერთიანებას, რომლის სიძლიერე ძვ. წ. VIII საუკუნისათვის დოკუმენტურად დადასტურებული ფაქტია. ცხადია, თავდაპირველად ეს დამოკიდებულება არ იყო ისე მძიმე, როგორც ის ელინისტურ ხანაში გვაქვს დადასტურებული, მაგრამ თანდათანობით, სამეფო ხელისუფლების გაძლიერების, აპარატის

³⁷³ იქვე, 156. შენიშ. 1.

³⁷⁴ მეფისაგან დამოკიდებული მეთემეები არიან იბერიის **λαιοί**-ც.

³⁷⁵ ჯანაშია ს. ნ., საქართველო აღრინდელი ფეოდალიზაციის გზაზე, 170-171.

გამრავლარიცხოვანების, სამეფო საგვარეულოს რიცხოვრივი ზრდის, ალებ-მიცემობის გაცხოველებისა და რიგი ეკონომიური თუ პოლიტიკური ფაქტორების ზეგავლენით ექსპლუატაციის ხარისხი თანდათან იზრდება. $\lambda\sigma\iota$ თავისი უფლებებისათვის ბრძოლაში, როგორც ჩანს, იყენებს თავის თემურ ინსტიტუტებს, ხოლო როდესაც და სადაც მისი მდგომარეობა აუტანელი ხდება, იგი სარგებლობს თავისი ნახევრად-თავისუფალი მდგომარეობით და ტოვებს იმ ობიექტს ($\iota\delta\iota\alpha$), რომელიც მისი დაკაბალების საფუძველია. უნდა ვიფიქროთ, რომ თვით $\lambda\sigma\iota$ შიგნით კიდევ გაიყოფებოდნენ რიგ კატეგორიებად (ძალით დაპყრობილი, ნებით შესული, ნასყიდი და ა.შ.).

სტრაბონის ცნობით, იბერიის საზოგადოებაში ერთ-ერთ გაბატონებულ ფენას ქურუმები შეადგენდნენ. მათ (მეფის საგვარეულოს წევრების შემდეგ) ქვეყანაში მეორე ადგილი ჰკავებიათ და მეზობლებთან სადავო საქმეების მოწესრიგება სდებიათ ვალად. ს. ჯანაშიამ ფაქტობრივ მასალებზე დაყრდნობით უჩვენა, რომ ქურუმთა ბატონობას, მოცემულ ხანაში, კოლხიდაშიც უნდა ჰქონოდა საფუძველი. აღნიშნული სოციალური კატეგორიის წარმოშობა ქართულ სინამდვილეში ჯერ კიდევ თემური წყობილების წიაღში იწყება და თანდათანობით იგი კლასობრივ გაფორმებას იღებს. განვითარების ამ ხაზის წარმოსადგენად ძვირფას მასალას იძლევა ქართველ ტომთა ეთნოგრაფიის სინამდვილეში დაცული გადმონაშთები. მაგრამ სანამ ამ მასალას გავიცნობდეთ, მანამ უნდა შევნიშნოთ, რომ ქურუმების პოლიტიკური სიძლიერე მათი ეკონომიური სიძლიერითაა შეპირობებული და მას ეყრდნობა. გვიან, ქრისტიანობის გაბატონების ხანაში, ქურუმთა კლასის წინააღმდეგ გადამწყვეტი დარტყმა სწორედ ეკონომიურ სფეროში იქნა მიყენებული, რის შემდეგ ისინი წელში ვეღარ გასწორდნენ.

ქართულ ეთნოგრაფიულ მასალებზე დაკვირვება ცხადყოფს, რომ წარმართული სალოცავების მსახურები აქ დიდი ავტორიტეტით სარგებლობენ, ხოლო სალოცავები დიდი ადგილ-მამულის მფლობელები არიან. რამდენადაც კოლხური საზოგადოება უფრო ახლოს ძველ-აღმოსავლურ საზოგადოებებთან უნდა მდგარიყო, ამიტომ ეთნოგრაფიული ანალოგიებისათვის უფრო ის მასალები უნდა გამოვიყენოთ, რომლებიც იმ ტომებს ეხება, რომელთა ინსტიტუტები სიახლოვეს სწორედ ძველ-აღმოსავლურ საზოგადოებათა შესაბამის ინსტიტუტებთან იჩენს. როგორც ვ. ბარდაველიძემ გამოარკვია, ერთ-ერთ ასეთ უჯრედად ხევსურული თემი წარმოგვიდგება, რომელიც თავისი ბუნებით, სიდიდით, მიწათმფლობელობისა და მეურნეობის ფორმებით, სტრუქტურით და სამოხელეო ინსტიტუტებით, ყველაზე მეტად ძველ-აღმოსავლურ საზოგადოებათა შესაბამის ინსტიტუტებს უახლოვ-

დება.³⁷⁶ „ხევსურული თემის მახასიათებელ მხარეს შეადგენდა ის, რომ თითოეული მათგანის ცენტრში მოთავსებული იყო **ჯვარი** სათემო ღვთაების საკულტო და სამეურნეო ნაგებობათა სახით, * რომელიც საერო და სასულიერო ხელისუფლების თავყრილობის ადგილს შეადგენდა...³⁷⁷ თემის მოსახლეობა სათემო მიწაზე იჯდა, რომელიც არა მარტო ამ ქართველი ეთნიკური ერთეულის ცხოვრების ჩვენთვის საინტერესო ხანაში, არამედ გაცილებით უფრო ადრეც გაგებული უნდა ყოფილიყო, როგორც თემის ერთობლიობის განმასახიერებელი ჯვარის საკუთრება.“³⁷⁸ თემში ორგვარი მიწებია დადასტურებული: თემის მიწები და ჯვარის მიწები. თემის თეოკრატიულ ხელისუფლებას „ჯვარიონი“ ეწოდება, საიდანაც აირჩევა თემის უმაღლესი ხელისუფლება. ხოლო თემის მეორე ძირითად ნაწილს, რომელიც რიცხობრივად უმრავლესობას შეადგენს, „ერისგანნი“ ეწოდებათ. ჩვენ მოცემულ შემთხვევაში „ჯვარიონი“ გვანტერესებს. როგორც აღვნიშნეთ, ჯვარიონიდან აირჩევა თემის უმაღლესი სასულიერო ხელისუფალი და, აგრეთვე, „ჯვარის მეენე“. ისინი ამავე დროს ითვლებიან სათემო ჯვარის მთავარ ქურუმებადაც. თემის უფროსს ხუცი ეწოდება, ხოლო ზოგიერთი მსხვილი თემის უფროსი ხევისბერის სახელს ატარებს. ზოგიერთ მსხვილ თემში ხუცების რიცხვი 4-მდე აღიოდა, რომელთაგან ერთი თავ-მორიგე იყო. „თავ-მორიგეთა“ (ე. ი. თემის უფროსისა და ჯვარის მეენის) ხელისუფლება მუდმივი, ხოლო მათი თანამდებობა რიგ თემებში მემკვიდრეობითი იყო...³⁷⁹ ხუცესი წარმოადგენდა თემის საერო და სასულიერო ხელმძღვანელს. ამავე დროს იგი სათემო ჯვარის მთელი მეურნეობის გამგებელია და ყველგან ხელი მიუწვდება. ჯვარი თემის მასშტაბით მსხვილი მამულების მფლობელია, რომელზეც ძირითად მწარმოებლად „ერისგანნი“ გვევლინებიან.³⁸⁰ ქურუმთა შემდგომი გაძლიერება კოლხეთის სინამდვილეში ჩვენ პოლიტიკური ამბების შემდგომ განვითარებასთან კავშირში გვაქვს წარმოდგენილი: ის ხანა, როდესაც იწყება ბრძოლა თემების ტომებად გაერთიანებისათვის, ხასიათდება ძველი თემის სალოცავების გავლენების გაფართოებით; ეს განსაკუთრებით გამარჯვებული თემის სალოცავს შეეხება. შემდგომი ხანა უკვე ტომობრივ გაერთიანებათა წარმოებას იძლევა. ამ

³⁷⁶ ბარდაველიძე ვ., ხევსურული თემი, საქართველოს სსრ მეცნიერებათა აკადემიის მოამბე, ტ. XIII, №8, 495-502. XIII, №10, 623-630.

* მცირეაზიური თემებიც თავმოყრილია თავიანთი სალოცავების გარშემო. იხ. Ранович, იქვე, 156.

³⁷⁷ იქვე, 497.

³⁷⁸ იქვე, 623-624.

³⁷⁹ ბარდაველიძე ვ., ხევსურული თემი, საქართველოს სსრ მეცნიერებათა აკადემიის მოამბე, ტ. XIII, 626.

³⁸⁰ იქვე, 625.

ხანაში გამარჯვებული ტომის მთავარი სალოცავი შეიძლება მთელი პოლიტიკური გაერთიანების სალოცავი გახდეს (ასირიის ამური, იბერიის არმაზი და ა.შ.), მაგრამ ერთი რომელიმე სალოცავის უზენაესობის აღიარება არ ნიშნავს სხვა სალოცავების მოსპობას. ახალწარმოქმნილი პოლიტიკური გაერთიანების ღვთაებათა პანთეონი შედგება არა მარტო გამარჯვებული ტომის კერპებისაგან, არამედ იგი შეივსება დამორჩილებული ტომებისა და თემების ღვთაებებით, რომლებიც ეგუებიან ახალ ვითარებას, ხოლო მათი მსახურები გამარჯვებული ტომის სალოცავების მსახურთა გვერდით საპატრიო ადგილს იჭერენ. და ბოლოს, პოლიტიკური ერთობის დიდი ტრადიციების პირობებში დავიწყებას ეძლევა, თუ რომელი ღვთაება-სალოცავია გამარჯვებული ტომის და რომელი – დამარცხებულის. სალოცავის მსახურნი პოლიტიკურ გაერთიანებათა წარმოქმნებში თავიანთ შემდგომი გაძლიერება-გამდიდრების წყაროს ხედავენ, რაც სალოცავისათვის ახალდაპყრობილი მიწის ფონდის ნაწილის, განძის, მონების შეწირვაში შეიძლება გამოიხატებოდეს. სწორედ ეკონომიურ ნიადაგზე იბეზება ამ ხანაში კავშირი საერო ხელისუფლებასა და ტაძრის მსახურებს შორის, ხოლო შემდეგში, როდესაც ტაძრები მონებისა და დიდი სიძლიერის მფლობელები ხდებიან, საერო ხელისუფლების სიძლიერე მათთვის კვლავ აუცილებელი გარემოებაა, რაც მათ სამეფო ხელისუფლების დასაყრდენ ძალად აქცევს. უკვე ელინისტური ხანის მცირე აზიაში ტაძრები და მისი ქურუმები უდიდესი მაწათმფლობელ-მონათმფლობელები არიან. ამ მხრივ განსაკუთრებით ბევრ მასალას იძლევა სტრაბონი. იგი აღმოგვცემს, რომ ღვთაება მა-ს ტაძარს ქ. კომანაში ჩემი იქ ყოფნის დროს 6000 მონა ჰყავდა ორივე სქესისო. ტაძარს დიდი მამული ჰქონია, რომლის შემოსავლითაც ქურუმი სარგებლობს, რომელიც მეფის შემდეგ მეორე პირი ყოფილა კაპადოკიაში.³⁸¹ ზევსის ტაძარს ვენაზში ჰყოლია 3000 სატაძრო მონა და დიდი მამული, რომლის შემოსავალი 15 ტალანტს აძლევდა ქურუმს³⁸² და ა.შ. მცირე აზიური ტაძრები თავიანთ მიწებს ამუშავებენ როგორც „თავისუფალი“ მოსახლეობის, ისე მონების გამოყენებით.³⁸³ სტრაბონი გზადაგზა იძლევა ცნობებს სხვა ქვეყნებში მდებარე სალოცავებზეც. კერძოდ, იგი გვაცნობებს, რომ კოლხეთის მესხეთში ყოფილა ლევკოთეას საკურთხეველი, რომელიც ძვ. წ. I საუკუნის მეორე ნახევარში ორჯერ გაძარცვულა – ჯერ ფარნაკის, ხოლო შემდეგ პოლემონ პონტოელის მიერ.³⁸⁴ ამ ცნობაზე დაყრდნობით ს. ჯანაშიამ მიუთითა, რომ ქუ-

³⁸¹ Strab., XII, 2, §3. SC, I.

³⁸² იქვე, §5.

³⁸³ XII, 2, §3. SC, I.

³⁸⁴ იქვე, XI, 2, §17, SC, I, 137.

რუმების გავლენა კოლხიდაშიც ძლიერი უნდა ყოფილიყო. აქაური ტაძრების სიმდიდრეზე გვითითებს ის გარემოება, რომ ისინი მეზობელი ქვეყნების მეფეთა ყურადღების (მარცვის) საგანი ხდება. ქურუმთა შემდგომი ევოლუცია ქვემოთ იქნება განხილული, მაგრამ აქ დასკვნის სახით უნდა ვთქვათ, რომ მათი განვითარება, რომელიც ჯერ კიდევ გვაროვნულობის ადრეულ საფეხურებზე იწყება, ძვ. წ. I საუკუნის იბერიასა და კოლხეთში სავსებით დასრულებულია და იწყება მისი დაღმასვლა, იწყება ისეთი სოციალური ძალების წარმოქმნა, რომელთა განვითარებისათვის სატაძრო საკუთრება და ქურუმების არსებობა შემაფერხებელის როლს ასრულებს.

* * *

სტრაბონის მიერ მოცემული იბერიის საზოგადოების აღწერილობიდან ჩანს, რომ მისი წყაროს დროისათვის იბერიაში რაღაც განსაკუთრებული სახის სამეფო ინსტიტუტი არსებულა. ნ. ა. ბერძენიშვილმა პირველმა დაასაბუთა, რომ სტრაბონის მიერ მოცემული იბერიის მეფე შეუსაბამობაშია სხვა წყაროებით ცნობილ იმდროინდელი იბერიის მეფესთან და ანტიკურ ლიტერატურაში დაცული ამ ცნობების შეთანხმება შეუძლებელია (ერთის მხრივ – სტრაბონი, ხოლო მეორე მხრივ დიონ კასიუსი, ტაციტი) „...ან სტრაბონი მის დრომდის რაღაც დიდი ხნის წინ არსებულ მდგომარეობას გადმოგვცემს, ან კიდევ შეცდომაში შეიყვანეს ზეპირად ცნობების მიმწოდებლებმა“.³⁸⁵ თუ გადავხედავთ ანტიკურ ლიტერატურულ ცნობებს ქართველურ ტომებზე, დავინახავთ, რომ სტრაბონის იბერიის მეფე ყველაზე ახლოს მოსინიკების მეფეს უახლოვდება – ორივე, თითქმის ერთნაირად, უშინაარსო სახელის მატარებლები არიან. მათ მხოლოდ ის განასხვავებს, რომ იბერიის მეფე პირადად თავისუფალია, ხოლო მოსინიკების მეფე ჩაკეტილია და დაცვის (იძულებითი) ქვეშ ცხოვრობს. ისეთი ინსტიტუტი, როგორც მოსინიკებშია, ალბათ, სხვა ქართულ ტომებსაც ექნებოდათ, რომელიც აღწერილი იყო რომელიმე ჩვენამდე მოუღწეველ შრომაში, რომელსაც სტრაბონი ბრმად ეყრდნობოდა. სტრაბონის მიერ იბერიის საზოგადოების აღწერილობა, ჩანს, ლიტერატურული გადამუშავების ნაყოფია – იგი ერთი რომელიმე წყაროდან კი არ მომდინარეობს, არამედ აქ შენაჯამებია ცნობები, რომლებიც აღმოსავლურ-ქართულ გაერთიანებაზე არსებობდა, რის გამოც ერთ კონტექსტში მოხვედრილია სხვადასხვა ეპოქის ამსახველი ცნობები. რეალურ მდგომარეობას არ შეესაბამება არა მარტო იბერიის

³⁸⁵ ბერძენიშვილი ნ. ა., ჯანაშია ს., საქართველო ადრინდელი ფეოდალიზაციის გზაზე, „მიმოხილველი“, III, თბ., 1953, 293 და შმდგ.

ბასილევსი, არამედ, როგორც ნ. ბერძენიშვილმა აჩვენა, ქურუმთა მდგომარეობაც. სტრაბონის ხანის იბერიაში ქურუმების ხელში აღარაა მეზობლებთან სადავო საქმეების მოწესრიგება; ამავე დროს აღარც მეფის შემდეგ „მეორე პირი“ ჩანს უკვე, რომელიც მოსამართლეობდა და მხედართმთავრობდა. პირველი საუკუნის იბერიაში ყველა ეს ფუნქცია უკვე მეფის ხელში ჩანს გაერთიანებული.³⁸⁶ ამგვარად, კვლავ დგება სტრაბონის ამ ცნობის თარიღის საკითხი: ივ. ჯავახიშვილის აზრით, აქ ძვ. წ. I საუკუნის დამლევის სურათია მოცემული.³⁸⁷ ს. ჯანაშია სტრაბონის წყაროს ძვ. წ. I საუკუნის დამდეგით ათარიღებს,³⁸⁸ ი. მანანდიანის აზრით, აქ ახ. წ. I საუკუნის დამდეგის საზოგადოებაა ასახული,³⁸⁹ ა. ბოლტუნოვას ეს ცნობა პოსიდონიოსის (ძვ. წ. 140-57 წწ.) „ისტორიიდან“ მომდინარედ მიაჩნია,³⁹⁰ ხოლო თ. ყაუხჩიშვილი ეთანხმება იმ მკვლევართ, რომლებიც სტრაბონის ამ ცნობის წყაროს ძვ. წ. II საუკუნის 40-30-იანი წლებით ათარიღებენ.³⁹¹ როგორც აღვნიშნეთ, სტრაბონის „იბერიის მეფე“ გაუგებარია I საუკუნის იბერიისათვის, ამასვე ადასტურებს მცხეთის არქეოლოგიური ექსპედიციის ეპიგრაფიკული მასალები, სადაც იბერთა „დიდი მეფეც“ იხსენიება. „ანაბასისში“ დაცული ცნობა და რიგი ეთნოგრაფიული მასალები ცხადყოფს, რომ უაღრესად შეზღუდული საერო ხელისუფლება ქართული სინამდვილისათვის უცხო არ არის, მაგრამ მოსინიკების „ბაზილევსის“ ევოლუცია ვერ მოგვცემს იბერების რეალურ მეფეს. უფრო შესაძლებელია მოსინიკების „არქონტი“ განვითარდეს ისეთ მეფედ, როგორც არტოკი, ფარსმანი და სხვანია, ვიდრე კოშკში გამოკეტილი ტომის ბელადი, რომელიც ქსენოფონტს მეფედ ყავს მოხსენიებული. ელინისტური ხანის იბერიაში ასეთი მეფე არ შეიძლებოდა არსებობდა. იგი კლასობრივ საზოგადოებაში არც არის გასაგები, ამიტომ ასეთი მეფე არც ერთ კლასობრივ საზოგადოებაში ჯერ დადასტურებული არ არის, რის გამოც ან სტრაბონის ცნობის ამ ნაწილის თარიღი უნდა გადავწიოთ ძვ. წ. აღ. VI-V საუკუნის იქით, ან ვაღიაროთ, რომ იბერიის მთიანეთის რომელიმე ტომში მაშინ (სტრაბონის წყაროს ხანაში) არსებობდა ისეთი „ხელისუფალი“, რო-

³⁸⁶ იქვე, 296.

³⁸⁷ ქართული სამართლის ისტორია, I, თბ., 1928, 137 და შ.

³⁸⁸ ჯანაშია ს., ფეოდალური ურთიერთობის წარმოშობისათვის საქართველოში, შრ. II, 137 და სხვა შრომები.

³⁸⁹ Манандян Я., Заметки о феодальном войске Парфии и аршакидской Армении, Ер., 1932, 15-17.

³⁹⁰ Болтунова А., Описание Иберии в «Географии» Страбона XI, 1-6, ВДИ, 1947, №4, стр. 159.

³⁹¹ ყაუხჩიშვილი თ., ὕψος ტერმინის მნიშვნელობისათვის სტრაბონთან, „მიმოხილველი“, III, 248.

გორიც იქაა აღწერილი. მე უფრო იმ აზრისაკენ ვიხრები, რომ ამ ცნობაში (მთლიანად აღებულში) ავტორის მიერ თვითნებურად სხვადასხვა ხანის და იქნებ სხვადასხვა ეთნიკური უჯრედის შესახებ ცნობებია გაერთიანებული. ჩვენ შორს გავყევით სტრაბონის ცნობას, რაც არცთუ ძალიან აუცილებელი იყო ჩვენი მიზნისათვის. იმავე ხანის სხვა ავტორებისა და მასალების ჩვენებებიდან ირკვევა, რომ იბერიაში იმ დროს კლასობრივი საზოგადოება გვაქვს წარმოდგენილი, განვითარებული სახელმწიფო აპარატით (მეფე, დიდი და მცირე ერისთავები (პიტიანშები), ეზოს მოძღვარი (ეპიტროპი) და ა.შ.).

სოციალური მდგომარეობის მხრივ ასეთივე ვითარება გვაქვს წარმოდგენილი კოლხეთშიც. დაცული ცნობებით, კოლხეთის სამეფოსა და სამეფო ხელისუფლების ჩამოყალიბება ადრე იწყება. ყოველ შემთხვევაში, ჩვენი წარმოდგენით, ძვ. წ. VIII-VII საუკუნეებში კოლხიდის ბარში და სამხრეთ-დასავლეთ საქართველოს რიგ დაწინაურებულ რაიონებში, რომლებიც ერთ პოლიტიკურ გაერთიანებაში შედიან, უკვე გადამწყვეტი მომენტი დამდგარა. ჩვენი მოსაზრება იმ სურათს ემყარება, სადაც მოვლენები, ჩვენის აზრით, ერთმანეთთან ლოგიკურად გამომდინარეობენ და ახსნას პოულობენ ეთნოგრაფიული მასალებით. ძვ. წ. II და I ათასწლეულის მიჯნაზე სამხრეთ-დასავლეთ საქართველოს ტერიტორიაზე მტკვრის სათავეების რაიონში არსებობს ეკონომიურად დაწინაურებული ტომი კოლხები, რომელშიც უკვე გვაროვნული არისტოკრატია გამოყოფილად უნდა ვიგულისხმოდ (შეადარეთ მასალები ურარტული, ასირიული და ხეთური ეპიგრაფიკიდან), მაგრამ კლასობრივამდე საზოგადოებას ჯერ კიდევ ბევრი აკლია. ამ დროისათვის ეს ტომი შეიძლება დაიანის სამეფოს (ა/კავკასიის უძლიერესი გაერთიანება) შემადგენლობაში ვიგულისხმოდ.³⁹² მაგრამ, ჩანს, იგი სარგებლობს (ძვ. წ. IX ს.) დაიანის და ასირიის ომებითა და ახერხებს თავისუფლების მოპოვებას. აქედან იწყება მისი გაძლიერების ხანა, კოლ-ების (კოლ-ხი) ტომი ახერხებს მეზობელი ტომების თანდათანობით დამორჩილებას და დაიანის ჩრდილო-დასავლეთით დიდი პოლიტიკური გაერთიანების წარმოქმნას. გ. მელიქიშვილი შენიშვნით, „არის იმის ნიშნები, რომ უკვე ძველ აღმოსავლურ ხანაში უნდა დაწყებულიყო დიაუხის დიდი გაერთიანების ტერიტორიაზე ჰეგემონობის გადასვლა ხურიტული ელემენტიდან დასავლურ-ქართული წარმოშობის ტომების ხელში, რომლებშიც შემდეგ ამ ადგილებში მცხოვრები ხურიტული მოსახლეობა გაითქვიფა.“³⁹³ ძვ. წ. IX საუკუნის შუახანებში კულხა-კოლხა გაერთიანება იერთებს

³⁹² მელიქიშვილი გ., ურარტუ, 141; მისივე, უძველესი სამეფო სამხრეთ საქართველოს ტერიტორიაზე, „მომხილველი“, II, თბ., 1951, 216.

³⁹³ იქვე, 141-142.

ურარტელების მიერ განადგურებული დიაუხის (დაიაენის) ტერიტორიის ნაწილს (ხუშა-ნის ქვეყანა); იწყება ბრძოლა კოლხას გაერთიანებასა და ურარტელებს შორის, მაგრამ ასირიის ახალი გაძლიერება და სარგონ II-ის ლაშქრობები ურარტუში, უკანასკნელთა ყურადღებას აცილებს კოლხასთან ბრძოლას, სარგონ II-ის ლაშქრობების შემდეგ ურარტუ წელში ველარ გაიმართა, რაც კოლხას სამეფოს ძლიერებისათვის საუკეთესო ტაროსს ჰქმნის.³⁹⁴ VIII-VII საუკუნე გაერთიანების ძლიერება-გაფურჩქვნის ხანაა. იგი სამხრეთ-დასავლეთ საქართველოს უდიდესი და უძლიერესი პოლიტიკური გაერთიანებაა. ცხადია, მას ჰყავს თავისი პოლიტიკური აპარატი – პირველ ყოვლისა, სამეფო დინასტია, რომელიც ტომის ბელადის ბუნებრივი განვითარებითაა წარმოქმნილი: განვითარების უძველეს სტადიაზე მტკვრის სათავეებში მოსახლე ერთ-ერთი თემი ახერხებს კოლას ტომის თემებზე გაბატონებას. ამ ტომის ბელადი იწყებს ბრძოლას მეზობელი ტომების გაერთიანებისათვის და, როგორც ჩანს, საკმაო წარმატებითაც. მის მიერ ახალ-ახალი ტომების დაპყრობა ზრდის მის როგორც ეკონომიურ შესაძლებლობას, ისე პოლიტიკურ წონას. ძვ. წ. II-I ათასწლეულის მიჯნაზე იგი უკვე საკმაოდ ძლიერი გაერთიანების – დიაუხის სამეფოშია ისევ, მაგრამ ორი საუკუნის შემდეგ იგი სამხრეთ-დასავლეთ ა/კავკასიის უძლიერესი და უდიდესი პოლიტიკური გაერთიანების ჰეგემონია და ურარტუს მეფეების (განსაკუთრებით სარდური II-ის, 760-730 წწ.) ღირსეულ მოწინააღმდეგედ გამოდის. ასეთ დიდ გაერთიანებას, რომელმაც თავისი პოლიტიკური დამოუკიდებლობა ძვ. წ. I საუკუნემდე შემოინახა, ცხადია, გააჩნდა თავისი სახელმწიფო აპარატი. ასეთი დიდი პოლიტიკური ერთეულის მეფის მიერ უაპარატო გაძლოლა წარმოუდგენელია. აქ ჩვენ მივაღწეით კოლხიდაში სახელმწიფოს წარმოშობის საკითხს. VIII-VII საუკუნე კოლხას არა მარტო ბრწყინვალე ეკონომიური და პოლიტიკური განვითარების ხანაა, არამედ იგი, აგრეთვე, სოციალური ძვრების ხანაცაა. როგორც ზემოთ ვაჩვენეთ, უკვე VI საუკუნისათვის კოლხიდაში მონური შრომის საკმაოდ ფართო გამოყენებას აქვს ადგილი, იმავე დროს უკვე ჩამოყალიბებულია ქურუშთა ფენა და სამეფო საგვარეულო. სახელმწიფოს საჭიროება ძვ. წ. VI საუკუნიდან შეპირობებულია არა მარტო საგარეო, არამედ საშინაო განვითარებითაც. რა ფუნქციები უნდა ჰქონოდა VI საუკუნის კოლხურ სახელმწიფოს? კოლხას გაერთიანება, ცხადია, არ წარმოადგენდა იმ ტომთა ორგანულ გაერთიანებას, რომლებიც მასში შედიან. ტომებს შენარჩუნებული აქვთ დამახასიათებლობანი და ინსტიტუტები, მაგრამ ახლა ისინი გარკვეული

³⁹⁴ მელიქიშვილი გ., ურარტუ, 142.

ვალდებულებებით არიან დაკავშირებული გაერთიანების პოლიტიკურ აპარატთან. ამ აპარატის ერთ-ერთ მთავარ მოვალეობად, ჩვენის აზრით, სწორედ ამ ცალკეული ტომობრივი ერთეულების მორჩილებაში შეკავებაა. ამ ტომებს, განსაკუთრებით მათი არისტოკრატიული ზედა ფენის სახით, ძველი მდგომარეობისაკენ დაბრუნების ტენდენციები არასოდეს გამოლევიათ და შესაფერისი პირობების დადგომისას მათ მოახერხეს კიდევ ჯერ ნახევრად დამოუკიდებელი, ხოლო შემდეგ – დამოუკიდებელი მდგომარეობის მოპოვება. როგორც ს. ჯანაშიამ აღნიშნა, სტრაბონთან დადასტურებული კოლხური სკეპტუხიები ასეთი ტომობრივი ორგანიზაციის ბელადები უნდა იყვნენ. ამგვარად, კოლხეთის სამეფოს პოლიტიკურ აპარატს ამ მხრივ საკმაო საზრუნავი ჰქონდა. ხელისუფლების ერთ-ერთ მთავარ ამოცანას უკვე გამოყოფილი მქონებელი ფენების (ქურუმები, მეფე, მხედართმთავრები, მონათმფლობელები, ვაჭრები და ა.შ.) ინტერესებისა და საკუთრების დაცვა შეადგენდა. ამით იყო შეპირობებული მეფის ხელისუფლების კავშირის სიმტკიცე აღნიშნულ ძალებთან. მეფეს ესაჭიროება დასაყრდენი, მხარის მიმცემი, მქონებელთ ესაჭიროებათ დამცველი – აი, საფუძველი, რომელსაც ემყარება, ჩვენის აზრით, ეს კავშირი.

სამეფო ხელისუფლების ერთ-ერთ ამოცანას სამეურნეო ცხოვრების რეგულირება და მისი წინსვლისათვის ხელის შეწყობა წარმოადგენდა. მისი როლი განსაკუთრებით ისეთი ღონისძიებების გატარებისასაა საგრძნობი, სადაც ტომისა და თემის ძალები უკმარია (მელიორაცია-არხთმშენებლობა და მოვლა, გზების წესრიგში ქონება, ფართო სამთამადნო წარმოება და ა.შ.). სახელმწიფოს მარეგულირებელი როლი კარგად ჩანს ძვ. წ. VI საუკუნეში ალებ-მიცემობის მოწესრიგებისათვის, მონეტის გამოშვებაში, რომელიც, როგორც ირკვევა, ძირითადად შინაური ბაზრის საჭიროებისათვის იყო გამოწვეული „...როგორც მონეტის ფასის განსაზღვრა, ისე მონეტის მოჭრის ტექნიკური საქმეც სახელმწიფოს ხვედრია... ის სფერო, სადაც ფული მონეტის სახით მიმოიქცევა, გამოიყოფა საქონელთა სამყაროს *საყოველთაო* მიმოქცევიდან როგორც საქონელთა შინაგანი მიმოქცევა, რომელიც შემოფარგლულია ამა თუ იმ სახელმწიფოს საზღვრებით“.³⁹⁵ ამავე დროს გვაქვს მითითებანი საქალაქო ცხოვრების არსებობაზე (ეა, ხირადა, სტამენა, გვიმნიადა და ა.შ.). რიგი ადგილობრივი ქალაქებისა, ბერძნული ტრადიციის მიერ დაყენებულია ძველბერძნული პოლისების გვერდით (ეა, გვიმნიადა ...). მონეტის არსებობა წინაკლასობრივ საზოგადოებაში გაუგებარია. იგი მხოლოდ კლასობრივად აგებულ საზოგადოებაშია გასაგები. მისი არსებობა, იმავე დროს, იმდროინდელ კოლხურ სა-

³⁹⁵ მარქსი კ., პოლიტიკური ეკონომიის კრიტიკისათვის, თბ., 1953, 135.

ზოადობაში ვაჭართა ფენის არსებობაზე უნდა მიგვითითებდეს, მაგრამ ამ მხრივ ანტიკურ ლიტერატურაში ჩვენთვის საინტერესო ხანისათვის რაიმე ცნობა არ შემონახულა.

იმდროინდელი კოლხეთის სახელმწიფოს ერთ-ერთ მთავარ მოვალეობას საგარეო მტრებისაგან სახელმწიფოს დაცვა და ახალი ტერიტორიების დაპყრობა შეადგენდა. ამ მხრივ უნდა შევნიშნოთ, რომ ძვ. წ. VI საუკუნისათვის კოლხას დიდი ტერიტორიული დანაკლისი აქვს განცდილი – დაკარგა ყველა ის ტერიტორია, რომლებიც პონტოს მთების სამხრეთით მდებარეობდა. მესხები, რომლებიც ჰეკატეს ცნობით (მისი წყაროს ცნობაა), კოლხური ტომია, აქემენიდური ირანის ადმინისტრაციულ დაყოფაში შედის და მისი მოხარკეა. ამ ხანაში, კოლხას საზღვრების გარეთაა ის ოლქი, საიდანაც კოლხას გაერთიანება დაიწყო (მტკვრის სათავეები). ამგვარად, ძვ. წ. VI საუკუნისათვის კოლხიდა ეკონომიურად და სოციალურად დაწინაურებული ქვეყანაა. ბარში კლასობრივი საზოგადოებაა, ხოლო მთის ტომები გვაროვნულობის სხვადასხვა საფეხურზე იმყოფებიან. სახელმწიფო,³⁹⁶ რომლის წარმოქმნა VI საუკუნეში დასრულებული ჩანს, შინაგანი განვითარების წყალობით, რასაც არაკეთილსასურველი საგარეო პირობები ემთხვევა, ძვ. წ. I საუკუნის დამდეგისათვის ეცემა, რათა რამდენიმე საუკუნის შემდეგ უკვე ახალ (ფეოდალურ) საფუძველზე მოეწყოს.

§3. პოლიტიკური მდგომარეობა ძვ. წ. VI-II სს.

ბერძნულ და ლათინურ მწერლობაში დაცული ცნობები საშუალებას არ იძლევა დამაკმაყოფილებელი სისრულით გავითვალისწინოთ შავიზღვისპირეთის ქართველურ ტომთა პოლიტიკური თავგადასავალი, მაგრამ გადარჩენილი ცნობები უალრესად ძვირფასია და შესაძლებელს ხდის გავითვალისწინოთ პოლიტიკური მდგომარეობის სურათი დროის განსაზღვრული მონაკვეთისათვის.

ავტორთა რიცხვი, რომელთაც ჩვენთვის საინტერესო თემისათვის ასე თუ ისე ხელმოსაყიდი ცნობები მოეპოვებათ, რამდენიმეა და მათ შორის ყველაზე მეტი ცნობა ჰეროდოტესა და ქსენოფონტს აქვთ დაცული.

ჰეროდოტეს (484-425 წწ.) ცნობები საერთოდ შეეხება თითქმის ყველა ქართველურ ტომს, ტომობრივ გაერთიანებებს თუ სახელმწი-

³⁹⁶ ჯანაშია ს. ნ., ფეოდალური ურთიერთობის წარმოშობისათვის საქართველოში, 153 და შმდგ.

ფოებრივ წარმონაქმნებს და ასახავს ამ ტომების პოლიტიკურ მდგომარეობას აქემენიდთა ხანაში, ვიდრე ჰეროდოტეს დრომდე.³⁹⁷

ჰეროდოტეს ცნობები, როგორც შემოწმებით ირკვევა, სანდოა და სათანადო ოფიციალური თუ სხვა სახის წყაროებზე დაყრდნობითაა დაწერილი. მისი ცნობების ღირებულება მით უფრო ძვირფასია, რომ ეს არის ანტიკურობის პირველი ისტორიკოსი, რომელმაც თავის შრომაში ასეთი ადგილი დაუთმო ქართველური ტომების თავგადასავლის გადმოცემას და რომლის შრომაც ჩვენამდე შემოინახა.

დიდი ღირებულებისაა V-IV საუკუნის ბერძენი ისტორიკოსისა და ფილოსოფოსის ქსენოფონტის ცნობები, რომლებიც, ძირითადად, თავმოყრილია მის „ანაბასისში“ და ეხება შავი ზღვის სამხრეთ სანაპიროზე მოსახლე ქართველურ ტომებს, თანაც, ალბათ, უმთავრესად იმ ტომებს და ტომობრივ გაერთიანებებს, რომლებთანაც შეხება მოუხდა კუნაქსას ველიდან უკანდახეულ 10000 ბერძენ მოლაშქრეს. ქსენოფონტის ცნობები ერთგვარად აგრძელებენ ჰეროდოტეს მონათხრობს და გვისურათებენ იმ ევოლუციას ქართველური ტომების პოლიტიკურ ცხოვრებაში, რომელიც ჰეროდოტეს მიერ აღწერილი მდგომარეობის შემდგომ მომხდარა; ეს ევოლუცია, როგორც ქვემოთ დავინახეთ, აქემენიდური ირანის საზიანოდ წარმართულა. ქსენოფონტი გზადაგზა იძლევა ცნობებს ზოგიერთი ტომის პოლიტიკური ინსტიტუტის შესახებაც.

ჩვენ ხელთ არსებული მასალების საფუძველზე პოლიტიკური განვითარების სურათი ძველი წელთაღრიცხვის VI-II საუკუნეებში შემდეგნაირად გვესახება:

VI საუკუნეში აქემენიდური ირანის გავლენა, როგორც ჰეროდოტის ცნობით დასტურდება, კავკასიის ქედამდე ვრცელდება,³⁹⁸ მაგრამ ტომების ერთი ნაწილი სხვაგვარ პოლიტიკურ დამოკიდებულებაში არიან აქემენიდებთან, ვიდრე მეორე ნაწილი. ამიერკავკასიის სამხრეთი ნაწილი უშუალოდ შედის აქემენიდთა იმპერიაში და დარიოს I-ის ხანაში (521-485 წწ.) ქმნის რიგ სატრაპიებს. აქ მოსახლე ქართველური ტომები XVIII და XIX სატრაპიებში ყოფილა გაერთიანებული და 500 ტალანტის გადახდა ჰკისრებია ყოველწლიურად.³⁹⁹ სულ სხვანაირ დამოკიდებულებაშია აქემენიდებთან კოლხეთი. მას ძღვნის მირთმევა და აქემენიდების სამხედრო მოკავშირეობა უკისრია.⁴⁰⁰

სამხედრო ძალების გამოყვანა აქემენიდური ირანის ყველა ქვეშევრდომი ტომისა და „მოკავშირის“ პირველი მოვალეობა იყო. ასეთი

³⁹⁷ Herod., III, 94, 97. SC, I, 9; IV, 37, 38, 40. SC, I, 20-21; VII, 78, 79. SC, I, 56-58.

³⁹⁸ Herod., III, 97. SC, I, 9.

³⁹⁹ იქვე, III, 94. SC, I, 9.

⁴⁰⁰ Herod., III, 97. SC, I, 9 და VII, 79. SC, I, 57.

მოვალეობა ეკისრათ ქართველურ ტომებს და მათ შორის კოლხეთის სამეფოსაც.⁴⁰¹

როგორ უნდა ავხსნათ აქემენიდების (და მათი წინამორბედების) დამოკიდებულების თავისებურება კოლხეთისადმი?

VIII-VII საუკუნეები კოლხას სამეფოს ძლიერების ხანაა, როდესაც იგი მონაწილეობას იღებს სამხრეთ ამიერკავკასიის ტერიტორიულ-პოლიტიკურ გადანაწილებაში და ამ ნიადაგზე მედგარ ბრძოლებს აწარმოებს გაძლიერებულ ურარტუსთან, რომელმაც გაანადგურა დიაუხის სამეფო და მისი დიდი ნაწილი თავის პროვინციად აქცია.⁴⁰² ქართველურ ტომთა ის ჯგუფები, რომლებიც ძველი ასირიისა და ურარტუს შემადგენლობაში შედიოდა, ძვ. წ. VI საუკუნის დამდეგს შედის მიდიის სამეფოს შემადგენლობაში, რომელმაც, გაანადგურა რა ასურეთის სამეფო, დაიპყრო კაპადოკია და არმენია.⁴⁰³ მალე (547-546 წწ.) მიდიის სამეფო და მისი დანაპყრობი ტერიტორიები გადადის კიროსის (558-529 წწ.) მიერ შექმნილ სპარსეთის სახელმწიფოს შემადგენლობაში. კიროსი კაპადოკიასა და არმენიას იარაღით იმორჩილებს და თავისსავე სიცოცხლეში ახერხებს ლიდიისა და ბაბილონის სამეფოების განადგურებას.⁴⁰⁴

კულხა ამ დროსაც დამოუკიდებელი გაერთიანებაა; იგი თვალს ადევნებს ამბების განვითარებას წინა აზიაში და ხედავს რა მიდია-სპარსეთის ძლიერი იმპერიის შექმნას, ცდილობს შესაფერისი პოლიტიკური ხაზი გაატაროს. მაგრამ, ეტყობა, კულხა იოლად ვერ გადარჩენია ახალი იმპერიის შემოტევას. სპარსელებს ძალა შესწევდათ ამ ქართული გაერთიანების დამარცხება-განადგურებისათვის, მაგრამ მათ ამისაგან თავი შეუკავებიათ – კულხასთვის ტერიტორიის დიდი ნაწილი ჩამოუშორებიათ (მესხეთი, კოლა და ა.შ.), მათ შორის ის პროვინციაც, რომელიც კულხას გაერთიანების წარმოქმნისათვის ბრძოლის ცენტრს, დამწყებს წარმოადგენდა, და რომელმაც სახელი მისცა მთელ გაერთიანებას (ჰეკატე მილეტელის მესხები – ეს „კოლხური ტომი“, ჰეროდოტის ცნობით, დარიოს I-ის სატრა-პიაში შედის და აქემენიდების მოხარკეა) და კოლხეთის სამეფო დაუტოვებიათ, როგორც მეძღვნე ქვეყანა. უკანასკნელი ვალდებულება მოწმობდა კოლხეთის დამოკიდებულ მდგომარეობას აქემენიდებისადმი. კოლხეთის გადარჩენაში, ცხადია, მთავარი როლი იმ შეუპოვარმა ბრძოლამ შეასრულა, რომელიც ქართველურ ტომებს სპარსელების წინააღმდეგ

⁴⁰¹ იქვე, VII, 78. SC, I, 57.

⁴⁰² მელიქიშვილი გ., უძველესი სამეფო სამხრეთ საქართველოს ტერიტორიაზე, „მიმოხილველი“, II, თბ., 1951, გვ. 219-225.

⁴⁰³ Авдиев В. И., История древнего Востока, М., 1953, стр. 534.

⁴⁰⁴ იქვე, გვ. 536.

უწარმოებიათ. მძიმე ბრძოლებით შეწუხებულ სპარსელებს გადაუწყვეტიათ კოლხეთის სამეფო დაეტოვებინათ, როგორც საფარი ჩრდილოეთის ნომადების წინააღმდეგ. (მომთაბარე ტომები გამუდმებით ებრძვიან და იჭრებიან იმპერიის ტერიტორიაზე. იმპერიას სისხლისმღვრელი ბრძოლების წარმოება უხდება. ასეთ ბრძოლაში იღუპება სპარსეთის იმპერიის ფუძემდებელი კიროს II (529 წ.).⁴⁰⁵

ქართველური ტომები, როგორც ირკვევა, ადრე განთავისუფლებულან აქემენიდთა ბატონობისაგან. ქსერქსეს (486-465 წწ.) „ღევების წარწერაში“, რომელიც ძვ. წ. 485 წლითაა დათარიღებული, უკვე არც ერთი ქართული ტომი აღარ იხსენიება.⁴⁰⁶ აქედან შეიძლება დავკვსკვნა, რომ 485 წლისათვის ქართველი ტომები უკვე ავტონომიური უნდა ყოფილიყვნენ. ეს აზრი მით უფრო მისაღები იქნება, თუ გავითვალისწინებთ, რომ აქემენიდების იმპერია განუწყვეტლივი აჯანყებების ალში იყო გახვეული; იგი ერთმანეთისაგან ეთნიკურად განსხვავებულ, სხვადასხვა სოციალ-ეკონომიურ საფეხურზე მდგომი ხალხების ხელშეწყობი ნაკრები იყო, რომელშიც სეპარატისტული ტენდენციები არასოდეს გამოლეულა. ალბათ, იმპერიისათვის ერთ-ერთ მძიმე მომენტში ქართველურ ტომებს უსარგებლიათ ხელსაყრელი ვითარებით და თავისუფლება აღუდგენიათ, რისი ფასიც მათ ადრევე იცოდნენ და რისთვისაც ასურეთთან, ურარტუსთან და სხვა მოძალადეებთან საუკუნეების სიგრძეზე უბრძოლიათ.

ქართველ ტომებს რომ ჰეროდოტის დროისათვის მეხარკეობისაგან თავი დაუღწევიათ, ამას გვაგარაუდებინებს მისივე (ჰეროდოტის) ერთი ცნობა: გადმოგვცემს რა, რომ კოლხებმა ნებაყოფლობით იკისრეს საჩუქრების (ἢ δῶρεῖν) მირთმევაო, აგრძელებს, **ისინი ჩვენ დრომდეც კი ასევე იქცევიანო.**⁴⁰⁷ ჰეროდოტეს ეს გარემოება, როგორც ტექსტიდან ჩანს, ხაზგასმით აქვს აღნიშნული, ხოლო როდესაც ლაპარაკობს სხვა ქართველური ტომების მოხარკეობაზე, გადმოგვცემს ნამყო დროის ფორმით და საჭიროდ არ ცნობს რაიმე განმარტება მისცეს. როდესაც მის მიერ დარიოს I ხანისათვის აღწერილი ამბავი მის დროსაც განაგრძობდა არსებობას, იგი ამის შესახებ საჭიროდ ცნობს შენიშვნა გაუკეთოს, ხოლო როდესაც აღწერილი ვითარება უკვე აღარ არსებობს, იგი საკმარისად მიიჩნევს გადმოგვცეს მის შესახებ ნამყო დროის ფორმით.⁴⁰⁸ ამგვარად, „ღევების წარწერის“ (485 წ.) მონაცემები

⁴⁰⁵ Авдиев В., დასახ. ნაშრ., 538.

⁴⁰⁶ Струве А., Надписи Ксеркса «о дэвах» и религиозные верования персов, ИАН, II, 3, 1944. აფაქიძე ა., შენიშვნები Scithica et Caucasica-ს ახალი გამოცემის გამო, საქ. მუზ. მოამბე, XV-B, თბ., 1948, 91

⁴⁰⁷ Herod., III, 97. SC. I, 9.

⁴⁰⁸ Herod., III, 97. SC, I, 9.

ჰეროდოტის ცნობის შინაარსზე დაკვირვებითაც მართლდება, მაგრამ ამ გარემოებას საეჭვოს ხდის ქართველური ტომების მონაწილეობა ქსერქსეს არმიაში;⁴⁰⁹ აქ შეიძლება ორი გარემოება დავუშვათ: 1. ქართველური ტომებისაგან შემდგარი ნაწილები შეადგენენ მოქირავნეებს, ან 2. ეს ტომები აქემენიდთა „მოკავშირეები“ გამხდარან, ე.ი. მათი ბრძოლა განთავისუფლებისათვის კომპრომისული მორიგებით დამთავრებულა: აქემენიდებს უარი უთქვამთ ხარკის მოთხოვნაზე, ხოლო ქართველური ტომები „მოხარკის“ მდგომარეობიდან „მოკავშირის“ მდგომარეობამდე ამაღლებულან.

ძვ. წ. V საუკუნის დამლევისათვის შავი ზღვის სანაპიროების ქართველური ტომები აქემენიდთა შესახებ ცოტას თუ ფიქრობენ და მათგან სრულ დამოუკიდებლობაში არიან. აქემენიდთა სატრაპიების შემადგენლობაში მხოლოდ არმენები და ზოგიერთი მათი მეზობლები არიან.⁴¹⁰

მართალია, ძვ. წ. V საუკუნის დამლევეს შავიზღვისპირეთის ტომების აქემენიდებისაგან დამოუკიდებელი მდგომარეობა უცილობელი ფაქტია, მაგრამ ეს ტომები პოლიტიკურ ერთეულებად გაერთიანებული არ ჩანან. მათი დაქუცმაცებულობა ხშირად თემობრივ დანაწილებამდეც არის მისული, როგორც ამის შესახებ მოსინიკების მაგალითიდან შეიძლება ვივარაუდოთ.⁴¹¹ მართალი უნდა იყოს თ. მიქელაძე, როდესაც ასეთსავე მაგალითს შკვითინებშიც ხედავს, სიტყვა „სკვითინის“ ეტიმოლოგიის ძიებისას.⁴¹² მ. მაქსიმოვა, იხილავს რა ძვ. წ. V-IV ს.ს. პონტოს სანაპიროების ტომების პოლიტიკური ყოფის ფორმებს, ამბობს, რომ ეს ტომები მსხვილ სატომო გაერთიანებებად არიან უკვე გაფორმებული და თავიანთ საგარეო ურთიერთობაში სრული დამოუკიდებლობით სარგებლობენ; თუმცა ისინი ხშირად ერთი გაერთიანების შიგნითაც ებრძვიან ერთმანეთს, მაგრამ სხვა ტომებისა და ხალხების მიერ ერთგვარ მთლიანობად აღიქმებიან.⁴¹³ ამ აზრს, მაგრამ სხვა დასაბუთებით, ეთანხმება თ. მიქელაძე.⁴¹⁴

ირაკვევა, რომ ძვ. წ. V-IV ს.ს. მიჯნაზე პონტოს სანაპიროს ქართველური ტომები ერთნაირი პოლიტიკური ინსტიტუტების მქონენი არ არიან. ამ ინსტიტუტების ფორმები დამოკიდებულია ამ ტომების სოციალურ-ეკონომიური განვითარების დონეზე. თ. მიქელაძის შრომის

⁴⁰⁹ იქვე, II, 79. SC, I, 57.

⁴¹⁰ იხ. „ანაბასისის“ შესაბამისი ადგილები, და განსაკუთრებით VII, §25.

⁴¹¹ იქვე, V, 4, §3.

⁴¹² მიქელაძე თ., ქსენოფონტის ანაბასისი“ და მისი ცნობები ქართველი ტომების შესახებ (ხელნაბეჭდი), თბ., 1953, გვ. 286.

⁴¹³ Максимова М., Местное население юго-восточного Причерноморья по «Анабасису» Ксенофонта, ВДИ, 1951, №1, стр. 258.

⁴¹⁴ დასახ. ნაშრ., გვ. 286 და სხვა.

„ქსენოფონტის „ანაბასისი“ და მისი ცნობები ქართველი ტომების შესახებ“ ნაკლი იმაშიც მდგომარეობს, რომ მასში ერთ სიბრტყეშია განხილული მთისა და ბარის სოციალური მდგომარეობის სურათი და მხედველობაში არ არის მიღებული ის განსხვავება, რომელიც ამ მხრივ მთასა და ბარს შორის არსებობს. მთა სოციალური განვითარების მხრივ, როგორც ცნობილია, ამ დროს დიდად ჩამორჩება ბარს და ამა თუ იმ ტომის ცხოვრებაზე დაკვირვებისას ეს გარემოება მხედველობიდან არ უნდა გავუშვათ.

თვით იმდროინდელი ბარის მოსახლეობაც არ წარმოადგენს ერთ მთლიანს. ზოგიერთი ნაწილი ზღვის სანაპიროებისა ადრე ებმება კლასობრივი საზოგადოების ჭაპანში, ზოგიერთი კი უფრო დიდხანს ინარჩუნებს თემურობისათვის დამახასიათებელ ნიშნებს. პონტოს ტომების პოლიტიკური მდგომარეობა არც მთლად ისეთია, როგორადაც მას ზოგიერთი მკვლევარი გვიხატავს (მაქსიმოვა, მიქელაძე); თითქოს V-IV საუკუნეების მიჯნაზე ისინი პოლიტიკურად თავისუფალი არიან და თავის საქმეებს თვითონ განაგებენ: VI-V საუკუნეებში აქ უკვე მრავალი ძველბერძნული სავაჭრო ფაქტორია-ქალაქია, რომლებიც იმავე დროს მცირე მასშტაბის სახელმწიფოებიც არიან; ისინი ნაწილობრივ ადგილობრივი მოსახლეობის ექსპლუატაციის ხარჯზე ცხოვრობენ და ჰყავთ პოლიტიკურად დაქვემდებარებული ადგილობრივი მოსახლეობით დასახლებული ოლქები. „История классической древности – это история городов, но история городов основанных на земельной собственности и на земледелии“.⁴¹⁵ მიწათმოქმედების საკმაოდ დიდი როლი შეიმჩნევა თითქმის ყველა ძველბერძნულ ქალაქში, მათ შორის ისეთებშიც, რომელნიც უპირატესად სავაჭრო-სახელოსნო ცენტრებად იყო ცნობილი.⁴¹⁶ ყოველი კოლონია-ქალაქის დაარსებას თან ახლდა ადგილობრივ ტომთა მიწა-წყლის დაკავება-დაპყრობა და მისი გადაქცევა ქალაქ-სახელმწიფოს საკუთრებად. „Отношение к земле, как к собственности, всегда опосредствованно захватом (мирным или насильственным) земель племенем, общиной, имеющей более или менее естественно сложившуюся или уже исторически развитую форму“.⁴¹⁷ პონტოში ჩვენთვის საინტერესო ბერძნული კოლონიების შესახებ პირდაპირი ცნობები არ მოგვეპოვება, მაგრამ, ვითვალისწინებთ რა სხვა შესაბამის მაგალითებს, მივდივართ დასკვნამდე, რომ ქართველური

⁴¹⁵ Маркс К., Формы, предшествующие капиталистическому производству, ВДИ, 1940, №1, стр. 15.

⁴¹⁶ Невская В. И., Византия в классическую и эллинистическую эпоху, «Причерноморье в античную эпоху», №4, М., 1953.

⁴¹⁷ Маркс К., ЦИТ, труд. стр. 17.

ტომების საცხოვრისის ერთი ნაწილი, რომელიც ბერძნული სავაჭრო ფაქტორია-ქალაქების ირგვლივ მდებარეობდა, პოლიტიკურად ამ ქალაქების საკუთრებას წარმოადგენდა. სიტყვამ მოიტანა და ზედმეტი არ იქნება აქვე შევნიშნოთ, რომ ადგილობრივი მოსახლეობის დამოკიდებულება მოახალშენე ბერძნებისადმი სხვადასხვა ადგილას სხვადასხვანაირია – ქალაქის დაარსებისას შევიწროებით გამოწვეული „წყენა“, როგორც ჩანს, მალე „მეგობრული“ (საქმოსნური) ურთიერთობით იცვლება, მაგრამ ბრძოლისა და შუღლისათვის ნიადაგი მუდამ მზადაა. პონტოს სანაპიროებზე ეს შუღლი შეპირობებულია მთისა და ბარის წინააღმდეგობით, ბარის მიერ მთის შევიწროებით, რაც ძირითადად ტყვეთა ვაჭრობაში პოულობს გამოხატულებას. „ანაბასისში“ დაცულია ცნობა, რომლის მიხედვითაც პონტოს სამხრეთ სანაპიროს ბერძენ მოახალშენეებს განსაკუთრებული მტრობა მთის მცხოვრებლებთან ჰქონიათ (ტრაპეზუნტელების მტრობა დრიალებთან).⁴¹⁸ თ. მიქელაძე ფიქრობს, რომ ეს მტრობა ტრადიციულია და წარმოიშვა კოლონიების დაარსებისას, როდესაც ადგილობრივ მცხოვრებლებს მიწები წაართვეს.⁴¹⁹ მაგრამ იმ წანამძღვრებიდან, რომლებიც მას „ანაბასისიდან“ აქვს აღებული, ასეთი დასკვნა არ გამომდინარეობს: კოლონია-ქალაქი მდებარეობს ზღვის ნაპირას: კოლონიის მეზობელი, ირგვლივ მცხოვრები კოლხები, რომელთაც, ალბათ, კოლონიის დაარსებისას მართლაც წაართვეს მიწები, მათთან კეთილმეგობრულ განწყობილებაში არიან, ხოლო სადღაც მთაში მცხოვრები დრიალები მტრობენ მათ. აქ მტრობა, ცხადია, მიწის (ტერიტორიის) მიტაცებით კი არაა შეპირობებული, არამედ იმ ურთიერთობით, რაც მთასა და ბარს ოდითგანვე ახასიათებს. იმ ხანის მთა ეკონომიურად სუსტია და ნიადაგის სიმწირის გამო შეუძლია დაიტოს მოსახლეობის მკაცრად განსაზღვრული რაოდენობა. ამიტომ ძარცვა-გლეჯა ამ მოსახლეობის საარსებო მარაგის შევსების ერთ-ერთი გზაა. ჩვენ ვიცით, რომ „ანაბასისიდან“ 1000 წლის შემდეგაც აქ მოსახლე მთის ტომები ცნობილი იყვნენ თავიანთი თარეშით და ძალიან აწუხებდნენ რომაულ ქალაქებს. იმპერატორები იძულებული გამხდარან მათთვის ყოველწლიურად ოქრო ეგზანათ, ოღონდაც ძარცვა-გლეჯაზე ხელი აეღოთ.⁴²⁰ პროკოპი კესარიელი ჭანებში ძველ სანებს ხედავს, ხოლო არიანე დრილებს მიჩნევს სანებად,⁴²¹ ასე რომ ჭანები ისედაც (ლიტერატურულადაც) დაკავშირებული არიან დრილებთან და ანტიკურ

⁴¹⁸ Xenoph., V, 2, §2.

⁴¹⁹ მიქელაძე თ., დასახ. ნაშრ., გვ. 300.

⁴²⁰ Proc. Caess., 1) BP, 1, 15. გეორგია. II, საქ. მუზ. მოამბე, VI, გვ. 329. 2) De aedificiis, III, 6. გეორგია, II. საქ. მუზ. მოამბე, VIII, გვ. 266-272.

⁴²¹ PPE., §15. SC, I, 222.

ლიტერატურაში არცთუ „წესიერი“ ხალხის სახელი აქვთ მოპოვებული. მეკობრეობისაკენ მთის მცხოვრებლებს, როგორც აღვნიშნეთ, ცხოვრების პირობები უბიძგებდა, ხოლო მეკობრეობა, თავის მხრივ, ხელს უშლიდა, აფერხებდა კოლონიის სავაჭრო-ეკონომიურ საქმიანობას (ტრაპეზუნტსა და ზღვისპირა სხვა ქალაქებს არ შეეძლოთ მართო საზღვაო ვაჭრობით დაკმაყოფილებულიყვნენ. ისინი ახდენენ საქონლის გაცვლას შიდამატერიკულ ცენტრებთან, საითკენაც გზები პონტოს მთაგრეხილებზე გადადის). აი, კოლონიებისა და მთის მცხოვრებლების მტრობის ერთ-ერთი ნამდვილი მიზეზი. თუ ბერძნულ კოლონიებსა და ადგილობრივ მოსახლეობას შორის მიწისთვის წარმოშობილი მტრობის ტრადიცია V საუკუნის დამლევამდე უნდა ყოფილიყო შემონახული, ის, პირველ ყოვლისა, ბარის მცხოვრებლებთან უნდა შენახულიყო.

სულ სხვა საფუძველზეა აგებული ტომებისა და ტომობრივი გაერთიანებების ურთიერთობანი. პროფ. მ. მაქსიმოვას აზრით, პონტოს სანაპიროს ტომების ურთიერთობის ღერძი საძოვრებისათვის ბრძოლაა, რისი მაგალითიც, მისი აზრით, „ანაბასისში“ მრავლად გვხვდება.⁴²² ეს აზრი ჯერ კიდევ 20 წლის წინათ იყო წამოყენებული საბჭოთა ისტორიოგრაფიაში,⁴²³ მაგრამ ჯერჯერობით მხარდაჭე-რა მხოლოდ მაქსიმოვას მითითებულ ნაშრომში ჰპოვა. პონტოს სანაპიროს ქართველური ტომების ურთიერთობის ღერძი საძოვრების საკითხი ვერ იქნებოდა, თუნდაც იმ მიზეზის გამო, რომ ეს ტომები ბინადარ, დამჯდარ ცხოვრებას ეწევიან. ამასთან, მ. მაქსიმოვა ზოგიერთ ასეთ ტომს თვლის მომთაბარე-მესაქონლედ, რომელიც სინამდვილეში შერწყმული ტაპის მეურნეობის მქონეა (მათ შესახებ ქვემოთ გვექნება ლაპარაკი და აქ აღარ შევეხებით).

„ანაბასისის“ ცნობებით ირკვევა, რომ დამორჩილებულის ინსტიტუტი ამ დროს ქართველურ ტომებში არ არის უცხო რამ და ბრძოლა წარმოებს არა მართო ტომობრივ კავშირებსა თუ ცალკეულ ტომებს შორის (მოსინიკები – ხალიბები, კარდუხები – არმენები), არამედ ტომობრივი კავშირებისა თუ ცალკეული ტომების შიგნით – თემებს შორის (შკვითინებში, მოსინიკებში). ეს ბრძოლა, როგორც ირკვევა, პოლიტიკური ჰეგემონის მდგომარეობის მოპოვების, შენარჩუნების ან უკან დაბრუნებისა და მუდმივი შემოსავლის წყაროს მოპოვებისათვის წარმოებს. საინტერესოა დაკვირვება, როგორი გულმოდგინებით ცდილობენ ეს ტომები და თემები (შკვითინები, მოსინიკები, არმენები) 10000 უკანდახეული მეომარი ამ ბრძოლაში გამოიყენონ.

⁴²² Максимова М., Местное население ... ВДИ, 1951, №1, стр. 258.

⁴²³ Манандян Я., О торговле и городах Армении, Эр. 1930, стр. 16-17.

„ანაბასისში“ მოიპოვება ერთადერთი ცნობა, რომელიც პონტოს სანაპიროს ერთ-ერთი ქართველური ტომის პოლიტიკურ ინსტიტუტს ეხება – ესაა ცნობა მოსინიკების „მეფეებზე“. მ. მაქსიმოვამ მათში „მეფე-ქურუმი“, „მეფე-ღმერთი“ დაინახა, რომელიც დადასტურებულია სხვა ხალხების ეთნოგრაფიული მასალით.⁴²⁴ მაქსიმოვას აზრს უშე-ნიშვნოდ იზიარებს თ. მიქელაძე.⁴²⁵ მოსინიკების ეს ვითომდაც მეფეე-ბი რალაც უდღეური ჰეგემონები არიან, რომელთაც სიკვდილიც კი არ შეუძლიათ თავისი სურვილის მიხედვით. მოსინიკებში ნამდვილი სამ-ხედრო-პოლიტიკური ჰეგემონები ისინი უნდა იყვნენ, რომელთაც ქსე-ნოფონტი „არხონტებად“ იხსენიებს (ὀ ἄρχων).⁴²⁶

ამდროინდელი კოლხეთის შესახებ ქსენოფონტს მხოლოდ ის აქვს აღნიშნული, რომ ისინი „ავტონომიური“ იყვნენ,⁴²⁷ მაგრამ აქ მას მხედველობაში ე. წ. „მცირე კოლხეთი“ აქვს. ე. წ. „დიდ კოლხეთს“ იგი სხვა სახელით იცნობს.

კოლხეთის სამეფოს შესახებ ძვირფასი ცნობა სტრაბონს აქვს დაცული თავის „გეოგრაფიაში“. იგი ერთგან გადმოგვცემს, რომ მე-დეას მამის – აეტის მომდევნო მეფეებს, „ფლობდნენ რა სკეპტუხიე-ბად დანაწილებულ ქვეყანას, არ გააჩნდათ განსაკუთრებული ძლიე-რება“.⁴²⁸ აკად. ს. ჯანაშია, ანალიზს უკეთებს რა ამ ცნობას, შენიშ-ნავს, რომ „...სკეპტუხიებად დაყოფა“ ნიშნავს არა ჩვეულებრივ ადმი-ნისტრაციულ დანაწილებას (ასეთი რამ არ შეიძლებოდა გამხდარიყო მეფეთა დასუსტების მიზეზი), არამედ მოასწავებს ცენტრალური ხე-ლისუფლების დაქუცმაცებასა და დაქსაქსვას, გარკვეული სახის დეცენტრალიზაციასაც.⁴²⁹ სწორედ ასეთი დასუსტება იყო ის ხელ-საყრელი ვითარება, რომელმაც ასე იოლად შეაძლებინა მითრიდატ VI ევპატორს კოლხეთის სამეფოს დაპყრობა.⁴³⁰

სტრაბონის აღნიშნული ცნობა დადასტურებას პოულობს კოლხე-თის შემდგომი დროის სოციალ-პოლიტიკურ ვითარებაში, აქედანვე შეიძლება მისი ახსნაც.

⁴²⁴ Максимова М., Местное население..., ВДИ, 1951, №1, стр. 260.

⁴²⁵ მიქელაძე თ., დასახ. ნაშრ., გვ. 297.

⁴²⁶ Xenoph., V, 4, §3. SC, I, 79.

⁴²⁷ იქვე, VII, 8, §25.

⁴²⁸ Strab., XI, 2, §18. SC, I, 137.

⁴²⁹ ჯანაშია ს. ნ., ეგრისის სამეფოს წარმოშობა, შრ. II, თბ., 1952, გვ. 311.

⁴³⁰ Strab., იქვე.

§4. პონტოს სამეფო და კოლხეთი

ძვ. წ. II-I საუკუნეებს მიჯნაზე შავი ზღვის სანაპიროს ქართველური ტომები ერთ პოლიტიკურ გაერთიანებად არის წარმოდგენილი – ესაა პონტოს სამეფო, ელინისტური აზიის ერთ-ერთი დიდი პოლიტიკური ერთეული.

ღიაღობური ომების დასასრულისათვის უკვე მოიხაზა ახალი ელინისტური სახელმწიფოების კონტურები: სირია და მცირე აზიის სამხრეთი ნაწილი სელევკს ხვდა წილად, ხოლო მცირე აზიის დიდი ნაწილი ლისიმახმა შეუერთა თავის სამფლობელოს.

ძვ. წ. IV საუკუნის დამლევსა და III საუკუნის დამლევს მცირე აზიაში ლისიმახის სამფლობელოთაგან რამდენიმე დამოუკიდებელი ადგილობრივი პოლიტიკური ერთეული წარმოიქმნა. მცირე აზიის ბევრ ადგილობრივ ტომს უკვე აშკარად გამოხატული კლასობრივი სტრუქტურა ჰქონდა და პოლიტიკური ერთეულის გაფორმებისათვის ბრძოლის მეთაურის როლის შესრულება აშკარად შეეძლო. მეორე მხრივ, მცირე აზიაში უკვე ძველი აღმოსავლეთის ხანიდან მონათმფლობელური სახელმწიფოები და ქალაქ-სახელმწიფოები არსებობდნენ.

ძვ. წ. IV საუკუნის დამლევს პერდიკას დევნისაგან არმენიაში თავშეფარებული კაპადოკიის მეფის შვილი არიატი ახერხებს ანტიგონის (ძვ. წ. 301 წ.) კაპადოკიიდან განდევნას, იბრუნებს მამულს და სამხრეთ კაპადოკიაში დამოუკიდებელ სამეფოს აარსებს.⁴³¹ ცოტა ხნის შემდეგ, კერძოდ ძვ. წ. 297 წელს, ფორმდება ბითინიის სამეფო, რომელშიც ბითინია და პაფლაგონია ერთიანდებიან. ლისიმახის სამფლობელოს გამოეყო, აგრეთვე, მეორე ადგილობრივი დინასტი აქემენიდთა სახლიდან, მითრიდატი, რომელმაც შავი ზღვის სამხრეთ სანაპიროებზე (პონტოს ანუ ჩრდილო კაპადოკია) შექმნა დამოუკიდებელი სამეფო, რომელიც ისტორიაში პონტოს სამეფოს სახელითაა ცნობილი.

პონტოს სამეფოს დამაარსებელი მითრიდატე I ჯერ ანტიგონის სარდალი იყო, შემდეგ კი ლისიმახის. იგი სარგებლობს ლისიმახის დამარცხებითა და სიკვდილით (ძვ. წ. 281 წ.) და თავს საგამგეოდ გადაცემული ოლქის მეფედ აცხადებს.⁴³² ასე წარმოიხაზა სამეფო, რომელსაც ისტორიის ჩარხის ტრიალმა, შემდეგში, ანტირომაულად განწყობილი ელინისტური აღმოსავლეთის მედროშეობა არგუნა.

მითრიდატე I ჩქარა ერევა ელინისტური სახელმწიფოების ურთიერთბრძოლაში და უკვე ძვ. წ. 278 წელს ნიკომედ ბითინელთან კავშირში ქირაობს გალატთა ტომების სამხედრო ძალებს და ორი

⁴³¹ Ранович А. Б., Эллинизм и ее историческая роль, М-Л, 1950, стр. 94-96.

⁴³² იქვე, 95.

წლის განმავლობაში აოხრებს ანტიოქოზ I-ის (280-262 წწ.) მცირეაზიულ სამფლობელოებს. შემდეგ კი ამ ტომებს ჩრდილოეთ ფრიგიაში ასახლებენ და ამით ქმნიან ერთგვარ ბარიერს ანტიოქოზ I-ის წინააღმდეგ.⁴³³ სელევკ II (247-226 წწ.) იძულებულია ხელშეკრულებებითა და საქორწინო კავშირით უზრუნველყოს კაპადოკიისა და პონტოს ნეიტრალიტეტი, რაც მას ეგვიპტის წინააღმდეგ ბრძოლისათვის სჭირდებოდა.⁴³⁴

როდესაც მითრიდატე I და ნიკომედ ბითინიელი ფრიგიას გალატებით ასახლებდნენ, მათ აზრადაც არ მოსვლიათ, რომ ეს მიზეზი გახდებოდა პერგამის მნიშვნელობის ზრდისა, რომლის მმართველებმა III საუკუნის შუახანებში მოახერხეს დამოუკიდებელი სახელმწიფოს შექმნა, რომელმაც არაერთი უსიამოვნება მიაყენა პონტოსა და ბითინიას.⁴³⁵

ძვ. წ. III საუკუნის დამლევს ელინისტური აღმოსავლეთის ჰორიზონტზე სრულიად ახალი ძალა გამოჩნდა – რომაელებმა პირველად შედგეს ფეხი აზიაში საომარი ოპერაციების საწარმოებლად. ძვ. წ. 190 წელს მაგნეზიასთან ისინი ამარცხებენ ანტიოქოზ დიდს (223-187 წწ.), რაც კიდევ უფრო აძლიერებს პერგამის სამეფოს და ასუსტებს პონტოს მეფის პოზიციებს, რომელსაც დასავლეთისაკენ ტერიტორიული ინტერესები უჩნდება. მიუხედავად იმისა, რომ ძვ. წ. 179 წელს რომაელების „ხათრით“ პონტოს, მცირე არმენიის, კაპადოკიის, ბითინიის და პერგამის მეფეები დებენ სამშვიდობო ხელშეკრულებას,⁴³⁶ პონტოსა და პერგამის ურთიერთობა მაინც დაძაბული რჩება. პერგამის მეფე ევმენ II (197-160 წწ.) ჯერ ბითინიის მეფეს ამარცხებს (ცხადია, რომაელთა დახმარებით, რომელთა აგენტიც პერგამი იმთავითვე გახდა), ხოლო შემდეგ ებრძვის ფარნაკ პონტოელს.

ამ დროს პონტოს სამეფო ცდილობს თავისი საზღვრები დასავლეთისაკენ გადასწიოს, რაც პერგამის სასტიკ წინააღმდეგობას იწვევს. ფარნაკი ბრძოლიდან გამარჯვებული გამოდის, ევმენ II-ის ართმევს სინოპს და მას პონტოს სამეფოს დედაქალაქად აქცევს.⁴³⁷ ყურადსაღები გარემოებაა!.. პონტოს მეფეს დედაქალაქი დასავლეთისაკენ გადააქვს. დედაქალაქის ღალისს იქით გადატანა პონტოს დასავლეთისაკენ ექსპანსიის მაუწყებელია. ამ ხანებში პონტოს შემდგომი წაწვევა დასავლეთისაკენ აღარაა მოსალოდნელი, რადგან მომდევნო პერიოდებ-

⁴³³ Тарн В., Эллинистическая цивилизация, М., 1949, стр. 30.

⁴³⁴ Ранович, დასახ. ნაშრ., გვ. 117.

⁴³⁵ Тарн, დასახ. ნაშრ., გვ. 33-34.

⁴³⁶ Ранович, დასახ. ნაშრ., გვ. 127.

⁴³⁷ Тарн, დასახ. ნაშრ., 45.

ში პერგამი ახერხებს გალატიის დამორჩილებას და თავის გავლენაში აქცევს კაპადოკიას.⁴³⁸

პონტოს სამეფო ძლიერების ზენიტზე მითრიდატე VI ევპატორის ხანაში ავიდა, მის დროსვე მოელო ბოლო მის არსებობასაც. ამ პერიოდის შესახებ წყაროები განსაკუთრებით მრავლდება და კოლხეთის სამეფოს ისტორია ამ ხანაში პონტოს სამეფოს ისტორიის ნაწილია.

* * *

ტერიტორია, სადაც პონტოს სამეფო წარმოიქმნა, ძველთანაგვე ქართველური ტომების ადგილსაცხოვრისია. ეს ტომები პონტოს სამეფოს ეთნიკურ ბირთვს შეადგენენ.⁴³⁹ თავდაპირველად პონტოს სამეფოში ე. წ. ტიბარენული ხალხები (ტომები) არიან გაერთიანებული, შემდეგ კი მათ ირგვლივ ხდება სხვა ქართველური ტომების შემოკრება. *პონტოს სამეფოს ისტორია, იმავ დროს, შავი ზღვის სამხრეთ სანაპიროს ქართველური ტომების ისტორია* და ამ ისტორიის გადმოცემით ჩვენ ოდნავადაც არ გავდივართ ჩვენი თემის ფარგლებიდან.

ქართველური ტომების სოციალ-ეკონომიურ განვითარებაზე VI-I საუკუნისათვის ჩვენ ზემოთ უკვე გვქონდა ლაპარაკი, მაგრამ აქ უნდა აღვნიშნოთ, რომ მითრიდატე I-ს სახელმწიფოს შესაქმნელად ქართულ ტომებში შესაფერისი ნიადაგი უპოვნია – სახელმწიფოებრივი ცხოვრებისათვის ეს ტომები სავსებით მომზადებულნი ყოფილან. ეს გარემოება კიდევ ერთი საბუთია იმათ წინააღმდეგ, ვინც ამ ხანის ქართულ სინამდვილეში სახელმწიფოს არსებობის შესაძლებლობას უარყოფს.

ძვ. წ. II-I საუკუნეების მიჯნაზე, როგორც აღნიშნული იყო, გაძლიერებული მითრიდატე VI ევპატორი (120-63 წწ.) სარგებლობს კოლხეთის პოლიტიკური დასუსტებით და მას პონტოს სამეფოს უერთებს.⁴⁴⁰ მითრიდატე VI თავისი ეპოქის (ელინიზმის ხანის) ერთ-ერთი ბრწყინვალე პოლიტიკური მოღვაწეა. ანტიკური ისტორიკოსების ცნობით, მას 22 ენა სცოდნია და მის მიერ დაპყრობილ ხალხებს თავიანთ ენებზე ელაპარაკებოდა თურმე. მითრიდატე VI თავისი ნიჭით, გამჭრიახობით და მოხერხებით ახერხებს უზარმაზარი იმპერიის შექმნას, რომლის შემადგენლობაში შედის: ჩრდილო და ჩრდილო-აღმოსავლეთ შავიზღვისპირეთის ბერძნული ქალაქები, მცირე აზიის ჩრდილოეთი ნაწილი, რიგი სკივთურ-სარმატული ტომები, მცირე არმენია და ა.შ. ამავე დროს მას სამეგობრო კავშირი აქვს იბერიის, არმენიის და მიდიის მეფეებთან, რასაც ნათესაური ძაფების გაბმითაც

⁴³⁸ იქვე.

⁴³⁹ საქართველოს ისტორია, I, თბ., 1948, გვ. 60.

⁴⁴⁰ ჯანაშია ს. ნ., აღრეული ფეოდალიზმი, შრ. II, 176.

ამაგრებს და აზღვევს. იმავე დროს ტიგრან II – დიდი არმენიის მეფე, ახერხებს სელევკიდების სახელმწიფოს საბოლოოდ განადგურებას (ძვ. წ. აღ. 83 წ.) და არმენიაზე მიერთებას.

როდის დაუპყრია მითრიდატე VI-ს კოლხეთი?

სტრაბონის ცნობით, მას კოლხეთი თავის განსაკუთრებული ძლიერების ხანაში დაუპყრია.⁴⁴¹ პლუტარქის ცნობით, ძვ. წ. 87 წლისათვის მითრიდატეს დაპყრობილი ჰქონდა რომაელთა სამფლობელოები მცირე აზიაში, ბითინია, კაპადოკია და ბოსფორი.⁴⁴² აპიანეს ცნობით, 89 წლისათვის კოლხეთი უკვე პონტოს შემადგენლობაშია.⁴⁴³ ამ ცნობების საფუძველზე, ვგონებ, შეიძლება დასკვნა, რომ კოლხეთის პონტოსთან შეერთება II საუკუნის დამლევს ან I საუკუნის პირველ ათეულში უნდა მომხდარიყო.⁴⁴⁴

კოლხეთის დაპყრობას მითრიდატესათვის მრავალმხრივი მნიშვნელობა ჰქონდა:

ა) კოლხეთი ამ ხანისათვის ეკონომიურად დაწინაურებული ქვეყანაა, რომელსაც ეკონომიური კავშირები აქვს როგორც დასავლეთთან და სამხრეთთან, ისე აღმოსავლეთთან და ჩრდილოეთთან, რაზედაც არა ერთი ნუმისმატიკური თუ სხვა რიგი არქეოლოგიური მონაპოვარი მიგვითითებს. ამდროინდელი კოლხეთი ცნობილი იყო განვითარებული მემთამაღნეობით, სოფლის მეურნეობით, საფეიქრო წარმოებით, სატყეო მეურნეობით, მონათვაჭრობით და ა.შ. სტრაბონი გადმოგვცემს, რომ მითრიდატე VI ფლოტის ორგანიზაციისათვის ძირითად დახმარებას სწორედ კოლხეთიდან იღებდა.⁴⁴⁵ რისი მიწოდება შეეძლო საამისოდ იმდროინდელ კოლხეთს? – ხე-ტყე, ლითონის სამაგრები, საიალქნე ტილო, თოკები, ფისი, ცვილი, ტყავეული და ტანსაცმელი, სამხედრო შენაერთები და გემების გაწვრთნილი ეკიპაჟები, ფულადი გამოსაღები, მონები, სელის ნედლეული და ა.შ.

ბ) კოლხეთი თავისი გეოგრაფიული მდებარეობის გამო წარმოადგენდა ხიდს, რომლითაც შავი ზღვის სამხრეთი სანაპიროები სახმელეთო გზით ჩრდილო შავიზღვისპირეთს უკავშირდებოდა.⁴⁴⁶ მას შემდეგ, რაც მითრიდატე ევპატორმა მოახერხა ბოსფორის სამეფოსა და საერ-

⁴⁴¹ Strab., XI, 2, §18. SC, I, 137.

⁴⁴² Plut., Sulla, SC, I, 488.

⁴⁴³ APP, SC, I, 526.

⁴⁴⁴ შდრ. ჯავახიშვილი ივ., ქართველი ერის ისტორია, I, თბ., 1951, გვ. 438; მ. ბერძენიშვილი, ქ. ფოთის ისტორიისათვის, გვ. 129; მ. ინაძე, ფლავიუს არიანე ..., გვ. 87.

⁴⁴⁵ Strab., იქვე, SC, I, 137. ს. ჯანაშია, ფეოდალური რევოლუცია საქართველოში, შრ. II, 44-47.

⁴⁴⁶ ლიტერატურა: Манандян Я., О местонахождении ..., Историч. Записки, №25, М., 1948, 59. მისივე, Цель и направление подготовлявшегося Нероном Кавказского похода, Вопросы Истории, 1946, №7, 74. მ. ინაძე, ფლავიუს არიანე და მისი ცნობები საქართველოს შესახებ, ხელნაბეჭდი, თბ., 1953, 46-49, 113...

თოდ ჩრდილო შავიზღვისპირეთის ხელში ჩაგდება, ზოგიერთი სკვი-
თურ-სარმატული ტომების ჩათვლით, კოლხეთმა მისთვის განსაკუთრე-
ბული მნიშვნელობა მოიპოვა,⁴⁴⁷ როგორც სტრატეგიულმა პლაცდარმმა
ჩრდილოეთის მორჩილებაში ყოლის საქმეში და როგორც სტრატე-
გიულმა რეზერვმა საგარეო საფრთხის შემთხვევაში, რაც მოვლენების
შემდგომმა განვითარებამ არაერთხელ დაადასტურა.

გ) კოლხეთში, ქალაქ ფასიდთან მთავრდებოდა ელინისტური ხანის
ერთი უდიდესი სავაჭრო გზათაგანი, რომელიც აღმოსავლეთს დასავ-
ლეთთან აკავშირებდა. პატროკლის (ძვ. წ. III ს. პირველი ნახევარი)
ცნობით, ეს გზა ინდოეთში იწყებოდა და კასპიის ზღვიდან მტკვარზე
შემოყოლით პონტოსკენ გადადიოდა.⁴⁴⁸ სტრაბონი აღწერს ამ გზის იმ
მონაკვეთს, რომელიც კოლხეთის ფარგლებში მდებარეობდა.⁴⁴⁹ სტრა-
ბონისა და პლინი სეკუნდის ხანისათვის⁴⁵⁰ ეს გზა კეთილმოწყობილი
ყოფილა. შავი და კასპიის ზღვის დამაკავშირებელ გზებს ელინისტური
სამყარო დიდ მნიშვნელობას აძლევდა. პლინი სეკუნდთან დაცულია
კლავდი ცეზარის ცნობა, სადაც ნათქვამია, რომ სელევკ ნიკატორს
სურდა კასპიისა და შავი ზღვის არხით დაკავშირება, მაგრამ მოკ-
ლული იქნა (280 წ. – დ.ხ.) პტოლემეოს კერავნის მიერ და გან-
ზრახვა შეუსრულებელი დარჩა.⁴⁵¹ ამ გზის დიდ მნიშვნელობაზე ის
გარემოებაც მიგვითითებს, რომ მის მიყოლებით დიდი რაოდენობით
გვხვდება ელინისტური ხანის მცირე აზიისა და შავიზღვისპირეთში
საყოველთაოდ გავრცელებული ე.წ. „ლისიმახის“ მონეტები,⁴⁵² რომელ-
თა მიბადებითაც ადგილობრივ, კერძოდ, კოლხეთში წარმოებს მონეტის
გამომშვება.⁴⁵³

ფასიდ-კასპიის სავაჭრო გზის ერთი ძირითადი მონაკვეთის ხელში
ჩაგდებით მითრიდატე ევპატორი თავს ითავისუფლებდა ტიგრანიდებისა
და არშაკიდების შუამავლობისაგან აღმოსავლეთთან ურთიერთობაში,
კერძოდ, ვაჭრობაში, რასაც პონტოსათვის მცირე მნიშვნელობა არ
უნდა ჰქონოდა.

პონტოს სამეფოს ადმინისტრაციული აპარატი დაახლოებით ისეთივე
იყო, როგორც იმ ეპოქის სხვა ელინისტური სახელმწიფოებისა. პრო-
ვინციების მმართველად ან უფლისწულები იგზავნებიან, ან მეფის

⁴⁴⁷ APP, 64, SC, I, 527. 83 წ. მითრიდატე მანამდე ვერ ახერხებს აჯანყებული
ბოსფორელების წინააღმდეგ ბრძოლის დაწყებას, სანამ კოლხიდას არ იმორჩილებს.

⁴⁴⁸ Strab., XI, 7, §3. SC, I, 149-150.

⁴⁴⁹ იქვე, XI, 2, §17. SC, I, 136; XI, 3, §4. SC, I, 139.

⁴⁵⁰ Plin., VI, 13. SC, II, 178.

⁴⁵¹ იქვე, VI, 31. SC, II, 182.

⁴⁵² შდ. Пахомов, Монетные клады Азербайджана и Закавказья, 1927, стр. 16. კაპანაძე დ.,
ქართული ნუმიზმატიკა, თბ., 1950, გვ. 27.

⁴⁵³ იქვე.

მეგობრები. კოლხეთში, როგორც სტრაბონი გადმოგვცემს, მეფის მეგობრები იგზავნებოდნენ ნაცვლებად; ერთხელ თვით სტრაბონის დედის ბიძა (მამის ძმა) მოაფერანი ყოფილა კოლხეთის მმართველი.⁴⁵⁴

ძვ. წ. I საუკუნის დამდეგს რომისა და პონტოს სამეფოს წინააღმდეგობის კვანძი მტკიცედ გაინასკვა. დაიწყო ე. წ. „მითრიდატეს ომების“ სერია, რომელიც მთელი 30 წლის განმავლობაში გრძელდებოდა. მეომარი მხარეები აწყობდნენ შესვენებებს, რათა ახალი ძალები შემოეკრიბათ, შეევსოთ გამოფიტული რეზერვები და შეთხლებული არმიები, დაეთრგუნათ მოჯანყეები და შინაური მოწინააღმდეგეები და ა.შ. ეს ომები შავიზღვისპირეთის იმ ხალხებს აწვა მძიმედ, რომლებიც პონტოს სამეფოში შედიოდნენ. თითქმის ყველაფერი უქვივალენტოდ გადიოდა ამ ქვეყნებიდან და პონტოს მეფის ხაზინაში შედიოდა, რომელიც უძირო ქვაბს დამსგავსებოდა. იგი განუწყვეტლივ ცარიელდებოდა საომარ სამზადისში თუ ომების წარმოებისას. ხაზინის შესავსებად და საომარი ხარჯების დასაფარავად პონტოს მეფე, ბუნებრივია, არ ერიდებოდა განსაკუთრებული ზომების მიღებასაც. ასეთი შევიწროება არა ერთი აჯანყების საბაბი გამხდარა. ამასთან, ე. წ. „მითრიდატეს ომები“ არღვევენ იმ ეკონომიურ კავშირს, რომელიც ეგეოსის აუზის ქვეყნებსა და შავი ზღვის სანაპიროების ქვეყნებს შორის ადრინდანვე არსებობდა. ესეც ერთ-ერთი ძირითადი მიზეზთაგანია, ჩემი აზრით, შავიზღვისპირეთში პონტოს საწინააღმდეგო განწყობილების ზრდისა. უკანასკნელი განსაკუთრებით იმ პროვინციებში შეიმჩნევა, რომლებიც პონტოსთან სუსტი ეკონომიური დაფებით არიან დაკავშირებული და თანაც პოლიტიკური თვითმყოფობის ტრადიცია აქვთ. ერთ-ერთ ასეთ პროვინციათაგანს კოლხეთი წარმოადგენდა. პონტოს მეფეს აქ თავისი ნაცვალნი ჰყავდა, რომელიც სამხედრო შენაერთებზე დაყრდნობით ქვეყანას მორჩილებაში აკავებდა. რომაელებთან პირველი ომის დროს, როგორც ჩანს, მითრიდატეს პროვინციების გარნიზონები შეუსუსტებია. ეს ხელსაყრელ ვითარებას ქმნიდა აჯანყების გამარჯვებისათვის, აჯანყების, რომელიც ზემოთ ხსენებული მიზეზების საფუძველზე წარმოიშობოდა.

ძვ. წ. 83 წელს, აპიანეს ცნობით, რომაელებთან ომიდან დაბრუნებული მითრიდატე ევპატორი ებრძვის აჯანყებულ კოლხეთსა და ბოსფორელებს. კოლხები თხოვდნენ მეფედ თქვენი შვილი მითრიდატე დაგვინიშნეთო. ამავე ცნობით, ამავე ცნობით მითრიდატე ევპატორს მათი თხოვნა დაუკმაყოფილებია და კოლხებიც დამშვიდებულან, მაგრამ შვილზე ეჭვი მიუტანია, ყველაფერი ეს მისი ჩაგონებით მოხდაო და

⁴⁵⁴ Strab., XI, 2, §18. SC, I, 137.

სიკვდილით დაუსჯია.⁴⁵⁵ რომელი ისტორიკოსი აქ რაღაცას უნდა ურევდეს. არა მგონია, აჯანყებულ კოლხებს იმისთვის გამოედოთ თავი, რომ როგორმე ველირსოთ მითრიდატე მითრიდატის-ძე ჩვენი მეფე გახდესო. ნიშანდობლივია ის გარემოება, რომ კოლხეთი და ბოსფორი ერთდროულად არიან აჯანყებული. ბოსფორის მონაწილეობა ამ აჯანყებაში გვაფიქრებინებს, რომ აქ საქმე გვაქვს არა რომელიმე სტიქიურ აფეთქებასთან, არამედ წინასწარ დაგეგმილ აჯანყებასთან, სადაც სამი ძალა იღებს მონაწილეობას – კოლხეთი, ბოსფორის სამეფო და ბერძნული სავაჭრო ქალაქები. ამ სამი მონაწილიდან ჩვენ არ გვეგულება არც ერთი, რომელიც პონტოსაგან განთავისუფლებაში უპირველეს ყოვლისა ეკონომიურ სარგებელს არ ხედავდეს. აჯანყებები პონტოს სამეფოს წინააღმდეგ – ეს სცენიდან გამავალი ელინიზმის წინააღმდეგ აჯანყებებიცაა, რომელმაც შავიზღვისპირეთის ეკონომიური განვითარების დამუხრუჭება დაიწყო, განვლო რა თავისი პროგრესულობის სტადია. ჩვენ შემთხვევაში, როგორც ჩანს, საქმე ერთგვარი კომპრომისული შეთანხმებით გათავებულია: მითრიდატე აღიარებს, რომ კოლხეთი სამეფოა, ხოლო კოლხები თანხმდებიან, რომ მეფედ მითრიდატეს შვილი დაჯდეს (მეფედ არამეფური ჩამომავლობის მქონის დანიშვნა უხერხული იყო). მითრიდატე, დგება თუ არა შესაფერი მომენტი, სარგებლობს რაღაც შემთხვევით და კოლხების „მეფეს“ სიკვდილით სჯის. ცნობა იმის შესახებ, თუ როგორი გამოხმაურება ჰპოვა ამ აქტმა კოლხებში, არ მოგვეპოვება, მაგრამ კოლხეთისა და მითრიდატეს ურთიერთობის შემდგომი განვითარებიდან შეიძლება ვივარაუდოთ, რომ მითრიდატეს კოლხეთისადმი შერბილებული პოლიტიკის წარმოება გადაუწყვეტია, რითაც კოლხეთის მისდამი კეთილგანწყობილი დამოკიდებულების მოპოვება სურდა.* ამით იგი ერთბაშად რამდენიმე მიზანს ისახავს: ა) უპირიპირებდა ერთმანეთს ბოსფორსა და კოლხეთს, უფრო კი თიშავდა მათ, სპობდა მათი გაერთიანების (პონტოს წინააღმდეგ) საფუძველს. ასევე იქცეოდა ამ აქტით ბერძნული ქალაქების მიმართაც. ბ) ქმნიდა დასაყრდენს, რომელიც საიმედო და ერთგული იქნებოდა. მომდევნო ხანებში ჩვენ ვხედავთ, რომ კოლხეთი მითრიდატეს ერთგულია: კოლხები და სხვა ქართველური ტო-

⁴⁵⁵ APP., 64, SC, I, 527.

* იქნებ ერთ-ერთ ღონისძიებად კოლხეთში ნაცვლის ინსტიტუტის მეფის ინსტიტუტად შეცვლაც ყოფილიყო. ფლორთან (ახ. წ. II ს.) დაცულია ტიტე ლივიუსის შემოკლებანი, სადაც პომპეუსის ლაშქრობის ხანისთვის (ძვ. წ. 65 წ.) მოხსენებულია კოლხეთის მეფე ოროზი (... *regen Colchorum Orozen.*, I, 40, §27. SC, II, 258). აპიანე, აღწერს რა პომპეუსის ტრიუმფს რომში, გადმოგვცემს, რომ მასში მონაწილეობას იღებდა კოლხეთის მეფე ოლთაკი. (აპიანე – მითრიდატეს ომები. 117 SC, I, 537-538). როგორც ლივიუსთან (ძვ. წ. 59 – ახ. წ. 17 წ.), ისე აპიანესთან კოლხეთის მეფის შესახებ დაცული ცნობა არ უნდა იყოს დაუჯერებელი.

მები აქტიურად მონაწილეობენ მითრიდატეს მესამე ომში (74-63 წწ.), ხოლო პომპეუსისაგან დამარცხებული მითრიდატე ევპატორი გარბის კოლხეთში და 66-65 წლის ზამთარში ქ. დიოსკურიადაში რჩება, სადაც ატარებს სამზადისს და აწყობს გეგმებს რომში შესაჭრელად.⁴⁵⁶ ცოტა ხნის შემდეგ კოლხეთში შემოიჭრა მითრიდატეზე დადევნებული პომპეუსი, რომელსაც ფასილთან სერვილიუსის ფლოტი ელოდებოდა;⁴⁵⁷ ფლოტს შავი ზღვის სამხრეთი და აღმოსავლეთი სანაპირო უნდა შეეკრა. 63 წელს მითრიდატე ევპატორი ილუპება – ელინისტური აზია რომთან ბრძოლაში მარცხდება. მითრიდატე ევპატორის დამარცხებამ ცხადყო, რომ ელინიზმს რომთან წინააღმდეგობის ძალა არ შესწევდა, რომ მას ადგილი უნდა დაეთმო ახალისათვის, მონათფლობელური პოლიტ-ეკონომიური წყობის უფრო მაღალი საფეხურისათვის. „... Причины успеха римлян на Востоке надо искать в первую очередь не в римской военной доблести, дипломатической ловкости, военной выучке, а в том, что эллинистический мир быстро исчерпал себя и его включение в состав новой мировой державы стало исторической необходимостью“.⁴⁵⁸

პონტოს სამეფოსთან ერთად ახალი მსოფლიო იმპერიის შემადგენლობაში კოლხეთიც მოექცა. კოლხეთის ამდროინდელი საშინაო ვითარება არ აძლევდა ქვეყანას საშუალებას უცხო მოძალადისაგან თავი დაეცვა, ამიტომ კოლხეთს დამოუკიდებელი განვითარების საშუალება არ ეძლეოდა.

§5. ელინისტური კულტურა და კოლხეთი

ძვ. წ. აღ. IV საუკუნეში ბერძნული მონათმფლობელური საზოგადოების კრიზისი ღრობით გადაჭრას აღმოსავლეთის ლაშქრობაში პოულობს, სადაც აღმოსავლეთის იმდროინდელი იმპერიების სისუსტე ბერძენ-მაკედონელთა იოლ გამარჯვებებსა და ახალ, ჯერარნახულ მსოფლიო იმპერიის შექმნას აპირებს. ალექსანდრე მაკედონელის ლაშქრობამ აღმოსავლეთში გამოიწვია აღმოსავლეთისა და დასავლეთის მანამდე არნახული დაახლოება, რასაც შედეგად მოჰყვა

⁴⁵⁶ APP., 101. SC, I, 529.

⁴⁵⁷ Plut., Pomp., XXXIV, SC, I, 492.

⁴⁵⁸ Ранович А.Б., დასახ. ნაშრ. გვ. 31. შდრ. ჯანაშია ს., საქართველო ადრინდელი ფეოდალიზაციის გზაზე, შრ. I, 175, 176. ინაძე მ., ფლ. არიანე ..., გვ. 88. შენიშვ. 2 და გვ. 88-91.

თავისებური კულტურის შექმნა, რომელიც თავისი ბუნებით სრულად არც ბერძნული იყო და არც აღმოსავლური, არამედ მათ ნაკრებს (არა მექანიკურს) წარმოადგენდა. ბევრი რამის მიცემა შეეძლო დასავლეთს აღმოსავლეთისათვის, თითქმის უფრო მეტი ვალი დასდო აღმოსავლეთმა დასავლეთს. ეს კულტურა, თავისი ნიშნებით, მისი შემოქმედი საზოგადოების მოსპობის შემდეგაც (ძვ. წ. I ს.) განაგრძობს არსებობას და თავის კვალს აჩენს მის ორბიტაში მოხვედრილ ხალხთა კულტურას. იგი მეცნიერებაში ელინისტური კულტურის სახელითაა ცნობილი.

ელინიზმი მონათმფლობელური საზოგადოების არსებობის მთელი მონაკვეთია, ეპოქაა, დაწყებული ძვ. წ. 336 წლით, როდესაც ალექსანდრე მაკედონელი ტახტზე ავიდა, და დამთავრებული ძვ. წ. 31 წლით, როდესაც რომმა ბოლო მოუღო ელინისტური სამყაროს უკანასკნელი პოლიტიკური ერთეულის – ეგვიპტის პოლიტიკურ თვითმყოფობას. ელინიზმის ისტორია წარმოადგენს იმ პერიოდის თითქმის მსოფლიო ისტორიას, რადგან ელინიზმი მოიცავს იმდროინდელ ცივილიზებულ მსოფლიოს ნუბიიდან სკვითიამდე და სიცილიიდან ჩინეთამდე.⁴⁵⁹

მიუხედავად იმისა, რომ ელინიზმის ისტორიის შესწავლაზე მუშაობდა მთელი რიგი მეცნიერებისა – დროიზენი, ბელონი, როსტოცევი, ტარნი, მეიერი, ხვოსტოვი და სხვები, მათ არ მოუხერხდათ რომელიმე საკვანძო საკითხის გადაჭრა. უფრო მეტიც, მათ ვერ მოახერხეს ერთიანი აზრის გამომუშავება თვით „ელინიზმის“ ცნების შინაარსის შესახებ. მხოლოდ მოგვიანებით ისტორიკოს-ელინისტები ახერხებენ დასმას და გადაჭრას ელინიზმის ისტორიის მთელი რიგი საკვანძო საკითხებისა. განსაკუთრებით დიდი დამსახურება ელინიზმის რაობის შესწავლაში მიუძღვის ისტორიკოსს აბრამ ბორისის ძე რანოვიჩს, რომლის შემაჯამებელი ნაშრომი “Эллинизм и его историческая роль” (М.-Л., 1950 г.) იძლევა ელინიზმის არსის გაშლილ დახასიათებას. „Изучить эллинизм как историческую эпоху и понять его во всем его своеобразии нельзя без учета того основного факта, что эллинизм – этап в истории античного *рабовладельческого* общества, что он, следовательно, не представляет какого-то неисповедимого сцепления случайностей, а был исторически необходимым результатом всего предшествующего развития античной Греции с ее специфическими закономерностями рабовладельческого строя жизни. Конечно, многое эллинизм сохранил классического периода.

⁴⁵⁹ Ранович А.Б., Эллинизм и его историческая роль, М-Л, 1950, стр. 10-11.

Эллинизм же в целом представлял хотя общественный переворот, но не революцию, так как оставил в неприкосновенности основную структуру общества, и изучить его следует в связи с историей рабовладельческого общества в целом“.⁴⁶⁰

ელინიზმი წარმოადგენდა მონათმფლობელური საზოგადოების განვითარების ახალ საფეხურს, მაგრამ მისი შედეგები აღმოსავლეთისათვის უფრო მნიშვნელოვანი იყო, ვიდრე დასავლეთისათვის. დასავლეთისა და აღმოსავლეთის ურთიერთობიდან ამ ხანაში მოგებულ ადმოსავლეთი გამოდის, როგორც კულტურულად (ცენტრების გადანაცვლება აღმოსავლეთში ამის მანიშნებელი ვითარებაა), ისე სოციალურ-ეკონომიურადაც. ელინისტური კულტურის შექმნაში მონაწილეობას იღებს აღმოსავლური კულტურის არა ერთი მოღვაწე (ზენონ ჩინელი, ბიონ ბორისტენელი, სრიბიპ სოლელი, პოსიდონ ამპაელი, ფილოდემ გადარელი და ა.შ.), ხოლო ელინისტური კულტურის გავრცელებამ აღმოსავლეთში ხელი შეუწყო პიროვნების ერთგვარ განთავისუფლებას. მიუხედავად იმისა, რომ ეს გარემოება საზოგადოების მხოლოდ ზედა ნაწილს შეეხო, იგი მაინც პროგრესული იყო სოციალური თვალსაზრისით, რამდენადაც აღმოსავლეთის დესპოტია თავისი რელიგიური საფუძვლითა და ქურუმთა ყოვლისშემძლეობით საშინლად სტანჯავდა მასებს, როგორც სულიერად, ისე ეკონომიურად.⁴⁶¹ ბევრი რამ მისცა ელინიზმს აღმოსავლეთმა: პოლიტიკურ სფეროში მან მსოფლიო სახელმწიფოს იდეა უკარნახა, რელიგიურ სფეროში – დაცემული პოლისის ღმერთების ნაცვლად უნივერსალური ღმერთები შესთავაზა, ეკონომიურ სფეროში – წარმოების, მიმოსვლისა და კავშირის უფრო მაღალი დონე გააცნო. გა-დასცა თავისი მონაპოვრები ასტრონომიაში, მათემატიკაში, მედიცინაში, სოფლის მეურნეობაში და ა.შ.⁴⁶² საკმარისია აღინიშნოს, რომ ჰორიზონტალურ საქსოვ დაზგას ელინიზმის ხანამდე საბერძნეთი არ იცნობს, იგი ბერძნებმა აღმოსავლეთში გაიციეს.⁴⁶³ ასევე ამ ხანაში ეცნობა დასავლეთი ოქროქსოვილს,⁴⁶⁴ ალმასსა და მის მტვერს,⁴⁶⁵ გამომწვარ აგურს;⁴⁶⁶ აღმოსავლურ შეიარაღებას: ცხენოსან მშვილდოსნებს (კონ-

⁴⁶⁰ Ренович А., დასახ. ნაშრ., გვ. 16.

⁴⁶¹ Ренович А., დასახ. ნაშრ., გვ. 33.

⁴⁶² Ренович А., გვ. 34-37.

⁴⁶³ Максимова М., Техника (эллинистического) производства, Эллинистическая техника, М-Л, 1948, стр. 244-245.

⁴⁶⁴ იქვე, გვ. 245-246.

⁴⁶⁵ იქვე, 239.

⁴⁶⁶ იქვე, 45.

ные лучники), აქლემთა რაზმებს, მეშურდულეებს (прашники), საბრძოლო ეტლებს ცულებით, საბრძოლო სპილოებს და ა.შ.⁴⁶⁷

ელინიზმი აჩქარებს აღმოსავლეთის სოციალურ განვითარებას, ცვლის მის სოციალურ სურათს. ქალაქების გამრავლებამ გაზარდა მონური შრომის ხვედრითი წონა და დააჩქარა თემური საკუთრების ფორმების მოშლა; აამოძრავა მიწები, ერთი მხრივ ხდება მესაკუთრეთმეთემის მიკვრა მიწაზე, ხოლო მეორე მხრივ – მისი მიწისაგან გათავისუფლება. აღმოსავლეთი კერძო საკუთრებას მიწაზე არ იცნობდა – არსებობდა მხოლოდ მიწათმფლობელი სხვადასხვა ფორმა. ელინისტურ ხანაში აღმოსავლეთი ეცნობა მიწაზე ანტიკური საკუთრების ფორმას, რომელიც მანამდე აღმოსავლეთში ბერძნულ პოლისებში არსებობდა მხოლოდ.⁴⁶⁸

ელინიზმი, მართალია, მოასწავებდა აღმავლობას, მაგრამ ეს აღმავლობა არ იყო არც მტკიცე და არც ხანგრძლივი. მან ვერ მოახერხა შეექმნა საფუძველი მონათმფლობელური საზოგადოების დასანგრევად, თუმცა საამისოდ დაიწყო პირობების შემზადება. ვერც ერთი თავისი ასე თუ ისე დიდი წამოწყება ელინიზმმა ბოლომდე ვერ მიიყვანა, ბოლოს თვითონვე შევიდა კრიზისის ხანაში და დაეცა. რომაელთა დაპყრობები აღმოსავლეთში ამ კრიზისის გარდუვალი შედეგი იყო.⁴⁶⁹

ამიერკავკასია ელინისტური მსოფლიოს ერთი შემადგენელი ნაწილთაგანია და ელინიზმის, როგორც სოციალ-ეკონომიური და კულტურული მოვლენის, გავლენა, მასთან ნაცნობობა არა ერთი ფაქტითაა დადასტურებული. ელინისტური ხანის დასაწყისისათვის ამიერკავკასიაში ქართველთა ორი სახელმწიფოებრივი გაერთიანება არსებობდა: აღმოსავლეთში იბერია, ხოლო დასავლეთში კოლხეთი. იბერია თავიდანვე აღმოსავლური ქვეყანაა და, როგორც წყაროების შესწავლიდან ირკვევა, კულტურულად აღმოსავლეთთანაა უფრო დაკავშირებული. განსაკუთრებით მდიდარი მასალა ელინისტური ხანის იბერიის შესასწავლად მცხეთის არქეოლოგიური ექსპედიციის მიერ იქნა მოპოვებული. აქ მოპოვებული ეპიგრაფიკული მასალის შესწავლა იბერიას კულტურულად სწორედ არამეულ სამყაროსთან აკავშირებს. გ. წერეთელი აღნიშნული მასალის საფუძველზე გამოჰყოფს სემიტური ენების განსაკუთრებულ განშტოებას, რომელიც ძვ. იბერიაში იყო

⁴⁶⁷ Болдырев А.Б., Боровск И.М., Военная техника, «Эллинистическая техника», М-Л, 1948, стр. 273-275.

⁴⁶⁸ Ранович А., დასახ. ნაშრ., გვ. 157. Невская В., Византия в классическую и эллинистическую эпоху, М., 1953, стр. 37-42. Гаидукевич В.Ф., Боспорское царство, М-Л, 1949, стр. 94.

⁴⁶⁹ Ранович А., დასახ. ნაშრ., გა. 29.

ხმარებაში და მას არმაზულს უწოდებს. იგი შესაძლებლად მიიჩნევს დასვას საკითხი არმაზული და ქართული ანბანის ერთი ძირიდან ჩამომავლობაზე.⁴⁷⁰ მართალია, არმაზული ეპიგრაფიკის ძეგლები ახ. წ. აღ. I-III საუკუნეებით თარიღდებიან, მაგრამ ამ ხანებში ისინი განაგრძობენ არსებობას იმ დიდი ტრადიციის ნიადაგზე, რომელიც მათ გააჩნიათ. ელინისტურ ხანაში იწყება დასავლური კულტურული ნაკადის უფრო გაძლიერებული შემოდინება, რის ერთ-ერთ გამოხატულებას ბერძნული ენის გავრცელება წარმოადგენს. მცხეთის ეპიგრაფიკის ბერძნული ძეგლები, ისევე, როგორც არმაზული, ახ. წ. I საუკუნით თარიღდებიან,⁴⁷¹ მაგრამ მათი აქ გავრცელება სწორედ ელინისტური ხანიდან უნდა ვივარაუდოთ. ბერძნული ენის აღმოსავლეთში საკმაოდ ძლიერ გავრცელებაზე (განსაკუთრებით საზოგადოების ზედა ნაწილში) მიუთითებს არა ერთი უეჭვო გარემოება – არშაკიდების მონეტებზე წარწერები მხოლოდ ბერძნულ ენაზეა შესრულებული. 1909 წ. ზაგროსის მთებში, ს. ავრომანთან აღმოჩენილი იქნა ქვის ჭურჭელი, რომელშიც ტყავზე შესრულებული სამი ხელნაწერი ინახებოდა, რომელთაგან ორი ბერძნულ ენაზე შესრულებულ საიჯარო ხელშეკრულებას წარმოადგენდა; ერთი ძვ. წ. 88 წლით, ხოლო მეორე - ძვ. წ. 22 წლით თარიღდება.⁴⁷² ცხადია, ბერძნული კულტურული ნაკადის შემოღწევა იბერიას ვერ უცვლის თავის სახეს; უფრო მეტიც, იბერია ისევ აღმოსავლეთთან ტრადიციულად არსებულ ურთიერთობას აგრძელებს და სხვა ხალხების კულტურულ მონაპოვრებს თავის კულტურას მექანიკურად კი არ უერთებს, არამედ შემოქმედებითად ამუშავებს. ეკონომიურადაც იბერია ელინისტურ ხანაში უფრო აღმოსავლეთთანაა დაკავშირებული, ვიდრე დასავლეთთან, რაზედაც, იქნებ, ნუმიზმატიკური მასალებიც უნდა მიგვიითიებდეს.⁴⁷³ უცხო ენებს, რომლებიც იბერიის მხოლოდ ზედა ფენებში უნდა ყოფილიყო გავრცელებული, იბერიის საზოგადოების კულტურული განვითარების მსვლელობაზე რაიმე მნიშვნელოვანი კვალის დაჩნევა, ცხადია, არ შეეძლო, მაგრამ მათი აქ არსებობა, კერძოდ, ბერძნული ენის არსებობა, ცხადყოფს იბერიის ნაცნობობას ელინისტურ კულტურასთან.

⁴⁷⁰ Церетели Г.В., Эпиграфические находки в Мцхета, ВДИ, 1948, №2, стр. 49-57. მისივე, არმაზის ბილინგვა, ენიშკის მოამბე, XIII, თბ., 1943, გვ. 48. მისივე, Армазская билингва, Тб., 1941. მისივე, Армянское письмо и проблема происхождения Грузинского алфавита, «Эпиграфика Востока», II, 1948, III, 1949.

⁴⁷¹ ყაუხჩიშვილი თ. ს., ბერძნული წარწერები საქართველოში, თბ., 1951, გვ. 234 და შემდეგი. იქვე ბიბლიოგრაფია.

⁴⁷² Бузескул В., Открытия XIX и начало XX века в области истории Древнего мира, I. Восток, ПБ, 1923, стр. 190-191

⁴⁷³ Пахомов Е.А., Монетные клады Азербайджана и Закавказья, Труды общ. общ. и изуч. Азербайджана, Баку, 1927, выпю 3, стр. 16.

ელინისტური ხანის საქართველოს ნაცნობობას იმდროინდელი კულტურული სამყაროს მონაპოვრებთან ცხადყოფს არა მარტო და არა იმდენად ეპიგრაფიკული მასალები, რამდენადაც მატერიალური კულტურის სხვა ძეგლები, და კერძოდ, მშენებლობისა და წარმოების ტექნიკა. როგორც სათანადო ძეგლების შესწავლიდან გაირკვა, ელინისტური ხანის ხუროთმოძღვრებას და წარმოებას აქვს თავისი მახასიათებლები, რომლითაც ისინი გამოიყოფიან კლასიკური და რომაული ხუროთმოძღვრებისა და წარმოებისაგან: კლასიკური ხანის არქიტექტურული სტილისაგან განსხვავებით, თლილი ქვის შენობებში ელინისტურ ხანაში არ ხდება ჰორიზონტალური რიგის სიმაღლეთა და თანასწორობის დაცვა. ყველაზე გულმოდგინედ ნაგებ კედლებშიც კი ჰორიზონტალურ წყობათა სიმაღლე ერთნაირი არაა;⁴⁷⁴ კედლის წყობათა ასეთი სხვადასხვაობით გამოწვეულია ქვებზე ნიშნების გაკეთება, რომ ქვები ერთმანეთს იოლად მოერგოს. კლასიკურ ხანაში, როცა ყველა ქვა ერთი ზომისა იყო, ასეთი ნიშნები საჭიროებას არ წარმოადგენდა;⁴⁷⁵ ელინისტური ხანა ქმნის ქვის გადაბმის რამდენიმე მისთვის დამახასიათებელ ხერხს (მერცხლისკუდა, I ან II ფორმა და ა.შ.);⁴⁷⁶ ფართოდ ვრცელდება კოლონადებისა და თალების მშენებლობა. სწორად ქალაქების კარებიც კი თალურადაა ნაგები, იმავ დროს, გვიან ელინისტურ ხანაში ჩნდება მონოლითური კოლონები, რომლებიც ფართო გავრცელებას უფრო გვიან, რომაული ხანის არქიტექტურაში იღებენ;⁴⁷⁷ უმჯობესდება კრამიტის დამზადების ხერხი და იგი საღებავით იფარება.⁴⁷⁸ იქმნება მხატვრული მინის წარმოება (მოზაიკური, მოოქროვილი, მოხატული, გრავირებული და ა.შ., თუმცა მინის გამჭვირვალობა და დაბერვის ტექნიკა ჯერ მიღწეული არ არის;⁴⁷⁹ ჩნდება ცალმხრივ ამოზნექილი მონეტა, რაც მონეტისათვის მეტი სიმტკიცის მიცემითაა ნაკარნახევი,⁴⁸⁰ იწყება მოზაიკური იატაკის შექმნა (მოზაიკა წვრილი ნივთების წარმოებაში საშუალო სამეფოს ეგვიპტიდანაა ცნობილი), რომელიც განსაკუთრებულ აყვავებას რომაულ და ბიზანტიურ ეპოქაში აღწევს,⁴⁸¹ ხდება ხელოსნური წარმოების ძველი ცენტრების მონოპოლისტური მდგომარეობის მოსპობა⁴⁸² და ა.შ.

⁴⁷⁴ Максимова М., Техника эллинистического производства, 65

⁴⁷⁵ იქვე, 71.

⁴⁷⁶ Максимова М., Техника эллинистического производства, 54.

⁴⁷⁷ იქვე, 11, 71.

⁴⁷⁸ იქვე, 45.

⁴⁷⁹ იქვე, 233-235.

⁴⁸⁰ Зограф А.Ф., Распространение находок античных монет на Кавказе, Труды отдел. нумизм. Гос. Эрмитажа, Л., 1945, 257

⁴⁸¹ Максимова М., იქვე, 120 შმდგ.

⁴⁸² იქვე, 217-218.

მცხეთის ძეგლების ერთი ნაწილი სწორედ ჩვენ მიერ ზემოთ მითითებული თავისებურებებით ხასიათდება. აქ გვხვდება იბერიულ-ელინისტური სტილით შესრულებული ნაგებობები⁴⁸³ (ბაგინეთი, წიწამურის სერი, მცხეთის სადგური, არმაზის ხევი და ა.შ.), სააღმშენებლო მასალა (კრამიტი, ალიზის აგური, მერცხლისკუდა ფოსობიანი კვადრები) და ა.შ. ელინისტური მშენებლობის სტილი, როგორც ირკვევა, ელინისტური საზოგადოების დაცემის შემდეგაც განაგრძობს არსებობას. ამ მხრივ განსაკუთრებით საინტერესო გამოდგა სადგურ მცხეთის აღმოსავლეთით (300-მდე მეტრზე) 1951 წელს აღმოჩენილი აკლდამა. მან თითქმის დაუზიანებლად მოაღწია ჩვენ დრომდე და შემოგვინახა ახ. წ. I საუკუნის დამლევის იბერიის ისტორიის მეტად ძვირფასი მასალა. ძეგლი ქართული და ელინისტური ტრადიციების შერწყმითაა აგებული. „Особенно надо подчеркнуть то обстоятельство, что благодаря этому открытию оживает и приобретает свежую осмысленность сообщение знаменитого географа I века Страбона о зданиях в городах Иберии (Картли), построенных «по всем правилам зодчества» и покрытых черепицей. Под этими «правилами» надо подразумевать «правила» эллинистической архитектуры, в те времена еще господствовавший во всех переднеазиатских странах и резко отличающиеся от «правил» Римского зодчества, распространившихся позже. Новооткрытое сооружение, не нося никаких признаков римской архитектуры, тяготеет к формам именно эллинистическим. Таким образом, перед нами еще один яркий факт, вещественно доказывающий живые связи Грузии с эллинизованным миром, в котором теснейшим образом переплетались достижения местных, восточных культур и западной культуры. Этот факт, в совокупности с рядом первоклассных памятников (в том числе памятников письменности), открытых за последнее время археологами Грузии, наводит на далеко

⁴⁸³ Бердзенишвили Н.А., Ломтатидзе Г., Новые раскопки в Мцхета, „Заря Востока“, 1951, №183, стр. 3. ლომთათიძე გ., ციციშვილი ირ., ახალაღმოჩენილი აკლდამა მცხეთაში, საქ. სსრ მეცნ. აკად. მოამბე, XII, №10, თბ., 1951, 642-648. Цицишвили И.И., Гробница античного времени в Багинети. საქ. სსრ. მეცნ. აკად. მოამბე, XI, №3, თბ., 1950, 189-194. მისივე, მცხეთის ანტიკური კრამიტის შესწავლისათვის. საქ. სსრ, მეცნ. აკად. მოამბე, IX, №8, თბ., 1948, 517-524. აფაქიძე ა., არქეოლოგიური გათხრები საქართველოს უძველეს დედაქალაქში, „ბოლშევიკი“, 1945, №6. მისივე, ანტიკური წყაროების „სევსამორას“ ლოკალიზაციის საკითხისათვის, თეზისები, ივ. ჯავახიშვილის სახ. ისტორიის ინსტიტუტის მეოთხე სამეცნიერო სესიისა, თბ., 1953. ამირანაშვილი შ., ქართული ხელოვნების ისტორია, თბ., 1944. მისივე, История Грузинского искусства, М., 1950. Мшвениерадзе Д.М., Строительное дело в древней Грузии, Тб., 1952. გობეჯიშვილი გ., არქეოლოგიური გათხრები საბჭოთა საქართველოში, თბ., 1952, გვ. 110-135.

идущие выводы и предположения. Все четче вырисовывается в свете этих открытий культурный облик Грузии в последние века до нашей эры и начала нашей эры. Они придают особый интерес и все большую весомость сообщениям древнегрузинских летописей, отражающих тесные культурные взаимоотношения дохристианской Грузии с эллинистической Передней Азией, и в частности, сообщению об изобретении грузинского алфавита царем Фарнавазом, деятелем именно эллинистической эпохи.⁴⁸⁴

ელინისტური ხანის იბერიაში შეიმჩნევა ცვლილებები ყოფა-ცხოვრებაშიც, კერძოდ, არქეოლოგიური მასალით შესაძლებელი ხდება თვალის მიდევნება ცვლილებებზე დასაფლავების წესში – ვრცელდება (ყოველ შემთხვევაში ქალაქებში მაინც) ე. წ. ქვევრ-სამარხები, რომლებიც კოლხეთის გზით საბერძნეთიდან უნდა იყოს შემოსული (იხ. ეშერის, დაბლაგომის, ჩხოროწყუს და ა.შ. მასალები). ამ ხანის სამარხებს მის წინარე ხანის სამარხებისაგან ასხვავებს იარაღ-საჭურველისა და სურსათის ჩატანების წესის გაუქმება, შავი კერამიკის გაქრობა და განსხვავებული ფორმის წითელი კერამიკის გაჩენა, ოქროს სამკაულების, გემების, განსხვავებული ფორმის მონეტების და ა.შ. გაჩენა.⁴⁸⁵

ელინისტურ კულტურასთან გაცნობა იბერიისათვის ხდებოდა ორი გზით: 1) სელევკიდური აზიის ქვეყნებთან ურთიერთობაში, რაც იბერიას ელინისტური აღმოსავლეთის მიღწევებს აცნობდა, და 2) კოლხეთის გზით, საიდანაც იბერია ელინისტური დასავლეთის მიღწევებს ეცნობოდა. რაც შეეხება კოლხეთისა და შავი ზღვის სამხრეთ სანაპიროებს, ისინი ადრევე იცნობენ ელინურ კულტურას იქ არსებული ბერძნული სავაჭრო ქალაქების მეშვეობით, რომლებთანაც ურთიერთობა მათ ძვ. წ. VIII – VII საუკუნიდან აქვთ. ელინური კულტურის რიგი მონაპოვარი იბერიას სწორედ კოლხეთის, ან სამხრეთ საქართველოს გზით უნდა მიეღო, მაგრამ ელინისტური აღმოსავლეთის კულტურული მონაპოვარის კოლხეთში შეღწევის ერთ-ერთი გზა სწორედ იბერიაზე გადადიოდა. იბერიაზე გადაივლიდა ელინისტური სოფლის ერთ-ერთი უდიდესი სავაჭრო გზა, რომელიც აღმოსავლეთ აზიას დასავლეთთან აკავშირებდა (იხ. ზემოთ).

⁴⁸⁴ Бердзенишвили Н.А., Ломтатидзе Г., Новые раскопки в Мцхета, «Заря Востока», 1951, №188, стр. 3

⁴⁸⁵ ლომთათიძე, გ., არქეოლოგიური გათხრები საქართველოს ძველ დედაქალაქში, თბ, 1945, 33-34. Максимова М., Геммы из некрополя Мцхета-самтавро, საქ. სახ. მუზეუმის მოამბე, XVI-В თბ, 1950წ. 221-274. გობეჯიშვილი, გ., არქეოლოგიური გათხრები საბჭოთა საქართველოში, თბ, 1952წ., 112-113.

ეს უძველესი სავაჭრო გზები იმავე დროს კულტურულ მონაპოვართა გაზიარების არხებიც იყო. იქნებ ბორის არამეულწარწერიანი ლანგარი ერთეულ გამონაკლისად არ დარჩეს ძველი კოლხიდის ტერიტორიისათვის და მომავალმა არქეოლოგიურმა ძიებებმა დაადასტუროს არამეული დამწერლობის სხვა ძეგლების არსებობაც. ელინისტურ კულტურასთან ნაცნობობა კოლხეთში ვლინდება მატერიალური კულტურის მთელ რიგ ძეგლებში, რომლებიც მოპოვებულია: ვანში, დაბლაგომში, კლდეეთში, ბორში, ჩხოროწყუში, რაჭაში და ა.შ. ვანში აღმოჩენილია ელინისტური ხანის ისეთი ნაგებობის ნაშთები, როგორც დამოწმებული გვაქვს ბაგინეთში. ნ. ხოშტარია ამ ძეგლს ძვ. წ. II და წინარე საუკუნეებით ათარიღებს.⁴⁸⁶ ელინისტური ხანის კოლხეთი და სამხრეთ სანაპიროს ქართული ტომები აფართოებენ სავაჭრო-ეკონომიურ ურთიერთობას ელინისტური სამყაროს მრავალ ქვეყანასთან.⁴⁸⁷ სამხრეთ სანაპიროების შესახებ ჩვენ ძირითადად რამდენიმე წერილობითი ცნობის ამარად ვართ, რომლებიც ხალიბური ფოლადის და მოსინიკური სპილენძ-ბრინჯაოს წარმოებას და ექსპორტს შეეხება (ფსევდო არისტოტელე, აპოლონ როდოსელი, სტრაბონი...), ხოლო კოლხეთისათვის წერილობითი წყაროების გვერდით, გვაქვს შედარებით მდიდარი ნივთიერი მასალაც, როგორც ნუმიზმატიკური ძეგლების, ისე უცხოური ნივთების სახით, რომლებიც ამ ხანის კოლხიდის საზოგადოების გემოვნებისა და სოციალური დონის შესახებაც გვაძლევენ ცნობებს. ნუმიზმატიკური მასალის შესწავლა ცხადყოფს, რომ კოლხიდის საგარეო ვაჭრობაში ძირითადი წილი ისევ დასავლეთზე მოდიოდა. ძვ. წ. IV საუკუნიდან აქ ხმარებაში შემოდის ალექსანდრე მაკედონელისა და ლისიმახის მონეტები, რომლებიც ჩქარა, ცხადია, ეკონომიური აუცილებლობის გამო, მიბადვის საგანი ხდება, რადგან დედნები უკვე ვეღარ აკმაყოფილებს ბაზრის მოთხოვნილებებს. დასავლეთ საქართველოში და განსაკუთრებით ზღვის სანაპირო ტერიტორიებზე ვრცელდება ლისიმახის მონეტების მინაბადები, რომლებიც ლიტურატურაში კოლხურ მინაბადებად (კოლხურ სტატერებად) არიან ცნობილი. ისინი კოლხეთში „დაახლოებით ძვ. წ. III საუკუნეებში გაჩენი-

⁴⁸⁶ ხოშტარია, ნ., არქეოლოგიური გათხრები სოფ. ვანში 1947წ, „მომომხილველი“, I. 1949წ. 297-308; გობეჯიშვილი გ., დასახ. ნაშრ., 139. /თუმცა აქ ეს თარიღი გ. გობეჯიშვილს რატომღაც შეუბრუნებია და ამბობს, თითქოს ნ. ხოშტარია მას ძვ.წ. IV და მომდევნო საუკუნეებით ათარიღებდეს, – დ.ხ./.

⁴⁸⁷ საქართველოს ისტორია, I ტბ, 1948წ. 61.

ლა”.⁴⁸⁸ ელინისტურ დასავლეთთან კავშირზე მანიშნებელი ნივთების გვერდით გვაქვს, თუმცა უფრო სუსტად შემორჩენილი, ელინისტურ აღმოსავლეთთან კავშირზე მიმანიშნებელი მასალებიც (დაბლაგომი, კლდეეთი, ბორი...), მათ შორის წერილობითი წყაროების ჩვენებები (პატროკლი, არისტობულე, სტრაბონი...). როგორც უკვე აღინიშნა, აქ გაივლიდა, უფრო სწორედ, მთავრდებოდა, ჰირკანია-ფასიდის გზა:

სამხრეთ სანაპიროს ქართველურ ტომთა დიდი ნაწილი (ტიბარენები, ხალიბები, ხალდეები...) ძვ. წ. III საუკუნის დამდეგს შეადგენენ ახლად წარმოქმნილი ელინისტური სახელმწიფოს – პონტოს სამეფოს ეთნიკურ ბირთვს. ძვ. წ. I საუკუნის დამდეგისათვის პონტოს სამეფო ძლიერების მწვერვალზეა და ახერხებს კოლხეთის სამეფოს დაპყრობასაც.

ამგვარად, ძვ. წ. I საუკუნეში შავი ზღვის სანაპიროების ქართველური ტომები პოლიტიკურად ელინისტური პონტოს სამეფოს შემადგენლობაში არიან გაერთიანებული. პონტოს სამეფო ელინისტური აზიის უკანასკნელი დიდი წარმომადგენელია, რომელმაც ანტირომაულად განწყობილი აზიის მედროშეობა იკისრა, მაგრამ რომთან ბრძოლაში დამარცხებული, დროშასთან ერთად საკუთარ დამოუკიდებლობასაც თმობს. რომთან წარმოებულ ომებში მითრიდატე VI ევპატორის მარცხი ელინისტური აზიის დამარცხების აუცილებლობის დადასტურება იყო.

ამ ბრძოლის უკანასკნელი აქტის გათამაშებაში შავიზღვისპირეთის ქართველური ტომები უშუალო მონაწილეობას იღებენ და ამგვარად, ეს ტომები არა მარტო მონაწილეობენ ელინისტური კულტურის შექმნაში, არამედ უნებურად მის დამცველებადაც გამოდიან.

⁴⁸⁸ კაკანაძე დ., ქართული ნუმიზმატიკა, 27. . .

თავი II

შავი ზღვის სამხრეთ და სამხრეთ-აღმოსავლეთ სანაპიროს ქართველური ტომები ახ. წ. I-VI სს.

§ 1. სოციალურ-ეკონომიური მდგომარეობა I-IV სს.

ს. ჯანაშია, ეხება რა ძველი და ახალი წელთაღრიცხვის მიჯნის ქართული საზოგადოების შინაგან განვითარებას, აღნიშნავს, რომ „ამ სამნახევარი საუკუნის (ძვ. წ. I ს-ის დამდეგის შემდგომი ხანა – დ.ხ.) განმავლობაში განვითარების მთავარ ფაქტს შეადგენდა „მესამე გენეს“, „ერის“ შემდგომი დიფერენციაცია. აქ, როგორც ჩვენ ვფიქრობთ, უკვე I საუკუნის დამდეგს ჩვენს ერამდე (და იქნებ უფრო ადრეც) ერთგვარი ბზარია გავლებული „მეომრებსა“ და „მიწათმოქმედთა“ შორის,⁴⁸⁹ შემდეგ ავტორი აღნიშნავს „მძიმე აბჯრის“ და საერთოდ, შეიარაღების, მეურნეობის, შრომის საზოგადოებრივი განაწილების, ალებ-მიცემობის, განვითარებული კლასობრივი ცხოვრების მქონე საზოგადოებებთან ურთიერთობის და ა. შ. მნიშვნელობას ამ პროცესისათვის. ავტორის დასკვნით, „ეს ბზარი ეკონომიკურ ნიადაგზეა წარმოშობილი“.⁴⁹⁰ ეხება რა დასავლეთ საქართველოს სოციალური განვითარების საკითხს, ავტორი აღნიშნავს, რომ „ამ საკითხზე სავსებით დამაკმაყოფილებელი პასუხის გაცემა შეუძლებელია წყაროების სიმცირის გამო. ზოგიერთი ნიშანი და რექტოს-პექტრული თვალსაზრისი ჩვენ მხოლოდ შემდეგი საერთო დასკვნის გაკეთების საშუალებას გვაძლევს. უეჭველია, რომ გვაროვნული წყობილების ნაშთები ამ დროს ჯერ კიდევ უაღრესი სიძლიერითაა გამოხატული. მათს მოქმედებას ჩვენ ბევრად უფრო მერმინდელ ხანაშიც დიდი ანგარიში უნდა გავუწიოთ. ასევე, ცხადია, რომ პირველყოფილ მონობასაც თავისი გარკვეული წონა აქვს საზოგადოებრივ-ეკონომიკურ ურთიერთობაში, იგი შემდეგშიაც იჩენს თავს, ზოგჯერ უფრო გაძლიერებული სახითაც, ჩვეულებრივად კი საკმაოდ რთულ, წინააღმდეგობრივსა და კომბინაციურ დამოკიდებულებაში წარმოების სხვა წესებთან.

⁴⁸⁹ ჯანაშია ს., საქართველო ადრინდელი ფეოდალიზაციის გზაზე, 193.

⁴⁹⁰ იქვე, 193-200; საქართველოს ისტორია, 1, 86-98.

აღნიშნული ელემენტების გვერდით ჩვენ ფეოდალური ურთიერთობის ჩანასახსაც ვგულისხმობთ და, სხვებთან შეპირისპირებით, მის შედარებით უპირატესობასაც ვკარაულობთ. აღნიშნული მთავრების (არიანესთან რომ იხსენებინ – დ.ხ.) ხელისუფლებაც ადრინდელ - ფეოდალური დიფერენციაციის ნიადაგზე წარმოშობილად მიგვაჩნია. თვით მთავრები სათანადო ტრანსფორმაციაქმნილ, ძველი ტომის ბელადებად გვყავს წარმოდგენილი, რომელთაც თავიანთი საზოგადოების განვითარების გარკვეულ საფეხურზე უზურპაცია უყვეს მათთვის ჩაბარებულ უფლებებს და თემის დელეგირებული „მსახურებიდან თემისავე ბატონებად იქცნენ.“ თავისთავად ცხადია, რომ ეს ფეოდალური წყობა ამ დროს ჯერ სავსებით პრიმიტიული ფორმისაა და მის საბოლოო გამარჯვებამდე, ადებულ ქვეყანაში, კიდევ გრძელი და ძნელი გზა ძევს, იგი მხოლოდ სხვა ელემენტებთან შედარებით ბევრად უფრო მეტ სასიცოცხლო უნარს იჩენს და უფრო სწრაფად იზრდება.⁴⁹¹

სწორედ ამ ადრინდელ-ფეოდალური ურთიერთობის ზრდისა და გაძლიერების ნაყოფად მიგვაჩნია ჩვენ ეგრისის /ლაზიკის/ სამეფოს ჩამოყალიბება.⁴⁹²

ფეოდალური საზოგადოების ძირითადი საწარმო საშუალება მიწაა, რომლის სრული ფეოდალური მითვისებისათვის ბრძოლა საქართველოში დაახლოებით 20 საუკუნე გრძელდებოდა.⁴⁹³ ფეოდალური კერძო საკუთრება მიწაზე, რომელიც პირობით საოჯახო კერძო საკუთრებად არის წარმოდგენილი, არც ერთბაშად ჩამოყალიბებულა და არც მიწის მთელი

⁴⁹¹ აქ უნდა შევნიშნოთ, რომ ფეოდალური წყობა სხვა ელემენტებთან შედარებით იმიტომ იჩენს მეტ სასიცოცხლო და სწრაფი ზრდის უნარს, რომ „სხვა ელემენტებმა ამოწურეს თავისი თავი და საზოგადოებრივი განვითარების მუხრუჭებად გადაიქცნენ. ფეოდალური წყობა კი ახალია, მზარდი და სწორედ იმიტომ, რომ მისი გამარჯვება წარმოადგენს საზოგადოების შემდგომი განვითარების, წინსვლის პირობას, მომავალი მას ეკუთვნის. ახალისა და ძველის ბრძოლაში ახალის გამარჯვება გარდაუვალია. მაგრამ ადებული ხანისათვის ფეოდალური წყობის ელემენტები უადრესად სუსტია და ქვეყნის ცხოვრებაზე რამდენადმე შესამჩნევი გავლენა მათ ამ დროს არ უნდა ჰქონოდათ. საკითხის დასმა ლაზიკის სამეფოს წარმოშობის შესახებ, ცხადია, უადრესად საინტერესოა, მაგრამ ჩვენ ხელთ არსებული მასალები საშუალებას არ იძლევიან იგი ფეოდალური ძალების მომწიფებით ავხსნათ. თუ ლაზიკის სამეფოს წარმოშობას ამგვარად ავხსნით, მაშინ აუხსნელი რჩება ქრონოლოგიურად მისი მომდევნო და ნამდვილად ფეოდალური ერთეულის, აფხაზთა სამეფოს წარმოშობა.“

⁴⁹² ჯანაშია ს., ეგრისის სამეფოს წარმოშობა, შრ. II, 321-313; საქართველო ადრინდელი . . . 212.

⁴⁹³ ჯანაშია ს.ნ., ბრძოლა მიწის ფეოდალური მითვისებისათვის ძველ საქართველოში, შრ. II. 438.

ფონდი ქცეულა ფეოდალური კერძო საკუთრების საგნად. როგორც ს. ჯანაშია აღნიშნავს, უპირველესად, კერძო საკუთრების საგნად, საბაღ-ბოსტნე და სამოსახლო, ხოლო ცოტა გვიან - სახნავ-სათესი მიწა იქცევა და აქ ჩნდება პირველად ფეოდალური საკუთრება მიწაზე. სახნავ-სათესი მიწების შემდეგ კერძო საკუთრების საგნად საძოვარ-სათიბები, წყლები და ა.შ. იქცევა, ყველაზე ბოლოს ტყეს კარგავს თემი, რომელიც მიწის ფეოდალური მისაკუთრების წინააღმდეგ ყველაზე ძლიერი და ყველაზე ხანგრძლივად მებრძოლი გამოდის.⁴⁹⁴

ძველი და ახალი წელთაღრიცხვის მიჯნის იბერიისა და კოლხეთის ბარში მიწათმფლობელობის რამდენიმე ფორმის თანაარსებობა არის სავარაუდებელი,⁴⁹⁵ რომელთაგან ზოგი სცენიდან გამავალი საზოგადოებრივი ურთიერთობისთვისაა დამახასიათებელი (სათემო მიწათმფლობელობა, სატაძრო მიწათმფლობელობა), ზოგიც ახალი, მზარდი საზოგადოებრივი ურთიერთობისათვის (ფეოდალური მიწათმფლობელობა და მისი წვრილი ჩანასახები). სათემო მიწათმფლობელობა, ჩვენთვის საინტერესო ხანაში, მოცულობით, მიწათმფლობელობის გაბატონებული ფორმაა, მაგრამ მისი საფუძველი უაღრესად შერყეულია, იგი იმდენად დიდი მნიშვნელობის ფაქტორია ქართველ ტომთა ცხოვრებაში, რომ ამ ნიადაგზე წარმოქმნილი ტრადიციები თვით XIX საუკუნემდეც განაგრძობს არსებობას, როგორც რეალური ძალა, რომელიც განაპირობებს მთელი საზოგადოების უფლებას მიწის ცალკეულ სახეობაზე – კერძოდ ტყეზე.⁴⁹⁶ თემური მიწათმფლობელობა ის სფეროა, რომლის წიაღშიც ჩაისახა ფეოდალური კერძო საკუთრება მიწაზე, რომელსაც იგი დიდი ტანჯვითა და დიდი ბრძოლის შემდეგ უთმობს ასპარეზს. ჩვენთვის საინტერესო ხანაში თემური მიწათმფლობელობის გვერდით არსებობას განაგრძობს სატაძრო მიწათმფლობელობა, თუ მიწათსაკუთრება. მისი წარმოშობისა და ზრდის გზებზე ზემოთ აღვნიშნავდით, მაგრამ აქ უნდა შევნიშნოთ, რომ აღებულ ხანაში, საფიქრებელია, იცვლება იმ შრომის ხასიათი, რომელიც სატაძრო მეურნეობებში გამოიყენებოდა. თავისუფალ მეთემეთა შრომის ექსპლუატაცია ტაძრების მეურნეობაში ყოველთვის წარმოებდა და საამისო საბუთი ქართულ ეთნოგრაფიულ სინამდვილეში

⁴⁹⁴ იქვე, 438-439.

⁴⁹⁵ შდრ. ჯანაშია ს., საქართველო ადრინდელი ფეოდალიზაციის გზაზე, 287.

⁴⁹⁶ ჯანაშია ს.ნ., ბრძოლა მიწის ფეოდალური ... 439.

ცოტა როდია შემონახული.⁴⁹⁷ მაგრამ ალებულ ხანაში ჩნდება ტენდენცია მონის შრომის გამოყენების შეზღუდვისა, რომელსაც ახალ პირობებში აღარ შეუძლია რენტაბელური იყოს. საწარმოო ძალებისა და წარმოების საშუალებების მიღწეული ღონე ცხადყოფს, რომ მონის შრომამ უკვე მოჭამა თავისი დრო, რომ მეურნეობის შემდგომი დაწინაურებისა და რენტაბელობის პირობა შრომის ორგანიზაციის შეცვლაშია. სატაძრო მეურნეობათა სასაქონლო ხასიათს ადრე უნდა აეძულებინა ქურულობა ახალი პერიოდისათვის შესაფერისი ღონისძიებები მიეღო, მაგრამ რამდენადაც ისინი სცენიდან მიმავალ საზოგადოებრივ ურთიერთობათა საფუძვლებზე არიან მოწყობილნი, ამიტომ ამ ურთიერთობათა დაცემის შედეგად თვითონაც ეცემიან და ადგილს უთმობენ სატაძრო მიწათმფლობელობის ახალ ტიპს, რომელიც ახალ ფეოდალურ ურთიერთობათა საფუძველზე უნდა მოწყობილიყო. ეს სავსებით ბუნებრივი ისტორიული პროცესია. თემური და სატაძრო მიწათმფლობელობის გვერდით არსებობს ფეოდალური მიწათმფლობელობა, რომელიც ალებულ პერიოდში უაღრესად სპორადული და სუსტია, მაგრამ აქვს ტენდენცია ზრდისკენ. იგი ხანგრძლივ ბრძოლებს აწარმოებს როგორც სატაძრო, ისე თემური მიწათმფლობელობის წინააღმდეგ. როგორც ნ. ბერძენიშვილი აღნიშნავს, „ქართლის საზოგადოება VI-VII საუკუნეებში უკვე იცნობს მიწის საკუთრების სხვადასხვა ფორმას („მამულს“, „ნასყიდევს“, „შეწირულს“ და, უნდა ვიფიქროთ, „ნაწყალობევს“).⁴⁹⁸ პირობები მიწაზე ფეოდალური კერძო საკუთრების წარმოშობისათვის ქართველ ტომებში თემური მიწათმფლობელობის წიაღშია საძიებელი. ხევსურული თემური მიწათმფლობელობა სასოფლო და სამამო მიწათმფლობელობის გვერდით იცნობს **საკომლო** მფლობელობასაც, რომელიც, მართალია, ხევსურულ სინამდვილეში ვერ ახერხებს კერძო საოჯახო საკუთრებად ჩამოყალიბდეს, მაგრამ, სამაგიეროდ, განვითარების უფრო ხელსაყრელი პირობების წყალობით, სვანეთში, როგორც XIII-XV სს. საბუთებიდან ჩანს, უკვე ასწრებს კერძო საკუთრებად გაფორმებას (აქ უკვე დადასტურებულია „მამული“, „მკვიდრი მამული“, „შეწირვა“ /დათულა/ და ა. შ.).⁴⁹⁹ ხევსურული თემური მიწათმფლობელობის მასალები ადასტურებს, რომ აქ სამამულო

⁴⁹⁷ ბარდაველიძე ვ., ხევსურული თემი. . . 495-502. Бардавелидзе В., Земельные владения древнегрузинских святилищ, СЭ, 1949, №1, 92.

⁴⁹⁸ ჯანაშია ს., საქართველო ადრინდელი ფეოდალიზაციის გზაზე, 305.

⁴⁹⁹ სვანეთის საისტორიო ძეგლები, II, 18-19 / 15,16/

ნიადაგზე შესაძლებელია წარმოიშვას მეთემეთა ქონებრივი ღიფერენცია-ცია, რაც შემდგომ ამ სხვაობის გაღრმავების საფუძველი ხდება. დიდი მნიშვნელობა აქვს ეკონომიურად დაწინაურებული ფენისათვის მოლაშქრეობას. ეკონომიური შეძლებულობა მათ საშუალებას აძლევს თავი გაითავისუფლონ „მიწის მუშაკობისაგან“, რომელიც მისი ორთაგან ერთ-ერთი ძირითადი საზოგადოებრივი ნიშანი იყო („მეომარი-მიწათმოქმედი“) და „მეომართა“ ფენად ჩამოყალიბდეს, რაც მისი შემდგომი დაწინაურების ერთ-ერთი პირობა ხდება. ლეონტი მროველთან დაცული ერთი ძველქართული ტრადიციით, აზნაურობა „მეომართაგან“ არის წარმოშობილი, სწორედ იმ დროს, და ეს განსაკუთრებით საყურადღებოა, როდესაც ქართლში მეფობა არსდება.⁵⁰⁰ როგორც ჩანს, ქართველ ტომებში ამ პროცესის განვითარებისას საკმაოდ დიდი მნიშვნელობა წარმართული სალოცავების მოხელეობას უნდა ჰქონოდა, რაც საშუალებას აძლევდა მეთემეებისაგან ეკონომიურად გამოყოფილ ოჯახს, პოლიტიკურადაც აღზევებულიყო: უკანასკნელი გარემოება საშუალებას აძლევს მას მეტის გამაღებით ზარღოს თავისი აღზევების საფუძველი.

ფეოდალიზმი სხვა წარმოებითი ურთიერთობებისაგან განსხვავდება არა მარტო მიწათმფლობელობის ფორმებით, არამედ უშუალო მწარმოებლის საწარმოო საშუალებებთან დამოკიდებულების ხასიათითაც. აქ მონის შრომა ყმის შრომითაა შეცვლილი; იმის მიხედვით, თუ ფეოდალური საზოგადოების განვითარების რა სტადიასთან გვაქვს საქმე, „ყმა“ სხვადასხვა შინაარსის ცნებაა, ხოლო ყმათა კლასი თავის შიგნით, იმის მიხედვით, თუ საიდან მომდინარეობს მისი ვალდებულებანი და რა საფუძველზეა წარმოშობილი, მრავალ კატეგორიად გაიყოფა. ყმობის ინსტიტუტი ფეოდალური საზოგადოების კვალდაკვალ ვითარდება და მის ნიადაგზე გაიგება. ჩვენთვის საინტერესო ხანაში ყმურ დამოკიდებულებაში მყოფი ფენის გაჩენის ორი ძირითადი გზა არსებობდა – 1) მონის დასმა მიწაზე, და 2) თავისუფალი მეთემის ყმის მდგომარეობაში შეყვანა. რადგან მეურნეობაში მონური შრომის გამოყენების ხარისხი ქართველურ ტომებში დიდი არ უნდა ყოფილიყო, პირველი გზით ყმურ დამოკიდებულებაში მყოფი ჯგუფების რიცხვიც, შესაბამისად, მცირე უნდა ვივარაუდოთ. ყმათა ძირითადი მასა საქართველოში თავისუფალი მეთემეების დამოკიდებულ მდგომარეობაში შეყვანით არის გაჩენილი. თავისუფალი მეთემის დამოკიდებულ მდგომარეობაში შეყვანა ან შესვლა ჯერ კიდევ

⁵⁰⁰ „ქართლის ცხოვრება“, I, თბ., 1955, 18.

წინაკლასობრივი საზოგადოების ფარგლებშია შესაძლებელი, მაგრამ იქ ინდივიდუალური დამოკიდებულება კი არაა შესაძლებელი, არამედ კოლექტივის დამოკიდებულება კოლექტივისაგან. კლასობრივი საზოგადოების ჩასახვისა და მისი პოლიტიკური წარმონაქმნების ხანაში, როცა ტომის ბელადის ევოლუციას უკვე მეფე მოუცია, კოლექტივის ბატონობა კოლექტივზე იცვლება მეფის (ინდივიდის) ბატონობით კოლექტივზე. ფორმალურად, მეფის ბატონობა ამ დროს ჯერ კიდევ კოლექტივის ბატონობად აღიქმება თანამედროვეების მიერ. ახლა, დაპყრობილი ან „ნებაყოფლობით“ მფარველობაში მიღებული თემები ხატის ან თემის ყმებად კი არ იქცევიან, არამედ Βασιλικοί δῆμοι ხდებიან. მართალია, ეს „სამეფო მონები“ ანუ მეორენაირად λαοί ეხლა ინდივიდს ემორჩილებიან, რომელიც ამავე დროს ყველა მიწების უზენაესი მესაკუთრეცაა, მაგრამ თავიანთი შინა-სოციალური განვითარების დონით, ისინი ჯერ თემურ ცხოვრებას არ გაშორებიან. ასეთი დამოკიდებულება შეიძლება გაჩნდეს როგორც ძალმომრეობის გზით, ისე „ნებაყოფლობით“, მაგრამ წინა პერიოდისაგან განსხვავებით, ადრეფეოდალურ ხანაში აუცილებელი აღარაა რომელიმე მხარე აუცილებლად კოლექტივს ან მის განსახიერებას წარმოადგენდეს. აქ კოლექტივის (თემის, ტომის) შესვლა დაქვემდებარებულ დამოკიდებულებებში შეუძლებელი რამ არაა და უფრო გვიანი ხანისთვის-საცაა დადასტურებული, მაგრამ მასიური ხდება ინდივიდის შესვლა ინდივიდთან დამოკიდებულებაში; ყმურ დამოკიდებულებათა წარმოქმნა ფეოდალურ საზოგადოებას თან სდევს მისი არსებობის მთელ მანძილზე, რასაც ცხადყოფს როგორც სვანური საბუთების და ხევსურული ჯვარისყმობის ინსტიტუტის, ისე ლეონტი მროველთან, „ძეგლი ერისთავთა“-ში და სხვა წყაროებში დაცული მასალების შესწავლა.

* * *

პონტოს სამეფოს არსებობის ხანაში ქართველური ტომები პონტოს მეფის მოხარკეები არიან: ხარკი, რომელიც ისედაც მძიმე უნდა ყოფილიყო, განსაკუთრებით მძიმდებოდა „მითრიდატეს ომების“ პერიოდში, რომლებიც რამდენიმე ათეულ წელი გრძელდებოდა. რომაელთა გაბატონებას ამ მხრივ არაფერი შეუცვლია; სახარკო გადასახადები დიდად აფერხებდა ადგილობრივი მეურნეობის განვითარებას და მახინჯ ფორმებს აძლევდა მას. რომაელთა ბატონობა, შეიძლება ითქვას, მისი მახინჯი საგადასახადო სისტემით განსაკუთრებით აუტანელი უნდა ყოფილიყო.

მათი ერთსაუკუნოვანი ბატონობა პონტოსპირეთში, ქართველური ტომების დიდი აჯანყებით დაგვირგვინდა; მძიმე ხარკი, ამკრეფთა გამომძალველობა, რაც უაღრესად უხეში ფორმებით მიმდინარეობდა, ვაჭრობის შეზღუდვა, ე. წ. „თანამოლაშქრობა“ და ა. შ. სულს უხუთავდა ადგილობრივ ტომებს, ხოლო ვესპასიანეს საგადასახადო ღონისძიებანი 60-იანი წლების დამლევს ის წვეთი იყო, რომელიც მოთმინების ფიალის ავსებას აკლდა. ახალი წელთაღრიცხვის I საუკუნის დამლევს შემდეგ რომაელთა უშუალო გავლენა პონტოსპირეთის ტომების ცხოვრებაზე უაღრესად სუსტდება და თანდათანობით რომაელთა სიუხერენობის ფორმალურ აღიარებამდე მიდის – ეს ადგილობრივი ძალების დიდი გამარჯვება იყო.

როგორია ადგილობრივ ტომთა მეურნეობის ხასიათი?

როგორც ვალერი კატულის,⁵⁰¹ ვირგილი მარონის⁵⁰² სტრაბონის,⁵⁰³ ვალერი პრობის⁵⁰⁴, ვალერი ფლაკის⁵⁰⁵, დიონისეს⁵⁰⁶, ამიანე მარცელინის⁵⁰⁷ და რიგი სხვა ავტორების ცნობებზე დაკვირვებიდან ირკვევა, სამხრეთ სანაპიროზე ხალიბთა მიწა კვლავ **ლითონის დამუშავებითაა** ცნობილი; ანტიკურ ლიტერატურაში მათი სახელი ნაწილობრივ ტრადიციით, ნაწილობრივ – წარმოების ძველი დარგის კვლავ არსებობით, არაერთი ავტორის ყურადღების საგანი ხდება, მაგრამ, სამწუხაროდ, ჩვენ სრულებით არაფერი ვიცით, თუ როგორი ცვლილებები მიმდინარეობს იმდროინდელი წარმოების ტექნიკაში, რომელსაც ქართველური ტომები მეტალურგიულ წარმოებაში იყენებენ. ეს აიხსნება არა მარტო და არა იმდენად ანტიკურ ლიტერატურაში დაცული ცნობების სიმცირითა და სიმშრალით, რამდენადაც სამხრეთ სანაპიროების არქეოლოგიური კვლევის სრული უქონლობით. როგორც სტრაბონის ცნობიდან ირკვევა, ლითონის მოპოვება უპირატესად ქვეყნის სიღრმეში, მთებში მცხოვრებ თემებს უწარმოებიათ, ხოლო ზღვის სანაპიროზე მცხოვრებლები მეთევზეობით (და ალბათ, მიწათმოქმედება-მესაქონლეობით) მოიპოვებდნენ ცხოვრებისთვის საჭირო სახსარს. სამხრეთ სანაპიროს ტომების მეურნეობაში მნიშვნელოვანი ადგილი სჭერია **მეფუტკრეობას**. მართალია,

⁵⁰¹ Val. Cat., XVI, 48-50. SC, II, 13.

⁵⁰² Verg. Mar., I, 56-59. SC, II, 14.

⁵⁰³ Strab., XII, 3, §19. SC, I, 158.

⁵⁰⁴ Val. Prob., I, 56. SC, II, 25.

⁵⁰⁵ Val. Flac., IV, 610 ... SC, II, 202.

⁵⁰⁶ Dionis., 761-774. SC, I, 186-187.

⁵⁰⁷ Fmm. Marc., XXII, 8 §20. SC, II, 325.

ანტიკური ავტორები ცუდი აზრისა არიან აქაური თაფლის თვისებების შესახებ, რაზედაც მათ ერთგვარი საფუძველი გააჩნდათ, მაგრამ ისინი ძალიან აქებენ აქაურ *ცვილს* და *ფისს*. პლინი სეკუნდის ცნობიდან ირკვევა, რომ სანებს რომაელებისათვის ხარკად (intributa) ცვილი უძლევიან, რომელიც მუქი ყვითელი ფერის, სუფთა და თაფლის სურნელის მატარებელი ყოფილა.⁵⁰⁸ სწორედ ასეთი თვისებების მატარებელია ცვილი, რომელსაც დღესაც ამზადებენ გურია-აჭარის მთის რაიონის მცხოვრებლები. მეფუტკრეობა მნიშვნელოვანი უნდა ყოფილიყო არა მარტო სამხრეთ სანაპიროს ტომებისათვის, არამედ, როგორც სტრაბონის ცნობებიდან ირკვევა, კოლხეთისათვისაც.⁵⁰⁹ მართალია, პონტოსპირეთის თაფლი ბერძნულ-რომაულ სამყაროში საჭმელად არ გამოიყენებოდა, მაგრამ მას, როგორც კლავდი ელიანის ცნობიდან ირკვევა, იყენებენ სამკურნალოდ.⁵¹⁰

როგორც სტრაბონის ცნობებიდან ჩანს, პონტოსპირეთის ქართველურ ტომებში განაგრძობს არსებობას მეურნეობის ტრადიციული დარგები: ხეცყის დამზადება (ამის შესახებ იხსენიებს არიანეც), სამთამაღნო წარმოება, სელისა და კანაფის წარმოება, მეთევზეობა, მეფუტკრეობა, მეხილეობა და ა.შ.⁵¹¹ ბარისა და მთის მეურნეობა კვლავინდებურად სხვადასხვა ხასიათისაა; მთიელები, სტრაბონის ცნობით, მეტწილად ნადირის ხორციით, ველური ხილით და რძით იკვებებოდნენ თურმე, ხოლო ბარში მათთვის საჭირო საქონლის, კერძოდ მარილის, შესაძენად ჩამოდიოდნენ.⁵¹² მართალია, სტრაბონი კოლხიდას ახასიათებს ნაყოფით მდიდარ ქვეყნად (ἀγαθή δ᾽ἔστιν ἡ χώρα καὶ καρποῦν...), მაგრამ არაფერს ამბობს მარცვლეულის შესახებ. ანტიკურ ლიტერატურაში საერთოდ, და ჩვენთვის საინტერესო ხანისთვის კერძოდ, მემინდვრეობაზე თითქმის არა გვაქვს ცნობები. პრისკე პანიონელის (VI ს.) ერთი ცნობიდან ვიგებთ, რომ ლაზიკაში ხორბალი უთესიათ,⁵¹³ ხოლო VI საუკუნის დამლევის ავტორი აგათია სქსოლასტიკოსი გადმოგვცემს, რომ „ლაზების ქვეყანა

⁵⁰⁸ Plin., XXI, 77, SC, II, 193.

⁵⁰⁹ მეფუტკრეობაზე და მის რიტუალებზე იხილეთ: ალ. რობაქიძე, მეფუტკრეობა გურიაში, მასალები საქართველოს ეთნოგრაფიისათვის. V. 1953 წ. მისივე, К вопросу о пчеловодстве в Грузии, КСИЭ, УШ, 1949.

მისივე, მეფუტკრეობასთან დაკავშირებული ერთი ჩვეულების შესახებ, მიმომხილველი, III. 1953წ.

⁵¹⁰ Claud. Ell., V, 42; SC, I, 603.

⁵¹¹ Strab., XI, 2, §17; SC, I, 136-137

⁵¹² იქვე XI, §6, SC, I, 147.

⁵¹³ Fr., 22; SC, I, 847.

გამოირჩევა მიწა-წყლის სიჭარბითა და მოსავლიანობით“.⁵¹⁴ აგათიას უფროსი თანამედროვე პროკოპი კესარიელი ლაზიკას საერთოდ ღარიბ ქვეყნად წარმოადგენს, მაგრამ აქ გამოყოფს ერთ ოლქს, ე. წ. მუხურისს, რომელიც კოლხიდაში ყველაზე უხვმოსავლიანი და მდიდარი რაიონი ყოფილა, სადაც „ღვინოც კარგი მოდის, სხვა ნაყოფნიც კარგად ხარობენ“ და მჭიდროდ დასახლებული სოფლებიც მრავალია («...ἢ Μοχήρησιν...πολλὰς καὶ πολυανθρώπους κώμας ἔχουσα καὶ γῆς τῆς Κολχίδος αὕτη μάλιστα ἢ ἀρίστη ἐστὶν ἐπεὶ καὶ οἶνος ενταῦθα καὶ οἱ ἄλλοι καρποὶ ἀγαθοὶ φύονται καίτοι τὰ γε ἄλλα τῆς Λαζიკῆς οὐ ταύτῃ ἔχει»). როგორც ს. ჯანაშია აღნიშნავს, მუხურისი შეადგენდა დასავლეთ საქართველოს საკმაოდ მოზრდილ რაიონს, რომელიც ქუთაისის, მაიაკოვსკის (ბაღდადის), ვანის, სამტრედიის, აბაშის და გეგეჭკორის /მარტვილის/ რაიონების ვაკეს მთლიანად ან ნაწილობრივ ფარავდა და მოგვიანებით „სამოქალაქოდ“ იწოდებოდა.⁵¹⁵ აგათიას ცნობით, აქ ქვრიმა (ἔλυμός) და ასლიც (ζείας) მოდიოდა. შესაბამისი ხანის არქეოლოგიური ნუმიზმაკური მასალები, რომლებიც გათხრებისა თუ შემთხვევების წყალობით არის მოპოვებული, ადასტურებენ, რომ I-IV საუკუნის დასავლეთ საქართველო და სამხრეთ სანაპიროები განაგრძობენ სამეურნეო განვითარების ძველ ხაზს და ამოვარდნილი კი არ არიან განვითარების საერთო კალაპოტიდან, არამედ, პირიქით, დასტურდება, რომ დასავლურ-ქართული ტომები, ავითარებენ რა წინა თაობათა მონაპოვარს, შემოქმედებითად ითვისებენ უცხოელთა მიღწევებს და თავიანთს უზიარებენ მათ. სტრაბონი იბერიას მეტად მაღალგანვითარებული კულტურის ქვეყნად გვიხატავს (XI. 3 §1). ხოლო როგორც წერილობითი წყაროების, ისე არქეოლოგიური მასალის ურთიერთშედარება ცხადყოფს, რომ კოლხეთი, თუ მაღლა არ იდგა, არაფერით ჩამოუვარდებოდა იბერიას. ურეკში, სოხუმში, ვანში, ბორში, დაბლაგომში, კლდეეთში, ბიჭვინთაში, პეტრაში, ნოქალაქევში, ფოთში, ქუთაისში, ჩხოროწყუში და ძველი კოლხიდის სხვა პუნქტებში მოპოვებული მატერიალური კულტურის ნაშთები ამის საუკეთესო დადასტურებაა. შესაბამისი ხანის დასავლურ-ქართული მასალები უთითებენ როგორც ეკონომიური ცხოვრების მჩქეფარებასა და

⁵¹⁴ Agath., III, 5, გეორგიკა, III,50.

⁵¹⁵ ჯანაშია ს., ეგრისის სამეფოს წარმოშობა, შრ. II, თბ., 1952, 320-321

სოციალურ დიფერენციაციაზე, ისე ხელოვნებისა და კულტურის⁵¹⁶ და-
წინაურებულობაზე და ხელოსნობის მრავალსახიანობაზე.

წერილობითი წყაროებითა და არქეოლოგიურ-ნუმისმატიკური მასა-
ლებით ირკვევა, რომ დასავლურ-ქართული ტომების მეურნეობაში ალებ-
მიცემობას გარკვეული მნიშვნელობა ჰქონია. მას ეკონომიური ურთიერ-
თობა აქვს როგორც ჩრდილოეთისა და აღმოსავლეთის, ისე სამხრეთისა
და დასავლეთის ქვეყნებთან, მაგრამ ძირითადად ისინი დასავლეთის ქვეყ-
ნებთან ჩანან დაკავშირებული როგორც კულტურულ, ისე ეკონომიკურ
სფეროში.

საშინაო ბაზარი რაიონებსა და ტომებს შორის მოსაქმეობის დანაწი-
ლების გამო ძლიერდება, რასაც ხელს უწყობს მიმოსვლის საშუალებათა
და გზების გაუმჯობესება, რაც რომაელთა ხანაში უფრო საგრძნობი
ხდება. რომაელთა ღონისძიებები ამ მხრივ მიზნად ისახავს არა ადგი-
ლობრივ ტომთა ეკონომიკისა და ყოფის გაუმჯობესებას, არამედ იმპე-
რიის სტრატეგიული მდგომარეობის გაუმჯობესებას და ხაზინის შემო-
სავლის გადიდებას. რომაელთა ხანაში განსაკუთრებით გაცხოველდა
საგარეო ვაჭრობა, მაგრამ იგი რომაელთა პოლიტიკური ბატონობის გამო
შეზღუდულია მათი ინტერესების შესაბამისად.

ალება-მიცემობის (საგარეო და საშინაო) გაცხოველების შედეგად
განსაკუთრებით წინაურდება ზღვისპირა და საქარავნო თუ სამდინარო
მაგისტრალების მიყოლებით მდებარე ქალაქები – ტრაპეზუნტი, ფარ-
ნაკია, აფსარი, ფაზისი, დიოსკურია, პიტიუნტი, ქუთაისი, არქეოპოლისი
და სხვები. ბიჭვინთის არქეოლოგიურმა გათხრებმა ცხადყო, რომ I-IV
საუკუნისათვის ეს ქალაქი მჩქეფარე ცხოვრებით ცხოვრობდა, ამისივე
მოწმობა უნდა იყოს პლინი სეკუნდთან და ზოსიმთან დაცული ცნობებიც.
აღნიშნულ პერიოდში განსაკუთრებით დაწინაურებული ჩანს დიოსკურია,
რომელიც სტრაბონის ცნობით, ადგილობრივი ტომების საბაზრო ადგილი
ყოფილა. იქ, მისი სიტყვით, 60 ტომი იყრიდა თავს.⁵¹⁷ სადაც პლინი
სეკუნდის ხანაში რომაელები თავიანთ ოპერაციებს 130 თარჯიმნის შემ-
წევობით აწარმოებდნენ. ზღვისპირა ქალაქებში განსაკუთრებული ადგილი
ეჭირა ფაზისსა და ტრაპეზუნტს. ტრაპეზუნტი აღმოსავლეთიდან მომავა-

⁵¹⁶თემისტეს ცნობიდან ირკვევა, რომ ლაზიკაში არსებული განათლების
ცენტრები, სადაც სასწავლებლად მცირე აზიიდანაც კი მოდიოდნენ თურმე. იხ.
SC, I, 696. ს. ყუახნიშვილი, როტორიკული განათლების ცენტრები ძველ
კოლხეთში, საქ. სახ. მუხ. მოამბე X-B, 1940წ., 334.

⁵¹⁷ Strab., XI, 2, § 16. SC, I, 136.

ლი უდიდესი საქარავნო გზის წვეროში მდებარეობდა, ხოლო ფაზისი ფასიდ-პირკანიის გზის დასასრულს, რომელიც ცენტრალურ, სამხრეთ და აღმოსავლეთ აზიას შავი და ეგეოსის ზღვის აუზების ქვეყნებს უკავშირებდა.

ვირგილი მარონის, სტრაბონის, პლინი სეკუნდის, სენეკას, არიანეს და სხვა ავტორების შრომათა საფუძველზე შეიძლება შევადგინოთ სია იმ საქონელთა, რომლის მიწოდება ქართველურ ტომებს საგარეო ბაზრისათვის (აქ ძირითადად რომაული სამყარო იგულისხმება) შეეძლო: ხე-ტყე, ლითონები და მათი ნაწარმი, სანთელი, ფისი, სელი, კანაფი, ბეწვეული და ტყავი, ნანადირევი და თევზეული, ხილი, მონები, სამკურნალო საშუალებები - castorea, (თახვის ყაირა), acora, თაფლი, (აღიარებული იყო ეპილეფსიის სამკურნალო საშუალებად), და ა. შ. ცხადია, ეს სია სრული არ არის და მასში აუცილებლად უნდა ვიგულისხმოთ ხელოსნობის ნაწარმიც. მაგრამ კოლხიდა და სამხრეთ სანაპიროები საგარეო ბაზრს აწვდიან არა მარტო საკუთარ ნაწარმს, არამედ შუამავლობენ აღმოსავლეთისა და დასავლეთის ალებ-მიცემობაში. ეს როლი განსაკუთრებით ძლიერდება რომაელთა პოლიტიკური გავლენის შემცირების პარალელურად. იმ ხანაში, როდესაც რომაელებმა ამიერკავკასია დაიმორჩილეს, იმპერიისათვის აღმოსავლეთთან ვაჭრობას განსაკუთრებული მნიშვნელობა მიეცა, მაგრამ თავისუფალ კავშირს აფერხებდა ჯერ არშაკიდების, შემდეგ კი სასანიდების ირანი. კოლხიდაზე გადამავალი სავაჭრო გზა ირანზე შემოვლით უკავშირდებოდა კასპიის გაღმა მდებარე ქვეყნებს და ამდენად რომაელებისათვის მას განსაკუთრებული მნიშვნელობა ჰქონდა. ნერონის ცნობილი ექსპედიცია 60-იანი წლების დამდეგს, სხვათა შორის, ამ გზის ხელში ჩაგდებასაც ისახავდა მიზნად.⁵¹⁸ ეს გზა, მართალია, უძველესი დროიდან მოქმედებდა, მაგრამ (პირველი წერილობითი ცნობები მის შესახებ ანტიკურ ლიტერატურაში გარკვევით ელინისტური ხანისათვის ჩნდება, ჰეროდოტეს ცნობა ანგარიშში მისაღები არ არის) რომაელთა ხანაში იგი განსაკუთრებულ მნიშვნელობას იძენს და მათი საგანგებო ზრუნვის საგნად იქცევა – ეს აღმოსავლეთთან ვაჭრობის დიდი მნიშვნელობითაა გამოწვეული. ახალი წელთაღრიცხვის დასაწყისში აღმოსავლეთის ქვეყნები დასავლეთს აწვდიან იმ დროისთვის ფართო სიის საქონელს. ინდოეთი – ბრინჯს, ბამბის ქსოვილს, ბამბის

⁵¹⁸ Гайдукевич В.Ф., Боспорское царство, стр. 331, Манандян Я., Цель и направление ..., Вопр. Истор., №7, 1946, стр. 66

ნელეულს, პილპილს, ძვირფას ქვებს, მარგალიტს, შავ ხეს, საღებავებს, სპილოს ძვალს და ა. შ. ჩინეთი – ძირითადად აბრეშუმსა და აბრეშუმის ქსოვილებს. დასავლეთის ქვეყნებიდან აღმოსავლეთში მიდის – ტყვია, კალა, სპილენძი, ოქრო, ეგვიპტური და სირიული მხატვრული ქსოვილები და მინის ნაწარმი და ა. შ. მაგრამ დასავლეთს აღმოსავლეთთან ვაჭრობაში აქტიური ბალანსი თითქმის არასოდეს ჰქონია, რაც ნაღდი ფულით (ოქრო-ვერცხლი) იფარებოდა; პლინი სეკუნდი აღშფოთებით აღნიშნავს (XII, 41). რომ მისი დროის რომაელებს კომფორტი და ცოლები 100 მილიონი სესტერცია უჯდებოდათ წელიწადში; მკვლევართა აზრით, ეს ის თანხაა, რომლის გაღება რომს უხდებოდა აღმოსავლეთთან ვაჭრობის ბალანსის გასასწორებლად.⁵¹⁹ საკმარისია აღინიშნოს, რომ I-II საუკუნეში აბრეშუმი თითქმის ოქროს წონაზე იცვლებოდა, ხოლო III საუკუნის პირველი მეოთხედიდან სასანიდური ირანი გადაულახავ ზღუდედ აღიმართება ე. წ. „აბრეშუმის გზაზე“. იმპერიის ცდები – თავი დაეღწია ირანელთა შუამავლობისათვის აბრეშუმით ვაჭრობაში – წარმატებით არ დაგვირგვინებულა. აბრეშუმის საკითხის გადაჭრა მან თავის მემკვიდრე ბიზანტიის იმპერიას უანდერძა.

შინაური ბაზრის მოთხოვნილების დასაკმაყოფილებლად კოლხიდაში I-II სს-ში გრძელდება ადგილობრივი მონეტის გამოშვება. რომაელთა ბატონობის დასაწყისი ხანისათვის შემორჩენილია არისტარხეს სახელით გამოშვებული მონეტა (ძვ. წ. 52/51 წწ.).⁵²⁰ ამავე დროს აღმოსავლეთის ქვეყნებში განსაკუთრებულ გავრცელებას პოულობს ოქტავიანე ავგუსტის ღინარები. მკვლევარები ფიქრობენ, რომ ეს ღინარები სპეციალურად აღმოსავლეთის ქვეყნებისათვის იჭრებოდა, სადაც მას მეტოქეობას უწევს პართული დრახმები. პართელების ეკონომიური ბატონობა აღმოსავლეთში აიძულებს რომაელებს გამოუშვან პართული დრახმების თანაბარწონიანი ნიშნები.

იმპერიის სუსტი კავშირი პროვინციებთან და დამოკიდებული ხალხების მეურნეობასთან, აპრობებს უკანასკნელთა ეკონომიური ცხოვრების აღმავლობის შეუფერხებლობას იმ დიდი კრიზისებისა და რყევების ხანაში, რომელსაც იმპერია ჩვენთვის საინტერესო პერიოდში განიცდიდა.

⁵¹⁹ Манандян Я., О торговле ..., стр. 75-76.

⁵²⁰ კაპანაძე დ., ქართული ნუმიზმატიკა, 32 და შემდ. Манандян Я., О торговле ..., стр. 83. Зограф А.Н., Распространение находок античных монет на Кавказе, Тр. Отд. Нумизм., Гос. Эрмитажа, Л., 1945. Пахомов Е.А., Монетные клады ..., Б., 1926.

ბიზანტიის იმპერიის წარმოქმნის დროისათვის შავიზღვისპირეთის სანაპირო მონაკვეთზე უკვე სხვა პოლიტიკური სიტუაციაა, რომლის მიხედვითაც წარმოებს ეკონომიური ურთიერთობა დასავლეთთან, მის ხასიათზე ქვემოთ გვექნება საუბარი, როცა ზანთა სამეფოს ისტორიას შევხებით.

§2 პოლიტიკური მდგომარეობა I-IV სს.

ძვ. წელთაღრიცხვის 65 წლიდან, როგორც აღვნიშნეთ, კოლხეთი და სამხრეთ სანაპიროს ტომები რომაელთა ბატონობის ქვეშ ექცევიან.

რომაელთა მისწრაფება აღმოსავლეთში დაპყრობებისკენ და მათი წარმატებები ორი ძირითადი მიზეზით იყო შეპირობებული:

1) მონათმფლობელური საზოგადოების კრიზისით რომში, და 2) ელინისტური აღმოსავლეთის კრიზისით, მაგრამ ეს იყო ორი, მონათმფლობელური განვითარების სხვადასხვა საფეხურზე მყოფი, საზოგადოების კრიზისი. ელინიზმი ამ განვითარების შუა საფეხურს წარმოადგენდა, ხოლო რომი - უმაღლესსა და უკანასკნელს; ელინიზმს, განვითარების თავისებურებათა გამო, მისჯილი ჰქონდა ამ კრიზისის შედეგად დაცემულიყო, ხოლო რომმა იგი ახალი მსოფლიო (იმდროინდელი გაგებით) სახელმწიფოს შექმნით გადაჭრა, ცხადია, დროებით. ძველი წელთაღრიცხვის I საუკუნის დამდეგს რომი ღრმა სოციალური, ეკონომიკური და პოლიტიკური კრიზისის ხანაში შევიდა, რომლის დროებითი გადაჭრა მან სამხედრო დიქტატურაში (იმპერია) კპოვა.⁵²¹ სწორედ ასეთ პერიოდში ხდება რომაელების მიერ ამიერკავკასიის ქვეყნების დაპყრობა. რომაელი სარდალი პომპეუსი, რომელმაც ეს დაპყრობები განახორციელა, ამიერკავკასიის ქვეყნებს, იმის მიხედვით, თუ რომელი ქვეყანა როგორ დამოკიდებულებაში იყო პონტოს სამეფოსგან, სხვადასხვანაირად მიექცა, ზოგი რომის მოკავშირეებად ჩარიცხეს (იბერია, არმენია), ზოგან ახალი მმართველები დანიშნეს (კოლხიდა, სამხრეთ სანაპირო), ხოლო ზოგი პროვინციად გააერთიანეს (პონტო და ბითინია). რომაელებთან დამოკიდებულება ჩვენთვის საინტერესო ხანაში ერთნაირი არ იყო მთელ სივრცე-

⁵²¹ Ранович А.Б., Восточные провинции Римской империи в I-III вв. М.-Л., 1949, стр. 14, 31. Машкин Н. А., Принципат Августа, М.-Л., 1949, стр. 9 и сл. 74 и сл.

ზე: პომპეუსი, როგორც ჩანს, ანგარიშს უწევდა ადგილობრივ თავისებურებებს, მაგრამ იგი ძირითადად იმ გარემოებიდან გამოდიოდა, თუ რა შესაძლებლობა ჰქონდა რომს, ალებულ ხანაში, პროვინციების პოლიტიკურ და ეკონომიურ ცხოვრებას რომ გაძლოდა. რომს იმ ხანაში საამისო კადრი არ გააჩნია, ამიტომ იგი იძულებულია მმართველობისთვის ადგილობრივი ძალები გამოიყენოს.⁵²² რამდენადაც კოლხიდა პონტოს სამეფოს შემადგენელ ნაწილად იყო გაგებული რომაელების მიერ, პომპეუსმა იქ თავისი კაცი, არისტახნი დააყენა მმართველად. ფესტი (IV ს.) ირწმუნება, რომ არისტახნი მეფე იყო და არა მარტო კოლხეთის, არამედ ბოსფორისსაცაო.⁵²³ ევტროპის სიტყვითაც, არისტახნი მეფე ყოფილა, მაგრამ მხოლოდ კოლხიდასა.⁵²⁴ ფესტი ცდება, როცა არისტახს ბოსფორის მეფის გვირგვინით ამკობს, რადგან იქ ამ დროს ფარნაკ მითრიდატის-ძე მეფობს და არისტახნისათვის ადგილი აღარ იყო. ასევე შეცდომას უშვებენ ევტროპი და ფესტი, როცა არისტახს მეფედ /rex/ მიიჩნევენ, რომელიც, როგორც მის მიერ 52-51 წწ. გამოშვებული მონეტის ზედწერილად ჩანს, კოლხების „მეფის“ სახელს კი არ ატარებს, არამედ „წინამძღოლისა“ (Ἀριστάχου τοῦ ἐπὶ Κόλχιδι, Βί).⁵²⁵ ცხადია, ის რომაელი მმართველია და არა კოლხების მეფე; პომპეუსის განაწილების შედეგად სხვა ერთეულში მოყვნიენ სამხრეთ სანაპიროების ტომები. სტრაბონი გადმოგვცემს, რომ სამხრეთ სანაპიროები გადილონიტიდის ნაწილით (ნაწილი ამისის მცხოვრებლებს სჭერიათ) პომპეუსმა დეიოტარს-გალატების ერთ-ერთ ტეტრარხს გადასცაო; აქ შედიოდა მთელი ტერიტორია კოლხიდასა და მცირე არმენიამდეო. დეიოტორის სიკვდილის შემდეგ, სტრაბონის სიტყვით, მისი საგამგეო მრავალ სამეკვიდრედ /διαδοχαι/ დაიშალა.⁵²⁶

ძველი წელთაღრიცხვის 48 წელს კოლხეთი და სამხრეთ სანაპიროები ბოსფორის მეფემ ფარნაკ მითრიდატის-ძემ დაიპყრო, მაგრამ სამოქალაქო ომში გამარჯვებული ცეზარი ამარცხებს მას და სდევნის აზიიდან. ყირიმში დაბრუნებული ფარნაკი ძვ. წ. 47 წელს ილუპება ტახტის მოცილე ასანდრის ხელით.⁵²⁷

⁵²² Ранович А.Б., იქვე, 23.

⁵²³ Fest., XVI. SC, II, 323.

⁵²⁴ Eutr., VI, 14. SC, II, 319.

⁵²⁵ კაპანაძე დ., ქართული ნუმიზმატიკა, 32.

⁵²⁶ Strab., XII, 3, §13. SC, I, 157.

⁵²⁷ App., 120. ВДИ, 1948, №1, стр. 291.

ძველი წელთაღრიცხვის 42 წელს ტრიუმვირებსა და რესპუბლიკელებს შორის მომხდარ ბრძოლაში რესპუბლიკელების დამარცხების შემდეგ აღმოსავლეთი ანტონიუსის ხელში გადავიდა, რომელმაც პონტო კვლავ სამეფოდ აქცია და იქ მეფედ პოლემონი დანიშნა. იგი გახდა დინასტიის ფუძემდებელი, რომელიც ახალი წელთაღრიცხვის 63 წლამდე მართავდა პონტოს სამეფოს.⁵²⁸ პოლემონსვე დაევა ბოსფორის სამეფოს შემოერთებაც. 14 წელს პოლემონი დაეუფლა ბოსფორის სამეფოს, მაგრამ 8 წელს დაიღუპა ასპურგიანებთან ბრძოლაში. სტრაბონი გადმოგვცემს, რომ მის დროს კოლხიდას ფლობდა ჯერ პოლემონი, ხოლო მისი სიკვდილის შემდეგ კოლხებზე, ტრაპეზუნტზე, ფარნაკიაზე და მის ზემოთ მცხოვრებ „ბარბაროსებზე“ მეფობდა პოლემონის ქვრივი პითოდორიდა.⁵²⁹ მეორეგან სტრაბონი გვამცნობს, თუ ვის გულისხმობს იგი ამ ბარბაროსებში, – ესენი ტიბარენები და ხალდეები ყოფილან.⁵³⁰ მგვარად, კოლხიდა და სამხრეთ სანაპიროს ქართველური ტომები პოლემონის პონტოს სამეფოში ყოფილან გაერთიანებული. კოლხეთის პოლემონის პონტოში გაერთიანება, მ. ინაძის აზრით, ძვ. წ. 14 წლის ახლოს უნდა მომხდარიყო, როცა ოქტავიანემ პოლემონის ხელით პონტო და ბოსფორი ერთ სამეფოში გააერთიანა.⁵³¹ რა მნიშვნელობა ჰქონდა კოლხიდასა და სამხრეთ სანაპიროს ჩვენთვის საინტერესო მონაკვეთს რომის იმპერიისათვის? 1) კოლხიდა და სამხრეთ სანაპიროები წარმოადგენდა ერთგვარ პლაცდარმს რომის შემდგომი ექსპანსიისათვის როგორც აღმოსავლეთში, ისე ჩრდილოეთისაკენ. ამ სანაპიროებზე არაერთი მნიშვნელოვანი ნავსადგურია, რომლებიც აღმოსავლეთში მოქმედი რომაული არმიის მომარაგების პუნქტები ხდება და კეთილმოწყობილი გზებით უკავშირდება ახლო აღმოსავლეთის ქვეყნებს. მეორე მხრივ, ეს ოლქი იძლევა დამხმარე ჯარების გარკვეულ რაოდენობას, რომლებიც ადგილობრივი სარდლების ხელმძღვანელობით მონაწილეობენ რომაელების ლაშქრობებში; ამასთან, კოლხიდა მნიშვნელოვან როლს ასრულებს „მოკავშირე“ იბერიის მორჩილებაში ყოლის საქმეში. კოლხიდა იბერიის ერთ-ერთ უახლოეს მეზობელს წარმოადგენდა, საიდანაც იბერიისაკენ იმ დროისათვის ერთ-ერთი მნიშვნელოვანი გზა გადადიოდა. ასევე, სამხრეთ სანაპიროები გადა-

⁵²⁸ Голубцова Е.С., Северное Причерноморье и Рим на рубеже нашей эры, М., 1951, стр. 74.

⁵²⁹ Strab., XI, 2, §18; SC, I, 138.

⁵³⁰ Strab., XII, 3, §29; SC, I, 160-161.

⁵³¹ ინაძე მ., ფლავიუს არიანე ..., 104-108.

სასვლელებით უკავშირდება იბერიის სამხრეთ რაიონებს და არმენიას. განსაკუთრებული მნიშვნელობა ეძლეოდა კოლხიდას, როგორც პლაცდარმს, ბოსფორის სამეფოს დამორჩილების საქმეში, რომელთანაც იგი ეკონომიური დაფებითაც იყო დაკავშირებული; 2) კოლხიდა და სამხრეთ სანაპიროები წარმოადგენდა საკმაოდ მდიდარ რაიონს, რომელსაც რომის ხაზინისათვის საკმაოდ დიდი შემოსავლის მიცემა შეეძლო. რომაელები დიდ შემოსავალს იღებენ ვაჭრობიდანაც და ხარკის სახითაც, ამ მხრივ დამახასიათებელია პლინი სეკუნდის ცნობა, რომლის მიხედვითაც დიოსკურიაში რომაელები თავის საქმეებს (Negotia) 130 თარჯიმნის მეშვეობით აწარმოებდნენ თურმე.⁵³² სტრაბონის ცნობით, კოლხიდა და სამხრეთ სანაპიროები იძლეოდა საალმშენებლო ხე-ტყეს, სელს, სამთამადნო ნაწარმს, კანაფს, ცვილს, ფისს, ხილეულს და ა. შ. რომაელები დაპყრობილ ქვეყნებს ისე უყურებდნენ, როგორც ნადავლს, რომელსაც დაპყრობისას საფუძვლიანად დარცვავენ, ხოლო შემდეგ საძარცვავედ პროკონსულებს, პუბლიკანებსა და მევანშეებს აძლევდნენ. მართალია, იმპერიის ხანაში დარცვამ უფრო კანონიერი ხასიათი მიიღო, მაგრამ პროვინციის მმართველებისა და პუბლიკანების თვითნებობისაგან ადგილობრივი მოსახლეობის დაცვა არ ხერხდებოდა, რაც არაიშვიათად ცენტრალური ხელისუფლების ჩარევასაც იწვევდა, რომელიც იძულებული ხდებოდა მადამოჭარბებული მოხელეები სასამართლო პასუხისგებაში მიეცა. თუ როგორი დარცვა ხდებოდა პროვინციებისა, ჩანს იმ ფაქტიდან, რომ 100-105 წლებს შორის პასუხისგებაში იქნენ მიცემული პონტოსა და ბითინიის პროკონსულები იულიუს ბაასი და ვარენიუს რუფი. ტიბერიუსის დროს (14-37 წწ.) სასამართლოს გადასცეს მარტელა გრანი, ხოლო კლავდიუსის დროს (37-54 წწ.) კადიუს რუფი.⁵³³ ცხადია, ეს ის მაგალითებია, რომლებზეც გამოხმაურება ცენტრალურ ხელისუფლებას აუცილებლად უცვნია. იმ ოლქის მოსახლეობა კი, რომლის დარცვისათვის ეს პირები სასამართლოში იქნენ მიცემული, პროცესიდან ვერავითარ სარგებელს ვერ ნახულობდნენ. მართალია, კოლხიდასა და სამხრეთ სანაპიროს შიდა რაიონებზე რომაელებს ხელი არ მიუწვდებოთ მაინცადამაინც, მაგრამ ზღვის სანაპირო ქალაქები მათი აქ ბატონობის იარაღია. ეს ქალაქები მის ირგვლივ მდებარე ტერიტორიებზე პოლიკური ბატონობისა და ეკონომიურად მთელი მხარის დაქვემდებარების პუნქტები

⁵³² Plin., VI, 15. SC, II, 179.

⁵³³ Ранович А.Б., Восточные провинции Римской империи в I-III вв., 1949, 76.

ხდებიან. ზღვისპირა ქალაქებს სანაპირო ტომებს მეურნეობაში იმთავითვე მნიშვნელოვანი ადგილი ეჭირა როგორც გატანის, ისე შემოტანის ხაზით. ეს ქალაქები ის პუნქტები იყო, სადაც თავს იყრიდა დასავლეთ საქართველოს ტერიტორიაზე მოსახლე ტომების ნაჭარბი საქონელი – სელის ნაწარმი, ხე-ტყე, ლითონის ნაწარმი, ცვილი, თაფლი, ხილეული და ასევე უცხოეთიდან მოტანილი საქონელი – მარილი, ხელოსნობის ნაწარმი, პური, ღვინო და ა. შ. რომაელები სარგებლობენ მათი, როგორც გამარჯვებულის, მდგომარეობით და აღებ-მიცემობას, პირველ ყოვლისა, თავიანთ სარგებლობას უყენებენ მიზნად, რის გამოც ზარალდებიან ადგილობრივი საქმოსნები, ხოლო ყველაზე მეტად – უშუალო მწარმოებლები. კოლხიდა და სანაპიროები ითვლებიან აგრეთვე მონათა მიწოდების წყაროდ. მონები გადმოყავთ ჩრდილო კავკასიიდან, ხოლო ადგილზე ტყვეთა გამტაცებლების მთელი ბანდები მოქმედებენ, რომლებიც ზღვის სანაპირო ქალაქებში მოკალათებული რომაელების მფარველობით სარგებლობენ.⁵³⁴ ყოველივე ზემოთ მითითებულის გამო რომაელებმა პონტოსპირეთის ხალხების უაღრესი სიძულვილი დაიმსახურეს, რისი ერთ-ერთი დადასტურება ჰენიოხების მიერ „უმიდრესი პიტიუნტის“ გამარცხვაშიც შეიძლება დავინახოთ.⁵³⁵ მალე, ახ. წელთაღრიცხვის I საუკუნის 60-იან წლებში, პონტოსპირეთის ქართველურ ტომთა სიძულვილმა რომაელებისადმი ზღვრულ დონეს მიაღწია, რითაც ისარგებლა 63 წელს პონტოს სამეფოს ფლოტის ყოფილმა სარდალმა ანიკეტმა. 63 წელს ასევე პროვინციად იქცა ბოსფორიც და კოლხიდაც – ამავე დროს, ნერონის მეფობის უკანასკნელ წლებში ხდება პროვინციების მთელი რიგი აჯანყებები როგორც დასავლეთში, ისე აღმოსავლეთში, რასაც ნერონის სიკვდილის შემდეგ ტახტის მოცილეთა (ვესპასიანე და ვიტელიუსი) შორის ბრძოლაც დაემატა. ის იყო, ვესპასიანე გადამწყვეტი ბრძოლისათვის ემზადებოდა (69 წ. ზაფხული), რომ ტაციტის ცნობით, „მოულოდნელად პონტოში იარაღი აღმართა მონა-ბარბაროსმა (barbarum mancipium), რომელიც ოდესღაც სამეფო ფლოტის სარდალი იყო. ეს ანიკეტი იყო – პოლემონის აზატი (libertus), რომელსაც წინათ დიდი ძალა ჰქონდა და რომელიც გულნატკენი იყო იმ ცვლილებით, (რომელთა შედეგად) სამეფო

⁵³⁴ სტრაბონის ცნობით, ეს ბანდები, რომლებიც დღე და ღამ დაეხეტებიან, მხარდაჭერას რომელ მოხელეებთან პოულობენ, ხოლო ის ოლქები, რომელთაც თავიანთი ადგილობრივი ბელადები ყავთ, უკეთეს მდგომარეობაში არიან, რადგან ეს ბელადები იბრძვიან მეკობრეების წინააღმდეგ. Strab., II, 2, §12; SC, I, 133-134.

⁵³⁵ Plin., VI, 15, §16; SC, II, 179.

პროვინციად იქცა. ვიტელიუსის სახელით მან თავის მხარეზე გადაიბირა პონტოს სანაპიროზე მცხოვრები ტომები (gentibus) და ნადავლის იმედით შეაცდინა რა აგრეთვე ყოველგვარი ლატაკნი (egentissimo), ფრიად მნიშვნელოვანი რაზმით (manus) შეიჭრა ტრაპეზუნტში, ძველთაგანვე სახელოვან ქალაქში, აშენებულში, გადმოცემის მიხედვით, ბერძნების მიერ პონტოს სანაპიროს ბოლოს. იქ განადგურებულ იქნა კოპორტა, რომელიც წინათ სამეფო დამხმარე რაზმი იყო, ხოლო მას შემდეგ, რაც რომის მოქალაქეობა მიიღეს, მათ რომაული იარაღი და ჩვენი ნიშნების დროშები ჰქონდათ, მაგრამ განაგრძობდნენ ბერძნული სიზარმაცისა და დაუდევრობის შენარჩუნებას. ანიკეტმა ასევე ცეცხლი წაუკიდა ფლოტს და რომაელებს დაცარიელებულ ზღვაზე დასცინოდა, რადგან მუცლიანემ საუკეთესო ლიბურნული ხომალდები და ყველა ჯარისკაცი ბიზანტიონში გადაიყვანა.⁵³⁶ ამის გამო ბარბაროსები, სწრაფად ააშენეს რა გემები, რომლებიც კამარებად იწოდებიან, ამაყად მიმოდიოდნენ ზღვაზე... ამ ამბებმა აიძულა ვესპასიანე სამხედრო საქმეში გამოცდილი ვირდიუს გემინის სარდლობით ლეგიონებიდან გამორჩეული ვექსელიარები გაეგზავნა. თავს დაესხა რა მტერს, რომელიც საშოვარს დადევნებული, გაფანტულიყო, გემინმა ისინი გემებზე შერეკა და სასწრაფოდ ააშენა რა ლიბურნული ხომალდები, ანიკეტი მდინარე ხობის შესართავთან მიიმწყვდია, სადაც ის თავს უშიშარად გრძნობდა, სარგებლობდა რა სედოხეზების მეფის მხარდაჭერით, რომელიც მან მოკავშირედ გადაიბირა ფულით და საჩუქრებით. მეფე პირველად იცავდა დახმარების მთხოვნელ ანიკეტს და გემინს იარაღით ემუქრებოდა, მაგრამ მას შემდეგ, რაც მას ანიკეტის გაცემისათვის ჯილდოსა და ომს შორის არჩევანი შესთავაზეს, იგი ბარბაროსებისთვის ჩვეული ვერაგობით დათანხმდა დაეღუპა ანიკეტი და გასცა ლტოლვილები, ასე მოელო ბოლო მონების ომს.”⁵³⁷ მართალია, ტაციტი ამ ფაქტს „მონების ომად” იხსენიებს, მაგრამ როგორც ნ. ბერძენიშვილმა შენიშნა, ტაციტი აქ სიტყვა-სიტყვით გასაგები არ არის”. ტაციტის ცნობით, აჯანყებაში ძირითადად პონტოს ხალხები მონაწილეობენ.⁵³⁸ ვესპასიანეს მიერ სასწრაფო ზომების მიღება ნაკარნახევი იყო შიშით, რომ აჯანყების ალი ამიერკავკასიის სხვა ქვეყნებსაც არ მოს-

⁵³⁶ ვიტელიუსის წინააღმდეგ ომისათვის.

⁵³⁷ Corn Tacit., III, 47, 48. SC, II, 248-249. ჯანაშია ს., საქართველო ადრინდელი 188-189. Болтунова А.И., Восстание Аникета, ВДИ, 1939, №2, стр. 57-58.

⁵³⁸ ჯანაშია ს., საქართველო ადრინდელი ფეოდალიზაციის გზაზე, 299-300.

დებოდა.⁵³⁹ ამიტომ იყო, რომ ასეთ კრიტიკულ ხანაში (ვიტელიუსთან გადამწყვეტი ბრძოლა ჯერ არ მომხდარიყო) მან შესაძლებლად მიიჩნია რჩეული ჯარებისა და სარდლის აქეთ გაგზავნა. ტაციტის ცნობით, აჯანყების დამარცხების გაგებისას ვესპასიანე დიდ სიხარულს მისცემია.⁵⁴⁰ როგორც ტაციტის ცნობაზე დაკვირვებით ირკვევა, აჯანყებაში ძირითადად სამხრეთ სანაპიროს ტომებს მიუღიათ მონაწილეობა, კოლხეთში კი, ს. ჯანაშიას სამართლიანი შენიშვნით, აჯანყების უკანასკნელი აქტი გათამაშებულა. შესაძლებელია, ამ დროს მომხდარიყო ჰენიონების მიერ პიტიუნტის გამარცხვა, რასაც პლინისათვის დაცული ცნობიდან ვგებულობთ.⁵⁴¹ კოლხეთის ტომების ერთგვარი პასიურობა აჯანყების პერიოდში⁵⁴² შეიძლება აიხსნას იმ გარემოებით, რომ რომაელების გავლენა მათზე (ქვეყნის სიღრმეში მაინც) მეტად სუსტია, რაც კარგად ჩანს სელოხეზების მეფის ქცევიდან. იგი მაინცდამაინც დიდ ანგარიშს არ უწევს რომაელებს, იარაღითაც კი ემუქრება მათ. ამასთან, მას საშუალება აქვს აჯანყებულთა რაზმი შეიფაროს, ისე, რომ ხელისუფლების დაკარგვის საფრთხე არ იგრძნოს. ცხადია, მას ეს ხელისუფლება რომაელებისაგან მიღებული არა აქვს. იგი ადგილობრივია წარმოშობილი. ეს კარგად იცოდა ანიკეტმაც, როცა თავის შესაფარებლად მასთან მიდიოდა და მასში მოკავშირეს ეძიებდა. სელოხეზების მეფეს ცხადია თავისი ინტერესები გააჩნია. იგი მოვალეა დაიცვას ის, ამიტომაც ანიკეტის გამცემის როლში აღმოჩნდება. მაგრამ მან გასცა არა დიდი სახალხო მოძრაობა, არამედ დამარცხებული მოძრაობის ბელადები, რომელთა სიცოცხლეც საკუთარი სამთავროს ინტერესებზე მალა ვერ დააყენა. ამ მხრივ, მისი მოქმედება, როგორც პოლიტიკური ერთეულის ჰეგემონისა, გამართლებულია. ეს ძალები დაინტერესებული არიან რომაელთა მეურვეობისაგან გათავისუფლებით და იბრძვიან კიდევ ამისათვის, მაგრამ მათი სუსტი მონაწილეობა აჯანყებაში - აჯანყების ორგანიზაციისა და პროგრამის საკითხიცაა.⁵⁴³

⁵³⁹ Болтунова А.И., Там же, стр 62.

⁵⁴⁰ იქვე, III, 48.

⁵⁴¹ Plin., VI, 16. SC, II, 179.

⁵⁴² კოლხეთის ტომებს რომ აჯანყებაში მონაწილეობა მიეღოთ, რომაელების საქმეებზე წასვლა ტრაპეზუნტში არ დასჭირდებოდათ, ისინი აქვე იპოვიდნენ მათ სებასტოპოლისში, ფაზისში, პიტიუნტში და ა.შ.

⁵⁴³ ლიტერატურა: ს. ჯანაშია, საქართველო ..., 188 და შმდგ. საქართველოს ისტორია I, 79-80. ს. ჯანაშია, საქართველო ..., 299-300. Болтунова А.И., Восстание Аникета, стр. 57-67. მ. ინაძე, ფლავიუს არიანე ..., 124-125, 340-305.

მართალია, ვესპასიანე ინარჩუნებს აღმოსავლეთს, მაგრამ ტრაიანეს (98-117) კვლავ უხდება გამდგარი კოლხეთის, იბერიის, ბოსფორის და სხვათა მეფეების კვლავ მორჩილებაში მოყვანა.⁵⁴⁴ როგორც არიანეს *Περίπλους*-ში დაცული ცნობიდან ჩანს, ეს დამოკიდებულება სამეფო ნიშნების გაგზავნაში გამოიხატებოდა.⁵⁴⁵ მისივე ცნობით, პონტოსპირეთის ქართველურ ტომებს, რომლებიც უშუალოდ სანაპიროსთან ცხოვრობდნენ, 5 სამეფო ჰქონიათ, რომელთა გვერდით ყოფილან უმეფო (*ἀβασίλευτον*) ტომებიც (ჭანები). სამხრეთ სანაპიროზე არიანე იხსენიებს მაკრონებისა და ჰენიოხების სამეფოს, რომლის მეფედაც მის დროს ანქიალი ყოფილა. დიონ კასიუსის ცნობით, ეს ანქიალი იმპერატორ ტრაიანეს პართელების წინააღმდეგ ომში ხლებია და მისგან შესაფერისი ჯილდოც მიუღია.⁵⁴⁶ ამგვარად, იგი, როგორც ჩანს, ვალდებული იყო რომაელებისათვის დამხმარე რაზმები გამოეყვანა. ასევე არიანესთან *Ἀλανική ἱστορία* რომაელეზის მოკავშირეებად იხსენიან კოლხებიც.⁵⁴⁷ მისი ცნობით, პონტოს აღმოსავლეთ სანაპიროს გაყოფებით 4 სამეფო არსებულა (ლაზების, აპსილების, აბაზგებისა და სანიგების), რომელთა მეფეები ხელისუფლებას (*Βασιλείαν*) ფორმალურად რომის იმპერატორებისაგან იღებენ,⁵⁴⁸ ფაქტობრივად კი ისინი ადგილობრივი დინასტიებია. „*Περίπλους*“-ში იმპერატორების მიერ მეფეთა დამტკიცების წესის არსებობა ტრაიანეს (98-117წ.წ.) ხანისათვისაა დადასტურებული, მაგრამ ეს იმას არ ნიშნავს, თითქოს იგი ტრაიანეს მიერ ყოფილიყო დაკანონებული.⁵⁴⁹ ასეთი წესი შეიძლებოდა არსებულიყო არა მარტო რომაელების ბატონის ხანაში, არამედ უფრო ადრეც. არიანეს დუმილი ამ საკითხზე გამოწვეულია იმით, რომ მის მიზანს ახლა არსებული მდგომარეობის აღწერა შეადგენს. მართალი უნდა იყოს მ. ინაძე, როცა ფიქრობს, რომ ტრაიანეს მიერ ქვეშევრდომობაში მიღებული კოლხები რომაელთა მოხარკეები კი არ არიან, არამედ მოკავშირეები, თანამოლაშქრენი.⁵⁵⁰ იმპერატორის მიერ მეფის დამტკიცების წესის არსებობის ასახვა უნდა იყოს მოცემული

⁵⁴⁴ Fest., C XX., SC, II, 323. Eutr., VIII, 3. SC, II, 320.

⁵⁴⁵ PPC., §15. SC, I, 222.

⁵⁴⁶ Dio Cass., XVIII, 18; ალბათ ეს ანქიალი უნდა ვიგულისხმოდ „ჰენიოხების იმ მეფეში, რომელიც ტირიდატს მოუკლავს. იხ. იქვე, LXXI, 14, §1-2. SC, I, 622.

⁵⁴⁷ Agr., 7, ВДИ, 1948, №1. 280.

⁵⁴⁸ PPE., §15, SC, I, 222.

⁵⁴⁹ მ. ინაძე ფიქრობს, ეს წესი ტრაიანეს მიერ იქნა დაწესებული. იხ. მისი, ფლავიუს არიანე ..., 136.

⁵⁵⁰ იქვე.

იული კაპიტლინის ცნობაში, რომ ანტონი პიუსმა (138-161) ლაზებს მეფედ პაკორი მისცაო.⁵⁵¹ III-IV საუკუნისათვის ჩვენი ცნობები კიდევ უფრო მცირეა, მაგრამ ამ პერიოდში რომი უმძაფრეს საშინაო და საგარეო რყევებს განიცდის და დამოკიდებულება კიდევ უფრო ფორმალური ხდება – იმპერატორები ცდილობენ ძველი „მოკავშირეები” როგორმე მორჩილებაში შეიმაგრონ, რისთვისაც არ ერიდებიან გადმობირებასა და დასაჩუქრებას. კლავდი კლავდიანის ცნობით, თეოდოსი დიდს (379-395) მოკავშირეებად ჰყავდა იბერები და კოლხები.⁵⁵² მაგრამ საკონტროლო მასალები მეტყველებენ, რომ ამ ხანისათვის უკვე ჩამოყალიბებულია ლაზთა სამეფო, რომელსაც მოუსწრია დასავლეთ საქართველოს თავისი ჰეგემონობის ქვეშ გაერთიანება. დრეპანის ცნობით, თეოდოსი დიდის დროს კოლხიდა რომაელთა ხელისუფლების გარეთაა.⁵⁵³ ასევე, კონსტანტინე დიდის დროს (306-337) რომაელებს სანაპიროები ემორჩილებიან, მაგრამ მხოლოდ ჰამფილიიდან ტრაპეზუნტამდე და სიმაგრეები ფასიდზე.⁵⁵⁴ ასევე ამიანე მარცელინის ცნობა, თითქოს ფასიდთან მდებარე ქვეყანა რომაელების მოხარკე ყოფილიყო,⁵⁵⁵ ენება აქაურ ქალაქებსა და ირგვლივ მდებარე მიწებს. იმავე ამიანე მარცელინის ცნობით, IV საუკუნის 60-იან წლებში რომაელების სამფლობელოებისა და ლაზიკის საზღვრები უკვე დადგენილია: სპარსეთის მეფის საპორის არმენიაში შეჭრის შემდეგ, გადმოგვცემს იგი, არმენიის მეფე პარა არშაკის-ძე გარბის იმ მთების ხეობაში, რომელიც ლაზიკისა და რომაელთა სამფლობელოების საზღვარს შეადგენს (*Limites nostros distermnantes et Yazicom*).⁵⁵⁶ როდის უნდა მომხდარიყო ლაზების მიერ დასავლეთ საქართველოს სამეფო-სამთავროების გაერთიანება? როგორც ს. ჯანაშიამ მიაქცია ყურადღება, ამ კითხვაზე პასუხის გასაცემად ბერძნულ საისტორიო მწერლობაში მენანდრესთან დაცული ცნობა იძენს გადამწყვეტ მნიშვნელობას.⁵⁵⁷ მენანდრეს სიტყვით, ბიზანტიელი ელჩი პეტრე ირანის შაჰს სვანეთის საკითხზე წამოჭრილ დავასთან დაკავშირებით შემდეგს ეუბნება: „ლაზებში, ბატონო, ძველი წესი იყო, რომ სვანეთის სარდალი (ὄ

⁵⁵¹ Yul. Capit., Anton. Pius., 9. SC, II, 294. შდრ. მ. ბერძენიშვილი, ქალაქ ფაზისის ლოკალიზაციისათვის, 143.

⁵⁵² Claud. Claud., Stil., I, 154-156. SC, II, 384.

⁵⁵³ Drepan., Paneg., Theod., V, SC, II, 347.

⁵⁵⁴ Zosim., II, 33. SC, I, 797.

⁵⁵⁵ Amm., Marc., XXII, 7, §10; SC, II, 324.

⁵⁵⁶ იქვე, XXII, 12, §11; SC, II, 334.

⁵⁵⁷ ჯანაშია ს., ეგრისის სამეფოს წარმოშობა, შრ. II, 313.

Σουανίας ἡγεμῶν) ემორჩილებოდა ლაზს (τῶ Λαζῶ) და მასთან ის აღრიცხული იყო სახარკო სიაში, და ლაზი კიდევ იღებდა მისგან ფუტკრების ნაყოფს და ტყავებს და ზოგ სხვა რამესაც; ხოლო როდესაც სვანეთის მთავარი (ὁ Σουανός ἄρχων) გარდაიცვლებოდა, ლაზების მეთაური (ὁ τοῦς Λαζῶς ἔφεστῶς) ახელისუფლებდა მას, ვისაც უნდა მიეღო და დაეცვა გარდაცვლილის ძალაუფლება. ამავე დროს ის წერილობით აცნობებდა რომაელთა თვითმპყრობელს მომხდარი ამბების შესახებ და ესეც სამაგიერო წერილით უბრძანებდა მას გაეგზავნა სვანთა მთავრობის ნიშნები ვისთვისაც უნდოდა, მხოლოდ სვანი კი ყოფილიყო. ეს იყო ძალაში ჩვენი მეფის თეოდოსის დროიდან, ვიდრე თქვენი პაპის პეროზისა და ჩვენი მეფის ლეონის დრომდე. შემდეგ პეტრემ ქლამიდიდან გამოიღო ერთი წიგნაკი, სადაც ერთი-მეორეზე ცალ-ცალკე ნაჩვენები იყვნენ ლაზთა მეფეები, რომლებსაც გაეხელისუფლებიათ სვანთა სარდლები. ამ საბუთის ძალა ასეთი იყო, თუმცა გამოთქმები იქ ასეთი არ იყო; „ესენი არიან ლაზთა მეფეები (Λαζῶν Βασιλεῖς). რომლებმაც სვანებს ბატონიშვილები (οἱ γε βασιλίσκος) დაუყენეს, იმ დროიდან როდესაც რომაელთა ძალაუფლება ეპყრა თეოდოსის და სპარსელთა - უარანს, ვიდრე თვითმპყრობელ ლეონამდე და პეროზამდე.“⁵⁵⁸ ამ ცნობაში მოყვანილი ისტორიული პირების (თეოდოსი, უარანი, პეროზი, ლეონი) ზეობის საფუძველზე, როგორც ს. ჯანაშიამ დაადგინა, სვანეთი ლაზთა მეფის დამოკიდებულებაში შესულა 388-395 წლებში და ასე დარჩენილა 459-474 წლებამდე.⁵⁵⁹ იგი, აგრეთვე, ითვალისწინებს რა ერთი მხრივ რომის აღმოსავლეთ საზღვრებზე შექმნილ ვითარებას თეოდოსის დროს, ხოლო მეორე მხრივ – იმპერიის საშინაო მდგომარეობის სიძაბუნეს, მიდის დასკვნამდე, რომ IV საუკუნის 80-90-იანი წლები სწორედ შესაფერი ხანა იყო, რომ ლაზთა მეფეებს იმპერატორისაგან თავიანთი ტერიტორიული ექსპანსიის დადასტურება მოეთხოვათ. მისი აზრით, „ალბათ დაახლოებით იმავე ხანებში უცნიათ ლაზთა მეფის სიუზერენობა სხვა ტომებსაც – აფსილებს თუ აფშილებს, აბასკებს, სანიგებსა და სხვებსაც.“⁵⁶⁰ მაგრამ მენანდრეს ცნობიდან ირკვევა, რომ IV საუკუნის 80-იან წლებში ლაზების სიუზერენობა მხოლოდ სვანებს უცვნიათ, ხოლო სხვა წყაროების ჩვენებიდან ვგებულობთ, რომ დანარჩენი ტომები ლაზებს

⁵⁵⁸ Menandr., XI, გეორგიკა, III, 224-225; ს. ჯანაშია, იქვე, 313-314.

⁵⁵⁹ იქვე, 314; საქ. აღრ. ფეოდ. გზაზე, შრ. I, 256.

⁵⁶⁰ იქვე, შრ. I, 259. შრ. II, 317. საქართველოს ისტორია, I, 99-100.

გაცილებით ადრე დაუმორჩილებიათ. არიანეს, პტოლემეიოსის, პროკოპის, აგათიას და სხვა ავტორების ჩვენებებიდან ჩანს, რომ ზღვის სანაპიროზე ლაზების ჩრდილოეთით აფშილები, აბაზგები და სანიგები ცხოვრობდნენ, ხოლო სიღრმეში სვანები, მისიმინები, ლეჩხუმელები, მეგრელები და სხვები. სანამ ლაზები სვანების დამორჩილებას გადაწყვეტდნენ, მათ მანამდე უნდა ეფიქრათ სხვა ტომების დამორჩილებაზე, რომელთაგან ნაწილი გზაზე ელობებოდა, ხოლო ნაწილი თავისი პოლიტიკური ორგანიზაციის ქონებისას ლაზთა მეტოქედ გამოდიოდა. მართლაც, ირკვევა, რომ ლაზების მიერ დასავლეთ საქართველოს გაერთიანება ძალიან ადრე დაწყებულა: მეორე საუკუნის მეორე ნახევარში მათ უკვე მთელი ზღვის სანაპირო სჭერიათ.⁵⁶¹ პტოლემეისი გადმოგვცემს, რომ „კოლხიდის ზღვის სანაპირო ნაწილზე მოსახლეობენ ლაზები, ხოლო ზემოთ მდებარეზე - მანრალეები და ისინი, რომლებიც ეკრიკტიკის ქვეყანაში ცხოვრობენ“ (Κατέχουσι δὲ τὰ ἐπὶ θαλάσση τῆς Κολχίδος Λάζοι τὰ δὲ ὑπερκείμενα Μάνραλοι καὶ οἱ κατὰ τὴν Ἑκρηκτικὴν χώραν).⁵⁶² როგორც ირკვევა, ლაზები არც III საუკუნეში მსხდარან გულხელდაკრეფილნი, რადგან IV საუკუნის 60-იანი წლებისათვის ისინი უკვე არმენებისა და იბერების მეზობლები გამხდარან.⁵⁶³

ამგვარად, არიანეს, პტოლემეიოსის, ამიანე მარცელინის, მენანდრე პროტექტორის ცნობების საფუძველზე ირკვევა, რომ დასავლეთ საქართველოს ლაზიკის სამეფოდ გაერთიანებისათვის ბრძოლა II-IV საუკუნეში მომთავრებულა ძირითადად: II საუკუნის მეორე ნახევარში მათ დაუმორჩილებიათ ზღვის სანაპიროს ტომები (აფშილები, აბაზგები, სანიგები, სედოხეზები), IV საუკუნის 60-იანი წლებისათვის მათ უკვე დამორჩილებელი ჰყავთ შიდა რაიონები (მანრალეები, ეკრიკტიკის სხვა ტომები) და უშუალოდ იბერებს ემეზობლებიან, ხოლო IV საუკუნის 80-იანი წლებში სვანები დაუმორჩილებიათ, ე. ი. მათ უკვე მთაზე მიაქვთ იერიში. VI საუკუნეში, როგორც პროკოპის, აგათიას და სხვა ავტორების ჩვენებებიდან ირკვევა, ლაზებს ემორჩილებიან დასავლეთ საქართველოს ტერიტორიაზე მოსახლე ყველა ტომები კავკასიონზე მოსახლეთა ჩათვლით, ხოლო ამაზე ადრე, V საუკუნის ავტორი ფსევდო არიანე წერს, რომ „დიოსკურიიდან ანუ სებასტოპოლისიდან მდინარე აფსარამდე წინათ

⁵⁶¹ შტრ. ს. კაკაბაძე, დასახ. ნაშრ., 70.

⁵⁶² Ptol., 9, §5, SC, I, 241

⁵⁶³ Amm. Marc., XXVII, 12, §11, 17; SC, II, 334-335.

ცხოვრობდა ხალხი წოდებული კოლხებად და სახელგადარქმეული ლაზებად” (Ἀπὸ οὖν Διοσκουρίδος τῆς καὶ Σεβαστουπόλεως ἕως Ἀψαροῦ ποταμοῦ πρώην ἄκουσ ἔθνος οἱ λογόμενοι Κόλχοι οἱ μετονομησθέντες Λαζοί).⁵⁶⁴

§3. ლაზიკის (ზანთა) სამეფო და მისი ადგილი საქართველოს ისტორიაში

ლაზიკის სამეფოდ დასავლეთ საქართველოს ტომების გაერთიანება, როგორც აღვნიშნეთ, II-IV საუკუნეში დასრულდა, ცალკეულ ტომთა შორის ჰეგემონობისათვის ბრძოლაში გამარჯვებული ზანები გადმოვიდნენ და გაერთიანებასაც თავისი სახელი მიაკუთვნეს. ბერძნულ-ლათინურ მწერლობაში დაცული სახელწოდება „ლაზიკა“ ქართველური ენების ლა//ლე თავსართითაა ნაწარმოები „ზან“ სახელიდან. ისევე როგორც ლე-ჩხუმი, ლე-ზანდრე ა. შ. და უდრის ქართულ „სა-ზან-ო“-ს.

ლაზთა სამეფოდ ცნობილი პოლიტიკური გაერთიანების წარმოქმნას ხელი შეუწყო კეთილსასურველი საშინაო და საგარეო ფაქტორების არსებობამ. მისი წარმოქმნა, ს. ჯანაშიას აზრით, ახალფეხადგმული ფეოდალური ძალების მომწიფების დადასტურება იყო. ისინი ახლა, მისი აზრით, პოლიტიკურადაც ფორმდებიან.⁵⁶⁵ მათ ასეთ ორგანიზაციაში გაფორმებას ხელი შეუწყო კეთილსასურველმა საგარეო პირობებმაც: რომის იმპერია, რომელიც ძვ. წელთაღრიცხვის I საუკუნიდან პონტოს-პირეთის უზენაესი გამგებელია, მომდევნო ხანაში უმძაფრეს რყევებს განიცდის. IV-V საუკუნე იმპერიის სულთაბრძოლის ხანაა. ამავე ხანებში გამოყოფილი აღმოსავლეთ რომის იმპერია, რომელიც აღმოსავლეთში ძვ. რომის მემკვიდრედ ცდილობს გამოვიდეს, თავისი ორგანიზაციის პროცეს-

⁵⁶⁴ PPE., §48. SC, I, 275.

⁵⁶⁵ დასავლეთ საქართველოში, ფეოდალიზმის ურთიერთობის ასე ადრე გამარჯვების ვარაუდი იწვევს სამართლიან ეჭვს (ნ. ბერძენიშვილი, ს. ჯანაშია, საქართველოს ადრინდელი ფეოდალიზმის გზაზე). ლაზიკის სამეფოში ფეოდალური ძალები არ შეიძლება სამეფოს წარმოქმნის მიზეზი გამხდარიყვნენ. ჩვენ არ ვიცით რა სოზოგადოებრივ ძალებს ემყარებოდა ლაზიკის მეფე, მაგრამ ვიცით, რომ იმავე ხანის იბერიაში მეფისა და აზნაურების კონფლიქტის ნიადაგზე ეცემა მეფობა და მხოლოდ შემდეგ იწყება ახალი ძალების პოლიტიკური გაფორმება, რამაც შედეგში საქართველოს ფეოდალური მონარქია მოგვცა.

შია გართული და უდიდესი დაძაბვით ახერხებს ბარბაროსთა შემოსევების უკუგდებას. ლაზები სარგებლობენ შექმნილი ვითარებით და ანგარიშს აღარ უწევენ ძველ ბატონებს. კონსტანტინეპოლის მთავრობა იოლად არ თმობს შავი ზღვის აღმოსავლეთ სანაპიროზე მცხოვრებ ქვეშევრდომებს, რომლებიც იმპერიის საფარს წარმოადგენენ ჩრდილოეთის ნომადების წინააღმდეგ.⁵⁶⁶

იმ დროს, როდესაც რომსა და იტალიას ბარბაროსთა ტალღები ჰქე-
ლავენ, აღმოსავლეთ რომის იმპერია იძულებულია ლაზებთან ომი დაიწ-
ყოს: V საუკუნის 50-იან წლებში ლაზებსა და რომაელებს შორის
მტრობა ჩამოვარდნილა. როგორც პრისკე პანიონელის ცნობებიდან ირკ-
ვევა, ლაზებთან ომში რომაელები ვერაფერს გამხდარან და უკან გაბრუ-
ნებულან. თანაც რომაელ სარდლებს ლაზებზე შეტევის ახალი გეგმა
დაუშუშავებიათ და დახმარებისათვის ირანის მეფისათვის მიუმართავთ.⁵⁶⁷
საინტერესო ცნობაა! ლაზებთან ომისათვის რომის იმპერატორი ირანე-
ლებს სთხოვს შეელას. მეფე გუბაზი თავის მხრივაც ემზადება ომის
გაგრძელებისათვის, საამისოდ დახმარებისათვის მასაც ირანისათვის მიუ-
მართავს, მაგრამ ირანი ამ დროს ჰუნებს ებრძვის და გუბაზს თხოვნაზე
უარით პასუხობს. ლაზები თავიანთი ტაქტიკური მოხერხებულობით რო-
მაელებს ზედიზედ ამარცხებენ⁵⁶⁸ და აიძულებენ გუბაზის მიერ შეთავაზე-
ბული საზავო წინადადება მიიღონ. პრისკე პანიონელს თუ დაუჯერებთ,
რომაელებს ომი თურმე იმისათვის აუტეხიათ, რომ გუბაზი და მისი
შვილი ერთდროულად მეფობდნენ ლაზიკაში, რაც, თურმე, ნუ იტყვიან,
არ ეთანხმებოდა ძველ წესს (ὁ παλιος θεσμός).⁵⁶⁹ ცხადია, რომაელები
იძულებულნი გახდნენ ხელი აეღოთ ომის მთავარი მიზნების შესრუ-
ლებაზე და გუბაზს მოსთხოვეს, ან მას აეღო ხელი ტახტზე, ან მის
შვილს. გუბაზი, ჩანს, პატივმოყვარე არ ყოფილა და მეფობაზე უარი
უთქვამს შვილის სასარგებლოდ. ცხადია, რომაელებს ეს მოთხოვნა
თავისი უსუსურობის დასაფარავად აქვთ წამოყენებული, მათ, ცხადია,
დიდად არ აინტერესებთ - ერთი მეფე იქნება ლაზიკაში თუ ათი, ოღონ-
დაც ისინი რომაელების გამგონენი იყვნენ. რომაელებსა და ლაზებს შო-
რის უთანხმოების ძირითადი საკითხი, ცხადია, მამა-შვილის ერთად
მეფობა არ იყო. პრისკე პანიონელი, იქვე, მისდა უნებურად იძულებულია

⁵⁶⁶ ჯანაშია ს., ეგრისის სამეფოს წარმოშობა, შრ. II, თბ., 1952.

⁵⁶⁷ Prisc. Pan., 25, SC, I, 840.

⁵⁶⁸ იქვე, Fr. 2. SC, I, 847.

⁵⁶⁹ იქვე, §26. SC, I, 841.

აღნიშნოს, რომ კეისარი მარკიანე (450-457) გუბაზის მოთხოვნით ლაზიკაში გზავნის სპეციალურ ელჩს, რომელიც უნდა შეუთანხმდეს გუბაზს იმ უთანხმოებებზე (διδόριαι), რაც მათ შორის არსებობს. უბაზი უთანხმდება რომაელ ელჩს, მაგრამ მიუხედავად უვნებლობის გარანტიის მიღებისა, მაინც არ ცხადდება მარკიანე კეისართან, მხოლოდ ლევ კეისარის დროს ჩავიდა იგი კონსტანტინეპოლში, ისიც მისი გამეფებიდან რამდენიმე წლის შემდეგ. იქ იძულებული გამხდარან იგი კარგად მიელოთ და შენდობილი გაეშვათ.⁵⁷⁰ სწორედ ამ დროს უნდა დაედწიათ თავი ლაზებს რომაელებთან თანამოლაშქრობის ვალდებულებისაგან. ამ დროს წარმოქმნილა ის ვითარება, რომლის შესახებ პროკოპი კესარიელი წერს: „ლაზები თავდაპირველად კოლხიდის ქვეყანაში მოსახლეობდნენ და რომაელთა ქვეშევრდომები იყვნენ, ხოლო *არც ხარკს იხდიდნენ*, არც სხვა რამეში ემორჩილებოდნენ მათ გარდა იმისა, რომ როდესაც მეფე მოუკვდებოდათ, რომაელთა მეფე უგზავნიდა სამეფო ტახტის მემკვიდრეს ძალაუფლების სიმბოლოს (Σύμβολα τῆς ἀρχῆς). ის გულმოდგინედ იცავდა ქვეშევრდომებთან ერთად ამ ქვეყნის საზღვრებს, რათა მტრულად განწყობილი ჰუნები მათი მოსაზღვრე კავკასიის მთიდან ლაზიკაზე გამოვლით, რომაელთა მიწა-წყალში არ შემოჭრილიყვნენ – ისინი მტკიცედ იცავდნენ იმათ, ისე, რომ არც ფულს ღებულობდნენ რომაელებისაგან, არც ჯარს და არც ლაშქრობდნენ რომაელებთან ერთად, – რა სახითაც არ უნდა ყოფილიყო ეს.”⁵⁷¹

VI საუკუნის დამდეგს ლაზიკა უკვე ირანის მხარეზე ჩანს. ლაზთა მეფე დამნაზე, რომელიც, ალბათ, გუბაზის შვილის მემკვიდრე უნდა ყოფილიყო, რომაელებს განდგომია და ირანული ორიენტაცია აუღია. ირანი ამ დროს აქტიურად გამოდის ამიერკავკასიაში. V საუკუნეში მან ჯერ ალბანეთში მოსპო მეფობა, ხოლო შემდეგ არმენიაში და იბერიას მიაღვა. მან კარგად ისარგებლა რომის იმპერიის საგარეო და საშინაო გართულებებით და იბერია თავის მოხარკედ აქცია. მაგრამ ვახტანგ გორგასლის მეფობამ მას ცხადად დაანახა, რომ თუ იბერიაში მეფობა არ მოიპოვება, იგი ირანის გამგონი ყმა არ გახდება. ამავე დროს, იბერიაში აჯანყებებისა და ურჩობის სურვილის აღკვეთა მისი ზურგის გაუვნებლობით თუ შეიძლებოდა. ასეთი ზურგი კი ლაზიკა იყო. ამიტომ იბერიაში პოზიციების მომაგრების შემდეგ, რაც ვახტანგ გორგასლის მოკვლის

⁵⁷⁰ იქვე, §34. SC, I, 842.

⁵⁷¹ BP, II, 15. გეორგია, II, 45-46.

შემდეგ უნდა მომხდარიყო, ირანი იწყებს ლაზიკისათვის ბრძოლას, სარგებლობს ლაზიკასა და რომს შორის უთანხმოებით და ლაზთა მეფეს თავის მხარეზე იბირებს. ირან-ლაზიკას „მეგობრული“ დამოკიდებულება 20-იანი წლების დამდეგამდე გრძელდება. სანამ ლაზთა მეფე დამნაზე, წათე I-ის მამა ცოცხალი იყო (521-522 წ.) წათე აჩვენებდა, რომ აღიარებს ცეცხლთაყვანისმცემლობის ღოგმებს და ირანელების ერთგუ-ლია, რაც იოანე მალალას ცნობით, მეფედ დამტკიცების ერთ-ერთი მთა-ვარი პირობა იყო. მაგრამ გარდაიცვალა თუ არა დამნაზე, იგი კონ-სტანტინეპოლში იუსტინე I-თან (518-527 წწ.) გამოცხადდა 522-523 წელს, ქრისტიანობა მიიღო და ლაზიკის მეფედ იქნა დანიშნული.⁵⁷² საინტერესო ცნობაა! ამა თუ იმ სარწმუნოებრივი მრწამსის აღიარება თანამედროვეების მიერ იმავე დროს პოლიტიკური ორიენტაციის ასეთო-ბისა თუ ისეთობის მანიშნებელ გარემოებადაა გაგებული. თვით სიუხე-რენებიც თავისი ქვეშევრდომების მორჩილებისა და მათი აღზევება-დამცრობის პირობას მათი სარწმუნოების აღიარებაში ხედავენ. სწორედ აქ უნდა ვეძებოთ იმის ძირითადი მიზეზი, რომ ქრისტიანობა, როგორც ოფიციალური სარწმუნოება, ლაზიკაში იბერიასთან შედარებით ორი საუ-კუნით გვიან იქნა აღიარებული: ქრისტიანობის გავრცელება ლაზიკაში ძალიან ადრე იწყება. ნიკეის საეკლესიო კრებას (325 წ.) უკვე ესწ-რებოდა ბიჭვინტის ეპისკოპოსი სტრატოფილოსი, მაგრამ ოფიციალურ სარწმუნოებად მისი აღიარება იგვიანებს, რადგან ქრისტიანობის ოფიცია-ლურ სარწმუნოებად აღიარება ლაზიკისათვის ნიშნავდა რომაული ორი-ენტაციის საბოლოოდ აღიარებას, ხოლო ასეთისათვის ლაზიკაში ნიადაგი დიდხანს არ არსებობდა, რამდენადაც რომაელებმა თავისი განუყოფელი ბატონობის ხანაში იქ კარგი ვერაფერი დათესეს. ის ფაქტი, რომ ბიზანტია ახლოს იყო და მბრძანებლობდა, ხოლო მისი მეტოქე ირანი შორს იყო და დროდადრო კეთილმოსურნე შესტსაც აკეთებდა, უბიძგებდა ლაზიკას, უფრო კი მის სამეფო საგვარეულოს, ქრისტიანობის აღიარე-ბისგან თავი შეეკავებინა. სულ სხვა მდგომარეობა იყო იბერიაში. იბერია ადრე გაეცნო ირანის მეზობლობის სიაგვარგეს და ადრე მიიღო ქრის-ტიანობა, რაც იმავე დროს რომაული ორიენტაციის აღიარებასაც ნიშნავ-და. ასეც ესმოდა ეს იმდროინდელი ირანის მმართველებს და იბრძოდნენ კიდევ მის წინააღმდეგ. მას შემდეგ, რაც ირანი უშუალოდ გაუმეზობლდა ლაზიკას, უკანასკნელი იძულებული გახდა საბოლოოდ მოეხდინა არჩევა-

⁵⁷² Χρονογραφία., XVII, გეორგია, III, 263.

ნი ირანსა და რომს შორის. ცხადია, მან რომაული ორიენტაცია აირჩია, ორთაგან უმცირესი ბოროტება. იგი კარგად ხედავდა, თუ რა ხდებოდა იბერიასა და არმენიაში. ცხადია, ორი ცუდიდან მან ნაკლებ ცუდი შეარჩია და 522-523 წელს ლაზი უფლისწული წათე ირანელებს განუდგა, ქრისტიანობა მიიღო და ლაზიკის მეფედ კონსტანტინეპოლის ხელისუფლთა მიერ იქნა დამტკიცებული.

წათე I-ის განდგომა ირანის შაჰ კავადს არაფრად მოეწონებოდა, მაგრამ სამაგიეროს მიზღვევისათვის მზადებაში რომ იყო, უეცრად იბერთა მეფე გურგენი აჯანყდა და ბიზანტიელებს (რომაელებს) მიემხრო. მაგრამ ბიზანტიელთა მიერ გაწეული სამხედრო დახმარება მისთვის უკმარი აღმოჩნდა, რის გამოც ირანელებისაგან დევნილი ლაზიკაში გაიხიზნა.⁵⁷³ ირანელები დაედევნენ გაქცეულებს, მაგრამ ისინი ლაზიკის გადასასვლელზე მდებარე ვიწრობებში იოლად იგერიებენ მათ. ბიზანტიელები შეშფოთდნენ. ირანელები კი ლაზიკაში სალაშქროდ ემზადებიან. ამის გამო იბერიიდან გადმომავალი გზის ჩამკეტი ორი ციხიდან (შორაპანი და სკანდა) ბიზანტიელებმა ლაზთა მეფეს თავისი გარნიზონები გამოაყვანიეს და იქ რომაელი ჯარისკაცები ჩააყენეს, მათი სურსათით მომარაგება კი ლაზებს დაავალეს.⁵⁷⁴ ასეთი რამ, პროკოპის ცნობით, ლაზე-ბისათვის უჩვეულო საქმე იყო და მათ გარნიზონების სურსათით მომარაგებაზე უარი განაცხადეს, რადგან ეს ციხეები მათ საკუთარი თავისუფლების დასაცავად ააშენეს, ახლა კი ისინი რომაელთა ბატონობის ბაზა ხდებოდა. რომაელები იძულებულნი გახდნენ შორაპანი და სკანდა დაეცალათ. ირანელებმა ამით ისარგებლეს და ციხეებში საკუთარი გარნიზონები ჩააყენეს.⁵⁷⁵ ამის შემდეგ ბიზანტიელები ცდილობენ უფრო მოქნილად იმოქმედონ და ლაზების კეთილგანწყობა მოიპოვონ. 532 წლის „საუკუნო ზავით“ ლაზიკა ბიზანტიის სფეროდ იქნა აღიარებული, ხოლო იბერია – ირანისად. ირანელებმა დაცალეს ლაზიკის სასაზღვრო ციხეები. გათამამებული ბიზანტიელები ცდილობენ ლაზიკა თვინიერი გახადონ და იქ მათთვის სასურველ ეკონომიურ პოლიტიკას ატარებენ, რითაც დიდად ზარალდება ლაზიკის სამეფოს გარკვეული წრეები, განსაკუთრებით კი ისინი, რომლებსაც კავშირი აქვთ ბაზართან. ურთიერთობა მწვავედება და ბიზანტიელები ლაზიკაში სამხედრო ძალებს იმრავლებენ და თანაც

⁵⁷³ BP, I, 12. გეორგიკა, II, 21-25.

⁵⁷⁴ იქვე, გ. გოზალიშვილი, ბიზანტიასა და ირანს შორის ბრძოლა იბერია-ლაზიკისათვის VI საუკუნეში. თსუ შრომები, XXVI, თბ., 1944, გვ. 117.

⁵⁷⁵ BP, I, 12. გვ. 25.

მეტად ძლიერ ციხეს, პეტრას, აშენებენ,⁵⁷⁶ რაც საშუალებას აძლევს მათ სარდლებს უბოდიშოდ ჩაერიონ ლაზიკის საქმეებში და მათი ავტონომია შეზღუდონ. ბიზანტიელთა ასეთ მოქმედებას VI საუკუნის 40-იანი წლების დამდეგს ლაზიკამ, გუბაზ მეფის მეთაურობით, განდგომითა და ირანელების მოწვევით უპასუხა.⁵⁷⁷ 542 წელს ირანის მეფე ხოსრო (531-571) დიდი ჯარით, რომელსაც მეგზურად ლაზები ჰყავდა, შეიჭრა ლაზიკაში და მძიმე ბრძოლის შემდეგ აიღო რომაელთა მთავარი სიმაგრე პეტრა. ამით დაიწყო ირან-ბიზანტიის ომების სერია, რომლებიც ძირითადად ლაზიკისათვის და ლაზიკის ტერიტორიაზე წარმოებდა. ეს ხანგრძლივი ომი, მცირე შესვენებებით, მთელი VI საუკუნის სიგრძეზე მიმდინარეობდა და საბოლოოდ ბიზანტიის გამარჯვებით დამთავრდა.

ლაზები ჩქარა დარწმუნდნენ, რომ ირანელების ბატონობა არაფრითაა უკეთესი ბიზანტიურზე. ამავე დროს, ხოსრომ გადაწყვიტა მთელი ლაზიკის აყრა და ირანელების იქ დასახლება. ახლა გუბაზი ცდილობს ბიზანტიასთან შერიგებას და ლაზიკისათვის სასარგებლო ფორმაში ახერხებს კიდევ იუსტინიანესთან (527-565) შეთანხმებას. ლაზთა დახმარებით ბიზანტიელები ავიწროებენ ირანელებს.

იმავე დროს თავს იჩენს ლაზთა ქვეშევრდომი ტომების განკერძოების ტენდენციები. ლაზთა და ბიზანტიელთა ბატონობისაგან თავდახსნისათვის ისინი ირანელებს უკავშირდებიან (სვანები, აფშილები, აბაზგები და მისიმიელები), მაგრამ საბოლოოდ იძულებული ხდებიან დამორჩილდნენ. და მანც აბაზგები, ალბათ, ბიზანტიელთა ზრიკებით, ჩამოცილდნენ ლაზთა სამეფოს და უშუალოდ ბიზანტიელებს დაექვემდებარნენ.

562 წელს დადებული ირან-ბიზანტიის ზავით ლაზიკა ბიზანტიას დარჩა, მაგრამ სვანეთის საკითხი დარჩა გადაუჭრელი. ირანი დარწმუნდა, რომ ლაზიკაში ბიზანტიის პოზიციები ირანულთან შედარებით მეტად ძლიერია და უარი თქვა ომის შემდგომ გაგრძელებაზე. ამავე დროს მას საფრთხე ექმნება აღმოსავლეთის საზღვრებზე. ბიზანტია-ირანის ომში ლაზიკისათვის ბიზანტიის გამარჯვებაში ძირითადი ფაქტორი ლაზების პრობიზანტიური ორიენტაცია იყო. მომდევნო ხანებში ირანს ხელიდან ეცლება იბერია და არმენია. თეოფანე ბიზანტიელის ცნობით, VI საუკუნის 70-იანი წლების დამდეგს აჯანყებულ არმენებს ირანელთა წინააღმ-

⁵⁷⁶ BP, II, 15. გეორგიკა, II, 47-48 და მრავალი სხვაგან. აგრეთვე Yustiniani novellae., XXXI, იქვე, 19, II, 17, იქვე 541, II, 29. იქვე 73.

⁵⁷⁷ BP, II, 15. გეორგიკა, 11, 45.

დეგ ბრძოლაში კოლხები (ლაზები) და აბაზგები ეხმარებიან.⁵⁷⁸ ბიზანტიელებს, როგორც ირკვევა, ლაზიკაში თანდათან მოუმაგრებიათ ფეხი. უპოვნიათ საზოგადოებრივი ფენები, რომელთაც შეიძლებოდა დაყრდნობოდნენ და ლაზიკის მეფის ხელისუფლება თანდათან შეუზღუდავთ. ჩვენ არ ვიცით, როდის მოხდა ეს, მაგრამ VII საუკუნის ბოლოს უკვე იხსენიება ლაზიკის პატრიკოსი სერგი ბარნუკის-ძე.⁵⁷⁹ ს. ჯანაშიას აზრით, ასეთი რამ შეიძლება ჰერაკლე კეისრის დროს მომხდარიყო, როდესაც ლაზებმა და აბაზგებმა იბერებთან ერთად, როგორც თეოფანე გადმოგვცემს, უარი უთხრეს კეისარს ლაშქრობაში შემდგომ დარჩენაზე და საკუთარ ქვეყანაში დაბრუნდნენ,⁵⁸⁰ ე. ი. ლაზ მეფეთა დინასტიას VII საუკუნის 20-იან წლებამდე უბატონია. VIII საუკუნის დამლევეს დასავლეთ საქართველო უკვე ახალ საფუძვლებზე ერთიანდება, სადაც სრულიად ახალი საზოგადოებრივი ურთიერთობა გვევლინება წამყვანად.

ჩვენ აქ აღვნიშნეთ ლაზიკის სამეფოს პოლიტიკური თავგადასავლის მხოლოდ ძირითადი მომენტები, გვერდი ავუარეთ VI საუკუნეში წარმოებულ აღმოსავლურ ომში მხარეების მამოძრავებელ მოტივებზე საუბარს. არ შეგვხვთ დაწვრილებით ლაზიკის მნიშვნელობას ბიზანტიისა და ირანისათვის. მაგრამ ამ საკითხებზე დაინტერესებული მკითხველი დამაკმაყოფილებელ პასუხს მიიღებს ს. ჯანაშიას, ივ. ჯავახიშვილის, გ. გოზალიშვილისა და სხვათა შრომებში.⁵⁸¹

* * *

როგორი იყო ლაზთა სამეფოს ტერიტორიული მოცულობა? როგორი იყო მისი ეთნიკური სურათი? ამ კითხვებზე პასუხის გაცემა, არსებული წყაროებით, მიახლოებით მაინც შესაძლებელია.

ლაზთა სამეფო ჩრდილოეთით კავკასიონის ქედით ისაზღვრებოდა, აღმოსავლეთით – ლიხის მთითა და მისი გაგრძელებით სამხრეთისაკენ, ხოლო სამხრეთით – მდ. ჭოროხითა და აჭარისწყლის ხეობით. სამეფოს პოლიტიკური საზღვრები, ცხადია, ყოველთვის ერთნაირი არ ყოფილა: იგი საგარეო პირობების ცვლილებათა მიხედვით, ხან ფართოვდებოდა,

⁵⁷⁸ Fr., 4. გეორგიკა, III, 258.

⁵⁷⁹ Tneophanis chrongraphia, გეორგიკა, IV, 105.

⁵⁸⁰ იქვე, 94-97. ს. ჯანაშია, ფეოდალური რევოლუცია საქართველოში, შრ. II, 88-89.

⁵⁸¹ ლიტერატურა ლაზიკის სამეფოზე: ს. ჯანაშია, დასახ. ნაშრ., ეგრისის სამეფოს წარმოშობა, შრ. II, 307-322. საქართველო ადრინდელი ფეოდალიზაციის გზაზე, შრ. I. გ. გოზალიშვილი, დასახ. ნაშ., ივ. ჯავახიშვილი, ქართველი ერის ისტორია, I, 1928. საქართველოს ისტორია, I, 99-103; 112-124 და სხვა.

ხან კი ვიწროვდებოდა. წინათ ლაზიკის სამეფოს შემადგენლობაში მყოფი აბაზგია, VI საუკუნეში უკვე მისგან გამოყოფილი ჩანს. იგივე შეიძლება ითქვას სვანეთზეც. ლაზიკის მეფეს არც ზღვისპირა ქალაქები ემორჩილებიან. განსაკუთრებით ეს ფასიდზე, დიოსკურიასა და პიტიუნტზე (ბიჭვინტა) ითქმის, სადაც რომაელებს თავიანთი გარნიზონები უყენიათ. ესენი რომაელთა აქ ბატონობის დასაყრდენი პუნქტებია. მათი მოსახლეობაც უფრო მეტად არაქართული უნდა ყოფილიყო.

ეთნიკურად ლაზთა სამეფო მეტად ჭრელ გაერთიანებას შეადგენდა გარეგნულად, მაგრამ სინამდვილეში იქ მხოლოდ ქართველური ტომები იყვნენ გაერთიანებული. აქ შედიან როგორც მეგრულ-ჭანური, ისე სვანური და ქართული მოდგმის ტომები და თემები. წერილობითი წყაროები აქ მოსახლედ უჩვენებენ: ხანებს, ეგრებს, აფშილებს, აბაზგებს, სანიგებს (წანებს), სვანებს, მისიმიელებს, ლეჩხუმელებს, სუდოხეზებს, ხოლო დასავლეთ საქართველოს დღევანდელი ეთნიკური შემადგენლობა გვიდასტურებს, რომ სამეფოს შემადგენლობაში ყოფილა იბერიული მოდგმის თემები (გურიაში, იმერეთში), სამხრეთით კი დროდადრო ლაზიკის სამეფოს შემადგენლობაში უნდა შემოსულიყო ჭანთა საცხოვრისის ნაწილიც.

* * *

ლაზთა სამეფოს სამეურნეო მდგომარეობა, ბუნებრივი პირობების გამო, არ უნდა ყოფილიყო ისე დაწინაურებული, როგორც იბერიისა. წარმოების ტექნიკური დონე აქ ისეთივეა, თუ მაღალი არა, როგორც იბერიაში, მაგრამ ნიადაგის სიმწირე, ჭაობიანობა, გადაჭარბებული ტენიანობა და ა. შ. ხელს უშლის სოფლის მეურნეობის ისეთი დარგების მომძლავრებას, როგორცაა მევენახეობა და მარცვლეული, რომლებიც იმ ხანაში ძირითად სიმდიდრედ იყო აღიარებული. ლაზიკას ყოველ-თვის აკლდა მარცვლეული, ღვინო და მარილი, რომელიც მას ჩრდილო და სამხრეთ შავიზღვისპირეთიდან და იბერიიდან შემოჰქონდა. სამაგიეროდ, გაჰქონდა, და ჩვენთვის საინტერესო ხანაშიც, ხე-ტყე, მონები, ძენძი, ტყავები, ლითონური ნაწარმი და ა. შ. ლაზიკისთვის ამის გამო აღებ-მიცემობას დიდი სამეურნეო მნიშვნელობა ჰქონდა. ეს კარგად ჩანს VI საუკუნის 40-50 წლებში მომხდარ ბიზანტია-ლაზიკის კონფლიქტში, რომელიც, ძირითადად, ბიზანტიური სავაჭრო მონოპოლიის ლაზიკაში შემოღებით იყო გამოწვეული, რაც თავისთავად ლაზიკის საშინაო საქმეებში უხეში ფორმით ჩარევაც იყო. როგორც უკვე დადგენილია, მონო-

პოლიის შემოღებამ სული შეუხუთა ლაზიკის საქმიანი წრეების გარკვეულ ნაწილს, რაც კარგად გამოიყენა გუბაზ მეფემ და ბიზანტიელებს განუდგა. ლაზიკას სავაჭრო-ეკონომიური ურთიერთობა აქვს როგორც ჩრდილო და სამხრეთ შავიზღვისპირეთთან, ისე აღმოსავლეთ კავკასიის ქვეყნებთან და იმის მიხედვით, თუ რომელი ჯგუფი რომელ ბაზართან არის უფრო მჭიდროდ დაკავშირებული, ლაზიკაში ვხედავთ სხვადასხვა პოლიტიკური ორიენტაციის წრეებს, რომელთა არსებობაც კარგად ჩანს გუბაზ მეფის მოკვლის შემდეგ გამართულ ლაზების სახალხო კრებაზე გამოსულ ორატორთა სიტყვებიდან, სადაც ერთმანეთს ებრძვიან ირანული და ბიზანტიური ორიენტაციის წრეების ლიდერები – აეტი და ფარტაძე.⁵⁸²

ლაზიკის ტერიტორიაზე არსებობენ როგორც სავაჭრო ცენტრები, ასევე სავაჭრო გზები,⁵⁸³ რომლებიც მას ჩრდილოეთის, სამხრეთისა და აღმოსავლეთის ქვეყნებთან აკავშირებდა. ეს გზები დიდი ხანია არსებობდა და იზიდავდა უცხოელ მოძალადეთა ყურადღებას. ჩვენთვის საინტერესო ხანაში ამ გზებით განსაკუთრებულ დაინტერესებას იჩენენ ბიზანტია და ირანი. ერთიც და მეორეც ამ გზებს აძლევენ როგორც ეკონომიურ, ისე სამხედრო-თავდაცვით მნიშვნელობას. უკანასკნელი კავკასიის კარებზე გადმომავალ გზებს შეეხება უპირატესად, რადგან ამ კარების პატრონს თავისი სურვილის მიხედვით შეუძლია წარმართოს ჩრდ. კავკასიის ველებზე მოსახლე ნომადების მოძრაობა სამხრეთისაკენ. VI საუკუნეში ბიზანტია ცდილობს ამ გზების გამოყენებით დაარტყას ირანის მონოპოლიას აბრეშუმით ვაჭრობაში.

* * *

მეტად მწირია ცნობები ლაზიკის სამეფოს პოლიტიკურ წყობასა და სოციალური საფუძვლის მდგომარეობაზე. ჩვენ აქ ისეთი ცნობებიც კი არ გავაჩნია, როგორც იბერიისთვის შუშანიკისა და ევსტათი მცხეთელის წამების მომთხრობელ ძეგლებში გვაქვს დაცული.

ლაზიკის სამეფოს პოლიტიკური წყობა გადარჩენილი მასალებით შემდეგნაირად წარმოგვიდგება: სამეფოს სათავეში დგას მეფე, რომელსაც ტახტზე რომის იმპერატორი ან ირანის შაჰი ამტკიცებს. მეფე ამავე

⁵⁸² Agath., III, 8, 9, 10, 11, 12, 13, 14. გეორგიკა, III, 63-81.

⁵⁸³ ჯანაშია ს., დასახ. ნაშრ., 44 და შმდ. Еремян С, Торговые пути Закавказья в эпоху Сасанидов. ВДИ, 1939, №1 79 и сл. გ. გოზალიშვილი, დასახ. ნაშრ., 122 და შმდ.

დროს ჯარების მთავარსარდალიცაა. არსებობს „სამეფო კარი“, რაზედაც „ლაზთა მეფის კარის რაზმების უფროსის“ მოხსენიებაც უნდა მიგვითითებდეს (აგათიას ცნობით, გუბაზ მეფის დროს ფარსანტ კოლხი... ταγματων τοῦ Λαζῶν Βασιλέως ἡγεῖτο μάχιστρος ὄνομα τῆ ἀρχῆ ἑ. ი. „ლაზების სამეფო კარის რაზმებს სარდლობდა: მაგისტროსი იყო თანამდებობით.“).⁵⁸⁴ ქვეყნის სამართავად ლაზთა მეფეებს ჰყოლიათ მოხელეთა შტატი. მათ შორის ბიზანტიელი ავტორები იხსენიებენ „მაგისტროსებს“. აგათიას სიტყვით, ამ მოხელეს ლაზიკაშიც ეს სახელი რქმევია (νενόμεσται γὰρ τοῦτο καὶ παρὰ τοῖς ταύτη βαρβάρους).⁵⁸⁵ ეს თანამდებობა უმაღლესი სამოხელეო რანგი ჩანს, და მის მატარებლად უმაღლესი არისტოკრატიის წარმომადგენლები ინიშნებიან. პროკოპი კესარიელი ლაზთა მაგისტროსს ტერდეტის Ἰλαζεῖς Λογίμων და τῶν Λαζῶν ἄρχοντι („ლაზი წარჩინებული“ და ლაზთა მთავარი“) სახელით იხსენიებს.⁵⁸⁶ აგათიასთან იხსენიებიან „კოლხების მმართველები“ (τὰ τῶν Κόλχων πράγματα).⁵⁸⁷ მას არ ავიწყდება აღნიშნოს, რომ ეს „მმართველები“ „დიდებულები“ (οἱ δυναμῶνται) და „წარჩინებულები“ (οἱ λογιματάτοι) არიან. მაგრამ არაფერს ამბობს, რატომ ეწოდებოდათ მმართველები, ან რა სახელები გააჩნდათ მათ. ამ მოხელეებს, კერძოდ მაგისტროსებს, როგორც ირკვევა, სამეფოს მთელ ტერიტორიაზე მიუწვდებათ ხელი და ყველგან ითვლებიან ლაზთა მეფის წარმომადგენლად. ამაში, ვფიქრობ, შემდეგი ფაქტით დავრწმუნდებით: ლაზთა სამეფოს შემადგენლობაში შედიოდა ისეთი ტომები და თემები (აბაზგები, აფშილები, სვანები), რომელთაც თავიანთი თვისტომი მეფე, მთავარი თუ ბელადი ჰყავდათ. ეს მთავრები (ἄρχων, ἡγῆμων) უშუალოდ ლაზთა მეფეს ემორჩილებიან, ხოლო მათ საგამგეო ტერიტორიებზე ლაზთა მეფის უმაღლეს მოხელეებსაც მიუწვდებათ ხელი: ლაზთა მაგისტროსი ტერდეტი, როგორც პროკოპი გადმოგვცემს, წაჩხუბებია გუბაზს და ირანელებს შეუთანხმდა აფშილეთში მდებარე წიბილეს ციხეს გადმოგვცემთო. ის მართლაც ასერხებს ციხეში შესვლას, რადგან „ციხის მცველ რაზმს არ შეეძლო არ ნდობოდა ლაზთა მთავარს“-ო.⁵⁸⁸ ამგვარად, მეციხოვნე

⁵⁸⁴ Agath., I, 13. გეორგიკა, III, 1567.

⁵⁸⁵ იქვე.

⁵⁸⁶ BG, VII, 10. გეორგიკა, II, 131-132.

⁵⁸⁷ Agath., III, 8, იქვე, 63.

⁵⁸⁸ BG, VIII, 10, იქვე, 132.

რაზმი თვლის, რომ ლაზთა მეფის მოხელის ციხეში არშეშვება მას არ შეუძლია.

სამწუხაროდ, ჩვენი ცნობები ლაზთა სამეფოს სამოხელეო შტატზე ამით ამოიწურება, მაგრამ მეფე მარტო მაგისტროსებით ვერ გაუძღვებოდა ასეთ სამეფოს. მას უნდა ჰყოლოდა თავისი უფრო მცირე ერისთავები, ხევისთავები, ციხისთავები, ქალაქისთავები, სოფლის მამასახლისები და ა. შ. როგორც პროკოპის ერთი ცნობიდან ირკვევა, ლაზებს უნდა ჰქონოდათ თავიანთი სამეფო არქივი. ყოველ შემთხვევაში, აქ წესად ჰქონიათ საბუთების შენახვა-დაცვა.⁵⁸⁹

სოციალურად, ჩვენთვის საინტერესო ხანის დასასრულს (V საუკ. დამლევი), ლაზიკა უკვე დიდი სოციალური ძვრებით ფეხმძიმე ქვეყანაა. საინტერესოა, რომ ამ დროს ქვეყნის პატრონებად უკვე „წარჩინებულებია“ მიჩნეული, ე. ი. მსხვილ მიწათმფლობელ არისტოკრატიას „თავისუფალი“ ერი უკვე მნიშვნელოვნად შეუზღუდავს. ლაზთა სახალხო კრებაზე, დამსწრეთა აზრს მხოლოდ დიდებულთა წარმომადგენლები წარმართავენ. ისინი არიან მიჩნეული „ქვეყნის მმართველებად“. სამწუხაროდ, წყაროები არაფერს ამბობენ, თუ როგორი იყო „წარჩინებულთა“ წოდებრივი იერარქია, მაგრამ იგი, ამ დროისათვის, იბერიის მაგალითის მიხედვით („შუშანიკის მარტვილობა“), ცხადად გამოხატულად არის საგულისხმებელი. ამავე დროს დაწყებული ჩანს შინაკლასობრივი ბრძოლა. წყაროებში დადასტურებულია როგორც მეფისგან გამდგარი და მასთან მებრძოლი მსხვილი დიდმოხელეები, ისე ურთიერთშორის მებრძოლი ჯგუფები, რომლებიც პოლიტიკურ ასპარეზზე თავიანთი ლიდერებით გამოდიან. ცხადია, მეფის წინააღმდეგ ბრძოლაში ეს ძალები დასაყრდენს უცხო ძალაშიც პოულობენ. ბიზანტიელები და ირანელები აქეზებენ ამ ძალებს. ამ მხრივ დამახასიათებელია ის ცნობა, რომელიც ქართულ საისტორიო მწერლობაში ქართლის შესახებაა დაცული. ჯუანშერის სიტყვით, გუარამ ერისთავი „მეფობდა კეთილად და უმფოთველად, არამედ ერისთავნი ქართლისანი ვერ ცვალნა საერისთაოთაგან მათთა, რამეთუ სპარსთა მეფისაგან და ბერძენთა მეფისაგან ჰქონდეს სიგელნი მკვიდრობისათვის საერისთავოთა მათთა.“⁵⁹⁰ „მკვიდრობის სიგელისათვის“ ბრძოლა დიდხანს გრძელდებოდა საქართველოში მეფესა და აზნაურებს შორის. ქართლში იგი მეფობის გაუქმებითა და აზნაურობის გამარჯვებით

⁵⁸⁹ BP, II, 15. იქვე, 49.

⁵⁹⁰ ჯუანშერი, ცხოვრება ვახტანგ გორგასლისა, M, 1907, 190. A, 1942, 144.

დამთავრდა, მაგრამ ეგრისის შესახებ ცნობები მეტად მწირია. მაინც, აქაც მეფის პატრიკოსად გადაქცევის გარემოება სამეფო ხელისუფლების დამარცხებაზე უნდა მიგვიბრუნებდეს.⁵⁹¹ ეს არის ხანა, როცა წარმოების ფეოდალურ წესს ჯერ კიდევ არ მოუცავს მთელი საზოგადოება, არ გამხდარა ერთადერთი ღერძი ცხოვრებისა, მაგრამ იგი ამ დროს ასეთად გადაქცევის წინააღმდეგ განიცდის.

სამწუხაროდ, ჩვენ არაფერი ვიცით, თუ რა მდგომარეობაშია უშუალოდ მწარმოებელთა მასა. აქ წერილობითი წყაროების დუმილით გამოწვეული ხარვეზი არქეოლოგის ნიჩბით მოპოვებულმა მასალამ უნდა შეაფასოს. მაგრამ კოლხიდის არქეოლოგია ჯერ ისე არ მოღონიერებულა, რომ მისი მასალებით ამ საკითხზე რაიმე უეჭვო დასკვნის გაკეთება შეიძლებოდეს.

ყოველ შემთხვევაში, მომდევნო ხანის მდგომარეობის გათვალისწინებით ცხადი ხდება, რომ IV-VI საუკუნეებში ფეოდალური წარმოების წესს უკვე მოუცავს საზოგადოების მნიშვნელოვანი ნაწილი და იგი, ესაა იმდროინდელი ცხოვრების ძირითად ღერძად უნდა გადაიქცეს.

⁵⁹¹ ეს გარემოება, თავის მხრივ, იმაზე უნდა მიგვიბრუნებდეს, რომ ლაზიკის სამეფო ხელისუფლება არ იყო ფეოდალურ ძალთა პოლიტიკური ორგანიზაციის ფორმა, არამედ სულ სხვა ძალების, რომელთა საისტორიო სცენიდან გასვლის კვალდაკვალ ლაზთა მეფის ხელისუფლებაც ჰქრება. რომ ლაზიკის მეფის ხელისუფლება აღმოცენებული ყოფილიყო ფეოდალურ ძალთა ინტეგრაციის შედეგად, მაშინ ფეოდალურ ძალთა შემდგომი გაძლიერების ნიადაგზე იგი კიდევ უფრო უნდა გაძლიერებულიყო და განმტკიცებულიყო, მაგრამ სინამდვილეში ჩვენ სრულიად საწინააღმდეგო ფაქტის წინაშე ვდგებით, – ვლტულობთ, რომ მზარდი ფეოდალური ძალები სპობენ იმ ორგანოს, რომელიც მათი შემდგომი ზრდისა და ბატონობის გარდაუვალი იარაღი უნდა იყოს...

ՄԿԱՐՊՅՈՒ ԸՆ ԼՈՅՆԵՐԱԾՄՆԵՐ

ՄԿԱՐՊՅՈՒ

1. Άγαθίας Σχολαστικός, περί Ίουστινιανουῦ βασιλεία, ԶԵՐԹՃՈՅՅ, III, 23-187
2. Άππιανός, Μιθριδάτεως, SC, I, 526-539
1. Αίσχύλος, Προμηθεύς δεσμώτης, SC, I, 333-336
2. Αΐλιος Ήρωδιανός, Ό τεχνικός, SC, I, 575-580
3. Άπολλόδωρος, Βιβλιοθήκη, SC, I, 447-451
4. Άπολλώνιος Ρόδιος, Άργοναυτικά, SC, I, 412-424
5. Άριστοτέλης, Περί θαυμασίων άκουσμάτων, SC, I, 379-380
6. Άρριανός Φ. 1) Περίπλους Ευξεινού Πόντου, SC, I, 217-228
2) Ανάβασις Αλεξάνδρου, SC, I, 513-518
3) Ίνδική, SC, I, 519-520
4) Άλανική ιστορία, SC, I
7. 9. Άρριανός (), Περίπλους Ευξεινού Πόντου, SC, I, 271-288
2. Διονύσιος, Οίκουμένης περιήγησις, SC, I, 178-187
3. Δίων Κάσσιος Κοκκηϊνός, Ρωμαϊκή ιστορία, SC, I, 609-623
4. Διονύσιος Άλικαρνασσεύς, Ρωμαϊκή άρχαιολογία, SC, I, 479-480
5. Διόδωρος Σικελιώτης, Βιβλιοθήκη, SC, I, 457-479
6. Διοσκορίδης, Περί ὕλης ιατρικῆς, SC, I, 507
7. Δημοσθένης, Περί τῆς άτελείας πρὸς Λεπτίνην, SC, I, 364-366
8. Έρμείας Σωζόμενος, Έκκλησιαστική ιστορία, SC, I, 756-772
9. Έρατοσθένης, Γεωγραφικά, SC, I, 411-412
10. Έκαταΐος Μιλήσιος, Περίοδος γῆς, SC, I, 1-3
11. Εὐάγγελος Σχολαστικός, Έκκλησιαστική ιστορία, ԶԵՐԹՃՈՅՅ, III, 290-300
12. Εὐσέβιος, Προπαρασκευή εὐαγγελική, SC, I, 662-681
13. Εὐστάθιος, 1) Παρεκβόλαι εἰς τὴν Όμηρον Ίλιάδα, SC, I, 305
2) Παρεκβόλαι εἰς τὴν Όμηρον Όδυσσεϊόν, SC, I, 305-311
3) Παρεκβόλαι εἰς τὴν Διονυσίου «Περιήγησιν», SC, I, 187-209
14. Έφορος, Ίστοριῶν άποσπάσματα, SC, I, 362-363
15. Ζαχάριας Ρήτωρ Έκκλησιαστική ιστορία, ԶԵՐԹՃՈՅՅ, III, 1-22
16. Ζώσιμος, Ίστορία νέα, SC, I, 787-810
17. Ήρόδωτος, Ίστορίαι, SC, I, 4-57
18. Ήσιόδος, Θεογονία, SC, I, 317-319
19. Θεοφάνης Βυζάντιος, ԶԵՐԹՃՈՅՅ, III, 202-252
20. Θεόφραστος, Τρωικά, SC, I, 388-389
21. Θεοφύλατος Σιμοκράττης, Ίστορίαι, ԶԵՐԹՃՈՅՅ, IV, 5-16
22. Θεοφάνης Όμολογήτης, Χρονογραφία, ԶԵՐԹՃՈՅՅ, IV, 70-117

23. Ίουλίος Πολυδεύκης, Ὀνομαστικόν, SC, I, 589-590
24. Ίωάννης Λίδος, Περί ἀρχων τῆς Ῥωμαίων πολιτείας, γγορζοζα, II, 200-205
25. Ίουστινιανός, Νοουέλαι, γγορζοζα, II, 196-199
26. Ίωάννης Ἀντιοχεύς, Ίστοία, γγορζοζα, IV, 1-4
27. Ίωάννης Μαλάας, Χρονογραφία, γγορζοζα, III, 260-271
28. Ίππόκρατος, Περί ἀερῶν, ὑδάτων, τόπων, SC, I, 57-65
29. Κλ. Πτολεμαῖος, Γεωγραφική ὑφήγησις, SC, I, 228-247
30. Κλαύδιος Αἰλίανος, Περί ζῶων, SC, I, 601-608
31. Μέμνων, Περί Ἡρακλείας, SC, I, 509-510
32. Μένανδρος, Ίστορία, γγορζοζα, III, 202-252
33. Νικηφόρος Βλεμμίδος, Γεωγραφία συνοπτική, SC, I, 290-293
34. Ξενοφώντας, 1) Κύρου ἀνάβασις, SC, I, 65-84
2) Κυνηγετικός, SC, I, 359
35. Ὅμηρος, Ίλιάς, Ὀδύσσεια, SC, I, 299-301
36. Πausάνιας, Περιήγησις τῆς Ἑλλάδος, SC, I, 570-575
37. Παλαίφατος, Τρωικά, SC, I, 388-389
38. Πίνδαρος, Πυθιονικά, SC, I, 323-325
39. Πλούταρχος, Βίοι παράλληλοι, SC, I, 485-504, 929-930
40. Πρίσκος Πανίτης, 1) Ίστορία Γοτθική, SC, I, 810-846
2) «Ταρσοὶ καλάμων», SC, I, 847
41. Προκόπιος Καισαρέως, 1) Πολεμικά, γγορζοζα, II, 11-182
2) Περί κτισμάτων, γγορζοζα, II, 182-193
3) Ἀνέκδοτα, γγορζοζα, II, 193-195
42. Πολύβιος, Ίστορίαι, SC, I, 440-444
43. Σκύλακος Καριάνδεως, Περίπλους ..., SC, I, 84-86
44. Στράβωνος, Γεωγραφικά, SC, I, 91-164
45. Στέφανος Βυζάντιος, Ἐθνικά, SC, I, 252-271, γγορζοζα, III, 272-289
46. Φλαουίος Ίωσήπος, 1) Ίουδαϊκή ἀρχαιολογία, SC, I, 482-483
2) Περί τοῦ Ίουδαϊκοῦ πολέμου, SC, I, 483-484
47. Chronicon Paschale, γγορζοζα, IV, 5-16
48. Ammianus Marcellinus, Perum gestarum libri Qui Supersunt, SC, II, 324-345
49. Ampelius, Liber memorialis, SC, II, 260
50. Annaeus Seneca, Dialogorum liber, I-XII, SC, II, 132-134
51. Annaeus Seneca, Thyestis, SC, II, 139-141
52. Annaeus Lucanus, De bello civilix libri decem, SC, II, 145-151
53. Claudius Claudianus, 1) In Eutropium, I-II, SC, II, 382-383
2) De consulatu Stilichonis, I-III, SC, II, 383-384
54. Cornelius Tacitus, 1) Annaleus, II, IV, VI, XI, XIII, SC, II, 231-246
2) Historiae, I, III, SC, II, 247-249
55. Curtius Rufus, Historiae Alexandri Magni, IV, VI, VII, VIII, IX, X, SC, II, 126-132

56. Drepanius, Panegyricus Theodosio Augusto dictus, V, X, XIV, XXII, XXXII, XXXIII, SC, II, 346-348
57. Eusebius Hieronymus, 1) Epistolae, 60, 77, 107, 108, 122, SC, II, 367-370
2) Adversus Jovianum, II, SC, II, 370
58. Eutropius, Historia Romano, V, VI, VII, VIII, IX, SC, II, 319-321
59. Festus, Breviarum rerum gestarum populi Romani, III, X, XI, XIV, XVI, XX, SC, II, 321-323
60. Julius Capitolinus, 1) Aelii Spartiani Hadrianus, 3,5,6, 17, 21, SC, II, 292,293
2) Gallieni dua, 4, 11, SC, II, 298-299
61. Livius, T., 1) Ab urbe condita libri, 25, 30, 31, 32, 33, SC, II, 44, 49
a. Periochae, 92, 95, 97, 98, 100, 101, 102, 113, 115, SC, II, 49-51
62. Ovidius Noso, 1) Heroides, 18, SC, II, 70
2) Epistole ex Ponto, I-IV, SC, II, 90-103
63. Plinius Secundus, Naturalis Historia, 2, 3, 4, 5, 6, 7, 8, 9, 10, 11, 16, 17, 18, 19, 21, 22, 25, 26, 27, 29, 31, 32, 33, 37, SC, II, 167-200
64. Pomponius Mela, De chronografia, 1, 2, 3, SC, II, 115-126
65. Septimius Florens Tertulianus, Ad mationes, libri duo, II, SC, II, 268
66. Tyranius Rufinus, Historia ecclesiastica, I, SC, II, 362-365
67. Valerius Catullus, Carmina, SC, II, 13
68. Valerius Flaccus, Argonavticon, 1, 4, 5, 6, 7, 8, SC, II, 201-214
69. Valerius Probus, Commentarius in Georgica, 1, 2, 3, SC, II, 25-26
70. Virgilius Maro, 1) Bucolica, 6, SC, II, 13
2) Georgica, 1, 2, 3, 4, 6, 8, 11, SC, II, 14-16
71. Vitruvius Pollic, De architectura, II, 1-4, SC, II, 42-43

ლიტერატურა

1. აფაქიძე ა., ბიჭვინთა, 1952 წლის საველე არქეოლოგიური კვლევადიების შედეგები, თეზისები, თბ., 1953.
2. აფაქიძე ა., შენიშენები Scithica et Caucasia-ს ახალი გამოცემის გამო, საქ. მუზ. მოამბე, XV-B, თბ., 1948.
3. აფაქიძე ა., ბაკურციხის არქეოლოგიური ძეგლები, თბ., 1940. (ხელნაწერი დისერტაციისა)
4. აფაქიძე ა., ანთიმონის წარმოების ისტორიისათვის საქართველოში, საქ. სახ. მუზეუმის მოამბე, XV-B, თბ. 1948.
5. აფაქიძე ა., არქეოლოგიური გათხრები საქართველოს უძველეს დედაქალაქში, „ბოლშევიკი“. 1945, №6.
6. აფაქიძე ა., ანტიკური წყაროების „სევსამორას“ ლოკალიზაციის საკითხისათვის, თეზისები, თბ., 1953.
7. ბარდაველიძე ვ., ხევსურული თემი.

8. ბერძენიშვილი ნ., ქართული საბჭოთა არქეოლოგიის ზოგიერთი პრინციპული საკითხისათვის, „მომხილველი“, II, თბ., 1951.
9. ბერძენიშვილი ნ., ჯანაშია ს., საქართველო ადრინდელი ფეოდალიზაციის გზაზე, „მომხილველი“, III, თბ., 1953.
10. ბერძენიშვილი ნ., ჯავახიშვილი ივ., ჯანაშია ს., საქართველოს ისტორია, I. თბ., 1948.
72. ბერძენიშვილი მ., ქალაქ ფაზისის დოკალიზაციისათვის, თსუ შრომები, XXIII, თბ., 1942.
73. ბიბლია, თბ., 1884.
74. გეგეშიძე მ., ბორბლის უძველესი სახეების საკითხისათვის, „მომხილველი“, II, თბ., 1951.
75. გობეჯიშვილი გ., არქეოლოგიური გათხრები საბჭოთა საქართველოში, თბ., 1952.
76. გობეჯიშვილი გ., ძველი ქართული სამთამადნო და მეტალურგიული წარმოების ნაშთები სოფ. დებთან, საქართველოს სსრ მეცნ. აკად. მოამბე, XIII, 3, თბ., 1952.
77. გობეჯიშვილი გ., სტალინირის ნაცარგორა, „მომხილველი“, II, თბ., 1951.
78. გობეჯიშვილი გ., მდ. რიონის სათავეებში 1952 წ. ჩატარებული არქეოლოგიური გათხრების შედეგები, თეზისები, თბ., 1953.
79. გოზალიშვილი გ., ბიზანტიასა და ირანს შორის ბრძოლა იბერიულაზიკისათვის VI საუკუნეში, თსუ შრომები, XXVI – ვ, თბ., 1944.
80. ვახუშტი, აღწერა სამეფოსა საქართველოსა, თბ., 1941.
81. ინაძე მ., ფლავიუს არიანე და მისი ცნობები საქართველოს შესახებ, თბ., 1953 (ხელნაბეჭდი).
82. ინგოროვეა პ., გიორგი მერჩულე, „მნათობი“, თბ., 1950, №3,4,7....
83. კაკაბაძე ს., ქართული სახელმწიფოებრიობის გენეზისის საკითხები, საისტორიო მოამბე, I, თბ., 1924.
84. კაპანაძე დ., ქართული ნუმიზმატიკა, თბ., 1950.
85. კილაძე ნ., ახალი ქვის ხანის ძეგლები თეთრამიწიდან, მასალები საქართველოსა და კავკასიის ისტორიისათვის, 29, თბ. 1951.
86. ლომთათიძე გ., არქეოლოგიური გათხრები საქართველოს ძველ დედაქალაქში, თბ., 1945.
87. ლომთათიძე გ., წინაპართა ნაკვალევი, თბ., 1952.
88. ლომთათიძე გ., ციციშვილი, ი., ახალადმოჩენილი აკლდამა მცხეთაში. საქართ. სსრ მეცნ. აკადემიის მოამბე. XII, 10, თბ., 1951.
89. ლომოური ნ., პტლემეაიოსის ცნობები საქართველოს შესახებ, თბ. 1952.
90. მარქსი კ., პოლიტიკური ეკონომიკის კრიტიკისათვის, თბ., 1952.
91. მარქსი კ., კაპიტალი, I, თბ. 1930. კაპიტალი, III₂ თბ., 1933.
92. მელიქიშვილი გ., ურარტუ, თბ., 1952.
93. მელიქიშვილი გ., უძველესი სამეფო სამხრეთ საქართველოს ტერიტორიაზე, „მომხილველი“, II, თბ., 1952.

94. მელიქიშვილი გ., ქაშქების ხალხის ეთნიკური ვინაობის საკითხისათვის, „მომომხილველი“, III, თბ., 1953.
95. მენაბდე ტ., საქართველოს ქერები, თბილისის ბოტანიკური ინსტიტუტის შრომები, VI, თბ., 1938
96. მიქელაძე თ., ქსენოფონტის „ანაბასისი“ და მისი ცნობები ქართული ტომების შესახებ, თბ., 1952 (ხელნაბეჭდი).
97. ნიორაძე გ., არქეოლოგიური გათხრები კოლხიდაში, ენიმკის მოამბე, X, თბ., 1941.
98. ნიორაძე გ., ზემო ავჭალის სამარე, საქართველოს სახ. მუზ. მოამბე, VII, თბ., 1931.
99. რამიშვილი მ., გურიის, აჭარისა და სამეგრელოს ვაზის ჯიშები, თბ., 1948.
100. რეხვიაშვილი ნ., მჭედლობა რაჭაში, თბ., 1953.
101. რობაქიძე აღ., მეფუტკრეობა გურიაში, მასალები საქართველოს ენთოგრაფიისათვის, V თბ., 1951.
102. რობაქიძე აღ., მეფუტკრეობასთან დაკავშირებული ერთი წეს-ჩვეულებების შესახებ, „მომომხილველი“, III, თბ., 1953.
103. სტალინი ი. ბ., დიალექტიკური და ისტორიული მატერიალიზმის შესახებ, ლენინიზმის საკითხები, XI, თბ. 1951.
104. სტალინი ი. ბ., სოციალიზმის ეკონომიკური პრობლემები სსრ კავშირში, თბ., 1953.
105. საბანისძე იოვანე, წამება აბო თბილელისა, ძველი ქართული ლიტერატურის ქრესტომატია, I, თბ., 1946.
106. სვანეთის საისტორიო ძეგლები, II, თბ., 1941.
107. სიჭინავა ვ., ძველი კოლხეთის კულტურის ისტორიიდან, შოთა რუსთაველის სახელობის ბათუმის სახელმწიფო პედაგოგიური ინსტიტუტის შრომები, III, 1954.
108. სუმბაძე ლ. კოლხური საცხოვრებელი სახლი ვიტრუვის მიხედვით, საქართველოს სსრ მეცნ. აკად. მოამბე, I, თბ., 1945.
109. ქართლის ცხოვრება, ანასეული ნუსხა, თბ., 1942.
110. ყაუხჩიშვილი ს., ბერძნული ლიტერატურის ისტორია, I, თბ., 1949.
111. ყაუხჩიშვილი ს., ბერძნული ლიტერატურის ისტორია, II, თბ., 1950.
112. ყაუხჩიშვილი ს., რიტორიკული განათლების ცენტრები ძველ კოლხეთში, საქართველოს სახ. მუზეუმის მოამბე, X-B, თბ., 1940.
113. ყაუხჩიშვილი ს., მისიმიანთა ტომი, თსუ შრომები, I, თბ., 1936.
114. ყაუხჩიშვილი თ., ბერძნული წარწერები საქართველოში, თბ., 1951.
115. ყაუხჩიშვილი თ., Γένος ტერმინის მნიშვნელობისათვის სტრაბონთან, „მომომხილველი“, III, თბ., 1953.
116. ჩიტაია გ., აკად. ს. ჯანაშია და ქართველი ხალხის წარმოშობის პრობლემა, „მომომხილველი“, I, თბ., 1949.
117. ჩიტაია გ., რაჭული სახენელი, ენიმკის მოამბე, I, თბ., 1937.
118. ჩიტაია გ., დასახლების ტიპი მთიულეთში, თეზისები, თბ., 1953.

119. ჩუბინიშვილი ტ., სოფ. გოგოლეისუბანში გვიანი ბრინჯაოს ხანის არქეოლოგიური კომპლექსის აღმოჩენის გამო, „მომომხილველი“, I, თბ., 1949.
120. ციციშვილი ი., მცხეთის ანტიკური კრამიტის შესწავლისათვის, საქართველოს სსრ მეცნ. აკად. „მოამბე“, IX, 8 თბ., 1951
121. წერეთელი გ., არმაზის ბილინგვა, ენიმკის მოამბე, XIII, თბ., 1943.
122. ხარაძე რ., დიდი ოჯახის გადმონაშთები სვანეთში, თბ., 1940.
123. ხოშტარია ნ., არქეოლოგიური გათხრები სოფ. ვანში 1947 წელს. „მომომხილველი“, I, თბ., 1949.
124. ხოშტარია ნ., დიხა გუძუბა, კოლხეთის დაბლობის ძველი მოსახლობა, საქართ. სსრ მეცნ. აკად. „მოამბე“, II, თბ., 1944.
125. ჯავახიშვილი ივ., ქართველი ერის ისტორია, I, თბ., 1951.
126. ჯავახიშვილი ივ., ქართული სამართლის ისტორია, I, თბ., 1928.
127. ჯავახიშვილი ივ., საქართველოს, კავკასიისა და ახლო აღმოსავლეთის ძირითადი ისტორიულ-ეთნოლოგიური პრობლემები, თბ., 1950.
128. ჯავახიშვილი ივ., საქართველოს ეკონომიური ისტორია, I, თბ., 1930.
129. ჯავახიშვილი ივ., საქართველოს ეკონომიური ისტორია, II, თბ., 1935.
130. ჯანაშია ს., ფეოდალური ურთიერთობის წარმოშობისათვის საქართველოში, შრ., II, თბ., 1952.
131. ჯანაშია ს., გვაროვნული წყობილება ქართველ ტომებში, შრომები, II, თბ., 1952.
132. ჯანაშია ს., თუბალ-თაბალი, ტიბარენი, იბერი, ენიმკის მოამბე, I, თბ., 1937.
133. ჯანაშია ს., ადრეული ფეოდალიზმი, შრ., II, თბ., 1952.
134. ჯანაშია ს., ბრძოლა მიწის ფეოდალური მითვისებისათვის საქართველოში, შრ., II, თბ., 1952.
135. ჯანაშია ს., უძველესი ეროვნული ცნობა ქართველთა პირველსაცხორისის შესახებ, შრ. II. თბ., 1952.
136. ჯანაშია ს., პარიადრი, სკიდასი, მოსხური მთები, შრ., II, თბ., 1952.
137. ჯანაშია ს., საქართველო ადრინდელი ფეოდალიზაციის გზაზე, შრ., I, თბ., 1949.
138. ჯანაშია ს., ფეოდალური რეოლუცია საქართველოში, შრ., II, თბ., 1949.
139. ჯანაშია ს., ეგრისის სამეფოს წარმოშობა, შრ., II, თბ., 1952.
140. ჯაფარიძე ო., კოლხური ცული, საქართ. სახ. მუზეუმის მოამბე, XVI-ვ, თბ., 1950.
141. ჯაფარიძე ო., მიწათმოქმედების იარაღები დასავლურ ქართულ კულტურაში, თ ს უ შრომები, 49, თბ., 1953.
142. Авдиев В., История Древнего Востока, М., 1953.
143. Адонц Н., Армения в эпоху Юстиниана, СПб., 1903.
144. Амираншвили Ш., История Грузинского искусства, М., 1950.
145. Апакидзе А., Гобеджишвили Г., Каландадзе А., Ломтатидзе Г., Против маровщины и космополитизма в Археологии Грузии. «Заря Востока», 1952, 19, VI (№144).
146. Бардавелидзе В., Земельные владения древнегрузинских святилищ, СЭ, 1949, №1.

147. Бузескул В., Открытия XIX и начала XX века в области истории древнего мира, 1, Восток, ПБ, 1923.
148. Бердзенишвили Н., Ломтатидзе Г., Новые раскопки в Мцхета, «Заря Востока», 1951, 5, VIII, №183.
149. Болдырев А., Боровск И., Военная техника, «Эллинистическая техника», М.-Л., 1948.
150. Болтунова А., Описание Иберии в «Географии» Страбона, XI, 3, 1-6, ВДИ, 1947, №4.
151. Болтунова А., Восстание Аникета, ВДИ, 1939, №2.
152. Гаидукевич В., Боспорское царство, М., 1949.
153. Голубцова Е., Северное Причерноморье и Рим на рубеже нашей эры, М., 1951.
154. Граков, Материалы по истории Скифии в греческих надписях, ВДИ, М., 1939, №3.
155. Деген-Ковалевский Б., Из истории железного производства Закавказья, ИГАИМК, 120, М.-Л., 1936.
156. Деилор Т., Путешествие в Лазистан и Армению, Тб., 1871.
157. Еремян С., Торговые пути Закавказья в эпоху Сасанидов по Т.Р., ВДИ, 1939, №1.
158. Зограф А., Распространение находок античных монет на Кавказе, Труды отдел. нумизм. Гос. Эрмитажа, Л., 1945.
159. Ивашенко М., Материалы к изучению культуры колхов, მასალები საქართველოსა და კავკასიის ისტორიისათვის, II, თბ., 1941.
160. Иессен А., К вопросу о древнейшей металлургии меди на Кавказе, ИГАИМК, 120, Л., 1935.
161. Иессен А., Древнейшая металлургия Кавказа и ее роль в Передней Азии (Доклады III международного конгресса по иранской истории и археологии), М.-Л., 1939.
162. Куфтин Б., Археологические раскопки в Триалети, Тб., 1941.
163. Куфтин Б., Материалы к археологии Колхиды, I, Тб., 1949.
164. Куфтин Б., Материалы к археологии Колхиды, II, Тб., 1950.
165. Латышев В., Известия древних писателей греческих и латинских о Скифии и Кавказе, I, I₂, I₃, II, II₂, СПб, 1893-1906.
166. Маркс К., Формы, предшествующие капиталистическому производству, ВДИ, 1940, №1.
167. Марр Н., Из поездки в Турецкий Лазистан, ИАН, СПб, 1910.
168. Максимова М., Геммы из некрополя Мцхета-Самтавро, საქართველოს მუზეუმის ბოძები, XVI, V, თბ., 1950.
169. Максимова М., Местное население юго-восточного Причерноморья по «Анабасису» Ксенофонта. Дрилы и Моссиники, ВДИ, 1951, №1.
170. Максимова М., Техника эллинистического производства, в сб-ке: «Эллинистическая техника», М.-Л., 1948.
171. Максимова М., О выходе хеттов на южный берег Черного моря, ВДИ, 1948, №4.
172. Манандян Я., О местоположении Caspia via и Caspia porta, Исторические записки, 25, Ереван, 1948.

173. Манандян Я., О торговле и городах Армении, Ереван, 1930.
174. Манандян Я., Заметки о феодальной войне Парфии и аршакидской Армении, Ереван, 1932.
175. Манандян Я., Цель и направление подготовлявшегося Нероном Кавказского похода, Вопросы истории, 1946, №7.
176. Манандян Я., О некоторых проблемах истории древней Армении и Закавказья, Ереван, 1944.
177. Машкин Н., Принципат Августа, М.-Л., 1949.
178. Медведев, Турция, М.-Л., 1946.
179. Меликишвили Г., Наири-Урарту, Тб., 1954.
180. Мшвениерадзе Д., Строительное дело в древней Грузии, Тб., 1952.
181. Менабде Т., Ботанико-систематические данные о хлебных злаках древней Колхиды, საქართველოს სსრ მეცნ. აკად. მოამბე, I, თბ., 1940.
182. Менабде Т., Пшеница Грузии, Тб., 1948.
183. Невская В., Византия в классическую и эллинистическую эпохи, М., 1953 (Причерноморье в античную эпоху, №4).
184. Осман-бей, Лазистан, ИРГО, X, 8, 1874.
185. Пахомов Е., Монетные клады Азербайджана и Закавказья, Труды общ. обл. и изуч. Азербайджана, Баку, 1927.
186. Пиотровский Б., История и культура Урарту, Ереван, 1944.
187. Ранович А., Эллинизм и ее историческая роль, М.-Л., 1950.
188. Ранович А., Восточные провинции Римской империи в I-III вв., М.-Л., 1949.
189. Робакидзе А., К вопросу о пчеловодстве в Грузии, КСИЭ, VIII, Тб., 1949.
190. Скуднова В., Находки колхидских монет и пифосов в Нимфее, ВДИ, 1952, №2.
191. Соловьев Д., Следы древнего соляного промысла близ г. Сухуми и г. Очамчири, Труды Абхазского Госуд. Музея, I, 1947.
192. Струве А., Надпись Ксеркса «О дэвах» и религиозные верования персов, ИАН, II, 3, 1944.
193. Тарн В., Эллинистическая цивилизация, М., 1949.
194. Тенцов В., Сванетия (географ. очерк), СМОМПК, X, Тб., 1890.
195. Турецко-русский словарь, М., 1931.
196. Услар П., Древнейшие сказания о Кавказе, ЗКОРГО, XII, Тб., 1881.
197. Успенский Ф., Очерки из истории Трапезунтской империи, Л., 1929.
198. Харадзе Р., Структура семейной общины в Картли, «Вопросы этнографии Кавказа», Тб., 1952.
199. Хаханов А., Древнейшие пределы расселения Грузин по Малой Азии, ЗКОРГО, XXII, 6, Тб., 1903.
200. Хоштария Н., Древнее поселение в Даблагоми, Тб., 1941 (рукопись).
201. Хоштария Н., Археологические разведки, მასალები საქართველოსა და კავკასიის ისტორიისათვის, II, თბ., 1941.
202. Церетели Г., Армазская Билингва, Тб., 1941.
203. Церетели Г., Эпиграфические находки в Мцхета, ВДИ, 1948, №2.
204. Церетели Г., Армазское письмо и проблема происхождения грузинского алфавита, «Эпиграфика Востока», II, 1948, III, 1949.

205. Цицишвили И., Гробница античного времени в Багинети, საქართველოს სსრ მეცნ. აკად. მოამბე, XI, 3, თბ., 1951.
206. Читая Г., Земледельческие системы и пахотные орудия Грузии, «Вопросы этнографии Кавказа», Тб., 1952.
207. Читая Г., К вопросу о происхождении абхазского пахатного орудия, «Вопросы этнографии Кавказа», Тб., 1952.

გამომცემლობის დირექტორი
ნანა ხახუტაიშვილი

გამომცემლობის რედაქტორი – ლალი კონცელიძე
ტექნიკური რედაქტორი – ედუარდ ანანიძე

სელმოწერილია დასაბეჭდად 22.05.2009
ქაღალდის ზომა 70X108 1/16
ფიზიკური თაბახი 11.5
ტირაჟი 100

შპსი სახელმწიფო

დაბეჭდა უნივერსიტეტის სტამბაში

ქ. ბათუმი, ნინოშვილის 35.